

সাহিত্য-বিভাগ

শ্রীমোহিতলাল মজুমদার

প্রণীত



বঙ্গভারতী প্রকাশন

২২১, কর্ণওয়ালিস স্ট্রীট

কলিকাতা

—প্রকাশক—

শ্রীশ্যামসুন্দর মাইত্রি, এম. এ., বি. এল.

গণেশপুর গ্রাম ; অমরদহ পোঃ ; হাওড়া জেলা ।

মূল্য  টাকা

—মুদ্রাকর—

শ্রীত্রিদিবেশ বসু, বি. এ.

কে. পি. বসু প্রিন্টিং ওয়ার্কস্

১১নং মহেন্দ্র গোস্বামী লেন, কলিকাতা

সাহিত্যিক ও সাহিত্য-প্রেমিক
স্বর্গত দুঃশেখর বন্দ্যোপাধ্যায়
স্মরণে—

সূচী

মুখবন্ধ	১/০
সাহিত্য-বিচার	১
বাঙালী ও বাংলা সাহিত্য	৩০
জাতির ভাষা ও জাতির সাহিত্য	৪৪
সাহিত্যিক বিজ্ঞানসাগর	৫৫
বঙ্কিম-প্রতিভার একটি বৈশিষ্ট্য	৬৪
বঙ্কিম-সাহিত্যের রস-বিচার	৭৫
মৃত্যুর আলোকে রবীন্দ্রনাথ	৮৭
রবীন্দ্রনাথের গল্প-কবিতা	১০৬
রবীন্দ্র-কাব্যের কবিপুরুষ	১১৮
বাংলার রবীন্দ্রনাথ	১৩৬
কবি করুণানিধানের কবিতা	১৪৪
রবীন্দ্র মৈত্র	১৬৫
অতি-আধুনিক বাংলা কবিতা	১৭৮
বাংলার প্রগতিবাদী সাহিত্যিক	১৮৭
ছঃখের স্বরূপ	২০২
হাস্যরস ও হিউমার	২১০
'রডোডেনড্রন-গুচ্ছ'	২১৭
সাহিত্য-সেবা ও সাহিত্যের ব্যবসায়	২২৭
সাহিত্য ও যুগধর্ম	২৩৮
সাহিত্যের আসর : কবি ও কাব্য	২৫৩
বর্তমান বাংলা সাহিত্য	২৭২

“ মুখবন্ধ ”

যে প্রবন্ধগুলিকে গ্রন্থাকারে একত্র করিয়া ‘সাহিত্য-বিতান’ নাম দিয়াছি, তাহাদের পরিচয় ঐ নামটির মধ্যেই আছে, সাহিত্যের ‘মণ্ডপ’ বা ‘আসর’ বলিতে যাহা বুঝায় এই গ্রন্থে তাহারই ভাব রক্ষা করিয়াছি। পাঠকগণ ইহাতে সাহিত্যবিষয়ক, বিশেষতঃ বাংলাসাহিত্য সম্বন্ধে, নানাবিধ আলোচনা—বৈঠকী আলাপও পাইবেন। ইতিপূর্বে ‘সাহিত্য-কথা’-নামক গ্রন্থে আমি মুখ্যতঃ সাহিত্যের তত্ত্বটুকু আলোচনা করিয়াছিলাম—সেখানে বিশেষ অপেক্ষা নির্বিশেষের দিকেই দৃষ্টি ছিল ; এই গ্রন্থে আমি—সাহিত্যের শুধুই তত্ত্ব নয়—নানাবিধ সৃষ্টিকর্মের সাক্ষাৎ রস-সন্ধান এবং কবি ও সাহিত্যিকের ব্যক্তিগত প্রতিভার পরিচয়ও করিয়াছি। ইংরাজীতে এইরূপ বহু প্রবন্ধপুস্তক আছে—Appreciations, Discoveries, Countries of the Mind প্রভৃতি নাম অনেকে স্মরণ করিবেন। এই হিসাবে ‘সাহিত্য-বিতান’কে ‘সাহিত্য-কথা’রই উত্তরভাগ বলা যাইতে পারে। সেই যোগ রক্ষা হইয়াছে ইহার প্রথম প্রবন্ধটিতে। এই প্রবন্ধে আমি সাহিত্যবিচারের মূলতত্ত্ব আর একবার সংক্ষেপে ও বিশদভাবে ব্যাখ্যা করিবার উদ্দেশ্য করিয়াছি—ইহাই পরবর্তী আলাপ-আলোচনার মানদণ্ড।

এই প্রথম প্রবন্ধটির সম্বন্ধে আমার আরও কিছু বলিবার আছে। আধুনিক কালে, যুরোপীয় মনীষীসমাজে—অপর সকল বিজ্ঞান মত, এই সাহিত্য-বিজ্ঞানও অনেকদূর অগ্রসর হইয়াছে ; সাহিত্য-সমালোচনা একটি বড় জিজ্ঞাসার বিষয় হইয়াছে। আমাদের দেশেও জ্ঞান-বিজ্ঞানের সাধনা যখন জাতীয়-জীবনের মতই শক্তি ও স্বাস্থ্যযুক্ত ছিল, তখন এই বিজ্ঞান বিশেষ অনুশীলন হইয়াছিল—সংস্কৃত অলঙ্কারশাস্ত্রের সুদীর্ঘ ইতিহাস তাহার প্রমাণ। কিন্তু প্রাচীনের দৃষ্টি ও আধুনিকের দৃষ্টিতে প্রভেদ আছে, ও তাহা অবশ্যস্বামী ; এজন্য ইংরাজীতে যাহাকে—‘Modern Study of Literature’ বলা হয় তাহার বিশেষ প্রয়োজন আছে। বস্তুতঃ জীবনের আর সকল ব্যাপারের মত সাহিত্যের সৃষ্টি ও তাহার রসান্বাদেও নূতনতর আদর্শ ও নূতনতর রুচির উদ্ভব হইয়াছে—মানুষের দৃষ্টিভঙ্গির পরিবর্তন হইয়াছে। এই কারণেই, সেই এক প্রাকৃতিক শোভা ও এক মনুষ্য-সমাজ যেমন আফ্রিকার কবি-শিল্পীর প্রাণ-মনকে জ্বলন্তভাবে স্পর্শ করে, তেমনই কাব্যেরও রসান্বাদনে অতিব পিপাসা ও অতিব বোধ-বৃদ্ধির উন্মেষ হইয়াছে, সেজন্য সেই পুরাতন প্রণালীতে কাব্য-বিচার আর যথোপযুক্ত হইতেছে না। আমাদের দেশে এই নূতন বা আধুনিক বিচার-পদ্ধতি এখনও প্রতিষ্ঠিত হয় নাই ; অথচ, আধুনিক কবি-প্রবৃত্তি বলিতে যাহা বুঝায়, যুগকর্মের বশে ও যুরোপীয় সাহিত্যের প্রভাবে, তাহা এক্ষণে প্রায় পূর্ণপ্রতিষ্ঠিত হইয়াছে। যাহারা রক্ষণশীল তাহারা ‘চিত্রকলা’র ‘ইতিহাস আর্ট’র মত, কাব্যকলাতেও সেই প্রাচীন আদর্শ রক্ষা করিতে না পারিলেও—কাব্যসমালোচনার ভারতীয় রস-সংস্কার ও তদনুযায়ী বিচার-পদ্ধতির পক্ষপাতী। এই অসঙ্গতির ফলেই আমাদের দেশে সাহিত্য-সমালোচনার কোন আদর্শ বা পদ্ধতি এ পর্যন্ত নিরূপিত হয় নাই। এক্ষণে এমন একটি তত্ত্বকে ও এমন একটি আদর্শকে দৃঢ়রূপে স্থাপনা করিতে হইবে যাহার সাহায্যে সর্বকালের সকল কাব্য ও সর্ববিধ কবি-মানসকে একই প্রমাণে প্রমাণিত করা সম্ভব হয়। আমাদের দেশের দুই একজন আধুনিক কাব্যসমালোচক একরূপ নূতন মাপকাঠির আবশ্যকতা স্বীকার করেন না—সেই প্রাচীন

অলঙ্কার শাস্ত্রের যোগ্যতা সম্বন্ধে তাঁহাদের সংশয়মাত্র নাই; অথচ, সে বিচার মুখ্যতঃ রস-বিচার—কাব্যের রূপ-বিচার নয়। এখানে এবিষয়ে আর কিছু বলিব না, যথাস্থানে আমি সে আলোচনা করিয়াছি। যুরোপীয় কাব্যবিচারে এই রূপের তত্ত্ব বড় হইয়া উঠিয়াছে—বিশেষের সেই যে রূপ-ভঙ্গি তাহাই আধুনিক সাহিত্যবিচারের 'ষ্টাইল-তত্ত্ব'। আমি এ বিষয়েও বিস্তৃত আলোচনা অশক্ত করিয়াছি। কিন্তু বর্তমান প্রবন্ধে আমি একটি নূতন তত্ত্ব-প্রতিষ্ঠার দুঃসাহস করিয়াছি; আমি খাঁটি আর্ট ও খাঁটি কাব্যশৃঙ্গার মধ্যে একটা স্পষ্ট ভেদ নির্দেশ করিয়াছি—এ দুঃসাহস এ পর্য্যন্ত কেহ করেন নাই। তত্ত্বহিসাবে ইহাতে যে দোষই থাকুক—আমার বিশ্বাস, নিছক আর্টকর্মকে কবিকর্ম হইতে পৃথক না রাখিলে কাব্যবিচার সমস্তাজটিল হইয়া পড়ে; যে রূপ-কর্মকে আমরা বাণীরচনা বলি, এবং যাহার উৎকৃষ্ট নিদর্শনগুলিতে জীবন ও জগতের বিশিষ্ট রূপকেই রসোচ্ছল হইতে দেখি—তাহার মূল্য ও কাব্যের সেই বিশেষ অধিকারটিকে অগ্রাহ্য করিতে হয়। এ সম্বন্ধে এখানে ইহার অধিক বলিবার প্রয়োজন নাই, আমি কেবল এই প্রথম প্রবন্ধের প্রতি সকল সাহিত্যজ্ঞানী পণ্ডিতের দৃষ্টি আকর্ষণ করিতেছি।

'সাহিত্যের আসর' নামক প্রবন্ধটিতে সাহিত্য-বিচারের কয়েকটি মূলতত্ত্ব একটু সরল ও সহজ ভঙ্গিতে আর একদিক দিয়া ব্যাখ্যা করিবার প্রয়াস পাইয়াছি; অতএব এই প্রবন্ধটিও প্রথম প্রবন্ধের সহিত পড়িতে বলি। বাকি প্রবন্ধগুলিতে আমি অধিকাংশস্থলে তত্ত্ব-বিচার নয়—রস-নির্ণয় করিয়াছি; ইহাই এ গ্রন্থের মুখ্য অভিপ্রায়, এ কথা পূর্বে বলিয়াছি। এতদ্বন্দ্বেষ্টে কোথাও কবি-মানস বা কবিচরিত্র—কোথাও বা কাব্যরচনার বৈশিষ্ট্য প্রদর্শন করিয়াছি; কোন কোন রচনায় (যেমন 'রডোডেনড্রন গুচ্ছ' ও 'দুঃখের স্বরূপ') আমি কবি ও কাব্যকে মুখ্য না করিয়া আমার নিজেরই চিন্তা ও ভাবকল্পনাকে সাহিত্যের আকারে প্রকাশ করিয়াছি, তাহাও সাহিত্যবিচারের বহির্ভূত নয়।

সর্বশেষে, এই 'সাহিত্য বিতান' সম্বন্ধে আমার একটা কৈফিয়ৎও আছে। ইহার কয়েকটি প্রবন্ধে যে ধরণের আলোচনা আছে—তাহা সাহিত্যের আসরে সমবেত শ্রোতৃবর্গের তাদৃশ প্রতিরোধক হইবে না, বরং কিঞ্চিৎ কটু বলিয়াই মনে হইতে পারে। তথাপি, আমি এইরূপ বিপরীত প্রসঙ্গ উত্থাপন করিয়াছি এইজন্য যে, রসের স্বরূপ বুঝিবার পক্ষে বিরূপের পরিচয়ও প্রয়োজন—বরং যে বস্তুকে সহজে যুক্তি বা বাক্যার্থের দ্বারা নির্দেশ করা যায় না—তাহাকে নেতি-মুখে প্রমাণ করারও যে রীতি আছে তাহা নিন্দনীয় নয়। আমি কোন প্রবন্ধগুলির কথা বলিতেছি তাহা এই গ্রন্থপাঠকালে সকলেই বুঝিতে পারিবেন; কিন্তু পাঠকালে তাঁহারা যেন ইহাও লক্ষ্য করেন যে, সেগুলিতে আমি ব্যক্তিকে আক্রমণ করি নাই—তাঁহাদের সাহিত্যিক প্রবৃত্তি বা রুচিরই দোষ দর্শন করিয়াছি। এ দোষ এ যুগের শ্রেষ্ঠ কবি ও শিল্পীর পক্ষেও সম্ভব হইয়াছে—তাহাতে প্রমাণ হয়, যুগ-প্রভাব হইতে ব্রহ্মা বিষ্ণুরও নিস্তার নাই। এইজন্য সাহিত্যের রস-সন্ধান এ গ্রন্থের মুখ্য অভিপ্রায় হইলেও, আমি ইহাতে এ যুগের বাংলাসাহিত্যের দুর্বলতা ও তাহার কারণ আলোচনা করিতে বাধ্য হইয়াছি; এবং জাতির সহিত জাতীয়-সাহিত্য ও জাতির ভাষার সম্পর্কসম্বন্ধেও কয়েকটি আলোচনা ইহাতে সন্নিবিষ্ট করিয়াছি; 'সাহিত্য বিতান' বা সাহিত্যের আসরে সাহিত্যবিষয়ক কোন আলাপই অপ্রাসঙ্গিক নয়।

এই দারুণ দুর্দিনে এ ধরণের পুস্তক প্রকাশ করিয়া 'বঙ্গভারতী গ্রন্থালয়' যে দাব্বিক শ্রদ্ধা ও সং-সাহসের পরিচয় দিয়াছেন তাহা বাংলাসাহিত্যের পক্ষে আশাশ্রিত। সাহিত্যের বাবদায়ী

যাঁহারা তাঁহাদের নিকটে ইহা মৎ-সাহস নয়—দুঃসাহস ; বাজারের বর্তমান অবস্থায় ত দূরের কথা—
অল্প সময়েও গল্প-উপন্যাস এবং স্কুলপাঠ্য পুস্তক ছাড়া আর কিছুতে মূলধন নিয়োগ করা আমাদের
দেশের পুস্তকব্যবসায়ীগণের কার্য্য নহে । সাহিত্যের প্রকাশ বা প্রচার নয়—পুস্তক বিক্রয়ই যাঁহাদের
ব্যবসায়, তাঁহাদের পক্ষে এইরূপ গ্রন্থপ্রকাশের আশ্রয় না হওয়াই সম্ভব । সাহিত্যের সেবা ও
ব্যবসায় সম্বন্ধে এই গ্রন্থেরই একস্থানে আমি বাহা লিখিয়াছি—‘বঙ্গভারতী গ্রন্থালয়ে’র এই উক্তম যদি
তাহারই সূচনা হয়, তবে, আশা করি বর্তমান অবস্থার পরিবর্তন ঘটিলে এই ‘গ্রন্থালয়’ সাহিত্যের
ব্যবসায়কে মৎ-সাহিত্যের প্রচারমূলক সেবার সহিত যুক্ত করিয়া বাংলাসাহিত্যের একটা বড় কল্যাণ
সাধন করিবেন—জাতির কৃতজ্ঞতাভাজন হইবেন ।

‘বঙ্গভারতী গ্রন্থালয়ে’র সেই ব্রতধারী তরুণ ব্যবসায়ীকে আমি অন্তরের সহিত আশীর্বাদ
করিতেছি ।

নীলক্ষেত, রমনা,
আশ্বিন, ১৩৪২

}

গ্রন্থকার

সাহিত্য-বিচার

১

যাহারা সাহিত্যের স্রষ্টা, তাঁহাদের কাজ ঐ সৃষ্টিকার্যেই সমাপ্ত হয়, প্রতিভার কোন জবাবদিহি নাই। সকল সৃষ্টির আদিস্রষ্টা ভগবানেরও—সৃষ্টিই একমাত্র সাক্ষ্য, তাহার অতিরিক্ত কিছু তিনিও বলিতে বাধ্য নহেন। কিন্তু সেই সৃষ্টির অর্থ, মানুষকে আপনার জ্ঞানে বুঝিয়া লইতে হয়। কবি ও ঋষি, বিজ্ঞানী ও দার্শনিক, কতরূপে তাহার কত ব্যাখ্যাই করিতেছেন; কিন্তু এই সকলের মধ্যে কবিই শ্রেষ্ঠ ব্যাখ্যাকার, কারণ তিনি সৃষ্টির ব্যাখ্যা আর এক সৃষ্টির দ্বারাই করেন—ভাগবতী প্রেরণাকে অনুসরণ করিয়া সেই সৃষ্টির রসরূপ আমাদের চিত্তগোচর করেন। অতএব কবি ভগবানের পরেই দ্বিতীয় স্রষ্টা। তাঁহার সৃষ্টিরও ব্যাখ্যার প্রয়োজন হয়, তাহারই নাম সাহিত্যসমালোচনা। কারণ, যাহাকে সমালোচনা বলা হয়, তাহা আসলে ব্যাখ্যা মাত্র, কবির সৃষ্টিকে ভাল করিয়া আমাদের চিত্তে ধরাইয়া দেওয়াই তাহার অভিপ্রায়। আমি এ বিষয়ে ইতিপূর্বে নানা প্রসঙ্গে যে সকল আলোচনা করিয়াছি, এই প্রবন্ধে তাহাই একটা সংক্ষিপ্ত অথচ সম্পূর্ণ আকারে উপস্থাপিত করিতে চেষ্টা করিব; সাহিত্য-বিচারের কয়েকটি মূল তত্ত্ব যতদূর সম্ভব সুস্পষ্ট ও সুনিরূপিত করাই আমার অভিপ্রায়।

প্রথমেই, সাহিত্য কি—অন্তত আমার আলোচনার বিষয়ীভূত যে সাহিত্য, তাহার একটা সংজ্ঞা নির্দেশ করা প্রয়োজন। যদি বলা যায়, মানুষ তাহার ভাষায় যাহা কিছু রচনা করে তাহাই সাহিত্য, তবে সাহিত্য-বস্তুটির কোন বিশেষ ধারণাই হইল না; কারণ, ভাষা মানেই সাহিত্যের ভাষা নয়, এবং রচনা-

শব্দটিও অতি ব্যাপক ও সাধারণ অর্থে ব্যবহার হইয়া থাকে। অতএব এই সংজ্ঞাই মানিয়া লইতে হইলে, ভাষা ও রচনা—এই দুইটি শব্দের উপরে জোর দিতে হইবে। রচনা মুখে মুখেও করা যায়, কিন্তু সাহিত্যের ভাষা যেমন কণ্ঠনিঃসৃত বাক্যাবলীই নয় তেমনই, তাহার রচনাও কথোপকথন মাত্র—এমন কি, বক্তৃতাও নয়। যে রচনায় কেবল মস্তিষ্কজাত বিচার অনুশীলন বা যুক্তিপ্রণোদিত তত্ত্বের বিচারণা আছে, যাহাতে সৃষ্টির বস্তুঘটিত ব্যাখ্যা ও বিশ্লেষণ আছে, তাহা খাঁটি সাহিত্য বা কাব্য-সৃষ্টি নহে; তাহা জিজ্ঞাসা, মীমাংসা ও আলোচনা মাত্র। সাহিত্যের রচনা বলিতে একরূপ সৃষ্টিই বুঝায়; বাক্য যদিও এইরূপ সৃষ্টির উপাদান, তথাপি এখানে তাহা কিছুকে নির্দেশ বা জ্ঞাপন করে না; একটা রূপকে প্রকাশ করে—মূর্ত্তি নির্মাণ করে। ভাস্কর ও চিত্রকর ভিন্ন উপাদানে যেমন একটা কিছু গড়িয়া তোলে—আমাদের ইন্দ্রিয়গোচর করে, সাহিত্যস্রষ্টা কবিও তেমনই এক আশ্চর্য্য উপায়ে, বাক্যেরই সাহায্যে, একটা কিছুকে আমাদের অন্তঃস্বপ্নের গোচর করেন, বাহিরের রূপকে অন্তরে রূপময় করিয়া তোলেন। এই যে বাস্তবী রচনা—ইহা কোন তথ্য, ভাব বা চিন্তার ব্যাখ্যা, বিবৃতি বা নির্দেশ নয়; ইহাতে বক্তৃতা নাই, তর্ক নাই, যুক্তিপ্রয়োগ নাই; কিন্তু তাই বলিয়া ইহা অনির্বাচনীয় কোন অনুভূতির আধারও নহে। আমাদের অলঙ্কারশাস্ত্রে যাহাকে রস বলে, সেই ‘ব্রহ্মান্বাদ-সহোদর’ একটি চেতনার উদ্বেকই ইহার সার-মর্ম্ম নয়; একটা অতিশয় অপার্থিব, অতীন্দ্রিয় নিরূপাধি কিছুই ইন্দ্রিত বা উদ্বোধন সাহিত্যের অভিপ্রায় নয়। ভগবানের সৃষ্টি এই বিশ্ব যেমন বস্তুতেই প্রকাশমান, ভাব যেমন সর্বত্র রূপ পাইয়াছে, এবং এই রূপকেই আমরা সৃষ্টি বলিয়া থাকি, তেমনই সাহিত্যের সৃষ্টিও রূপময়; বাক্যে এই রূপ দেওয়াকেই আমরা রচনা বলিব। বাক্যে রচিত আর যাহা কিছু—তাহাতে রূপ নাই, কেবল কথা আছে, এবং কথারও অর্থ আছে; সেখানে সকলই পরোক্ষ—চিন্তার ব্যবধান থাকায় কিছুই রূপে প্রকাশ পায় না। অতএব সাহিত্য বলিতে যদি কেবল ভাষাগত রচনা বুঝিতে হয়, তবে রচনা-কথাটির এই বিশেষ অর্থ করিতে হইবে। আমি এখানে সাহিত্য অর্থে সেই রচনার কথাই বলিতেছি।

কথাটা আর একবার বুঝিয়া লওয়া যাক—সেই সঙ্গে সাহিত্যের সম্পর্কে ভাষা কি বস্তু, তাহার ধারণাও স্পষ্ট করিয়া লই। ভগবানের সৃষ্টি—যেমন,

কোনও প্রাকৃতিক দৃশ্য—কথা বলে না, রূপে প্রকাশ হয় মাত্র ; তাহার ভাষা সেই রূপই ; যাহার দৃষ্টিশক্তি আছে, তিনি সেই রূপকেই দেখেন, আর কিছুই প্রয়োজন হয় না, আমাদের চিত্তে প্রকাশ হইতে পারাই তাহার সার্থকতা । সাহিত্যও এই প্রকার রূপ-সৃষ্টি ; ওখানে যেমন রঙ, রেখা ও আকার প্রভৃতির সাহায্যে একটা কিছু প্রকাশ পাইয়া থাকে, এখানেও তেমনই বাক্যই সেই রূপসৃষ্টির নিদান ; বাক্য কিছু বলে না, সেই রূপকে আমাদের দৃষ্টিগোচর করে । অতএব, বাক্য এখানে একটা অসাধারণ কার্য্য করিয়া থাকে ; ভাব ও অর্থের নির্দেশই যাহার উৎপত্তির মূলে—ব্যাখ্যা, বিবৃতি ও সংবাদ-জ্ঞাপনই যাহার সাধারণ কর্ম্ম, তাহার দ্বারা বস্তুকে একবারে সাক্ষাৎ দৃষ্টিগোচর করাইতে হয় । একটি সামান্য উদাহরণ দিলেই সাহিত্যসৃষ্টিতে ভাষার এই প্রকৃতি-পরিবর্তনের আভাস পাওয়া যাইবে । সভামধ্যে সহসা কোনও মহিমময় পুরুষমূর্ত্তির আবির্ভাব আমাদের দৃষ্টিগোচর করাইবার জগ্য কবি লিখিলেন—“পর্বতের চূড়া যেন সহসা প্রকাশ” ; ইহাতে প্রত্যক্ষ-দর্শনের ফল হইল । অবশ্য ঐরূপ পর্বতচূড়া-দর্শনের ঘটনা যাহার জীবনে ঘটিয়াছে, অথবা যিনি কল্পনায় সেই অবস্থা অনুভব করিতে পারেন, তিনিই এই ভাষাকে দৃশ্যরূপে উপলব্ধি করিবেন । এ ভাষা বিবরণ বা বিজ্ঞাপনমূলক নয়, ইহা প্রদর্শনমূলক । এখানে একটি উপমায় যাহা সাধিত হইয়াছে, তাহাই নানা স্থানে, নানা উপায়ে সাধিত হয় ; এবং বাক্যের কি বিচিত্র ও অসীম শক্তি, কবিদিগের ভাষায় তাহার অফুরন্ত নিদর্শন আমরা পাইয়া থাকি ।

অতএব এই যে ভাষার সাহায্যে রূপসৃষ্টি—এই তত্ত্ব সাহিত্যপরিচয়ের একটা বড় তত্ত্ব । বাংলা ‘রূপ’ কথাটির প্রচলিত অর্থ যাহা, তাহা হইতে এই অর্থ যে ভিন্ন, তাহাও লক্ষ্য করিতে হইবে । প্রথমত, ভাবের যাহা বিপরীত তাহাই রূপ ; ভাব একটা মানস-বস্তু বা মানস-ক্রিয়ার ফল ; একটা আইডিয়া, ধারণা বা ক্রিয়াকেও ভাব বলিব ; ইহা মনেই উৎপন্ন হইয়া বাহিরের জগতে আরোপিত,— অথবা বাহিরের জগতের সংস্পর্শে মনের মধ্যে উদ্ভিক্ত হয় ; ইহার কোন রূপ নাই । আর একজাতীয় ভাব আছে, তাহা মানুষের আর এক প্রকার অন্তঃকরণ-প্রবৃত্তির ফল ; সে একটি পৃথক প্রবৃত্তি, তাহাকে রস-প্রবৃত্তি বা আনন্দ-পিপাসা বলা যাইতে পারে । ইহাও দুইমুখী—অন্তমুখী, বা নিছক ভাবমার্গী ; এবং

বহির্মুখী, বা জগৎ ও জীবনের বস্তুগত অস্তিত্বের আশ্রয়কারী। এই শেযোক্ত প্রবৃত্তি কখনও abstract বা সম্পূর্ণ মনোগত বিষয়ে আসক্ত হইতে পারে না, ইহা নিরন্তর বস্তু-রূপের কামনা করে। এই প্রবৃত্তির বশেই মানুষের চিন্তে সৃষ্টি-প্রেরণা জাগে, বাহিরের সৃষ্টিকে—বিধাতার বস্তুময়, ঘটনাময়, দৃশ্যময় রচনাকে—তাহারই স্বকীয় ছন্দ, রঙ ও রেখায়, একটা অপূর্ব অর্থসম্বিতরূপে আবিষ্কার করে। এই যে আবিষ্কার, ইহাই গভীরতর অর্থে রূপসৃষ্টি; এখানে রূপকথাটির অর্থ আরও সূক্ষ্ম হইয়া উঠিল। কবি-বিধাতার হস্তলিপি-রচিত যে কাব্য প্রত্যক্ষ দৃশ্যরূপে সম্মুখে উদ্ঘাটিত রহিয়াছে, তাহারই অক্ষরে অক্ষরে দাগা বুলাইয়া, তাহার অন্তর্নিহিত ভাবকে—ভাবনা করিয়া নয়, মনুষ্যচেতনার অধিগম্য তাহার যে রূপ, তাহাই দৃষ্টিগোচর করিয়া—বাক্যের পটবস্ত্রে তাহাকে দৃশ্যরূপে স্থাপন করাই উৎকৃষ্ট কবিকীর্তি; তাহাকেই আমি খাঁটি সাহিত্যসৃষ্টি বলিয়াছি। এই প্রসঙ্গে, ভাব ও রূপের পার্থক্য-বিচারে, আমি উপরে অন্তঃকরণ-প্রবৃত্তির যে ভেদ নির্দেশ করিয়াছি, তাহা মনে রাখিতে হইবে; ইহাও বলিয়া রাখা প্রয়োজন যে, মনোবৃত্তি ও রস-প্রবৃত্তি দুইটি স্বতন্ত্র বৃত্তি হইলেও, সাহিত্যসৃষ্টিতে এই দুই বৃত্তির মিশ্রণ বা বৃত্তিসঙ্কর এমনভাবে হইয়া থাকে—অনেক সময়ে তাহা এত গূঢ় ও প্রচ্ছন্ন থাকে যে, সাহিত্যবিচারে ভ্রম-প্রমাদ প্রায়ই অনিবার্য হইয়া উঠে। তথাপি আশা করি, সাহিত্যের স্বরূপ নির্ণয় করা দুঃসাধ্য হইবে না।

২

এ পর্যন্ত যে আলোচনা করিয়াছি, তাহার পর, খাঁটি সাহিত্যরচনা কি, সে বিষয়ে আর একটু স্পষ্ট ধারণা করিবার সুবিধা হইবে। পূর্বে আমি এক স্থানে বলিয়াছি, সাহিত্যসৃষ্টি চিত্র বা ভাস্কর্যের মতই একটা রচনাকার্য্য। গল্পেই হউক আর পল্পেই হউক, এইরূপ রচনাকে সাধারণভাবে কাব্য বলা যাইতে পারে; অর্থাৎ নাটক, উপন্যাস, গল্প, কবিতা—সকল সৃষ্টিধর্মী রচনাকেই কাব্যজাতীয় সাহিত্য বলিতে হইবে। যেহেতু এ সকলই এক অর্থে রূপ-সৃষ্টি, অতএব ইহাও অগ্রাণ্ড শিল্পকলার মত একটা শিল্পকর্ম বলিয়াই সহসা মনে হইবে। কিন্তু খাঁটি সাহিত্যসৃষ্টির লক্ষণ বিচার করিলে দেখা যাইবে, ইহা ঠিক আর্ট বা কলাকীর্তি নহে; তাহা হইতে ভিন্ন, অথবা শ্রেষ্ঠ। সঙ্গীতও একটি কলা, সুর-রচনার

সাহায্যে ভাবোদ্বেক করাই তাহার অভিপ্রায় ; কিন্তু সে ভাব যতই গভীর বা মর্মান্তস্পর্শী, কিংবা চিদ্বন আনন্দের উদ্বেককারী হউক, তাহা রূপাত্মক নয় ; জগৎ ও জীবনের সাক্ষাৎ সংস্পর্শ তাহাতে নাই । চিত্র ও ভাস্কর্য্যও দুই বিভিন্ন কলা ; ইহাদেরও আদি-আদর্শ সঙ্গীত ; অর্থাৎ ইহারা বস্তুর রূপ বা রঙ-রেখা ও আকার প্রভৃতির সাহায্যে অভিব্যক্ত হইলেও, রূপ-কে রূপকে পৌছাইতে না পারিলে— বিশেষের সাহায্যে নির্বিশেষের ব্যঞ্জনা, সকল উপাদানের সাহায্যে একটা সঙ্গীত-সঙ্গতির রসাবেশ উদ্বেক করিতে না পারিলে—তাহা উচ্চানের কর্ম বলিয়া গণ্য হয় না । কিন্তু উৎকৃষ্ট সাহিত্যসৃষ্টিতে এইরূপ ভাবাবস্থা মাত্র উদ্বেক করিবার নৈপুণ্য থাকিলেই চলিবে না, তাহাতে জীবন ও জগৎঘটিত একটা সাক্ষাৎ উপলব্ধি—ভাবে নয়, রূপসম্বিত হইয়া বিদ্যমান থাকা চাই ; অর্থাৎ, জীবন ও জগতের একটা সাক্ষাৎ পরিচয় সেই ভাবাবস্থাতেও আমাদের চৈতন্যগোচর হওয়া চাই । ইহাতে আর্টের নৈপুণ্য যতই থাকুক, বাস্তবসৃষ্টির রহস্যবোধ—প্রত্যক্ষ প্রকাশমান রূপেরই একটা নিবিড় চেতনা যদি লুপ্ত হয়, তবে তাহা উৎকৃষ্ট সাহিত্য-পদবাচ্য নয় । যে রচনায় ভাব বহিমুখী না হইয়া একেবারে অন্তর্মুখী হইতে চায়, যাহাতে জীবন ও জগৎ কোন এক দিক দিয়া খণ্ড-ভাবে একটা বিচিত্র অন্তর-অনুভূতির symbol বা প্রতীক হইয়াছে দেখা যায়, তাহা আর্ট মাত্র—বা ছোট আর্ট ; সাহিত্য যে আর্ট, তাহা আরও উচ্চ, আরও বড় । সেই সকল অপর আর্ট আত্মসর্কস্ব ; তাহা ব্যক্তির ব্যক্তিগত ধ্যান-কল্পনাকে প্রকাশ করে, সার্বজনীন চেতনা, বা জীবনের বস্তুগত সমগ্ররূপ তাহার লক্ষ্য নয় । যাহা আর্ট মাত্র, তাহা ইন্দ্রিয়ানুভূতিকে ইন্দ্রিয়ের বিষয় হইতে বিচ্ছিন্ন করিয়া তাহাকে একটা মানস-স্বপ্নমা দান করে ; বস্তু বা ইন্দ্রিয়ার্থের সম্পর্কশূন্য হওয়ায় তাহা আর সৃষ্টি-রহস্যে অনুপ্রাণিত হয় না ; সাক্ষাৎ দেহ-চেতনা হইতে মুক্ত হয় বলিয়াই তাহা সৃষ্টিকে অস্বীকার করে । একটা ছবি, একটা প্রস্তরমূর্তি, একটা শাল বা কার্পেটের নক্সা— এমন কি, একটা স্বরসমষ্টির ঐক্যতান, এই জগ্গই আর্ট বা শিল্পরচনা হিসাবে সার্থক হয় যে, তাহাতে জীবনের কোন ব্যাখ্যা বা রূপ-প্রদর্শন নাই ; বরং জীবনকে অগ্রাহ্য করিয়া ‘রস’ নামক একটি বস্তুর সাধনাই তাহার লক্ষ্য । কিন্তু সাহিত্য এইরূপ আর্টসাধনা নয়, তাহা খাঁটি সৃষ্টিকর্ম । এই সৃষ্টিকার্য্যের বিষয় ও প্রেরণা কি, এক্ষণে তাহাই বলিব ।

এ পর্যন্ত ইহাই বলিয়াছি যে, সাহিত্য-রচনার উপাদান যেমন ভাষা—সাহিত্য বাস্তব বিগ্রহ, তেমনই, সেই বিগ্রহ জীবনেরই একটি সুপ্রকাশিত রূপ। এখন এই জীবন কথাটিকে ভাল করিয়া বুঝিয়া লইতে হইবে—সাহিত্যের সম্পর্কে ইহার স্থূল ও সূক্ষ্ম অর্থ নির্ণয় করিতে হইবে। সমস্ত বহির্জগতের পরিবেশ—সেই পরিবেশের যতখানি মানুষের চেতনায় বিরাজ করে তাহারই আশ্রয়ে, এবং মানুষের দেহ-মন-প্রাণের সহিত অখণ্ডনীয় নিয়তিসূত্রে সংযুক্ত হইয়া, পরিবার, সমাজ ও প্রকৃতির পরিবেষ্টনীতে মানুষকে প্রধান নায়ক করিয়া, যে বিরাট নাট্যলীলার অভিনয় হইতেছে, তাহাই জীবন—তাহাই সাহিত্যের বিষয়। জীবন বলিতে ইহাই বুঝিতে হইবে। তথাপি এই ব্যাপক অর্থ বুঝাইবার জন্য আমি প্রায় সর্বত্র ‘জীবন ও জগৎ’ এই যুক্ত বাক্য প্রয়োগ করিয়াছি। সাহিত্যের বিষয়ীভূত জীবনকে নাট্যলীলা বলিবার কারণ আছে। জীবনের এই বহিঃপ্রকাশ যে আর এক ভঙ্গিতে মানুষের জ্ঞানগোচর হয়, তাহাতে জীবনধারণের সমস্তাই প্রবল; তাহাতে কোন রূপ নাই, অর্থাৎ সমগ্রতার উপলব্ধি নাই; তাহা খণ্ড ও বিচ্ছিন্নভাবে, প্রয়োজনের তাড়নাসম্মত চিন্তা-সমষ্টিরূপে, আমাদের দৃষ্টি আচ্ছন্ন করে। এজন্য তাহা একটা রূপ-পরিণামী আদি-অন্তযুক্ত দৃশ্যপরম্পরার মত আমাদের দৃষ্টিগোচর হয় না—কেবল কতকগুলি বিচ্ছিন্ন ঘটনা ও ঘটনাপরম্পরায় প্রতিভাত হয়। তাই জীবনের যে রূপকে আমি সাহিত্যের সাধন বলিয়াছি, তাহাকে নাট্যলীলার সহিত তুলনা করাই সঙ্গত। জীবনের অপর অভিজ্ঞতাকে বাস্তব নাম দেওয়া হইয়া থাকে, এবং ইহা আধুনিক জ্ঞান-বিজ্ঞানের দুর্দ্বন্দ্ব প্রমাণরাশির বলে একটা তত্ত্বরূপে দৃঢ় প্রতিষ্ঠিত হইয়াছে। জীবনের এই মূর্তির সঙ্গে সাহিত্যের লেশমাত্র সম্পর্ক নাই—মানুষ যেখানে এই বাস্তবের উপাসনা করে, সেখানে সে সাহিত্য সৃষ্টি করে না। সাহিত্যের বিষয় যে জীবন, তাহাও বাস্তব—কেবল তাহা জড়-বাস্তব নহে, চিন্ময় বাস্তব। মানুষের দেহ অ্যানাটমি-বিজ্ঞান নিকটে যাত্রা ভাস্কর বা চিত্রকরের নিকট নিশ্চয় তাহা নহে; সেই দেহের নানা অঙ্গসংস্থান, অস্থি ও স্নায়ুশিরার সংখ্যা, ও তাহাদের বিজ্ঞাসপদ্ধতির জ্ঞানই মনুষ্যমূর্তির পরিচয় নহে। সেই মূর্তির আপাদমস্তক সর্ব অঙ্গের যে ছন্দ, তাহার লীলায়িত গতিভঙ্গি, তাহার স্বাস্থ্যের লাভণ্য, তাহার মুখের হাসি ও চোখের কটাক্ষ যে

রূপের লক্ষ্য দেয়—পেশী মাংস অস্থি ও স্নায়ুশিয়ার সমষ্টি যে দেহ, সে দেহে তাহা থাকিতে পারে না। বিজ্ঞানীর নিকটে দেহ একটা বহু অঙ্গ-বিশিষ্ট যন্ত্রমাত্র, তাহার প্রাণ সেই যন্ত্রের একটা ক্রিয়া; এবং সেই প্রাণ-ক্রিয়া নির্বাহ ছাড়া তাহার কোন অর্থ বা অভিপ্রায় নাই। ইহার পর, এই যন্ত্রের বিকল হওয়ার ষত কারণ, এবং তাহা নিবারণ করার ষত কৌশল—তাহাই যন্ত্রবিদকে অনন্তমনা করিয়া রাখে। প্রাণধারণের পক্ষে ইহার প্ররোজন আছে; কিন্তু সৃষ্টির রহস্যবোধের পক্ষে ইহা নিতান্তই খণ্ড বিচ্ছিন্ন ও ক্ষুদ্র। ইহা সেই অনন্তশক্ষুর গভীরতর দৃষ্টিকে রোধ করিয়া দাঁড়ায়, যাহা পদক্ষেপ হইতে কটাক্ষপাত পর্য্যন্ত সর্ব অঙ্গের মিলিত স্মমায়—কণ্ঠের আর্ন্তচীংকার ও কলধ্বনি, দেহের স্বেদ-কম্প-পুলক-শিহরণ—এই সকলের মধ্যে, একটি অখণ্ড চিৎ-সত্তার অপরূপ প্রকাশ আবিষ্কার করে। এই যে সৃষ্টি, ইহার মূলে কেবল জড়ের জড়ধর্মের উত্তেজনাই নাই, তাহা হইতে শ্রেষ্ঠ একটি সম্বোধি জাগ্রৎ হইয়া থাকে। আমি বিজ্ঞানের জড়বাদ ও সাহিত্যের এই জীবনবাদের পার্থক্য বুঝাইবার জন্য একটি সাধারণ উপমা ব্যবহার করিয়াছি, তাহাতে আমার বক্তব্য কিছু বিশদ করিবার সুবিধা হইয়াছে—উপমা যেমন সাহিত্যের ভাষা, তেমনই সাহিত্য-বিচারেও উপমার উপযোগিতা অল্প নহে।

সাহিত্যে আমরা এই জীবনকেই—আকারে-ইঙ্গিতে, রূপকে-প্রতীকে, ভাবে ও ভাবনায়—কখনও সুরের অনির্বাচনীয়তায়, কখনও বাক্যের অপরূপ ব্যঞ্জনায়, কখনও বা অর্থে, কখনও অর্থহীনতায়, কখনও স্থিরচিত্রে, কখনও ঘটনার গতিচ্ছন্দে, কখনও রূপবিবর্জিত অতীন্দ্রিয় অনুভূতিতে, কখনও মানস-কণ্ডুয়নজাত নানা মতবাদের ভূমিকায়—এবং প্রায় এই সকলের একাধিক ভঙ্গির মিশ্রণে, প্রতিবিস্তৃত হইতে দেখি। কিন্তু আসলে জীবনকে সাহিত্যে রূপ দিবার ভঙ্গি এক বই দুই নহে—অন্তত যাহা উৎকৃষ্ট সাহিত্য তাহার লক্ষণ সর্বত্র ও সর্বকালে একই। সেই রূপ কি, আর একবার ভাল করিয়া হৃদয়ঙ্গম করিতে হইবে। কবিও রূপকার—কিন্তু চিত্রকর ও ভাস্করের মত রূপকার নহেন; সাহিত্যের আর্ট—সঙ্গীত চিত্র বা তক্ষণকলার আর্ট নহে, ইহা পূর্বে বলিয়াছি। কেন, তাহা আবার বলি। সাহিত্যের সৃষ্টিকর্ম হয় বাক্যে—বাণীতে; ইহাতে সেই সৃষ্টির বৈশিষ্ট্য বৃষ্টিতে পারা যায়। বাক্যে যাহা প্রকাশিত হয়, তাহা

অর্থবান অথচ অর্থাভীত ; তাহা ভাবময় অথচ রূপাশ্রিত ; তাহা চিত্র ও মূর্তি-কলার অমুক্যকারী, অথচ দেশে ও কালে তাহাদের মত সীমাবদ্ধ নয় ; তাহা সঙ্গীতযুক্ত অথচ নির্বিশেষ নয়—সবিশেষ । এই জগুই বাণী ভিন্ন অপর কিছুতেই এ সৃষ্টি সম্ভব নয় । সৃষ্টিতে যাহা খণ্ডরূপে, ব্রহ্মের জড়মূর্তিরূপে আমাদের ইন্দ্রিয়গোচর হয়, তাহাই কবির অথচ অমুক্যভূতিতে—যেন একপ্রকার বর্ষ ইন্দ্রিয়-চেতনায়—সমগ্ররূপে চিন্ময় হইয়া উঠে ; কোনও একটা ইন্দ্রিয়ানুভূতি প্রধান হইয়া মনকে অধিকার করে না, হৃদয়ের একটা বিশেষ বৃত্তি উত্তেজিত হইয়া সূক্ষ্মভাব ও শেষে সূক্ষ্মতর রসাবেশে লয়প্রাপ্ত হয় না । এই সর্বানুভূতির ঐক্যবোধযুক্ত যে রূপ, তাহাকেই সাহিত্যে প্রতিফলিত জীবনের রূপ বলিয়াছি ; এবং দেশ ও কালের ভূমিকায় এই রূপ নিরন্তর উৎকর্ষিত হইতেছে বলিয়া আমি নাট্যালীলাকেই সাহিত্যের আদর্শ বলিয়াছি ; সঙ্গীত যদি অন্যান্য শিল্পের আদর্শ হয়, তবে সাহিত্যকে—তাহার সৃষ্টিনিহিত রূপকে—নাট্যরূপ বলিতে হইবে । যাহা দেশে ও কালে—যুক্ত নয়—খণ্ডিত, যাহা ছিন্ন ও বিক্ষিপ্তের একটা অসংলগ্ন সমষ্টি বলিয়া মনে হয়, তাহাকেই একটা প্রাণবন্ত গতিধারায় আদি মধ্য ও অন্ত যুক্ত করিয়া দেখানোই সাহিত্যের সৃষ্টিকর্ম । সকল শ্রেষ্ঠ কাব্যে—মহাকাব্য, কাহিনী, উপন্যাস, এমন কি, উৎকৃষ্ট খণ্ডকবিতায়, জীবনের এই নাট্যালীলায়ক রূপ আছে । এই জগুই বোধ হয় জীবনকে প্রতিবিম্বিত করিবার উৎকৃষ্ট বাণী-মুকুর নাটক ; আর কোথাও জীবনের রূপ-সমগ্রতা আমাদের চিত্তে এমন অবাধে সংক্রামিত হয় না । যখন কোন রচনার এইরূপ লক্ষণ আমরা বিচার করি, তখন দেখিতে হইবে, তাহার মধ্যে একটা কিছুই সমগ্র প্রকাশ আছে কি না—জীবনকে যেখানে যেদিক দিয়াই দেখি, তাহাতে একটা পূর্ণ পরিধি কেন্দ্র-যুক্ত হইয়া উঠিয়াছে কি না ; কাব্য বৃহৎ হউক, ক্ষুদ্র হউক—রচনার বিষয়বস্তু যেমনই হউক—সিদ্ধুর বিশাল বক্ষে যেমন, তেমনই পুষ্করিণী ও গোম্পদে সেই এক চন্দ্রবিশ্ব প্রতিফলিত হইয়াছে কি না । এই যে সমগ্রতার রূপ-সংবেদনা, ইহাতেই জীবনের সকল অনর্থ অর্থবান হইয়া উঠে, সকল দুঃস্বপ্ন দূর হইয়া অন্তর যেন অরুণালোকে উদ্ভাসিত হয় । এখানেও দেহের সেই উপমাটা আর একবার কাজে লাগিবে, জীবনের রূপ বৃত্তিতে দেহের রূপই ধরা যাক । জড়বাদী দেহকে যে ভাবে দেখে, তাহাতে

যেমন রূপ নাই, আছে গ্রন্থিবদ্ধ কয়েকটা খণ্ডের সমষ্টি—তেমনই, দেহকে দেখবার কালে যাহার দৃষ্টি দেহকে অতিক্রম করিয়া তাহার পশ্চাতে একটা ভাবময় সত্তাকে আবিষ্কার করে, অথবা দেহকে সেইরূপ একটা মানস-সংস্কারের প্রতীকরূপেই গ্রহণ করে—সেও এই রূপের কারবারী নহে। একটা উদাহরণ দিব। যে কবি বিশ্বমানবের ধ্যান করেন, তিনি মানুষের দিকে না তাকাইয়া—তাহাকে অতিক্রম করিয়া—মানব-নামে একটা পরম সত্তার পূজা করেন, তিনি মানুষের দেহদশার সকল দুঃখ, তাহার জীবনযাত্রার নিয়তি-নির্দারিত পাপ-তাপের মধ্যে, অর্থাৎ তাহার বাস্তব প্রকৃতির মধ্যেই, জীবনের রহস্য সন্ধান করেন না; মানুষকে ভাল না বাসিয়া, মানবতার একটা ভাববিগ্রহ গড়িয়া তাহারই পূজা করেন। তাঁহার রচনার জীবনেরই রহস্য রূপময় হইয়া উঠে না। আবার, যে রচনায়, দেহের কোন একটি অঙ্গের—যেমন ক্রলতা, নয়ন-ইন্দ্রীবর, বা ভূজবল্লরীর—রমণীয়তাকেই প্রেক্ষণীয় করিয়া তোলা হয়, সে রচনা উৎকৃষ্ট সাহিত্যকর্ম নয়, এক প্রকার শিল্পকলা মাত্র।

আমি যে রূপসৃষ্টিকে শ্রেষ্ঠ সাহিত্যকর্ম বলিয়াছি, তাহা ঐ দেহের মতই জীবনের সর্ব্বাঙ্গীণ সুষমার অভিব্যক্তি; সে রূপ—ঐ দেহেরই মত—জীবনেরও যেন কাস্তি; তাহাতে জীবনের সকল বিষমতা ও বিরোধ, সকল খণ্ডতা ও অসংলগ্নতা, একটি সমগ্ররূপে সমাহিত হইয়া প্রকাশ পায়। দেহের রূপ যেমন কোন একটা অঙ্গবিশেষের রূপ নয়, তাহা সর্ব্বাঙ্গে সঞ্চারিত হইয়া থাকে, এবং অখণ্ড হইলেও তাহা দেহময়—এজন্য তাহা একই কালে বিশেষ ও নির্বিশেষ; জীবনের রূপও, তেমনই, সাহিত্যে আমাদের চিত্তগোচর হয়। যেখানে জীবনের এই রূপ আমাদের চেতনায় একটি অপরূপ অর্থ-সঙ্গতি লাভ না করে—সেখানে সাহিত্যের প্রেরণা বিফল হইয়া থাকে। দেহ ও দেহের কাস্তির যে উপমা দিয়াছি, জীবন জীবনের রূপ তাহা হইতেই বুঝিয়া লইতে হইবে; কায়া হইতে কাস্তি যেমন পৃথক করা যায় না, সাহিত্যেও তেমনই, জীবন হইতে জীবনের রূপকে পৃথক করা যায় না। অতএব তত্ত্ববিচারে দেহাত্মবাদ নামে যে একটি সিদ্ধান্ত আছে, সাহিত্যবিচারেও এইরূপ সিদ্ধান্তকে কায়া-কাস্তিবাদ নাম দেওয়া যাইতে পারে। পরিশেষে, সাহিত্যসৃষ্টির সম্পর্কে জীবনের যে ব্যাখ্যা আমি করিয়াছি, তাহাতে আর একটি কথা যোগ দিলেই

আমার বক্তব্য শেষ হয়। তাহা এই যে, সাহিত্যে জীবন ও জীবনের রূপ বলিতে যাহা এবং যতখানিই বুঝি না কেন, শেষ পর্যন্ত তাহা নর-নীলা ভিন্ন আর কিছুই নহে। জগৎ-নাট্যলীলার নায়ক মানুষ; জীবনে যাহা কিছু দেখি তাহা মানুষেরই দেহ-নিয়তির সঙ্গে মিলাইয়া দেখি; যেখানে সেই দেখা নাই, সেখানেই সাহিত্যসৃষ্টি হয় নাই। সাহিত্যে আমরা জীবনের যে চিন্ময় প্রকাশ দেখি, তাহা মানুষজীবনের জবানিতেই ঘটিয়া থাকে, ইহার অন্যথা হইতে পারে না; কারণ, তাহা হইলে সে রচনা আর্ট-জাতীয় বস্তু হইবে, খাঁটি সৃষ্টিধর্মী সাহিত্য হইবে না।

৩

এতক্ষণ সাহিত্যের প্রকৃতি বিচার করিয়াছি, এবং সে বিচারে সাহিত্যের একটি প্রধান লক্ষণ—যাহাকে আমি স্বরূপ লক্ষণ বলি—তাহার কথাই বলিয়াছি। কিন্তু শুধু সেই দিক দিয়াই বিচার করিলে চলিবে না, আরও একদিক আছে, সেই দিক দিয়াও দেখিতে হইবে, নতুবা এ বিচার অসম্পূর্ণ থাকিবে। সাহিত্যের প্রকৃতি-বিচারে তাহার বাহিরের রূপ যেমন একটা বড় কথা তেমনই সেই রূপসৃষ্টির প্রেরণাও অনুধাবনযোগ্য। এই প্রেরণার জন্ম হয় কবিচিত্তে। অতএব কবিচিত্ত বলিতে কি বুঝি, তাহাই এক্ষণে বলিব।

সাধারণ মানুষের চিত্ত ও কবিচিত্তে প্রভেদ এই যে, সাধারণ মানুষের চেতনায় অনুভূতির ক্ষেত্র অতিশয় সঙ্কীর্ণ—যতই গভীর হউক, তাহার প্রসার অল্প। দ্বিতীয়ত, সাধারণ মানুষের ব্যক্তিত্ব বড়ই সীমাবদ্ধ। অনুভূতির ক্ষেত্র সঙ্কীর্ণ বলিয়াছি এই অর্থে যে, তাহা এক হইতে অপর ক্ষেত্রে প্রসারিত হইতে পারে না, খণ্ডের গণ্ডি পার হইয়া সমগ্রের দিকে প্রবাহিত হইতে পারে না। আমরা যাহাকে কবি-কল্পনা বলি—উৎকৃষ্ট অর্থে, তাহা এই প্রসারশীল অনুভূতির ফল; ইহা হইতেই কবিচিত্তে জীবনের রূপদর্শন ঘটে। দ্বিতীয় যে লক্ষণের কথা বলিয়াছি, তাহা আরও গভীর, তাই ভাল করিয়া বুঝিয়া লইবার প্রয়োজন আছে। কবির ব্যক্তিত্ব সাধারণ মানুষের মত সীমাবদ্ধ নয়, অর্থাৎ কবির মধ্যে একজন ব্যক্তিরই কামনা-ভাবনা নাই, তিনি যেন সকল মানুষের প্রতিনিধি। ইংরেজীতে ইহাকে rich ও composite personality বলা যাইতে পারে। জগতের শ্রেষ্ঠ কবি

শেক্সপীয়ারকে এক ঘনীষী যে বলিয়াছিলেন—'genius of humanity', ইহা যথার্থ। ব্যক্তির ব্যক্তিত্বকে ইংরেজীতে individuality বলে, ইংরেজীতে আর একটি শব্দ আছে—personality; এই দুইটি শব্দের অর্থগত প্রভেদ এখানে কাজে লাগিবে। প্রত্যেক মানুষের বাহির ও অন্তরের গঠনে অপরের সঙ্গে যে বৈলক্ষণ্য আছে—যাহা তাহারই, যাহা দ্বারা আর সকল হইতে তাহাকে পৃথক করিয়া লওয়া যায়, তাহাই তাহার individuality। কিন্তু personality বলিতে এই ব্যক্তিত্ব নয়—সাধারণ মানব-চরিত্রেরই এক ঘনীভূত বা প্রবলতর প্রকাশ বুঝায়। কবির personality ইহা হইতেও বড়; তাহা ঘনীভূত বা প্রবল নয়, তাহাতে কোন বিশেষ পুরুষ-মহিমা নাই, তাই তাহা ব্যক্তিত্বেরই একটা বিশেষণ নয়—ব্যক্তিজীবনেরই একটা পৌরুষময় মূর্তি নয়। সে যেন এক পুরুষচিত্তের আধারে সকল পুরুষচিত্তের সমান সৃষ্টি—ইহাই Genius of Humanity; এবং ইহাই genius, বা কবি-প্রতিভা। ইহারই কারণে কবির অনুভূতি সর্বমানবীয় অনুভূতি হইয়া দাঁড়ায়; তাহার সৃষ্টি যতই অপূর্ব হউক, তাহা সকলের অনুভূতিগোচর হয়,—কারণ, তাহা ব্যক্তিগত খেয়াল-খুশি বা উদ্ভট কল্পনার সৃষ্টি নহে। অতএব কবিচিত্তের যে আর এক লক্ষণ—যে প্রসারশীল অনুভূতির কথা পূর্বে বলিয়াছি, তাহাও এই লক্ষণের সহিত যুক্ত হওয়া চাই, তবেই উৎকৃষ্ট প্রতিভার জন্ম হয়। এই প্রসঙ্গে ইহাও লক্ষ্য করিতে হইবে যে, কবিচিত্ত সর্বমানবচিত্তের প্রতিনিধি বলিয়াই তাহা অতিশয় normal বা স্বস্থ; individuality বা ব্যক্তিগত বৈলক্ষণ্যের দিক দিয়া দেখিলে কেহই normal নয়। তাই উৎকৃষ্ট কবিপ্রতিভা এত দুর্লভ।

কবিচিত্তের এই লক্ষণ—এই সর্বময় personalityর প্রসঙ্গে, আর একটি কথা উল্লেখ করা প্রয়োজন। কবিচিত্তে এই যে বহুমুখিতার লক্ষণ আছে, তাহা সত্ত্বেও সে চিত্ত বহুর নয়—একেরই চিত্ত; অর্থাৎ তাহা খণ্ডিত বা অসংলগ্ন নয়, তাহা হইলে কবির সৃষ্টিতে সর্বত্র দৃষ্টির মূলগত এক্য থাকিত না। আধুনিক মনোবিজ্ঞানে একই ব্যক্তির মধ্যে যে multiple personality-র অস্তিত্ব স্বীকৃত হইয়াছে—কবির এই personality বা চিত্ত-সত্তা সেইরূপ বহুত্বসম্পন্ন নয়; তেমন প্রকৃতি normal বা স্বস্থ প্রকৃতি নয়। কবির চিত্ত বহুল নয়, তাহা বিরাট; সংখ্যাধিক্য নয়—প্রসার ও প্রশস্ততাই সেই সার্বজনীনতার কারণ; সে

বহুশ্রেণী গণিতের নিয়ম নাই ; এক প্রকার প্রেমেরই বাত্মশক্তি আছে । সেখানে একটা 'আমি'র মধ্যেই সকল 'আমি' স্পন্দিত হইতেছে—সর্বমানবচিত্ত একমুখী হইয়া একই শক্তির পুরুষসত্তাকে বিরাট-পুরুষ করিয়া তুলিয়াছে । এজন্য কবির মধ্যে ব্যক্তি যিনি, তিনিও নৈব্যক্তিক হইয়া আছেন । কবিচিত্তে ব্যক্তি ও নিব্যক্তির এই লুকোচুরি কবিপ্রতিভার আর এক রহস্য, ব্যক্তিত্বই যেন বর্ধিত হইয়া তাহাকে নৈব্যক্তিক করিয়াছে । তাই যে-জগৎ তাঁহারই জগৎ—তিনি ভিন্ন আর কেহ যাহা রচনা করিতে পারিতেন না—সেই জগৎ তথাপি একার জগৎ নহে, সকলের জগৎ—উৎকৃষ্ট কাব্যপাঠকালে এই উপলব্ধিই আমাদিগকে সমধিক বিস্মিত ও পুলকিত করে । এই জগৎই বলিতে হইবে, কবি নিজচিত্তে সকল চিত্তকে ধারণ করেন—ব্যক্তিত্বই বিরাট হইয়া উঠে ।

আধুনিক কালে কবিচিত্তের এই লক্ষণ স্বীকৃত হয় না, এখন এইরূপ personality অপেক্ষা individualityর উপরেই বিশেষ দৃষ্টি দেওয়া হয় । কিন্তু individuality বা কবির ব্যক্তিস্বাতন্ত্র্যই উৎকৃষ্ট কবিকর্মের পরিপন্থী । যে কবির চিত্তে স্বাতন্ত্র্য যত অধিক, তিনিই সেই পরিমাণে জগৎ ও জীবনের সহিত যোগযুক্ত নহেন, তিনি সার্বজনীন মানব চিত্তের অধিকারী নহেন, তাঁহার রচনা আত্মভাবস্পর্শী ; তিনি নিজেরই idiosyncrasy বা ব্যক্তিস্বভাবের বশে নিজের বিচিত্র-গঠন মানসদর্পণে জগতের যে প্রতিবিম্ব রচনা করেন, তাহা যেমন সৃষ্টির সত্যে অনুরূপ প্রাণিত নয়, তেমনই তাহা সর্বমানবচিত্তের দৃষ্টিগোচর নহে । যাহাদের সহিত সেইরূপ মানসধর্মের মিল আছে, কেবল তাহারাই, অনুরূপ আত্মভিমান তৃপ্ত হয় বলিয়া, সে রচনার পক্ষপাতী হয় । আধুনিক সাহিত্যসমাজে এই ধরণের রসিকেরাই সম্মান পাইয়া থাকেন ; এবং ইংরেজীতে ইঁহারা যে intellectuals নামে অভিহিত হন, তাহাও সঙ্গত ; কারণ, ইঁহারা সাহিত্যবিচারে প্রকৃতই মনোবিলাসী ; ইঁহারাও আত্মভাবপন্থী । সাহিত্যে এই ব্যক্তিস্বাতন্ত্র্যের দাবি আধুনিক কালে অত্যধিক বাড়িয়া উঠিয়াছে—ইহাতে সাহিত্যের স্বকীয় আদর্শ নষ্ট হইতেছে, জীবনের দেহচেতনাগত রূপমাধুরী, এবং কায়ার সহিত অভিন্ন যে কাঙ্ক্ষি, সাহিত্যে তাহা আর ফুটিতে পারিতেছে না ।

কবিচিত্তের যে লক্ষণ নির্দেশ করিয়াছি, তাহাতে এই ভাবতত্ত্বের মতই,

সাহিত্যের Realism বা বস্তুতন্ত্রের কথাও প্রাসঙ্গিক বটে। ভাবতাত্ত্বিক যেমন আত্মভাবের আদর্শে আপনার জগৎ পৃথক গড়িয়া থাকেন, এবং তাহার মূলে আছে স্বাতন্ত্র্যের অভিমান, বস্তুতাত্ত্বিকের অবস্থা ঠিক তাহার বিপরীত। এই সকল লেখক যেমন কোন স্বকীয় স্বতন্ত্র অনুভূতি দাবি করেন না, তেমনই, কোনপ্রকার অনুভূতি-কল্পনাও তাঁহাদের নাই। বস্তুতাত্ত্বিকের বুদ্ধি জগৎকে বস্তুসমষ্টিরূপেই দেখে—সে যেন কতকগুলো বক্র ভগ্ন অসম্পূর্ণ অর্থহীন রেখার সমাবেশ। ইহার কারণ, পুরুষের যে সন্ধিৎ কোন কিছুকেই অসম্পূর্ণ দেখিতে চায় না—হয় কল্পনা, নয় বিশ্বাস, অথবা প্রেমের দ্বারা জগতের সব কিছুর একটা সঙ্গতিবোধ করে—ইহারা তাহাকে প্রশ্রয় দেয় না; ইহাদের প্রেম নাই, ইহারা অবিশ্বাসী, নাস্তিক। আমি পূর্বে যে বৈজ্ঞানিক জড়বাদের কথা বলিয়াছি, ইহারা সাহিত্যেও তাহারই আরাধনা করে। ইহাদের মতে মানুষের দেহও তড়িৎ-ভাড়া মত কতকগুলো সুখদুঃখ-অনুভূতির আধার। সেই অনুভূতি যেন মুহূর্তের অনুভূতি মাত্র, যদি তাহার পরম্পরাও থাকে, তবে তাহার কোন পরিণাম নাই। একরূপ রচনায় রূপসৃষ্টি তো পরের কথা, একটা সঙ্গতি-স্বষমাও লক্ষিত হয় না; ইহা শিল্পকলারও অন্তর্ভুক্ত নহে; কারণ, সেখানেও অর্থহীন রং রেখা প্রভৃতিকে একটা সুবলয়িত স্বষমা দান করার প্রবৃত্তি আছে। কিন্তু রহস্যের কথা এই যে, এই সকল বস্তুতাত্ত্বিক সাহিত্যিকেরা বস্তুর নিছক বাস্তবতাকেও আয়ত্ত করিতে পারেন না। ইহার কারণ, বৈজ্ঞানিক চিন্তার ক্ষেত্রে আত্ম-সংস্কার বর্জন করা যতই সম্ভব হউক, যে-রচনা আদৌ অনুভূতিমূলক—সাক্ষাৎ ইন্দ্রিয়-পরিচয়ের উপরেই যাহার নির্ভর, তাহাতে বস্তুর মধ্যে লেখকের আত্ম-প্রবেশ থাকিবেই। সেই আত্ম-সংস্কারকে দমন করা অসম্ভব বলিয়াই বাস্তব-চিত্রের মধ্যেও আত্মভাবেরই একটা অতিশয় বিকৃত ক্ষতবিক্ষত বিকলাঙ্গ রূপ ফুটিয়া উঠে। ইহা হইতে বৃষ্টিতে পারা যাইবে যে, Realism বা বস্তুতন্ত্র সৃষ্টিধর্মী সাহিত্যের পক্ষে সম্পূর্ণ অর্থহীন।

অতঃপর, সাক্ষাৎ সাহিত্যসৃষ্টিতে কবিচিত্তের প্রেরণা কি, তাহাই বলিব। সাহিত্যসৃষ্টিতে কবির মূল প্রেরণা ভাবও নয়, চিন্তাও নয়—বাহিরের সহিত অন্তরের একাত্মতা; এই জগৎ ও জীবন যেন তাঁহার চেতনাকে অধিকার করিয়া রূপের ভাষায় আপন কথা বলে; অর্থাৎ তাহার কোন অংশই দেশ কাল হইতে

বিচ্ছিন্ন না হইয়া—যেমন আছে, হয়, ও ঘটে—তাহারই মূর্তিতে প্রকাশিত হয়। এখানে এই যে রূপের কথা বলিলাম, ইহা ভাবের বিপরীত মাত্র। জীবনের কোন একটা অভিজ্ঞতা হইতে, অথবা আমারই অন্তরের কামনা হইতে, ভাবের উৎপত্তি হইতে পারে ; এই ভাব অতিসূক্ষ্ম অনুভূতি-রসে পরিণত হইয়া এক প্রকার কাব্যের প্রেরণা হয়। কিন্তু এই ভাবমূলক রচনার রূপ নাই, ইহার ভাষা ভাবেরই ভাষা—আমারই হৃদয়োখিত এক অশরীরী বিগ্রহ, ইহা আমার সম্মুখে জগতেরই একটা ঘটনা বা দৃশ্যরূপে উদয় হইতেছে না। তাই ইহা জীবন-দর্শন নয়, এক প্রকার আত্মদর্শন মাত্র। আমাদের অলঙ্কারশাস্ত্রে—জীবনের রূপও নয়, ভাবের রসসৃষ্টিই কাব্যের মূলীভূত অভিপ্রায় বলিয়া স্বীকৃত হইয়াছে। ভাব বরং বস্তুমুখী ; রস ভাবেরও সূক্ষ্মতর পরিণাম, একেবারে বেত্মান্তরস্পর্শশূন্য ! কিন্তু আমি যে রূপের কথা বলিয়াছি, তাহা বস্তুর সহিত অভিন্ন ; কিন্তু তাই বলিয়া তাহা বস্তুতন্ত্রের বাস্তব নহে। এখানে কায়া ও কাস্তির উপমা স্মরণ করিতে হইবে। অতএব কবিত্বের মূল প্রেরণা—বাহিরের সহিত অন্তরের একাত্মতা। ইহাকে যদি আত্মার সহিত দেহের মিলন, জড়ের সহিত চিৎ-এর পরিণয় বলি, তবে কথাটা বড়ই দুর্কোধ্য হইয়া উঠিবে। যদি বলি—ইহাই প্রেম, তাহা হইলে কথাটা কতকটা হৃদয়ঙ্গম হইতে পারে। ইহারও পরে, যদি বলি, এই প্রেম আত্মমুখী নয়, বহিমুখী—ইহা আত্মরতি নয়, জগৎ-রতি, তাহা হইলে বোধ হয় কথাটা আর একটু স্পষ্ট হইয়া উঠিবে। জগৎ ও জীবনের প্রতি এই আসক্তি যখন ভাবের আকারেই সীমাবদ্ধ থাকে, তখন তাহা উৎকৃষ্ট সাহিত্যসৃষ্টির প্রেরণা নয়, সেও নিজেরই সুখদুঃখের গীতময় উচ্ছ্বাস ; তাহার যে কবিতা, সেও রূপাত্মক নয় ভাবাত্মক ; এ জন্ম তাহা উৎকৃষ্ট গান হইলেও উৎকৃষ্ট সৃষ্টি নহে—উৎকৃষ্ট আর্ট হইলেও, উৎকৃষ্ট সাহিত্য নহে। তথাপি সাহিত্যসৃষ্টির মূলে কবির সেই আসক্তি আছে—ইহারই বশে কবিচিত্ত এক আশ্চর্য উপায়ে জগতের বিক্ষিপ্ত বস্তুরাশির মধ্যে অনুসৃত হইয়া নটলীলায় প্রবৃত্ত হয় ; তখন কিছুই আর ভাব নয়, ‘ভব’, বা—ঘটনায়, দৃশ্বে, আকারে, অবস্থানে শরীরী—হইয়া উঠে। দৃষ্টান্তস্বরূপ, কবি যখন বলেন—

“মরিতে চাহিনা আমি সুন্দর ভুবনে,
মানবের মাঝে আমি বাঁচিবারে চাই ;”

—তখন তাহাতে খাঁটি জগৎ-প্রীতির প্রেরণাই আমরা লক্ষ্য করি বটে, কিন্তু এখানে তাহা ভাবের আকারেই আছে—‘ভব’ হইয়া উঠে নাই ; অর্থাৎ, একটি ভাবরূপেই তাহা আমাদের চিত্তে সংক্রামিত হয়—জীবনের কাহিনীতে রূপ ধারণ করিয়া চাক্ষুষ হইয়া উঠে না। ভাব ও রূপের এই প্রভেদ অল্প নহে। ভাবের আদিও নাই, অন্তও নাই—উহা একটা চিত্ত-চমক মাত্র ; কিন্তু রূপে, অর্থাৎ জীবনের ঘটনায়, যখন তাহা নাট্যীকৃত হয়, তখন তাহা আদি-অন্ত-যুক্ত হইয়া জীবনের গভীরতম রহস্যকে অপরোক্ষ করিয়া তোলে। উপরি-উক্ত শ্লোকে যে কামনা ব্যক্ত হইয়াছে, তাহা কামনা মাত্র ; তাহাতে রূপসৃষ্টির সম্পূর্ণতা নাই, ভাব হইতে ভাবেই তাহার পরিসমাপ্তি। কিন্তু রূপসৃষ্টিমূলক সাহিত্যে আমাদের অনুভূতি এইরূপ ভাবমূলক অসম্পূর্ণ অনুভূতি হইবে না। সেখানে ভাবিবার কিছুই নাই, সকলই দেখিবার ; তাই কামনাও একটা ঘটনার রূপে সম্পূর্ণ হইয়া উঠে। এখানে কবি যাহা কামনা করিতেছেন, তাহা নিশ্চয় অসম্ভব বলিয়া মনে হয় না ; বরং মৃত্যুর নিয়তিকে লঙ্ঘন করার যে সম্ভাবনা, তাহাই এই কামনাকে বৃহৎ ও কবিত্বময় করিয়াছে। কিন্তু এই কামনা যদি রূপে প্রকাশ পাইত, তবে দেখা যাইত ‘আমি’ মরে নাই, ‘আমি’ মানুষের মাঝে বাঁচিয়া আছে। আরও একটি আশ্চর্য ব্যাপার ঘটত, ঐ ‘আমি’টাকে তখন দেখিতে পাওয়া যাইত বলিয়া ‘আমি’ আর ব্যক্তি-আমি থাকিত না, সাধারণ আমি হইয়া যাইত—ভাবে যাহা ব্যক্তি-‘আমি’, রূপে তাহা সকলের ‘আমি’ হইয়া উঠে। এই জগৎই কাব্যসৃষ্টিতে Subjectivity বা মন্বয়তা অপেক্ষা Objectivity বা তন্ময়তাই কবিকল্পনার উৎকর্ষ প্রমাণ করে।

অতএব, এই যে রূপসৃষ্টি, ইহার মূলে আছে প্রেম—কারণ এমন করিয়া দেখিতে বা দেখাইতে হইলে সঙ্গে সঙ্গে ‘আমি’টাকে উৎসর্গ করিতে হয়। যিনি এই বিশ্বের আদি স্রষ্টা, তিনিও এই প্রেমের প্রেরণায় আপনাকে উৎসর্গ করিয়াই, জগৎ-সৃষ্টি করিয়াছেন—নির্বিষকল্প কৈবল্যের অবস্থা ভাল লাগে না বলিয়াই, রসব্রহ্ম জগৎ-ব্রহ্মের রূপ ধারণ করিয়াছেন ; এবং “ভাব হইতে রূপে যাওয়া আসা” নয়, নিত্য রূপের মধ্যেই অবস্থিতি করিতেছেন। কবির চিত্তেও সেই প্রেম জাগে—ভাগবতী সৃষ্টির সেই মূলকল্পনাকে মানবীয় সৃষ্টিতে, মানবদেহানুভূতির ভাষায় অনুবাদ করিয়া ভোগ করিতে ইচ্ছা হয় ; তাই

সাহিত্যে অগ্নিরূপী ব্রহ্মের দর্শন ঘটয়া থাকে। রূপ—রূপ—রূপ! তবু নয়, ভাব নয়, চিন্তা নয়; দেশ ও কালের দ্বিগুণিত সূত্রে বয়ন-করা, সর্বৈন্দ্রিয়-মনোহর সেই কাব্য—দেহকে দেহ দিয়া অমুভব করার মতই, প্রত্যক্ষগোচর হইয়া উঠে। সকল রূপ-পিপাসার মূলে এই দেহ-প্রেমই আছে; এই রূপ-পিপাসা দেহপ্রেমই কবির প্রতিভায় দিব্যদৃষ্টিতে পরিণত হয়; তখন কিছুই আর ক্ষুদ্র, খণ্ড, কুংসিত অপ্রীতিকর থাকিতে পারে না। ভাবের আত্মপরায়ণতায় যাহা তুরীয়ধর্মী—অর্থাৎ অরূপের অসীমায় যাহা অর্থাতীত ও আদি-অন্তহীন তাহাই দেহের প্রেম-পিপাসায়—সমগ্র, সুষীম, রূপময় ও অর্থপূর্ণ। কিন্তু কেবল-মাত্র রূপ-পিপাসাই এই প্রেম নয়; রূপ-পিপাসায় কিছুই সৃষ্টি হয় না, তাহাতে ইন্দ্রিয়বিলাসের উপকরণ রচনা হয় মাত্র, তাহাকেই আর্ট বলে। তাহাতে জীবনের সমগ্রতাবোধ নাই, কারণ তাহাতে পিপাসাই আছে, প্রেম নাই। সেখানেও দেহের খণ্ডরূপেরই আরাধনা হইয়া থাকে। নিম্নোক্ত পংক্তিগুলিতে এই রূপ-পিপাসার একটি চমৎকার অভিব্যক্তি আছে—

Mamua, when our laughter ends
 And hearts and bodies, brown as white,
 Are dust about the doors of friends,
 Or scent ablowing down the night,
 Then, Oh! then, the wise agree
 Comes our immortality :
 Mamua, there waits a land
 Hard for us to understand,
 Out of time, beyond the Sun...
 There the Eternals are, and there
 The Good, the Lovely, and the True
 And Types, whose earthly copies were
 The foolish broken things we knew...
 Never a tear, but only Grief ;
 Dance, but not the limbs that move ;
 Instead of lovers, Love shall be,
 And there, on the Ideal Reef,
 Thunders the Everlasting sea.

—এখানে রূপবিবক্ষিত নির্বিশেষ যে অস্তিত্ব, তাহার বিরুদ্ধে বিশেষের অহুরাগী, দেহপিপাসাতুর প্রাণের যে দীর্ঘশ্বাস শুনিতে পাই, তাহা প্রেম নয়—পিপাসারই ভাবোচ্ছ্বাস। কবিচিত্তের প্রেম জগৎ ও জীবনকে “foolish broken things” বলিবে কেন? সকলকেই সুসম্পূর্ণ ও সুস্বচ্ছ দেখিবে, এবং সেই দেখাতেই হৃদয়ে আর কোন আক্ষেপ থাকিবে না—আপন সৃষ্টির মধ্যেই একটা শান্ত ও চিরন্তনী সত্তা উপলব্ধি করিবে। সাহিত্যেই আমরা এই অপূর্ব আশ্বাস লাভ করি; আর সকল পথে প্রাণকে এড়াইয়া চলিতে হয়, অথবা প্রাণ বাড়িয়াই চলে, সমাধান আর হয় না। এই জন্ম সাহিত্যকেই শ্রেষ্ঠ জ্ঞানযোগ বা প্রকৃষ্ট প্রজ্ঞান-পন্থা বলা যাইতে পারে।

৪

যাহা শ্রেষ্ঠ সাহিত্যিক সৃষ্টি, তাহাতে Idealও নাই, Realও নাই, কিন্তু রোমান্স আছে—থাকিবেই। রোমান্স অর্থে অতিচারী কল্পনা নয়, সত্যকার কবিকল্পনা। যে কল্পনা জড়কে চিন্ময় দেখে, খণ্ড ও বিচ্ছিন্নকে সমগ্র ও অর্থপূর্ণ করিয়া লয়—যাহা ভগ্নকে যুক্ত করে, অসংলগ্নকে সুস্বচ্ছ করিয়া তোলে, তাহাই সাহিত্যকে রোমান্স-গুণযুক্ত করে—অর্থাৎ, জীবনের খণ্ডরেখায় যে মণ্ডলাভাস আছে, তাহার পূর্ণমণ্ডল আবিষ্কার করে। এই কল্পনার মূলে আছে প্রেম, ইহাই সুস্থ। কল্পনা যেখানে আত্মপরায়ণ বা আত্মদ্রোহী, সেখানে রূপসৃষ্টির রোমান্স নাই; অবাস্তব ভাববিলাস, অথবা বাস্তবের বস্তু-বিশ্লেষণ আছে। যাহা নাই, তাহার মনোহর মায়ারূপ-রচনা সত্যকার কাব্যসৃষ্টি নয়—যাহারা এই প্রকার রচনাকেই কাব্য বলে, তাহারা উৎকৃষ্ট উপন্যাসকেও রোমান্স বলিয়া নাসাকুণ্ডিত করে; এবং জীবনের কাহিনীতে কল্পনাহীন বাস্তবের আধিপত্য থাকিলেই তাহাকে আদর্শ উপন্যাস বা সাহিত্যসৃষ্টির এক উৎকৃষ্ট নিদর্শন বলিয়া গণ্য করে। এজন্য যে রচনায় প্লট বা সুসম্পূর্ণ কাহিনী নাই—ঘটনা সকলের মধ্যে সাক্ষাৎ কার্যকারণের সঙ্কট মাত্র আছে, কিন্তু কোনও একমুখী পরিণামের মিলিত অভিপ্রায় নাই, তাহাই ইহাদের মতে জীবনের উৎকৃষ্ট চিত্র; কারণ তাহা বাস্তব, তাহা রোমান্স নয়। কিন্তু এইরূপ রচনাই সাহিত্যপদবাচ্য নয়, কারণ ইহাতে কবিদৃষ্টির লক্ষণ নাই। কাব্য-সৃষ্টিতে কবির দৃষ্টি স্থির, একাগ্র ও পূর্ণতার অভি-

মুখী; তাহাতে অসম্বন্ধ বাস্তবের বিবৃতি নাই বলিয়াই তাহা অবাস্তব বা মিথ্যা নয়। রোমান্স-বিরোধী যে বাস্তব, তাহাতে যাহা কিছু 'হয়', তাহার শেষ সেইখানেই; সেই 'হওয়া'র কোন পরোক্ষ পরিণতি নাই, তাই সেইরূপ রচনায় কোন কাহিনী বা স্বসঙ্গত গুট থাকে না। কিন্তু উৎকৃষ্ট কবিকল্পনা সকল 'হওয়া'কেই একটি সম্পূর্ণ 'হওয়া'র রূপে প্রত্যক্ষ করিতে পারে—'হওয়া'র এই সম্পূর্ণতাই রোমান্স, ইহাতে বাস্তবই পূর্ণ আকারে প্রতিষ্ঠিত হয়। যে সকল রচনায় বাস্তবই নাই—অসংলগ্ন স্বপ্নখণ্ডকে, রূপে নয়, ভাবে অপরূপ করিয়া তোলা হয়—তাহাকে আমি রোমান্স বলিতেছি না, তাহাকে সাহিত্যিক সৃষ্টি বলিব না; তাহাও আর্টের অন্তর্গত। আবার যেখানে 'হওয়া-উচিত'কেই জবরদস্তি করিয়া 'হয়'-এর উপরে চাপানো হয়, অর্থাৎ 'হওয়া'কে তাহার আপন নিয়মেই সম্পূর্ণ 'হইতে' দেখার দৃষ্টি নাই—ধর্মনীতি, সমাজনীতি প্রভৃতির আদর্শে জীবনকে কাটিয়া ছাঁটিয়া একটা ছাঁচে ঢালিয়া দেখানো হয়, সেখানেও রোমান্সের চিত্ত-চমৎকার নাই, একটা সঙ্কীর্ণ মনোবৃত্তির তৃপ্তিসাধন বা সংস্কারবদ্ধ চিত্তের উল্লাসই আছে।

কিন্তু এই প্রসঙ্গে ইহাও মনে রাখিতে হইবে যে, জীবন যাহার বিষয়, সেই সাহিত্য আর্টের মত নীতিহীন হইতে পারে না—যদি তাহা হইত, তবে সাহিত্যে জীবনের রূপসমগ্রতা প্রকাশ পাইত না; কারণ, কোন একটি বস্তুে সংহত ও মণ্ডলায়িত না হইলে রূপের রূপত্ব থাকে না—সেই রূপকে ধারণ করিবার কিছুই থাকে না, তাহার কোন significance বা অর্থই থাকে না। এই গভীরতর নীতি কেমন করিয়া প্রকাশ পায়, তাহাই বলিব। প্রথমত, জীবনের আলেখ্য-রচনায়, সর্বসংস্কারমুক্ত মানবাত্মার কল্পনাই মিথ্যা; কারণ, তাহা আর দেহ-দশাধীন থাকিবে না বলিয়াই তাহা অবাস্তব। সমাজনীতি বা ধর্মনীতির সংস্কার কোন-না-কোনরূপে মানুষের চেতনায় বদ্ধমূল থাকিবেই, কারণ, মূলে উহা প্রকৃতিগত। উহা হইতে মুক্ত হইতে পারিলে জীবনের যে অংশ বাকি থাকে, তাহা কবিচিত্তের ধ্যানযোগ্যই নহে—রূপসৃষ্টির উপকরণই শূন্য হইয়া যায়। এই সকল নীতির তাড়নায় এবং তাহাদেরই সংঘর্ষে, জীবনের গভীরতর নীতি—সৃষ্টির নিয়তি-নিয়মের গূঢ় রহস্য—মানুষের কাহিনীতেই ধরা পড়ে; এবং তাহারই আলোকে কবির সৃষ্টি সমগ্রতার অর্থে অর্থবান হইয়া উঠে। অতএব সমাজনীতি বা ধর্মনীতির আদর্শে যেমন জীবনের সত্যকার রূপসৃষ্টি করা সম্ভব নয়, তেমনই,

ঐরূপ সংস্কার-বন্ধন স্বীকার না করিলে বাস্তব দেহমনকেই অস্বীকার করিতে হয় ; এবং এই স্বপ্নের ভিতর দিয়াই যে স্বাভাবিক পরমবস্তুর উপলব্ধি হয়, জীবনের সেই রহস্যময় নিয়তির রসরূপকে আর প্রত্যক্ষ করা যায় না। এই জন্য আর্ট যে অর্থে নীতিহীন, সাহিত্য সে অর্থে নীতিহীন নয়। বস্তুতাত্ত্বিক সাহিত্যে আর এক নীতির প্রাদুর্ভাব দেখা যায়, তাহা নীতিহীনতার নীতি—নীতির পরিবর্তে দুর্নীতিরই একটা প্রবল সংস্কার। বাস্তবতা বা সম্ভাব্যতার দিক দিয়া ইহাই নাকি আরও সত্য। কিন্তু যাহার বিরুদ্ধে এই দুর্নীতিকেই প্রশংসা দেওয়া হয়, সেই নীতিই ইহার তুলনায় আরও সত্য, আরও বাস্তব। এই দুর্নীতিও মনেরই একটা সংস্কার, এবং ইহা বিকৃত ও অস্বাভাবিক বলিয়া জীবনকে শুধুই ক্ষুদ্র ও অসম্পূর্ণ করিয়া দেখে না, কুৎসিত করিয়া দেখে। সম্ভাব্যতা বা probability-র যে অভ্যুহাত ইহারা দেয়, সত্যকার কবিদৃষ্টির পক্ষে সে প্রশ্ন গুরুতর নয় ; কারণ কবিচিত্তে এইরূপ কোন সংস্কার না থাকায়, তাহা জীবনের নিম্নতম ও উর্দ্ধতম সীমায় অবাধে গত্যাত করিতে পারে, এবং সেই পূর্ণদৃষ্টিতে সম্ভব-অসম্ভববোধের বাধা আর থাকে না ; যাহা এমন করিয়া দেখিতে পাইতেছি, তাহার সম্বন্ধে কোন সন্দেহ থাকিবে কেন ? সেই দৃষ্টি ইহাদের নাই বলিয়া ইহারা কিছুই সৃষ্টি করিতে পারে না, ইহাদের রচনাও সাহিত্য নয়। ✓

আর একটি কথা বলিয়া আমি কবি-প্রেরণার পরিচয় শেষ করিব। আমরা সাহিত্যে ট্র্যাগেডি-রচনার কথা জানি, এই ট্র্যাগেডিতে জীবনকে একটি বিশেষ ভঙ্গিতে দেখা হয়—তাহাতে একটা নিদারুণ নিষ্ফলতার চিত্র ফুটিয়া উঠে। কিন্তু ইহাও সত্য যে, কোন উৎকৃষ্ট কাব্যে জীবনকে একটা অভিশাপ রূপে প্রকটিত করা সম্ভব নয়—বৈরাগ্য বিরক্তি বা বিদ্বেষ কবিচিত্তের প্রেরণা হইতে পারে না, জীবনকে সর্বাংশে গ্রহণ করাই কবি-কল্পনার স্বস্থ প্রবৃত্তি। কোথাও বা, পরম জ্ঞানের যে পরম অচ্যুতভূতি, তাহারই এক স্নিগ্ধ-করণ হাশ্বজ্যোতি জীবনের উপরে বিকীর্ণ হইতে দেখা যায় ; এই humour বা উৎকৃষ্ট হাস্যরস কবিচিত্তের স্বাস্থ্য ও স্থিরতার প্রমাণ। কোথাও বা, বাহ্যত কবিচিত্তের এই স্বৈর্যলক্ষণ নাই—জীবনের অন্তল অকূলকে মন্বন করিয়া তাহার তলদেশে চকিত দৃষ্টি নিক্ষেপ করা—অথবা সেই ঘূর্ণ্যমান প্রবাহের মধ্যবিন্দুকে ঘূর্ণ্যসমেত লক্ষ্য করার বাসনাই প্রবল বলিয়া বোধ হয় ; তখন কাব্যে জীবনের অপর রস-রূপ—ট্র্যাগেডির উদ্ভব

হয়। কিন্তু উভয়ই সেই একই সমান, স্বস্থ, normal কবিচিত্তের ক্রিয়াই আছে। সাহিত্যে আর এক প্রকার ট্রাজেডিও আমরা দেখিয়াছি, তাহাতে জীবনের রস-রূপের পরিবর্তে, মৃত্যুর অন্ধকারই ঘনাইয়া উঠে, আমাদের জীবাশ্মের আর্ন্ত ক্রম্ভনে আর সকল সুর ডুবিয়া যায়—নরনারীর অতিশয় একক পৃথক ব্যক্তি-চেতনা অতিমাত্রায় উদ্ভূত হইয়াই যেন মূর্ছিত হইয়া পড়ে। ইহা উৎকৃষ্ট সাহিত্যের ট্রাজেডি নয়। এখানে ব্যক্তির ব্যক্তি-স্বতন্ত্র অনুভূতিই জীবনের বাস্তবকে আশ্রয় করিয়াছে—অনুভূতির প্রখরতা আছে, কল্পনার প্রসার নাই; ভাবতিরেকের বিদ্রোহ আছে, প্রেমের প্রশান্তি নাই। ইহাতে সর্বমানবহৃদয়ের প্রতিনিধিত্ব নাই বলিয়া, বরং ব্যক্তির idiosyncrasy-ই অতিমাত্রায় প্রকট বলিয়া, এ কাব্য সর্বকালীন ও সার্বজনীন চেতনার অনুমোদন লাভ করিবে না। Sentiment বা ভাবতিরেক যতই বাস্তবানুগ, এবং কল্পনা যতই সংযত হউক, এ ক্ষেত্রে লেখকের দৃষ্টি একদেশদর্শী বলিয়া জীবনের সমগ্র রূপ তাঁহার আয়ত্ত নহে। মানবজীবনের উৎকৃষ্ট ট্রাজেডি রচনা করিয়াছিলেন যে কবি, সেই শেক্সপীয়ার সম্বন্ধে এক মনীষী লেখকের একটি উক্তি এই প্রসঙ্গে বড়ই সত্য—“He was the most living and least sentimental of authors”।

অতএব জগতের শ্রেষ্ঠ সাহিত্য, যাহা আবহমানকাল মানুষের অন্তর তৃপ্ত করিয়াছে—তাহার দিকে চাহিলে সাহিত্যের এই স্বরূপ সম্বন্ধে সন্দেহ থাকিবে না। হোমার, বাল্মীকি, ব্যাস, কালিদাস, শেক্সপীয়ার হইতে আমাদের বঙ্কিম, রবীন্দ্রনাথ পর্যন্ত, বড় বড় কবির সাহিত্যসৃষ্টিতে এই লক্ষণ যেখানে ঘটখানি প্রকাশ পাইয়াছে, তাহার দ্বারাই ইহাদের শ্রেষ্ঠত্ব কার কতখানি, তাহা নিরূপণ করা যাইবে। যাহা শ্রেষ্ঠ সাহিত্য, তাহাতে মানুষ শুধুই মনোবিলাসের আনন্দ পায় নাই, মানুষের চিত্ত গভীরভাবে আশ্রিত হইয়াছে। সেই আশ্রাস উদ্ভেকের পন্থা বিভিন্ন হইতে পারে; কিন্তু এইরূপ সাহিত্যে জগৎ ও জীবন এমন সার্বজনীন অভিজ্ঞতার উপকরণে রূপময় হইয়া উঠিয়াছে যে, সৃষ্টির রহস্যভার—বাস্তবের সকল সংশয়—বাস্তবের মধ্যেই সমাহিত হইয়া একটি অপরূপ অর্থের ব্যঞ্জনা য মানুষকে আশ্রিত করিয়াছে। এই আশ্রাস ও আনন্দের কারণ, মানুষ এই সাহিত্যের মধ্যে আপনাকেই সমস্ত মানবের সহিত একাত্মভাবে দেখিবার

শক্তি লাভ করিয়াছে। দ্বিতীয়ত, এই সকল কাব্যস্রষ্টতে জীবনের রূপ এমন একটি সমগ্রতার ফুটিয়া উঠে, যাহা বুদ্ধির আয়ত্ত নয়, কেবল অনুভবযোগ্য। বুদ্ধির হাত হইতে নিষ্কৃতি পাইয়া মানুষের গভীরতর চেতনায়, জীবনের এই রূপদর্শনে যে সংশয়মুক্তি ঘটে, তাহাতেই প্রাণ পরিতৃপ্ত হয়; তাই অতিশয় মন্থাস্তিক কাহিনীও মধুর হইয়া উঠে; এবং সত্য ও স্নায়ের যে আধ্যাত্মিক সংস্কার মানুষের জন্মগত—কিন্তু যাহা জীবনের বাস্তব খণ্ড অভিজ্ঞতায় বার বার পীড়িত হয়, তাহা এই সাহিত্যের মধ্যেই চরিতার্থ হইয়া থাকে। এই আশ্বাস যেখানে নাই, দেহ-আত্মার দ্বন্দ্ব যেখানে মিটে নাই, সেখানে কবিকল্পনাই অসম্পূর্ণ—কেবলমাত্র আর্টের দোহাই দিয়া সে রচনা উৎকৃষ্ট হইতে পারে না। সৃষ্টিরও যেমন শেষ নাই, তেমনই কবিচিন্তা ও মানবহৃদয় তাহার সমকালব্যাপী,— এই তিনকে অবলম্বন করিয়াই সাহিত্য। যুগবিশেষের ভাবধারায়, ব্যক্তিত্বের অভিমানে, বা সঙ্কীর্ণ রসিকমণ্ডলীর রুচি ও রসবোধের আদর্শে, সাহিত্য সীমাবদ্ধ নয়। অতএব সাহিত্যের প্রকৃত বিচার সর্বকালের সর্বমানবের চিন্তে হইয়া থাকে; সেই বিচারের উপর বুদ্ধিপ্রয়োগ করাই পণ্ডিতের কাজ, এবং পণ্ডিতের সিদ্ধান্ত যে পরিমাণে সেই বিচারের অনুসরণ করিতে পারে, সেই পরিমাণেই তাহা যথার্থ, নতুবা তাহার কোন মূল্য নাই। এখানে কোন মতবাদ, কোন ব্যক্তিগত বা গোষ্ঠীগত অভিমানের স্থান নাই। কবিচিন্তা যেমন সর্বমানবচিত্তের প্রতিনিধি, সাহিত্য-বিচারেও তেমনই সর্বমানবচিত্তের প্রতিনিধিত্ব চাই। এজন্য কাল ও নিরন্তর-প্রবাহিত মানবচিত্তই সাহিত্যের শ্রেষ্ঠ বিচারালয় হইয়া আছে। এ দিক দিয়া দেখিলে সাহিত্যের এইরূপ পাণ্ডিত্যপূর্ণ বিচার নিরর্থক বলিয়া মনে হইবে; কারণ এই সজ্ঞান ধারণার পূর্বেই পাঠকের চিন্তে সে বিচার শেষ হইয়া যায়, জ্ঞানবিচারের পরোক্ষ প্রমাণের জন্ম হৃদয়ের অপরোক্ষ অনুভূতি অপেক্ষা করিয়া থাকে না। “আগে দর্শনধারী, তারপর গুণ বিচারি”—এ বাক্য সাহিত্যের পক্ষেও অধিকতর সত্য। দর্শনে, অর্থাৎ সাক্ষাৎ-সংবেদনায়, যাহা মুগ্ধ করে না, তাহার গুণবিচার অনাবশ্যক। এজন্য সাহিত্যের সমালোচনা অনেক স্থলেই “অরসিকেশু রসস্য নিবেদনং”, অথবা অরসিকেরই রসোদগার। তথাপি কাব্যজিজ্ঞাসা ক্রমেই একটা বড় জিজ্ঞাসা হইয়া উঠিয়াছে—কবিকর্মের বৈচিত্র্য ও কবিপ্রেরণার পরিধি যত বাড়িয়াছে, ততই এক দিকে যেমন রুচিভেদ, অপর

দিকে তেমনই আদর্শ-নির্ণয় অনিবার্য হইয়া উঠিয়াছে। পরিশেষে সাহিত্যে ব্যক্তিস্বাতন্ত্র্যের প্রবল প্রাচুর্যাবে, এমনই অরাজকতা উপস্থিত হইয়াছে যে, কাব্যের আদি প্রযুক্তি ও আদর্শকে সকল অসাহিত্যিক মতবাদ হইতে মুক্ত করিবার জ্ঞান একালে সৃষ্টি অপেক্ষা সমালোচনার প্রয়োজন বাড়িয়াছে। কিন্তু এ জিজ্ঞাসার শেষ নাই, যেটুকু নির্দেশযোগ্য তাহারই বিচারণা আছে—মীমাংসার সঙ্কেত আছে, সিদ্ধান্ত নাই; তাহা যদি সম্ভব হইত, তাহা হইলে আমি সাহিত্যের স্বরূপ সম্বন্ধে যাহা বলিয়াছি, তাহা মিথ্যা হইত। এতকাল ধরিয়া ইহার যে চেষ্টা হইয়াছে এবং তাহাতে যে কয়টি পদ্ধতির উদ্ভব হইয়াছে, আমি এক্ষণে তাহারই সম্বন্ধে সংক্ষেপে কিছু বলিয়া এ প্রসঙ্গ শেষ করিব।

৫

সাহিত্যবিচারের জ্ঞান বহুপূর্বে যে শাস্ত্র গড়িয়া উঠিয়াছিল, তাহাতে আমাদের দেশে ও যুরোপে, উভয়ত্র—কতকগুলি সূত্র বা বিধির সৃষ্টি হইয়াছিল, এবং সকলের মধ্য দিয়াই একটি তত্ত্ব ক্রমশ পরিষ্কৃত হইয়া উঠিয়াছিল। প্রাচীন যুগে, যুরোপীয় ও ভারতীয় উভয় কাব্যশাস্ত্রে, কবিকর্ম-সম্বন্ধে যে ধারণা সুপ্রতিষ্ঠিত হইয়াছিল, কাব্যের সহিত প্রাকৃত সৃষ্টির—কবিকল্পনার সহিত জীবনের—যেটুকু যোগ স্বীকৃত বা অস্বীকৃত হইয়াছিল, তাহা হইতে আধুনিক কালের ধারণা অনেক পরিবর্তিত হইয়াছে। কবির রচনা বাস্তবের প্রতিলিপি বা অনুকৃতি হিসাবেই একটি আর্ট, এবং সেই আর্টের সাফল্য নির্ভর করে কতকগুলি সুপরীক্ষিত রচনাপদ্ধতির উপরে—ইহাই যেমন অবশেষে যুরোপীয় কাব্য-বিচারের প্রধান সূত্র হইয়া দাঁড়াইয়াছিল, তেমনই আমাদের দেশে কাব্যসাধনাকে জীবনের বা জগতের বাস্তব হইতে অনেক পরিমাণে মুক্তি দিলেও, রচনার বহিরঙ্গ-বিষয়ে আরও সুন্দর কলাকৌশলবিধির সৃষ্টি হইয়াছিল; শব্দার্থের প্রকৃতি ও সম্বন্ধ লইয়া দর্শন ও ব্যাকরণের মীমাংসা; শব্দযোজনা-রীতির দোষ-গুণ, সুন্দর রচনভঙ্গিমা, বা নানা শব্দালঙ্কারসৃষ্টির নিগূঢ় কৌশল—কাব্যের আত্মা, দেহ, অলঙ্কার প্রভৃতির সুন্দর ভেদনির্দেশ—এ সকলই কাব্য-বিচারের অঙ্গীভূত হইয়াছিল। ইহার ফলে আমাদের কাব্যশাস্ত্রে কল্পনা বা কবিদৃষ্টি এবং তাহারই বিষয়ীভূত যে জগৎ ও জীবন, তাহা গৌণ হইয়া উঠিল; এবং শেষে কাব্য

জীবনেরই রূপসৃষ্টি মা হইয়া রসাত্মক বাক্য বলিয়া স্থিরীকৃত হইয়াছিল। এই শাস্ত্র অনুসারে সাহিত্য কোন অর্থে জীবনের ব্যাখ্যা বা অনুবাদ নয়—জীবনেরই গভীরতর রূপের প্রতিচ্ছায়া নয়। কাব্যকে বাস্তব জীবনানুভূতির ক্ষেত্র হইতে দূরে সরাইয়া, কতকগুলি conventions বা কৃত্রিম বিধি-বিধানের সংস্কার অনুসারে তাহার রচনা ও সংস্কার—একরূপ চিত্তচমৎকারের মানস-উদ্যান সৃষ্টি হইল কাব্যের আদর্শ। ইহাও সাহিত্যের আর্টবাদ; তাই সংস্কৃত অলঙ্কারশাস্ত্র আর এক দিক দিয়া যে গভীর তত্ত্বে উপনীত হইয়াছিল, তাহা সাহিত্য-বিচারের অনুকূল নয়—তাহা নির্বিশেষ রসতত্ত্ব, বা Aesthetics-এরই সংগোত্র। এই রসতত্ত্ব যে সময় হইতে সাহিত্যের বিচারাসন অধিকার করিয়াছে, তখন হইতে সাহিত্যেরও অবনতি ঘটিয়াছে; সাহিত্যকে জীবন হইতে কৃত্রিম রসবিলাসের ক্ষেত্রে তুলিয়া ধরায় তাহার শ্বাস রুদ্ধ হইয়াছে; কবিচিত্তের তেমন ক্ষুধা আর নাই। সাহিত্যকে এক অতি অসাহিত্যিক শাসনের অধীন করিয়া তাহার আদর্শ বিচার করিবার চেষ্টা, আমাদের দেশে, এখনও বিংশ শতাব্দীতে বন্ধ হয় নাই; এখনও, যাহারা পণ্ডিতমাত্র, অর্থাৎ পুথিগত বিদ্যাই যাহাদের একমাত্র সম্বল—যাহাদের কোন প্রতিভাই নাই, তাহারাই শাস্ত্রের চর্কিতচর্কণকে পুনরপি চর্কণ করিয়া, সাহিত্যবিচারের নামে নিজেদেরই পাণ্ডিত্য-অভিমান চরিতার্থ করিতেছে।

কিন্তু আমাদের দেশে সাহিত্যবিচারের ধারা একই খাতে বহিয়া শেষে রুদ্ধ হইয়া গেলেও, যুরোপের জীবন্ত সমাজে তাহা নব নব সৃষ্টির অনুসরণ করিয়া নানা স্রোতে প্রবাহিত হইয়াছে। সেখানে প্রথম হইতেই জীবনের সহিত—বহিঃপ্রকৃতি ও প্রত্যক্ষ বাস্তবের সহিত—সাহিত্যের যোগ স্থাপিত হইয়াছিল; সাহিত্যের সৃষ্টিতেও যেমন, সমালোচনাতেও তেমনই, সাহিত্যের আর্ট রসতত্ত্বের এমন শূন্যবাদে পৌঁছিতে পারে নাই। তারপর, একদা যখন সেই সমাজে জীবন ও জগতের রহস্য আরও বড় হইয়া দেখা দিল, এবং সাহিত্যে সেই রহস্য-বিকাশের অস্ত রহিল না, তখন কিছুকাল সাহিত্যবিচারের চেষ্টাও স্থগিত ছিল, কোন নব্য পদ্ধতির প্রতিষ্ঠা হয় নাই। তাহার কারণ বোধ হয় এই যে, সাহিত্য যখন কোন জাতির জীবনে জীবন্ত হইয়া উঠে, তখন পণ্ডিতী-বিচারের অবকাশ থাকে না; আমি পূর্বে বলিয়াছি, সাহিত্যের প্রথম ও প্রকৃত বিচার মাহুষের চিত্তেই হইয়া থাকে—কেতাবে পুথিতে নয়। মধ্যে আবার এই সৃষ্টি-প্রেরণা

মন্দীভূত হইয়া শাস্ত্রীয় বিধিনিষেধ ও যুক্তিবাদের শরণাপন্ন হয়। কিন্তু ঊনবিংশ শতাব্দীতে ইহারই প্রতিক্রিয়ার ফলে, কবিকল্পনার ব্যক্তি-স্বাতন্ত্র্যের জয়ঘোষণা হইল, এবং কবির দৃষ্টি অন্তর্মুখী হইয়া জীবনকে এক নূতন মহিমায় মণ্ডিত করিল। এইকালেই কবিমানসের এই নূতন প্রবৃত্তি যে সকল প্রশ্নের সৃষ্টি করিল, তাহা হইতে নূতন করিয়া কবিপ্রতিভা ও বহিঃসৃষ্টি, অর্থাৎ প্রকৃতিপুরুষ-তত্ত্ব—ভাবকের ভাবনা অধিকার করিল; এ বিষয়ে কবিদের সাক্ষ্যও অল্প সহায়তা করিল না। কিন্তু এই সকল আলোচনার কবিপ্রতিভার মাহাত্ম্য ও কাব্যসৃষ্টির রহস্যই স্বগভীর হইয়া উঠিল, এবং কাব্যবিচার—মনস্তত্ত্ব ও অধ্যাত্ম-দর্শনের সীমাস্তবর্তী হইয়া উঠিল। অতঃপর এই শতাব্দীর শেষভাগে সৃষ্টির নিয়তিনিয়মের বাস্তব অভিজ্ঞতা হইতেই এক নূতন দার্শনিক চিন্তার উদ্ভব হইল, এবং মানব-চেতনার সর্ববিধ ক্রিয়াকে একই তত্ত্বের অধীন করিয়া, Aesthetics বা রসতত্ত্বের নূতন ভিত্তি-স্থাপনা হইল। শোপেনহাওয়ার হইতেই এই নূতন রসতত্ত্বের সূচনা হয়, এবং বেনেদেত্তো ক্রোচের মনীষায় ইহা স্ফূটতর ও পূর্ণাঙ্গ হইয়া উঠে। সাহিত্যসৃষ্টির সম্বন্ধেও এই নূতন দার্শনিক চিন্তা এমন এক বিচারপদ্ধতির সন্ধান দিয়াছে—রূপ ও ভাবের এমন অভিন্নতা নির্দেশ করিয়াছে যে, সাহিত্যের আর্টবাদই সৃষ্টিবাদ হইয়া দাঁড়াইয়াছে। এই সৃষ্টি ভাগবতী সৃষ্টির মতই বিশেষের সৃষ্টি, প্রত্যেক রচনাই আপন বিশিষ্ট রূপে উজ্জ্বল। কবির অনুভূতি একটা প্রত্যক্ষ প্রকাশ বলিয়াই রূপাত্মক; এবং সকল রূপই বিশেষের রূপ, রূপ কখনও নির্বিশেষ হইতে পারে না। কবির নিজ চিন্তার প্রকৃতি অনুসারে এই বিশেষের বিশেষত্ব ঘটে; তাহাতে কাব্যসৃষ্টির তারতম্য হয় না; কারণ সকলই রূপ,—কাব্যে সেই রূপের যথাযথ প্রকাশই নিখুঁত সৃষ্টি। ইহাই সাহিত্যবিচারের আধুনিক ষ্টাইল-তত্ত্ব। ইহার অনুসরণে সাহিত্যের এই সৃষ্টিধর্মকেই প্রাধান্য দেওয়া হইয়াছে—এক দিকে যেমন ভাব ও রূপের অভেদ প্রতিষ্ঠা হইয়াছে এবং তাহাতে কবিদৃষ্টির সহিত সাক্ষাৎ জগৎ-চেতনাকে যুক্ত করা হইয়াছে, তেমনই, কবিকল্পনাকে স্বাতন্ত্র্যগৌরবও দেওয়া হইয়াছে। ইহাতে প্রাচীন কাব্যশাস্ত্রের কৃত্রিম বিধিবন্ধন যেমন পরিত্যক্ত হইয়াছে, তেমনই আধুনিক বিজ্ঞানের শ্রেণীবিভাগ-প্রণালীও বর্জিত হইয়াছে। কারণ, প্রত্যেক কবিকর্মই স্বতন্ত্র বা অনন্যসদৃশ; এজন্য তুলনা দ্বারা, সাধারণ লক্ষণ

ধরিয়া, খাঁটি সাহিত্যিক সৃষ্টির শ্রেণীবিভাগ চলে না। রচনাবিশেষের প্রেরণা সত্য ও সম্পূর্ণ কি না—রচনাগত রূপের মধ্যে তাহার প্রমাণ আছে ; যদি রচনার সর্ব অঙ্গে একটা বিশিষ্ট রূপ-সামঞ্জস্য থাকে, তাহা হইলেই সে রচনার প্রেরণা মিথ্যা বা অসম্পূর্ণ নয়, রচনা সার্থক হইয়াছে। সাহিত্যসৃষ্টির এই ষ্টাইল-তত্ত্বও সাহিত্যের আর্টকে স্বীকার করে ; কিন্তু good art ও great art-এর প্রভেদও স্বীকার করে ; যাহা great art-এর পর্যায়ভুক্ত, সেই সাহিত্যে ষ্টাইলের রহস্য আরও গভীর ; কারণ, তাহাতে জীবনের বিরাট ও বিচিত্র রূপ প্রতিফলিত হইয়া থাকে ; তাহাতে কেবল অনবগু প্রকাশ-কৌশল নয়—যাহা প্রকাশিত হইতেছে, তাহারও বিশিষ্ট গৌরব চাই। আমিও সাহিত্যকে সাধারণ অর্থে আর্ট বলিতে কেন কুণ্ঠিত, তাহা পূর্বে বলিয়াছি ; কোন একটা বিশেষের রূপ-সামঞ্জস্য হইলেই উৎকৃষ্ট সাহিত্যসৃষ্টি হইবে না, জীবনের একটা সমগ্র রূপের ছায়া—অঙ্গবিশেষের নয়, সমগ্র দেহের কাস্তির মত—তাহাতে ফুটিয়া উঠা চাই, নতুবা তাহা আর্ট মাত্র, উৎকৃষ্ট সাহিত্যিক সৃষ্টি নয়। এই সৃষ্টিতত্ত্বকে আমি যে কায়া-কাস্তিবাদ নাম দিয়াছি, তাহারও এই অর্থ করিতে হইবে।

সর্বশেষে সাহিত্য-বিচারের আর এক পদ্ধতির কথা বলিব। এই পদ্ধতি অনুসারে সাহিত্যকে রচনার দিক হইতে বিচার করা হয় না ; অর্থাৎ, রূপসৃষ্টি হিসাবে তাহা কতখানি সার্থক হইয়াছে—নিখিল কাব্যকলার আদর্শ তাহাতে কতখানি পরিপুষ্ট হইয়াছে, এবং জগৎ ও জীবনের কতখানি সুবলয়িত ও সর্বজনহৃদয়গ্রাহী রূপে চিত্রিত হইয়াছে—সে বিচার করা হয় না ; লেখকের দিক হইতে, তাহারই ব্যক্তিমানসের বৈশিষ্ট্য নিরূপণ করিয়া, রচনাবলীর মর্ম উন্মোচন করা হয়। ইহাও সাহিত্যের সাহিত্যিক বিচার নয়, কারণ ইহাতে সাহিত্যসৃষ্টি অপেক্ষা কবিমানসকেই প্রাধান্য দেওয়া হয়,—কাব্যবিচারে জগৎ ও জীবনের রূপ বড় না হইয়া কবির মনোজগতই বড় হইয়া উঠে। পূর্বে যে ষ্টাইল-তত্ত্বের কথা বলিয়াছি, ইহা তাহারই আতিশয্যঘটিত পরিণাম। একালে এইরূপ পদ্ধতির প্রাদুর্ভাব হওয়া খুবই স্বাভাবিক। এক্ষণে কবিকল্পনা অতিশয় অস্তুমুখী ও আত্মনিষ্ঠ হইয়াছে, এজন্য কবিচিত্ত এখন আর সর্বমানব-চিত্তের প্রতিনিধি নহে ; অতএব সার্বজনীন জীবনানুভূতিই এখন আর কাব্যের আদর্শ নহে। এই ভাবতাত্ত্বিক সাহিত্যের কথা পূর্বেও সবিস্তারে বলিয়াছি।

৬

সাহিত্য-বিচারের কয়েকটি পদ্ধতির কথা বলিলাম। তথাপি বার বার ইহাও মনে রাখিতে হইবে যে, সাহিত্যের প্রকৃত বিচার এইরূপ কোন পদ্ধতিতেই চূড়ান্ত হইতে পারে না। যুগ পার হইয়া যুগান্তরে যে সাহিত্য বাঁচিয়া থাকে, অর্থাৎ যাহা কালের ও চিরন্তন মানবচিত্তের কষ্টিপাথরে যাচাই হইয়া উজ্জল হইয়া উঠে, সকল পদ্ধতি তাহার সাক্ষ্য মাগ্ন করিয়াই আপনার মান রক্ষা করিতে পারে। এই কষ্টিপাথরে কষিত হইয়া কত এককালের উৎকৃষ্ট রচনা দীপ্তি হারাইয়াছে; এবং, এত পদ্ধতি সত্ত্বেও একালের পণ্ডিতেরা কোনও আধুনিক শ্রেষ্ঠ কাব্যের অমরতা সম্বন্ধে স্থনিশ্চিত ভবিষ্যদ্বাণী করিতে সক্ষম নহেন। কিন্তু তথাপি সাহিত্যের বিচার কোন কালে বন্ধ হইয়া থাকে না—বিচার চলিতেছে, কষ্টিপাথরে দাগ পড়িতেছে, সেই দাগই স্পষ্ট হইয়া উঠিবে কালান্তরে। আন্তিক্য-বুদ্ধি, জীবনের প্রতি শ্রদ্ধা, মানব-প্রীতি—ও সেই সঙ্গে ভাষার পরিচ্ছন্নতা সম্বন্ধে একটি সহজাত সংস্কার, যে ব্যক্তি বা জাতি বা সমাজের মধ্যে দেখা দেয়, সেইখানেই যেমন সাহিত্যসৃষ্টির সম্ভাবনা ঘটে, তেমনই সেই সৃষ্টির স্বাদ বুঝিবার মত লোকেরও অভাব হয় না। বিচার করিবার পূর্বেই সাহিত্য বুঝিতে পারা চাই; যেখানে বিচার আগে—পরে সাহিত্যের রসান্বাদন, সেখানে বিচারই নিস্প্রয়োজন, অথবা তাহা সম্ভব নহে। এইজন্য আমি এইরূপ বিচারপদ্ধতিকে আমার এই আলোচনায় সর্বাগ্রে স্থান দিই নাই। আমি, মুখ্যত, সাহিত্যের আদর্শ ও তাহার মূল প্রবৃত্তির কথাই বলিয়াছি; তাহাতে এইটুকুমাত্র ফললাভের আশা করি যে, আজিকার এই আদর্শবিপর্যয়ের দিনে যাহাদের সহজ সাহিত্যবোধ আছে, তাঁহাদেরও দৃষ্টি যেন আচ্ছন্ন না হয়।

এই প্রসঙ্গে আর একটি কথা বলিবার আছে। আমি সাহিত্যের যে খাঁটি আদর্শ উদ্ধৃত করিয়াছি, সেই আদর্শের উৎকৃষ্ট সাহিত্য এক একটা যুগেও অতি অল্পই সৃষ্টি হইয়া থাকে—শতাব্দীকালেও একাধিক মহাকবির উদয় হয় না। ইহা ভাবিয়া দেখিলে, আমাদের সাহিত্যের এই বর্তমান অজস্রতার মূল্য কি, তাহা অনুমান করা দুর্লভ হইবে না। সাহিত্যের নামে অক্ষমতার এই উন্মাদ-স্থলভ অনাসৃষ্টি জাতির দুর্বলতাই স্বরণ করাইয়া দেয়। আমি প্রকৃত সাহিত্যসৃষ্টির যে লক্ষণ ও কবিচিত্তের যে পরিচয় বিস্তারিতভাবে নির্দেশ করিয়াছি, ততদূর চিন্তা

না করিয়া অতি সহজেই এই সকল রচনার ব্যর্থতা প্রমাণ করা যায়। প্রথমত, এইজাতীয় সাহিত্যে জীবনের যে চিত্র ফুটিয়া উঠে, তাহা বাস্তবও নয়, আদর্শও নয়; তাহার বিরূপতাই সকল সুস্থ চিত্তকে আঘাত করে। এ যেন চিরপরিচিত বস্তুকে আরও পরিচিত না করিয়া অপরিচিত করিয়া তোলা—একের দুঃস্বপ্ন অপরের মস্তিষ্ক পীড়িত করিয়া তোলে। এই অতিশয় মিথ্যাকেও স্বীকার করিয়া লওয়াইবার জ্ঞান, বিকৃত দৃষ্টিকে প্রতিভার লক্ষণ এবং বিসদৃশকে অনন্তসাধারণ বলিয়া দাবি করা হয়। আসলে, ইহা normal বা সুস্থ নয়, অতএব প্রতিভার প্রধান লক্ষণ ইহাতে নাই। আরও প্রমাণ—এই সকল রচনার ষ্টাইল নাই। অতএব রচনা হিসাবেই এগুলি বিকলাঙ্গ ও অসম্পূর্ণ; ভাষাও যেমন অপরিচ্ছন্ন, ভাব তেমনই অপরিপুষ্ট—কল্পনার কোন কেন্দ্রগত ঐক্য নাই। ইংরেজীতে যাহাকে authentic বলে, ইহাদের অস্থূভূতি সেইরূপ authentic বা সমূলক নয়। বেশ বৃদ্ধিতে পারা যায়, যাহা বর্ণিত হইতেছে, তাহাতে প্রচুর ভান বা ফাঁকি আছে, প্রত্যক্ষ দর্শনের উপলব্ধি তাহাতে নাই; এজন্য ভাষার সকল প্রসাধনই কৃত্রিম। এই কৃত্রিমতার জন্মই এই সকল রচনার কোন ষ্টাইল নাই। যাহা দেখি নাই, অর্থাৎ যাহার সম্পূর্ণ প্রকাশ অস্তরে হয় নাই, বাহিরেও তাহার প্রকাশ অসম্পূর্ণ হইবেই। দৃষ্টি না হইলে সৃষ্টি হইতে পারে না; আবার সৃষ্টি যে নাই, তাহার প্রমাণ এই ষ্টাইলের অভাব। এজন্য পূর্বে যে ষ্টাইল-তত্ত্বের কথা বলিয়াছি, তাহাকে দৃষ্টি-সৃষ্টিবাদ বলা যাইতে পারে, এবং সাহিত্য-বিচারে এই তত্ত্বের বিশেষ উপযোগিতাও স্বীকার করিতে হয়। এই দৃষ্টিই কবিদৃষ্টি, এই শক্তিই প্রতিভা; যেখানে সেই দৃষ্টি ঘটয়াছে, সেইখানেই রচনার সৃষ্টির সকল লক্ষণ প্রকাশ পাইবে।

কিন্তু সবচেয়ে লক্ষ্য করিবার বস্তু—এই সকল রচনার দূষিত ভাষা; অর্থাৎ ভাষাই রচনার সর্বস্ব। যিনি সাহিত্যসৃষ্টি করেন, তাহার সবচেয়ে বড় সাধনা বা তপস্বী ভাষাকে লইয়া; সাহিত্য যদি একটা আর্ট হয়, তবে শুধু এই অর্থেই। তাই ভাষার বিষয়ে সাহিত্যশিল্পীর যত্ন ও ভাবনার অন্ত নাই। কিন্তু আধুনিক লেখকগণের ভাষা সম্বন্ধেই ভাবনা সব চেয়ে কম; তাহার কারণ, যে দৃষ্টির বলে সৃষ্টির প্রেরণা জাগে, সে দৃষ্টি ইহাদের নাই, এবং সেইজন্য কোন-কিছুকে সম্পূর্ণ রূপ দিবার প্রয়োজনই হয় না; যদি সে প্রয়োজন হইত, তাহা হইলে ভাষার

দ্বারা সাধ্য-সাধনা করিতেই হইত। অতএব, সাধারণ পাঠকের পক্ষে সাহিত্য-বিচারের সর্বাপেক্ষা সহজ উপায়—রচনার ভাষাটিকে যাত্র পরীক্ষা করা, এবং সে বিষয়ে ইহাই মনে রাখা যে, mannerism বা কৃত্রিম ভঙ্গিমা—অথবা ব্যাকরণ, অভিধান ও ইডিয়মের বিকৃচ্ছাচরণ—ইচ্ছাকৃত হইলেও, স্বতন্ত্র ঠাইলের লক্ষণ নয়; তাহা লেখকেরই অক্ষমতা ও অযোগ্যতার নিঃসংশয় প্রমাণ। মনে রাখিতে হইবে যে, যে-রচনাকে আমরা সাহিত্যিক সৃষ্টি বলি, তাহা কোন মত, তথ্য বা তত্ত্ব-প্রচারের বাহন নয়, তাহা তর্কবিতর্ক নয়—কাহিনী; তাই পরিস্ফুট, পরিচ্ছন্ন ও স্ফুটিল ভাষাই তাহার সর্বস্ব। এই ভাষার দোষ থাকিলে বৃষ্টিতে হইবে, লেখকের লেখক-জন্মই সত্য নহে, এবং রচনাও সাহিত্যপদবাচ্য নয়।

তথাপি, এই কালের এই কৃত্রিম রচনারাশির মধ্যে এমন রচনাও বিরল নয়, যাহাতে লেখকের শক্তির নিঃসংশয় প্রমাণ আছে। যদিও ইহাদের দৃষ্টি অসম্পূর্ণ, অসুভূতি সংশয়ক্লিষ্ট, ও কল্পনা সঙ্কীর্ণ, তথাপি ইহারাই সাহিত্যসাধনার ধারাটিকে এখনও রক্ষা করিতেছেন। খাঁটি সৃষ্টিশক্তির পরিচয় না দিলেও, ইহারা জগৎ ও জীবনের অনেক অনাবিকৃত তীর্থ এবং মানব-মনের অনেক নূতন ও সূক্ষ্ম অসুভূতির সন্ধান দিয়াছেন। আমাদের দেশে এ যুগেও এমন যে দুই চারিজন লেখকের সাক্ষাৎ আমরা পাইয়াছি, তাঁহাদের রচনাতেই কবিচিন্তা ও সাহিত্যের স্বরূপ সম্বন্ধে আমরা কিয়ৎ পরিমাণে আশ্বস্ত হইয়া থাকি।

সর্বশেষে আমি দুইটি উক্তি উদ্ধৃত করিয়া আলোচনা শেষ করিব। আধুনিক সাহিত্যের আদর্শ ও মূল্য সম্বন্ধে এক বিখ্যাত ইংরেজ লেখিকার উক্তি এইরূপ—

“It seems that it would be wise for the writers of the present to renounce the hope of creating masterpieces. Their poems, plays, biographies, novels are not books but note-books, and time like a good schoolmaster, will take them in his hands, point to their blots and scrawls and erasions, and tear them across; but he will not throw them into the waste-paper basket. He will keep them because other students will find them very useful. It is from the note-books of the present that the masterpieces of the future are made.”

অপরটি আমাদের শ্রেষ্ঠ সাহিত্যিক রবীন্দ্রনাথের উক্তি, তিনিও বলেন—
 “কিন্তু সকল মানুষের বিচারবুদ্ধি বড় নয়, সকল সমাজও বড় নয়, এবং এক
 একটা সময় আসে, যখন কণিক ও ক্ষুদ্র মোহে মানুষকে ছোট করিয়া দেয়,
 তখন সেই ছঃসময়ের বিকৃত দর্পণে ছোট বড় হইয়া দেখা দেয়, এবং তখনকার
 সাহিত্যে মানুষ আপনার ছোটকেই বড় করিয়া তোলে—আপনার কলঙ্কের
 উপরেই স্পর্শকার সঙ্গে আলো ফেলে। তখন কলার বদলে কৌশল, গৌরবের
 জায়গায় গর্ব, এবং টেনিসনের আসনে কিপ্লিংডের আবির্ভাব হয়।

“কিন্তু মহাকাল বসিয়া আছেন। তিনি ত সমস্তই ছাঁকিয়া লইবেন।
 তাঁহার চালুনির মধ্য দিয়া যাহা ছোট তাহা গলিয়া ধূলায় পড়িয়া ধূলা হইয়া
 যায়। নানা কাল ও নানা লোকের হাতে সেই সকল জিনিসই টেকে—যাহার
 মধ্যে সকল মানুষই আপনাকে দেখিতে পায়। এমনি করিয়া বাছাই হইয়া যাহা
 থাকিয়া যায়, তাহা মানুষের সর্বদেশের সর্বকালের ধন।

“এমনি করিয়া ভাঙ্গিয়া গড়িয়া সাহিত্যের মধ্যে মানুষের প্রকৃতির, মানুষের
 প্রকাশের, একটি নিত্যকালীন আদর্শ আপনি সঞ্চিত হইয়া উঠিতেছে। সেই
 আদর্শই নূতন যুগের সাহিত্যের হাল ধরিয়া থাকে। সেই আদর্শমতই যদি
 আমরা সাহিত্যের বিচার করি, তবে সমগ্র মানবের বিচারবুদ্ধির সাহায্য
 লওয়া হয়।”

বাঙালী ও বাংলা-সাহিত্য

আজ আপনারা আমাকে যে সাহিত্যের প্রতিনিধিরূপে এই সভায় আহ্বান করিয়াছেন, সেই বাংলা-সাহিত্যের নামেই, আমি আজ আপনাদের সম্মুখে দাঁড়াইয়াছি ; অতএব আপনারা আমাকে ভুল বুঝিবেন না। ব্যক্তিগতভাবে এই সম্মানের প্রতি আমার লোভ নাই, কারণ আমি ছোট হইলেও আমার আদর্শ বড়, আপনাদের এই মহতী সভায় সেই আদর্শই আমাকে উতলা করিয়াছে। আজ আমার বিশেষ করিয়া যে দুই মহাপুরুষকে মনে পড়িতেছে সেই দুইজন—বঙ্কিমচন্দ্র ও রামেন্দ্রসুন্দর। বাংলা-সাহিত্যের সাধনক্ষেত্রে কত বড় প্রতিভা ও প্রেম, এবং কতখানি ভক্তি ও নিষ্ঠা একদিন বিরাজ করিয়াছিল তাহাই স্মরণ করিয়া আজ এই সাহিত্য-সভার নেতৃত্ব করিতে আমি লজ্জায় অবসন্ন হইতেছি। তাই অপরাধ-ভঙ্গনের জন্ম আমি প্রথমেই সেই দুই মহাপুরুষের নাম কীর্তন করিব। বাংলা-সাহিত্যকে উজ্জীবিত করিতে ও বাঙালীকে প্রাণমস্ত্রে দীক্ষিত করিতে বঙ্কিমচন্দ্রের সমকক্ষ বীর্যবান সাহিত্যিক বাংলা দেশে আজিও জন্মগ্রহণ করেন নাই। উনবিংশ শতাব্দীর শেষার্ধ্বে সাহিত্যের মধ্য দিয়াই আমাদের যে জাতীয় জাগরণ ঘটিয়াছিল—সেই সাহিত্যের জনক, ও সেই জাগরণী-মন্ত্রের উদগাতা ছিলেন বঙ্কিমচন্দ্র। সে প্রতিভার মূলে ছিল প্রেম—শুধুই কাব্যপ্রেরণা বা আত্মভাবসাধনা নয় ; সে প্রেমও যত বড়, প্রতিভাও তত বড়—এমন আর হয় নাই। তাহার ফলে সেদিন যাহা হইয়াছিল, আর এখন যাহা হইতেছে—তুলনা করিলেই আপনারা বুঝিতে পারিবেন, সাহিত্যেও কবি অপেক্ষা মানুষ বড় ; প্রতিভার সঙ্গে প্রেম না থাকিলে সকল কীর্তিই নিষ্ফল। অতি-বড় প্রতিভাও যদি প্রেমহীন হয়, তবে তাহা জাতি, তথা জাতীয় সাহিত্যের প্রাণধারা পুষ্ট করিতে পারে না। আজিকার এই সাহিত্য-সভায় আপনারা সেই জাতিগত-প্রাণ মহাকবি ও মহামনীষীর উদ্দেশে প্রণাম করিয়া এই অনুষ্ঠানকে কল্যাণ ও জয়যুক্ত করুন।

অপর যে মহাপুরুষকে আমি এইরূপে স্মরণ করিতেছি, তাঁহার সাহিত্যিক প্রতিভা বিরাট নহে, কিন্তু জ্ঞানের সহিত যে প্রেম ও শ্রদ্ধা তাঁহার সাহিত্য-

সেবাকে মহিমাষিত করিয়াছিল- তেমনটি আর কোথাও দেখি নাই। জাতির যাহা শ্রেষ্ঠ সাধনা ও প্রকৃত আধ্যাত্মিক সম্পদ তাহাকে মাতৃভাষার মধ্য দিয়া প্রবর্তিত ও সংবন্ধিত দেখিবার কি আকুল আকাঙ্ক্ষাই তাঁহার ছিল! জ্ঞান-সমুদ্রকে গণ্ডুবে শুষ্কিয়া লইবার পিপাসা যেমন তাঁহার আয়ুষ্কয়ের কারণ হইয়াছিল, তেমনই সেই ব্রহ্মনিষ্ঠ ব্রাহ্মণের আত্মা মুহূর্তের জন্তও আপন স্বাভাৱ্যবোধ ত্যাগ করে নাই—মাতৃভাষার প্রতি প্রেম যেন তাঁহার আত্মার আত্মমর্যাদার সহিত জড়িত হইয়া ছিল। একদিকে বঙ্কিমচন্দ্র ও অপরদিকে রবীন্দ্রনাথ—বাংলা-সাহিত্যের এই দুই মেরুচূড়াকে তিনি তাঁহার অন্তরের উষালোকে উদ্ভাসিত করিয়া স্তুতি-নিবেদন করিতেন; তিনি অতীত ভারতীয় সভ্যতাকেই বাঙালীর প্রতিভায় প্রতিভাত করিয়াছিলেন; পরা ও অপরা বিদ্যাকে, দর্শন ও বিজ্ঞানকে, বেদমাতা গায়ত্রী ও আধুনিক গীতিচন্দকে—তিনি এক ভাবের সূত্রে গাঁথিয়াছিলেন, এবং বাংলা ভাষার ভাগীরথীকূলে সেই ভাবকল্পতরুটিকে রোপণ করিতে চাহিয়াছিলেন। তাঁহার পিতৃমাতৃভক্তিও এই দেশভক্তির সঙ্গে এক হইয়া গিয়াছিল—মাতৃভাষার অক্ষরমালায় তিনি আপন মোক্ষমন্ত্র জপ করিয়াছিলেন। বন্ধুগণ, আজ আমি সেই মহাপুরুষকে স্মরণ করিতেছি—যিনি জীবনে এমন একটি উৎকৃষ্ট চিন্তা করেন নাই, সাধনায় এমন কিছু লাভ করেন নাই যাহা তাঁহার মাতৃভাষাকে দান করিয়া যান নাই। তিনি ছিলেন বাণীর বীর-ভক্ত, তেমন ভক্ত এ পর্য্যন্ত আর দেখিলাম না—বঙ্গভারতীর চরণসরোজে এমন শুচি-শুভ্র ও প্রেমারুণ অল-আবীর আর কেহ অর্পণ করেন নাই। আজিকার সভায় সেই মহাপুরুষের স্মৃতিতর্পণ করিয়া আমাদের প্রাণ সাহিত্য-প্রেমে পূর্ণ হউক।

এই দুই মহাপুরুষের মাহাত্ম্য স্মরণে রাখিয়া, আমি আধুনিককালে বাঙালীর সাহিত্য-প্রীতি ও সাহিত্য-সেবার সম্বন্ধে দুই-চারি কথা বলিব—সে কথা আপনাদের প্রীতিকর হইবে না, আমার পক্ষেও প্রীতিকর নহে। আমি একমাত্র সাহিত্য-নীতি ও সাহিত্যিক আদর্শের দিক দিয়াই চিন্তা করিয়াছি—রাজনীতি বা সামাজিকতার কূটনীতি তাহাতে নাই; সত্যকে প্রিয় করিবার, অসত্যকে শোভন করিবার প্রবৃত্তি তাহাতে নাই; বক্তৃতামঞ্চে ও সংবাদপত্রে কোনও তর্ক বা তথ্যকে যে উপায়ে উপায়ে করিয়া না তুলিলে গণ-দেবতার তুষ্টি সাধন হয়

না, দুর্ভাগ্যক্রমে আমার বুদ্ধি বিপরীত বলিয়া সে উপায় আমার জানা নাই ; এ জন্ত আপনারা আমার উক্তিগুলির উপদেশতা সম্বন্ধে আশাশ্রিত হইবেন না। আমি প্রথমেই শিক্ষাক্ষেত্রে আমাদের মাতৃ-ভাষা ও সাহিত্যের যে অবস্থা দেখিতেছি তাহার কথাই বলিব।

আধুনিক বাংলা-সাহিত্য ও সেই সাহিত্যের ভাষা অতি অল্পদিন হইল উচ্চশিক্ষার বাহন ও বিষয়রূপে কিঞ্চিৎ মর্যাদা লাভ করিয়াছে ; এককালে ইহা কল্পনা করা যাইত না। কিন্তু এই মর্যাদার মূলে আন্তরিক শ্রদ্ধা বা প্রয়োজনীয়তা-বোধ নাই। আধুনিক সাহিত্যের ইতিহাস যাহারা জানেন তাঁহারা অবশ্যই লক্ষ্য করিয়া থাকিবেন, এই সাহিত্য বাঙালী সম্পূর্ণ পৃথকভাবে গড়িয়া তুলিয়াছে—উচ্চ শিক্ষার কেন্দ্র হইতে দূরে স্বতন্ত্রভাবে ইহা গড়িয়া উঠিয়াছে। বিদ্যাসাগর প্রভৃতি মহাপুরুষের কল্পনায় হয়তো ছিল যে, একদিন মাতৃভাষাই আমাদের জ্ঞান-চর্চার সহায় হইবে, এজন্ত বাংলা-সাহিত্যের সেই শৈশবকালে তাঁহারা বাঙালী-সাধারণকে নব-বিদ্যার প্রাথমিক শিক্ষায় শিক্ষিত করিবার জন্ত মাতৃ-ভাষার উদ্ধার ও সংস্কার-কার্যে আত্মনিয়োগ করিয়াছিলেন। কিন্তু সবচেয়ে উল্লেখযোগ্য এই যে, সেকালের ইংরেজী-শিক্ষিত সমাজের একটা অংশ মাতৃভাষা ও সাহিত্যের প্রতি বিশেষ অনুরাগী ছিলেন—ইহার প্রতি তাঁহাদের সুগভীর শ্রদ্ধা ছিল। আজ যখন বাংলা-সাহিত্য শৈশব—এমন কি বাল্যও অতিক্রম করিয়াছে, তখন তাহার প্রতি সেই শ্রদ্ধারই অভাব দেখা যাইতেছে, কারণ শিক্ষাভিমानी বাঙালীর সে মনোভাব আর নাই। তখনকার শিক্ষার আদর্শ হয়তো এখনকার মত এত অতুল্য ছিল না, কিন্তু শিক্ষিত-মন বলিয়া একটা পদার্থ তখন দুর্লভ হয় নাই, এবং শিক্ষার মূলে তখন কল্যাণবুদ্ধি ও সত্যনিষ্ঠা ছিল। তখন শিক্ষিত অ-সাহিত্যিকের তুলনায় অশিক্ষিত সাহিত্যিকের সংখ্যা অল্পই ছিল—সাহিত্য অপেক্ষা সাহিত্যিকের গৌরব অধিক হইতে পারে নাই। তখন বিশ্ববিদ্যালয়ে মাতৃভাষা স্থান পায় নাই বলিয়াই, বোধ হয়, বাঙালীর হৃদয়-আসনে তাহার একটু স্থান ছিল—এত মিথ্যা তখন গর্ব ও দস্তভরে বিদ্যার রাজপথে পদক্ষেপ করিয়া বেড়াইত না। আপনারা বোধ হয় আমার কথায় বিস্মিত হইতেছেন, হয়তো বা ক্ষুব্ধ ও রুষ্ট হইতেছেন। যে যুগে বাঙালীর জাতীয়তা-বোধ এত প্রখর হইয়াছে, এবং সেই কারণে মাতৃভাষার প্রতি সম্মানের অবধি

নাই—শুধুই সর্বোচ্চ পরীক্ষার বিষয়রূপে নির্দিষ্ট হয় নাই, উচ্চ শিক্ষার বাহন হইতে চলিয়াছে, যে যুগে ভাষা-সাহিত্যে পণ্যবীথিকা ভরিয়া উঠিতেছে, এবং দুঃখপোষ্য শিশুগণ তাহাদের গব্যরসপিপাসা সাহিত্যরসেই মিটাইতে পারিতেছে—সেই যুগে মাতৃভাষার প্রতি শ্রদ্ধা নাই, এ কেমন কথা? বন্ধুগণ, কথাটা বড়ই অশ্রদ্ধায়, তাহা আমিও স্বীকার করি; কিন্তু তথাপি সত্য বলিয়াই যে মনে হয়।

আপনারা নিশ্চয়ই বিশ্ববিদ্যালয়ে বাংলা ভাষার প্রতিষ্ঠার কথা ভাবিয়া পুলকবিহ্বল হইয়া থাকেন,—এইরূপ অতি সহজ পুলকবিহ্বলতা বাঙালী-চরিত্রের একটি মহৎ গুণ। আমার মনে আছে, একবার কোনও একটি অতি উচ্চপদস্থ বাঙালী সাহেব কোনও এক স্বজাতীয়-সভায় ধূতি-চাদর পরিয়া সভাপতিত্ব করিয়াছিলেন—তাঁহার ধন মান বিদ্যা বুদ্ধি যেমন ভারতবিশ্রুত ছিল, তেমনই সাহেবিয়ানার সিদ্ধসাধকরূপে তিনি খ্যাতি অর্জন করিয়াছিলেন। ধূতি-চাদরের প্রতি এ-হেন ব্যক্তির অহুরাগ দর্শনে আমরা সে দিন এমনই পুলকবিহ্বল হইয়াছিলাম যে, মনে হইয়াছিল, এতদিনে বাঙালীর কুল পবিত্র এবং বঙ্গজননী কৃতার্থা হইলেন। যে বিশ্ববিদ্যালয়ে ইংরেজীর মানসপুত্রগণ পরম গৌরবে অধিষ্ঠান করেন; সেখানে বাংলা ভাষাকে একটু লক্ষ্যস্থল দেওয়া যে কত-খানি দাক্ষিণ্যের কাজ তাহা আমরা বুঝি—এত বড় বাঙালী-সাহেবের পক্ষে ধূতি-চাদর পরিধান করা অপেক্ষা তাহা কম নয়, অতএব আমাদের পুলকিত হওয়া কর্তব্য বটে। কিন্তু তাই বলিয়া মাতৃভাষার সহিত বিশ্ব-বিদ্যার কোন-রূপ ঘনিষ্ঠ সম্পর্ক-স্থাপনের আশা করাও অশ্রদ্ধায়। বিশ্ববিদ্যালয়ে কোনও গবেষণা বা মৌলিক তত্ত্বসন্ধান সাধারণত মাতৃভাষায় হইতে পারে না, এমন কি দেশীয় সাহিত্য বা সংস্কৃতিমূলক গবেষণাও ইংরেজীতে হওয়াই প্রশস্ত। সম্প্রতি এ বিষয়ে নিয়ম-বন্ধন কিছু শিথিল করিলেও, যে সকল মৌলিক রচনা জ্ঞাতির জ্ঞানভাণ্ডার বৃদ্ধি করে বলিয়া বৃত্তি বা উপাধি দ্বারা পুরস্কৃত হয়, তাহাদের প্রায় কেহই মাতৃভাষার সম্পদ বৃদ্ধি করে না—সে অভিপ্রায় থাকিলে অহুরূপ ব্যবস্থাও হইতে পারিত। বিশ্ববিদ্যালয়ে বাংলা ভাষা ও সাহিত্যের যে অধ্যাপনা হইয়া থাকে, তাহাও প্রাসঙ্গিক ভাবে; অর্থাৎ তাহা মুখ্যত বাংলা-সাহিত্যের অহুশীলন নয়—‘ইণ্ডিয়ান ভার্নাকুলারস্’-এর একটা প্রসঙ্গ মাত্র। ইহার ফলে এই বিদ্যায় যাহারা উপাধি লাভ করিয়া থাকেন, তাঁহাদের সাহিত্য-জ্ঞান তো

পরের কথা—বর্ণাশ্রমের বিষয়েও তাঁহাদের মহাজনসুলভ উদারতা বিস্ময়কর ! পাঠপদ্ধতি ও পাঠ্য সম্বন্ধে যাহারা ব্যবস্থা দিয়া থাকেন তাঁহাদের সকলকে বাংলা-সাহিত্য সম্বন্ধে বিশেষজ্ঞ হইতে হয় না। যে-কোনও অপর বিজ্ঞান পারদর্শী হইলেই হইল—এমন কি তিনি যদি কেবল গণিতবিজ্ঞা-বিশারদ হন তথাপি তাঁহার মত গ্রাহ্য হইবার যোগ্য ! অনেক দিন পূর্বে যে গল্প শুনিয়াছিলাম তাহা যে এত সত্য তাহা তখন ভাবি নাই—রহস্য কথা বলিয়াই মনে হইয়াছিল। কোনও এক ‘মেসে’র বাসায় পাচকের অস্থখ হওয়ায় বাবুরা বিপন্ন হইয়া পড়েন; তখন তাঁহাদেরই মধ্যে এক ব্রাহ্মণসন্তান সে দিনের মত সমস্তার সমাধান করিতে অগ্রসর হইলে, একজন তাঁহার রন্ধন-বিজ্ঞা সম্বন্ধে সম্বন্ধ প্রকাশ করায় তিনি নাকি বলিয়াছিলেন—উহা তাঁহার মাতৃভাষা, অতএব বিজ্ঞার কথা নিতান্তই অবাস্তব। পাঠ্যনির্বাচন বা সঙ্কলনেও যে বিচারবুদ্ধি, জ্ঞান ও পরিশ্রমের পরিচয় পাওয়া যায় তাহার উল্লেখ আশা করি নিশ্চয়োক্তন। স্কুলে যেমন বাংলার শিক্ষক অল্পপস্থিত থাকিলে, যে কোনও শিক্ষক—এমন কি অবস্থা-বিশেষে কেয়ানিবাবুও কাজটা চালাইয়া দিলে নিতান্ত অসঙ্গত বা অশোভন হয় না, তেমনই বাংলার উচ্চতম অধ্যাপক পদে নিযুক্ত হইতে হইলে, বাংলা বিজ্ঞা যেমন-তেমন—অপর যে কোনও বিজ্ঞার অধিকারী হইলেই চলে। আপনারা ইহাও জানেন যে, বাংলা-সাহিত্যের অধিকাংশই ছুপ্রাপ্য, এমন কি আধুনিক সাহিত্যের যেগুলি ‘ক্লাসিক্‌স্’, সেগুলি আর মুদ্রিত হয় না—কিন্তু তজ্জন্য কোনও অস্থবিধা হয় না, কারণ বিষয়টির নাম “ইণ্ডিয়ান ভার্নাকুলারস্”—বাংলা-সাহিত্য তো নয় !

এতক্ষণ যাহা বলিলাম তাহা যদি মোটের উপরেও সত্য হয়, তবে বাংলা-সাহিত্যের সম্মানবৃদ্ধির জন্য পুলকিত হইবার কারণ নাই, বরং ইহাতে শঙ্কিত হইবার কারণ আছে। যেখানে শ্রদ্ধা নাই, সেখানে একরূপ সম্মান হিতকর না হইয়া অহিতকর হইয়া থাকে। এতদিন এ সাহিত্যের যেটুকু সত্যকার সাহিত্য, তাহাই সাহিত্যরসিকের শ্রদ্ধা আকর্ষণ করিয়াছে—এক্ষণে যাহা সাহিত্য-হিসাবে অপাত্তের তাহাও এই কৃত্রিম সম্মানের জোরে শ্রদ্ধা দাবি করিবে, কলে ক্রমশ সাহিত্যের আদর্শই অবনত হইবে। বাংলা-সাহিত্যের পক্ষে ইহা যে কতখানি অনিষ্টকর আপনারা তাহা চিন্তা করিয়া দেখিবেন।

বাংলা-সাহিত্যের প্রতি বাঙালী শিক্ষিত সমাজের প্রীতি ও অহুসারের পরিমাণ, বাজারে নং-সাহিত্যের চাহিদা হইতেই অনুমান করা যাইতে পারে। আমার মনে হয়, বাংলা সাহিত্য-গ্রন্থ আজকাল বড় কেহ পড়েন না, সাময়িক পত্রিকাগুলির পাত্রেই সকলে অবসর মত এক আধ চুমুক সাহিত্যরস পান করিয়া থাকেন। অতি কদর্যা কাগজে ছাপা স্থলভ-সংস্করণ গ্রন্থাবলী না থাকিলে, বঙ্কিম, মধুসূদনকে বোধ হয় রামরাম বহু ও মৃত্যুঞ্জয়ের পর্যায়ভুক্ত হইতে হইত ; রবীন্দ্রনাথের 'গল্পগুচ্ছে'র ছাপা-কাগজ বোধ হয় একই কারণে অত্যুচ্চ 'ক্লাসিকে'র লক্ষণাক্রান্ত হইয়াছে ; এবং 'চন্দন', 'সঞ্চয়ন', 'চরনিকা' প্রভৃতির প্রসাদেই কবিগণের কিঞ্চিৎ পরিচয় পাঠক-সমাজের গোচর হইয়া থাকে।

এ যুগ মুখ্যত পত্রিকার যুগ—কণজীবী সাহিত্যের যুগ। উপভাস ভিন্ন আর কোনও রচনা গ্রন্থাকারে প্রকাশিত করিবার দুর্ভূক্তি কোনও প্রকাশকের নাই—বাঙালী পণ্ডিতগণ মাতৃভাষায় লিখিত আর কোনও ধরণের গ্রন্থ স্পর্শ করেন না। পত্রিকাগুলি সাধারণত অর্ধশিক্ষিত যুবক-যুবতীর দিবানিদ্ৰা আকর্ষণের ঔষধস্বরূপ ব্যবহৃত হইয়া থাকে ; সম্পাদকগণ সাধারণত সেইদিকেই লক্ষ্য রাখেন—এবং সম্পাদকের কোনরূপ পাণ্ডিত্য না থাকিলেই কাজটি আরও সহজ হয়। বাংলা মাসিকপত্রিকাগুলির জীবিকা-নির্বাহের প্রধান উপায় দুইটি—ছবি ও গল্প। ছবি দুই প্রকার—চিত্র ও বিচিত্র : চিত্রগুলি দেহের, ও বিচিত্রগুলি ক্ষিত্যপ্তেজস্বরূপব্যোমের মানচিত্র। এইগুলি পাঠকমণ্ডলীর সাহিত্যিক অগ্নিমান্দ্য দূর করে—অতিশয় লঘু পথ্য, উন্টাইয়া গেলেই পাঠ শেষ হয় ; গল্পগুলিও অতিশয় সুপাচ্য। এই সকল পত্রিকায় আর সকলই থাকে, থাকে না কেবল সাহিত্যের কথা। যে সকল আলোচনা ও গ্রন্থ-সমালোচনা কোন কোন পত্রিকায় প্রকাশিত হয়, তাহাও সম্পাদকের সাহিত্য-জ্ঞান ও দায়িত্ববোধের প্রকৃষ্ট নিদর্শন। এমনও দেখিয়াছি যে, গল্প বা প্রবন্ধের ভাষায় অতিশয় স্পষ্ট ইডিয়ম-দোষ রহিয়াছে, সম্পাদক সেটুকুও সম্পাদন করিয়া দেওয়া আবশ্যিক মনে করেন নাই।

আমাদের দেশে এই সাময়িক পত্রিকাগুলিই সাহিত্যে গণতন্ত্রের প্রতিষ্ঠা করিয়াছে—এই গণতন্ত্র, সাহিত্যকে যেমন, তেমনই সাহিত্যিককেও প্রীতি করে না। পত্রিকাগুলিতে আগনারা যে কোনও রামা-শ্রামার কোঠা প্রকাশিত

হইতে দেখিবেন ; আর দেখিবেন কলার-টাই-ধারী অসংখ্য বালবৃদ্ধযুবার প্রতিকৃতি ; কেহ বড় চাকুরিয়া, কেহ বা ছুৰুচাৰ্য্য নামধারী সাধারণশ্রেণীর পণ্ডিত, কেহ বা কোনও বড়লোকের বিলাতযাত্রী বংশধর ; বিলাতপ্রত্যাগত হইলে অবশ্য অগ্র পরিচয়ের প্রয়োজন থাকে না, জাতির গৌরববৃদ্ধি করিতে এমন গুণ আর নাই ! ইংরেজীতে যাহাকে snobbery বলে, এ যুগে সৰ্বত্র তাহাই প্রকট ; ইহা হইতে আমাদের পোলিটিক্যাল গ্যাশ্চালিজ্‌ম্-এর মূলমন্ত্র বুঝিতে বিলম্ব হয় না । কিন্তু ইহাদিগের মধ্যে সাহিত্যিকের ছবি নাই । আজকাল অবশ্য সিনেমা-অভিনেত্রী ও নৃত্যকলাবিলাসিনীর প্রতিপত্তিই অধিক—ময়ূরবাহন সাহিত্যের কুমার-সম্প্রদায় একগুণে ‘উষার উদয়সম অকুণ্ঠিতা’ এই সকল উৰ্বশীকেই তাঁহাদের ইষ্টদেবীরূপে বরণ করিয়াছেন ।

এই যে সাহিত্য, যাহার গৰ্ব্ব আমরা করিয়া থাকি, তাহা যাহারা গড়িয়া তুলিয়াছিলেন, তাঁহারা অর্থ যশ বা সম্মানের প্রত্যাশা করেন নাই—পণ্ডিত-সমাজে প্রতিষ্ঠানাভের কামনাও করেন নাই । যাহার যেমন শক্তি—তিনি নিঃস্বার্থভাবে সেই মত দান করিয়া গিয়াছেন, সেই ক্ষুদ্র ও বৃহৎ দানেই আমাদের সাহিত্যভাগ্যের পূর্ণ হইয়াছে । কিন্তু দিন-দিন সেই প্রাণ ক্ষীণ হইয়া আসিতেছে—সেই সাহিত্যিক দান ও প্রেমের সেবা বিরল হইয়া উঠিতেছে । আজ সাহিত্যের প্রাক্‌গণে সাধনাহীন Dilettante ও চতুর Adventurer-এর দল বৃদ্ধি পাইতেছে ; ফলে, আসল ও মেকী—সাধু ও ভণ্ডের পার্থক্যজ্ঞান লোপ পাইতেছে । অতি-আধুনিক সাহিত্য নামে যে নাসাকর্ণহীন জীব কিছুকাল পূর্বে জন্মিয়া এখন তাহার জীবনীলা প্রায় শেষ করিয়া আনিয়াছে, তাহার সম্বন্ধে সবচেয়ে লজ্জার কথা এই যে, তাহার জাতকর্মে অস্থ্যানে যোগ দিয়াছিলেন প্রায় সকল প্রবীণ ও প্রৌঢ় সাহিত্যিক—ব্যভিচার ও অতিচারের শেষ সীমা পর্য্যন্ত ইহারা সাক্ষাতে বা পরোক্ষে তাহাকে লালন করিয়াছেন । আমি সাহিত্যের পক্ষ হইতে উক্ত জীবটির বিপক্ষে কিছু বলা নিম্প্রয়োজন মনে করি, কারণ, সত্যকার সাহিত্য সৃষ্টিই হয়, নষ্ট হয় না ; অতএব উহাতে সেই সাহিত্যের কোনও ক্ষতি হয় নাই । কিন্তু এই অনাচারকে প্রশ্রয় দেওয়ার ফলে সাহিত্যের প্রতি জাতির শ্রদ্ধা আরও হ্রাস হইয়াছে—সাহিত্যের নামে আপামরসাধারণের মনে একটা ‘বোল হরিবোল’-ভাব ক্রমশ বাড়িয়া উঠিতেছে । আমার মনে হয়,

আজকাল সাহিত্য-সম্মেলনে যে নানা শাখার সৃষ্টি করিতে হয়, ইহার কারণ আর কিছুই নহে—উত্তোক্তাগণের মনে আশঙ্কা জাগে যে, কেবল সাহিত্য বা সাহিত্যিক লইয়াই বড় একটা কিছু করা সম্ভবপর নহে। এই জন্মই বোধ হয়, আপনারাও দর্শন প্রভৃতির দ্বারা একটু সম্মম রক্ষা করিয়া, পরে সাহিত্যিক ‘রস’-চর্চার আয়োজন করিয়া থাকেন। বাংলা মাসিকপত্রেরও দেখিতে পাই, প্রথমেই একটা গুরুগম্ভীর দার্শনিক বা বৈজ্ঞানিক প্রবন্ধ না হইলে পত্রিকার যেন মানরক্ষা হয় না। আপনাদের দোষ নাই; আজকাল সাহিত্যিক লইয়াই কোনও ভদ্র-সভা করা চলে না। কারণ, ‘সাহিত্যিক’ নামে যে একটি বৃহৎ সম্প্রদায় অধুনা বিস্তারলাভ করিয়াছে, তাহারা সত্যই জাতিহীন। জাত হারাইলেই যেমন বোষ্টম হয়, তেমনই আজকাল স্বভাব হারাইলেই সাহিত্যিক হয়। সমাজে ইহাদিগকে দেখিলে অতিশয় সরল গ্রাম্য ব্যক্তিরূপে চিনিতে পারে, এবং অবজ্ঞা ও বিশ্বয়মিশ্রিত ভাবে বলিয়া উঠে—‘উনি একজন সাহিত্যিক’। ‘বাংলায় এম্-এ’ বলিলে শিক্ষিত সম্প্রদায়ের মনে যে ভক্তির উদ্রেক হয়, ‘সাহিত্যিক’ বলিলে ভদ্রলোকমাত্রেই মনে ঠিক তদ্রূপ ভাবই জাগে। ভেক ধারণ করিলেই যেমন ভিক্ষা মেলে, একটি ডুগডুগি বা একতারা লইয়া গৃহস্থের নিদ্রাভঙ্গ ও তণ্ডুলহরণ দুই কার্যই নির্বিঘ্নে সমাধা হয়—গৃহস্থ তাড়াইয়াও দেয় না, বসিতেও বলে না—আধুনিক সাহিত্যিকগণের সামাজিক অবস্থা সেইরূপ। এ জন্ম আমি আপনাদের সকলকেই ঐ জাতিভুক্ত করিতে চাহি নাই; আমার জাতি গিয়াছে বলিয়া আপনাদের সকলের জাতি মারিব কেন ?

কিন্তু ইহার জন্ম দায়ী কে ? বাংলা সাহিত্য ও সাহিত্যিকের এই দুর্বস্থা আমার অভিজ্ঞতা-মত আমি আপনাদের গোচর করিয়াছি। সাহিত্যের প্রতি যে অশ্রদ্ধা, মাতৃভাষার প্রতি যে নিদারুণ ঔদাসীন্য, আমি তলে তলে বহিতে দেখিয়াছি, আজ আপনাদের কাছে বড় দুঃখে তাহার কাহিনী বিবৃত করিলাম। বর্তমান যুগ হয়তো সাহিত্য-সৃষ্টির যুগ নয়, কিন্তু তাই বলিয়া সাহিত্যজ্ঞানও কি হারাইতে হইবে ? ভাষাটাকে পর্য্যস্ত নষ্ট করিতে হইবে ? বাঙালী আপনারা, আপনাদের অতি-আধুনিক বংশধরগণ যে ভাষায় ‘সাহিত্য’ লেখে, বাংলা দেশে সে ভাষা চলিত নয়, বাঙালী তাহা বোঝে না,—তাই বিলাতে পাঠাইয়া

সাহিত্য-বিধান

সাহেবকে দিয়া পড়াইয়া তাহার সার্টিফিকেট জোগাড় করিতে হয় ! ইহার জন্ত দায়ী কে ? আপনাই তো বিলাতী ডক্টরেট না পাইলে কাহাকেও সাহিত্য-চর্চা বলিয়া স্বীকার করেন না ।

অভিজ্ঞান দীর্ঘ হইয়া পড়িতেছে, তথাপি বাংলা-সাহিত্য সম্পর্কে আরও দুই একটি কথা আমার বলিবার আছে । কিছুকাল যাবৎ বাংলা ভাষা—সাহিত্যের ভাষা—লইয়া যে আন্দোলন শুরু হইয়া এক্ষণে কতকটা শান্ত ভাব ধারণ করিয়াছে, তাহার অভিপ্রায় ছিল বাংলা ভাষাকে মোদকখণ্ডিকার মত কড়াপাকের বদলে নরম পাক দেওয়া—আদি-রসগোল্লাকে স্পঞ্জ-রসগোল্লায় পরিণত করা । ইহার ফল কিঞ্চিৎ ফলিয়াছে—নূতন ফ্যাশন মাঝেই যতটা চলতি হয়, এই ভাষার ফ্যাশনও ততটা চলতি হইয়াছে । কারণ, এই ভাষাই বাংলা-সাহিত্যের নব-কার্ত্তিকদের উপযুক্ত বাহন—বেশ হালকা চালে চলে, আবার আবশ্যকমত একটু উড়িতেও পারে । প্রায় পঁচিশ বৎসরের অধিক কাল ইনি বাংলা-সাহিত্যের বাগানে ও বাগানবাড়িতে বিচরণ করিতেছেন, এবং বন্ধিমচন্দ্রের ভাষা ও শ্রীযুক্ত রবীন্দ্রনাথের ভাষাকে বাতিল করিয়া স্বমহিমা ঘোষণা করিতেছেন । ইহার বিরুদ্ধে এককালে যে কোলাহল হইয়াছিল, তাহা এক্ষণে আর শোনা যায় না ; তথাপি এতদিনে নিঃসংশয়ে প্রমাণিত হইয়াছে যে, আধুনিক সাহিত্যের যাহারা শক্তিশালী লেখক, যাহাদের যথার্থ সাহিত্য-সৃষ্টির প্রতিভা আছে, তাঁহারা এই ফ্যাশনের মোহ হইতে মুক্ত আছেন । কিন্তু এই ব্যাপারে আমি একটা বিষয় লক্ষ্য করিয়া বিস্মিত ও লজ্জিত হইয়াছি, তাহা এই যে, আমাদের দেশের অতিবড় ধুরন্ধরগণেরও সাহিত্যজ্ঞান এত অল্প যে, সাহিত্যের ভাষা লইয়া তাঁহারা এমন একটা প্রমাদের বশীভূত হইয়াছেন ! এখনও ভামহ-দণ্ডীর মোহ ঘুচিল না—সাহিত্যিক কোন্ ভাষায় সাহিত্য রচনা করিবেন, বাহির হইতে তাহার বিধান দেওয়া চলিবে ; এবং সে বিধান দিবেন ছাটকোট-মণ্ডিত আধুনিক মস্মটভট্ট ! এখনও ভাষার রীতিঘটিত কুসংস্কার ঘুচিল না—অথচ আর সর্ববিধ কুসংস্কার ঘুচিয়াছে ! বাংলা-সাহিত্য একটি আধুনিক সাহিত্য—সংস্কৃতপণ্ডিতগণ সেকথা না বুঝিতে পারেন, কিন্তু আধুনিক সাহিত্য-বিচারের মূলমন্ত্রগুলিও আমাদের দিক্‌পালদিগের জানা নাই ; সেই অজ্ঞতাজনিত অপূর্ব মতবাদ অজ্ঞতার সমাজে প্রচার করিবার চেষ্টা দেখিয়া লজ্জায়

অধোবদন হইতে হয়। ভাষার কোনও রীতি সাহিত্যবিচারের বহির্ভূত, তাহা কথাই হউক, আর সাধুই হউক। প্রত্যেক শক্তিস্থান সাহিত্যিক আপন বিশিষ্ট ভাবপ্রেরণার বশে যে ভাষায় আপনাকে প্রকাশ করেন, তাহাই তাঁহার ষ্টাইল বা স্বকীয় যথার্থ ভঙ্গি। বঙ্কিমচন্দ্রের ভাষা বা শরৎচন্দ্রের ভাষাকে যদি ব্যক্তিগত ষ্টাইল না বলিয়া কোনও একটা রীতি বলা সঙ্গত হইত, তবে অন্য কোনও রীতির কথা উঠিতে পারিত। যাহাকে কথ্যভাষা বলা হইয়া থাকে তাহা আদৌ কথ্য কি না সে তর্ক তুলিব না, কিন্তু সেই ভাষায় যদি কেহ সাহিত্য সৃষ্টি করেন, তবে সেই ভাষা সেই রচনারই ভাষা, এবং যদি তাহা লেখকের বিশিষ্ট ভাবচিন্তার যথার্থ ভঙ্গি লাভ করিয়া থাকে, তবে তাহা ষ্টাইল-গুণযুক্ত হইয়াছে। আবার, যদি সেই ভাবচিন্তার উৎকর্ষ ও মৌলিকতা উচ্চাঙ্গের হয় তবে সেই ষ্টাইলও উচ্চ সাহিত্যিক ষ্টাইল বলিয়া গণ্য হইবে। অতএব রচনাবিশেষ হইতে ভাষাকে পৃথক করিয়া কোনও একটা সাধারণ রীতির শ্রেষ্ঠত্ব দাবি করা যায় না, এবং তেমন রীতিকে সকল সাহিত্যিকের উপরে চাপাইয়া দেওয়া চলে না। যাহারা সাহিত্যের লেখকমাত্র, অষ্টা নয়—তাহারাই এইরূপ রীতির শরণাপন্ন হয়, এবং রীতিভেদ লইয়া কোলাহল করে। যাহারা এইরূপ কোনও রীতির প্রতিষ্ঠা দ্বারা আত্মপ্রসাদ লাভ করে এবং সাহিত্যিকের বুদ্ধিভেদ ঘটাইতে চেষ্টা করে, তাহারা যেমন মূর্খ, তেমনই আত্মশরী। অন্য দেশের সাহিত্য-সমাজ যে কথা শুনিবামাত্র হাসিয়া উড়াইয়া দিত, আমাদের দেশে সেই কথা বলিয়া সাহিত্যের সমাজপতি হওয়া যায়!

দ্বিতীয় এক সমস্যা কিছুকাল যাবৎ সাহিত্যের ক্ষেত্রে এক বান-প্রতিবাদের সৃষ্টি করিয়াছে—ইহার নাম বানান-সমস্যা। ইহা আদৌ একটি সমস্যা কি না সে বিষয়ে আমার মন এখনও সন্দেহাকুল আছে। সাহিত্যের সঙ্গে ইহার সাক্ষাৎ যোগ নাই বটে, কিন্তু এই সংস্কার-চেষ্টা অন্তর্ভাবে গোলযোগ সৃষ্টি করিবে। আমি এই সংস্কারের যুক্তিযুক্ততা সম্বন্ধে কিছু বলিব না—বিকল্পেও নয়, স্বপক্ষেও নয়; কারণ, এক মূর্খসৌকর্য্য ছাড়া আমি ইহার কোনও অত্যাবশ্যকতা দেখিতেছি না। সংস্কারমাত্রেরই পক্ষে কোনও না কোনও যুক্তি আছে—আমি কেবল ইহাই জিজ্ঞাসা করিব, “হঠাৎ বানান লইয়া এই মাথা-ব্যথা পড়িয়া গেল কেন?” ভাষা বা সাহিত্যের জগৎ কোনও ভাবনা নাই; ধাম-ধিলান মেরামত

করিবার শক্তি বা প্রবৃত্তি নাই, কিন্তু কার্নিসের কারিগরিতে বৈঠকী পরামর্শের বেশি কিছু দরকার হয় না বলিয়াই সে পক্ষে এত উৎসাহ! যেখানে অস্বাভাবে দেহ শুকাইতেছে সেখানে সর্বাঙ্গে কেশবিজ্ঞাসের পারিপাট্য-বিধান কি নিতান্তই মানস-কণ্ঠের ফল নয়? কিম্বা, হয়তো সত্যকার প্রয়োজন কিছু আছে—পূর্বে তাহা বলিয়াছি; তাই বানান-সংস্কার করিতে গিয়া যে সকল গুরুতর বাধা পদে পদে উপস্থিত হইয়াছে, সেগুলিকে কোনও রূপে—যেখানে যেমন সেখানে তেমন করিয়া—অতিক্রম করিতে হইয়াছে; কারণ, সেই প্রয়োজনটাই বড়—শব্দের ইতিহাস, ব্যুৎপত্তি প্রভৃতির ভাবনা তেমন গুরুতর নহে; কাজের লোক যাহারা, তাহারা 'rough and ready'-কেই আদর্শ-নীতি বলিয়া মনে করে—বানান-সংস্কার যখন করিতেই হইবে, তখন সেই নীতি ছাড়া উপায় কি?

ভাষা ও সাহিত্যের এই যে অবস্থা, এবং তাহার যে কারণ আমি সংক্ষেপে বিবৃত করিবার চেষ্টা করিয়াছি—সে সঙ্ক্ষে ভাবিবার সময় আসিয়াছে। কোনও জাতির ভাষা ও সাহিত্যের অবস্থা হইতেই তাহার স্বাস্থ্য ও আত্মিক শক্তির পরিচয় পাওয়া যায়। আমরা একালে আমাদের বিজ্ঞা ও বুদ্ধির যতই বাহ্যাস্ফোট করি না কেন—বিভাষায় ব্যুৎপত্তি, ও সেই ভাষায় জ্ঞান-বিজ্ঞান চর্চায় আমাদের প্রতিভার যতই পরিচয় দিই না কেন—একটু গভীরভাবে ভাবিয়া দেখিলেই বুঝিতে পারিবেন, মাতৃভাষা সঙ্ক্ষে এই অজ্ঞতা, ঐদাসীল্য ও অবজ্ঞা, জাতিহিন্দাবে আমাদের অধঃপতনেরই সূচনা করিতেছে। গত শতাব্দীতে বাঙালী জাতির যে জাগরণ ঘটিয়াছিল, তাহার প্রমাণ জীবনের অপর সকল ক্ষেত্রেও অবশ্য পাওয়া গিয়াছিল,—কিন্তু তাহার নিঃসংশয় প্রমাণ এই যে, সেই প্রতিভা মাতৃভাষায় প্রতিফলিত হইয়াছিল; জাতীয় জাগরণের এমন প্রমাণ আর নাই। আজ যে আমাদের ভাষা ক্রমশ ছন্নছাড়া হইয়া উঠিতেছে—ভাষার সঙ্ক্ষে কাহারও কোনও মমত্ববোধ নাই—তাহাতে স্পষ্ট বুঝা যাইতেছে আমরা জাতিহিন্দাবে অবসন্ন হইয়া পড়িয়াছি।

ইহার প্রতিবিধানকল্পে আমি কোনদিকে কোনরূপ সংস্কারের কথা তুলিব না—নূতন কোনও মতের সৃষ্টি করিব না। জাতীয়-শিক্ষার সমস্যা একটা ছন্নছাড়া ও বিরীক সমস্যা, সে সমস্যা আলোচনা করিবার যোগ্যতাও আমার নাই। আমি অতি ক্ষুদ্র সাহিত্যিক মাত্র—আমি যাহা ভাবিয়াছি তাহাই বলিব। উপস্থিত,

বাঙালীকে তাহার সাহিত্যের সহিত পরিচিত ও ভাষার বিষয়ে সচেতন করিবার জন্ত দুইটি কাজ করা যাইতে পারে, এবং সে কাজের ভার সাহিত্যিকমণ্ডলীকেই লইতে হইবে। বাংলা-সাহিত্যের দিক দিয়া কয়েকটি ভাল কাজ ইতিমধ্যে কিছু কিছু হইয়াছে, যথা—ভাষাতত্ত্বের আলোচনা, ভাষার ইতিহাস-রচনা, অভিধান-সঙ্কলন ও প্রাচীনসাহিত্য-উদ্ধার; যে সকল পণ্ডিত এইরূপ কার্যে আত্মোৎসর্গ করিয়াছেন তাঁহারা আমাদের নমস্কার। কিন্তু বর্তমান অবস্থায় যে দুইটি কাজ অত্যাবশ্যক বলিয়া মনে হয় তাহা অণুবিধ—দুইটিই প্রচারমূলক; একটি, বাংলা-সাহিত্যের ক্লাসিকসমূহকে উপাদেয় সংস্করণে সুসম্পাদিত করিয়া বাঙালীর ঘরে ঘরে পৌছাইয়া দিবার ব্যবস্থা; অপরটি, বাংলা-সাহিত্যের ইতিহাস, ও সমালোচনামূলক গ্রন্থ-রচনা। ইহার জন্ত সাহিত্য-প্রচার-সমিতি বা ঐরূপ একটা পরিষদ-প্রতিষ্ঠার প্রয়োজন। কেমন করিয়া ইহা সম্ভব হইবে, ব্যবসায় বা অপর কোন নীতিকে ইহার ভিত্তি করিতে হইবে—সে পরামর্শ দিবার ক্ষমতা আমার নাই। কিন্তু আমার বিশ্বাস, এরূপ কল্পনাকে কার্যে পরিণত করিবার কোন-না-কোন উপায় আছেই; সেই উপায় করিতে পারিলে কিছু ফললাভ সুনিশ্চিত। কারণ, আমার দৃঢ় বিশ্বাস, সং-সাহিত্যের সহিত—খাঁটি বাংলার সহিত—পরিচয়ের অভাবেই বাঙালীর রুচি ও রসবোধ এত অবনতিগ্রস্ত হইয়াছে। এ জাতিকে বিধাতা অস্তুত একটা বস্তু দিয়াছেন—তাহা ভাবানুভূতির শক্তি; সত্য ও সুন্দরকে দেখিলে তাহার প্রাণ সাড়া দিবেই; এখনও এই একাকারকারী অন্ধকারের মধ্যে যেখানেই একটু আলো জলে, সেইখানেই তাহার মুগ্ধদৃষ্টি নিবদ্ধ হয়।

আরও একটি বস্তুর অভাব দূর করিতে পারিলে ভাল হয়—একখানি উচ্চ শ্রেণীর সাহিত্য-সমালোচনা পত্রিকা। এই পত্রিকায় প্রাচীন ও আধুনিক বাংলা-সাহিত্য সম্বন্ধে আলোচনা থাকিবে, এবং বিশেষ করিয়া গ্রন্থ-সমালোচনা থাকিবে। গ্রন্থ-নির্বাচনে ও সমালোচনা-পদ্ধতিতে এমন রসবোধ ও বিচার-শক্তির প্রমাণ থাকিবে যে, কালে ঐ পত্রিকা সকল সুস্থমনা সাহিত্য-রসিকের বিশ্বাস ও শ্রদ্ধা আকর্ষণ করিয়া সত্যকার বিচারকের আসন গ্রহণ করিবে। ইহার জন্তও একটি বিশিষ্ট সাহিত্যিকমণ্ডলী সৃষ্টি করা প্রয়োজন।

আপনাদের সহিষ্ণুতার পরীক্ষা আর অধিক ক্ষণ করিব না—আমার কথা

ফুরাইয়া আসিয়াছে। বাঙালী ও বাংলা-সাহিত্য সম্বন্ধে যাহা বলিলাম তাহা হয়তো প্রবাসী বঙ্গ-সন্তানগণকে শুনাইবার মত হয় নাই। কিন্তু বাংলা ভাষা ও সাহিত্যের রক্ত-সম্পর্কই বাংলার বাহিরেও বাঙালীদের সবচেয়ে বড় ও সত্যকার সম্পর্ক; সে রক্ত দূষিত হইলে ব্যাধি সর্বত্র ছড়াইয়া পড়িবে, সম্পর্ক সহজ থাকিবে না। তাই আপনাদের এই সম্মেলনে আমি সেই সাহিত্যের কথা ভাবিয়া যে বেঙ্গনা বোধ করিয়াছি—আপনাদের নিকটে অকপটে তাহা নিবেদন করিলাম। কিন্তু বাংলার বাহিরে আপনারা যে বৃহত্তর বঙ্গের সৃষ্টি করিতেছেন তাহাতে আপনারাই বাংলা-সাহিত্যকে একটি উদারতর আদর্শে অনুপ্রাণিত করিতে পারেন। আপনাদের বাঙালী-প্রাণ ও বাঙালী-প্রতিভা ভারতের সর্বত্র ব্যাপ্ত হইয়া এমন একটি স্পন্দন অনুভব করিতে পারে, যাহাতে বাংলা ভাষায় ভারতীয় সংস্কৃতির একটি পূর্ণতর রূপ প্রতিফলিত হয়। এ যুগের কবি ও মনীষী সেই রূপেরই ধ্যান করিয়াছেন—সেই ধ্যান-দৃষ্টিই রবীন্দ্রনাথের কবি-প্রতিভাকে বিশ্ববরেণ্য করিয়াছে, এবং বাংলা ভাষাকে একটি অননুসাধারণ গৌরব দান করিয়াছে। স্বামী বিবেকানন্দেরও দেশ ছিল ভারতবর্ষ, তাঁহারও ভাবদৃষ্টি কেবল বাংলাদেশে নিবদ্ধ ছিল না। কিন্তু বর্তমানে আমরা সেই দৃষ্টি হারাইয়াছি—আমাদের সাহিত্য-প্রেরণা অতিমাত্রায় প্রাদেশিক হইয়া পড়িতেছে। আপনারা যদি প্রাদেশিকতামুক্ত হইয়া সেই ভারতবর্ষের আত্মাকে নূতন করিয়া আবিষ্কার করিতে পারেন, তবে বাঙালীজাতির জন্ম একটি নূতন গৌরব অর্জন করিবেন। আচার্য্য রামেন্দ্রচন্দ্র তাঁহার দিব্যদৃষ্টিতে ভারতের সেই আত্মাকে যেমন উপলব্ধি করিয়াছিলেন, তাঁহারই ভাষায় সেই অপূর্ব চিত্র উদ্ধৃত করিয়া আমি আমার বক্তব্য শেষ করিলাম—

“ভারতবর্ষের যজ্ঞভূমি জুড়িয়া একটা প্রকাণ্ড চিত্তি নির্মিত রহিয়াছে; বেদপন্থী সমাজের ষাঁহারা প্রতিষ্ঠাতা, তাঁহারা সেখানে বৈশ্বানর-অগ্নির প্রতিষ্ঠা করিয়াছেন—সে অগ্নির প্রভায় অর্ধপৃথিবী প্রভাসিত হইয়াছে; সিংহল হইতে সাইবীরিয়া পর্য্যন্ত, যবদ্বীপ হইতে আলেকজান্দ্রিয়া পর্য্যন্ত, জাপান হইতে কাম্পীয় তট পর্য্যন্ত, অর্ধ পৃথিবী সেই অগ্নির প্রভায় প্রভাসিত হইয়াছে। ভারতমাতা সেই যজ্ঞাগ্নিতে আত্মাহুতি দিয়াছেন—যা আমার ভোগ্য অন্নরূপে বুদ্ধিক্ত পৃথিবীতে আপনাকে বিলাইয়া দিয়াছেন। বিশ্বভূতের জন্ম আত্মোৎসর্গে মায়ে

ব্যথা হয় নাই। তিনি কখনও ক্ষুধার্ত পশুর মত পুরকে আক্রমণ করিয়া উদরসাৎ করিবার চেষ্টা করেন নাই, বরং 'যথেষ্ট ক্ষুধিতা বাংলা মাতরং পর্যাপাসতে'—ক্ষুধার্ত শিশু যেমন মাতার সমীপে উপস্থিত হয়—সেইরূপ পৃথিবীর যে কেহ অন্নার্থী হইয়া তাঁহার নিকটে উপস্থিত হইয়াছেন তিনি তাহাকে কোলে করিয়া স্নেহের সহিত স্তুতদান করিয়াছেন। 'চিরকল্যাণময়ী তুমি ধন্য, দেশবিদেশে বিতরিছ অন্ন।' কেবল স্থূল দেহের স্থূল অন্ন বিলাইয়া তিনি তৃপ্ত হন নাই; যখনই তিনি আপনার যজ্ঞভূমির বাহিরে গিয়াছেন তখনই তিনি ইড়ারূপিণী ব্রহ্মবিদ্যার জ্ঞান লাভ করিয়া দেশবিদেশে বিচরণ করিয়াছেন। মা আমার স্বয়ং ইড়াদেবী—মনুকন্ঠা মানবীরূপে তিনি স্বয়ং মনুকর্তৃক যজ্ঞার্থ নির্দিষ্ট হইয়াছেন। সরস্বতীরূপে তিনি ব্রহ্মাবর্তে বেদপত্নী সমাজের প্রতিষ্ঠা করিয়াছেন; ভারতীরূপে তিনি ভারতবর্ষের কুলদেবতা, বাগ্‌দেবীরূপে তিনি ব্রহ্মবাদিনী। তিনি গায়ত্রীরূপে মর্ত্যলোকে অমৃত আনিয়াছিলেন, সাবিত্রীরূপে আমাদের ধীশক্তির অগ্ৰাণি প্রচোদনা করিতেছেন। তিনিই বেদমাতা অদ্বিতি, স্বয়ং প্রজাপতি দক্ষ তাঁহাকে জন্ম দিয়াছেন। সেই অদ্বিতি হইতেই ভদ্র ও অমৃত-বন্ধু দেবগণ জন্মিয়াছেন। তাঁহারই নামান্তর দক্ষকন্ঠা সতী—যিনি প্রজাপতির যজ্ঞে আপনাকে উৎসর্গ করিয়াছিলেন; তাঁহার যজ্ঞোৎসৃষ্ট দেহ নারায়ণচক্রে শতধণ্ডে খণ্ডিত হইয়া, কামরূপ হইতে হিংলাজ, জালন্ধর হইতে কন্যাকুমারী পর্যন্ত ভারতভূমির প্রত্যেক ধূলিকণায় চক্রচ্ছিন্ন সতীদেহের বা হিমবৎকন্ঠা পার্বতীর দেহের পরমাণু প্রচ্ছন্ন রহিয়াছে। সেই ধূলি হইতে উৎপন্ন প্রত্যেক ধাতুশীর্ষে ও যবশীর্ষে ইড়ারূপ পরমায়ের অমৃতরস সঞ্চিত আছে। বিষ্ণুরূপী যজ্ঞপুরুষে অর্পণের পর, পঞ্চ মহাযজ্ঞে যাবতীয় ভূতে অর্পণের পর, হবিঃশেষরূপে সেই ইড়াভোজনে আমরা অধিকারী রহিয়াছি। এই সর্বদেবময়ী মহতী দেবতাকে সন্মোদন করিয়া আমরা অকুতোভয়ে বলিতে পারি—

স্বং হি দুর্গা দশপ্রহরণধারিণী
কমলা কমলদলবিহারিণী
বাণী বিজ্ঞাদায়িনী

নমামি ত্বাম্—

বন্দে মাতরম্ ।*

জাতির ভাষা ও জাতির সাহিত্য

বাংলা দেশের বর্তমান সাহিত্যিক আবহাওয়া যত লক্ষ্য করিতেছি ততই একটা বিষয়ে বিশেষ করিয়া চিন্তা করিবার সময় আসিয়াছে বলিয়া মনে হইতেছে। সে কথাটি এই, বাংলা-সাহিত্য আর যাই হোক, বাংলা আর হইতেছে না, তার সহজ অর্থ এই—আমরা জাতিভ্রষ্ট হইতেছি। ভাষা জাতির জাতীয় প্রাণের আধার, সেই আধার নষ্ট কিম্বা ভগ্ন হইলে সাহিত্যসৃষ্টি হইতে পারে কি না, এমন প্রশ্নও উত্থাপন করিতে হয়, আমাদের অবস্থা এতই শোচনীয়। আমি এই প্রশ্নেরই কিঞ্চিৎ আলোচনা করিব।

আমাদের অলঙ্কার শাস্ত্রে আছে, শব্দ ও অর্থের সহিত-ভাবই সাহিত্য। আধুনিক কাব্যশাস্ত্রের ভাষায় ইহাকে একটু প্রসারিত করিয়া বলা যাইতে পারে—ভাব ও ভাষায় যখন সম্পূর্ণ মিলন ঘটে তখনই সাহিত্যের জন্ম হয়। কাব্যের প্রধান লক্ষণ—Expression; যাহাকে ইংরাজীতে আর্ট বলে—বাংলায় যাহাকে রসসৃষ্টি বলিতে পারি—তাহার স্বরূপ এই Expression—শব্দ ও অর্থের সহিত ভাব—ভাব ও ভাষার হরিহরত্ব—কালিদাস বলিয়াছেন “পার্বতীপরমেশ্বরৌ”। আধুনিক রসপ্রমাতাগণের মতে—উৎকৃষ্ট সাহিত্যের ভাষা ভাবেরই রূপ; শব্দ অর্থের প্রতীক মাত্র নয়—তাহার দেহ, তাহার নিজ-রূপ। একদা এক সম্প্রদায়ের সন্ন্যাসীর মুখে শুনিয়াছিলাম—প্রাণ ও দেহ পৃথক নয়, প্রাণ দেহের বাহিরে দেহকে অতিক্রম করিয়া, অথবা দেহের কোন অংশ বিশেষে বিরাজ করে না; যতখানি দেহ ততখানিই প্রাণ। কথাটা তখন ভালো করিয়া বুঝি নাই, আজ কাব্যের বা সাহিত্যের ভাষা ও ভাবের অভেদ-তত্ত্ব বুঝাইবার সময় সেই কথাটা মনে পড়িয়া গেল—বলিতে ইচ্ছা হয়, ভাষাই ভাব; উৎকৃষ্ট সাহিত্যে ভাষাকে অতিক্রম করিয়া, ভাষার বাহিরে ভাবের সন্ধান করিতে হয় না—শব্দের ব্যঞ্জনা বা ধ্বনি-গুণ শব্দের মধ্যেই থাকে—অতিক্রম করিয়া থাকিলে বুঝিতে হইবে, ভাব সুপ্রকাশিত হয় নাই—Expression চূড়ান্ত হয় নাই। এক কথায়, Expressionই সর্বস্ব, ভাব যেখানে তাহার ভাষা-দেহ সম্পূর্ণ ভাবে পায় নাই—যাহা অনির্বাচনীয় তাহাও বাক্যে ধ্বনিত হয় নাই—সেখানে কাব্য-সৃষ্টি সার্থক হয় নাই।

কথাটা মূল ভাবেই বলিলাম, সূত্র আলোচনার স্থান এ নহে ; তথাপি সাহিত্যে ভাষার মূল্য সম্বন্ধে এ মত গ্রহণ করিতে কাহারো আপত্তি হইবে না ।

সাহিত্যের আর এক সংজ্ঞা আধুনিক বিশ্ব-সাহিত্যের দিনে ক্রমশঃ প্রচলিত হইতেছে । মানুষের সহিত মানুষের অন্তরঙ্গ যোগসাধন বা গভীরতম ভাবের আদান-প্রদানের উপায় এবং সেতু যাহা, তাহাই সাহিত্য । ইহার তাৎপর্য্য এই যে, যাহার দ্বারা মানুষ মানুষকে চিনিয়া লয়, যাহা যুগ ও জাতি নির্বিশেষে মানুষে মানুষে আত্মপর ভেদ ঘুচাইয়া সমমানবতার স্থাপনা করে—যাহা মনুষ্যসমাজের সেই গভীর সহিত-ভাবের আধার, তাহাই সাহিত্য । এখানে স্পষ্টতঃ ভাষার কথা নাই—ভাবের কথাই আছে । ইহা হইতেই সাহিত্য বিশ্ব সাহিত্যের নিরাকারত্বে প্রতিষ্ঠিত হইয়াছে—সার্বজনীন মানবতা বা মহামানব নামক এক কল্পমূর্ত্তির আরাধনায় সাহিত্যেও জাতিবর্ণহীন এক আদর্শের উদ্ভব হইয়াছে । বলা বাহুল্য, এই আদর্শ স্বীকার করিলে—যুক্তিশাস্ত্রমতে ভাষাও নির্বিশেষ হইয়া উঠে—বিশ্বমানবের যেমন কোন জাতি নাই, বিশ্বসাহিত্য-রচনাতেও তেমনই ভাষার বিশিষ্টতা থাকিতে পারে না । এই কথাটাই আমি একটু বুঝিতে ও বুঝাইতে চেষ্টা করিব ।

সাহিত্য ভাষার অধীন, ভাষা একটা বিশেষ জাতির ভাষা । ভাষাকে বাদ দিয়া অর্থাৎ ভাবের বিশিষ্ট রূপটিকে বাদ দিয়া সাহিত্যরসের ধারণা করাও যায় না । দেশের জলবায়ু ও জাতির রক্তগত সংস্কার—কোনও জাতির যে ভাব-জীবনকে পরিপুষ্ট করিয়া তোলে, ভাষা তাহারই রূপ । যাহা নির্বিশেষ ও নিরাকার তাহাই যেমন সৃষ্টিতে বিশেষ হইয়া উঠে এবং বিশেষত্ব ও বৈচিত্র্যই যেমন সৃষ্টির মূল অভিপ্রায়—তেমনই নিখিল মানবচেতনা বলিয়া যদি কিছু থাকে তাহাই জাতি-বিশেষের বিশিষ্ট ভাব-গণ্ডী আশ্রয় করিয়া রূপ পরিগ্রহ করে—প্রত্যেক বিশিষ্ট ভাষা সেই ভাব-দেহ নির্মাণের উপাদান । সৃষ্টির রহস্য সর্বত্রই এক—একাকার বা নির্বিশেষের আদর্শ সৃষ্টির আদর্শ নহে ; Individual ও Particularই সেই বৈচিত্র্যের নিদান—যাহা সকল আর্ট বা রসসৃষ্টির রহস্য । শিল্পিরকণাতে সূর্য্য-বিশ্বের মত এই Particular এর মধ্যেই Universal প্রতিফলিত হয়, তবেই রসের আন্বাদন হইয়া থাকে । অতএব রসের শ্রেষ্ঠ আধার যে সাহিত্য—তাহার মধ্যে সার্বজনীন মানবতার প্রকাশ থাকিলেও তাহার একটা বিশিষ্ট রূপ অবশ্যস্বাভাবী ।

এই বিশিষ্ট রূপ জাতির জাতীয়তার মধ্যেই আছে—এবং সাহিত্যসৃষ্টিতে জাতীয়তার গুঢ় গভীর লক্ষণ নিহিত থাকে জাতির ভাষায়। ভাষা ব্যক্তির নয়, জাতির; জাতির সমগ্র অতীত জীবন, পরম্পরাগত সাধনা ও সংস্কৃতি যে নিয়মে গড়িয়া উঠে, ভাষাতেও সেই নিয়ম বর্তমান। কোনও জাতির ভাষা তাহার জাতিধর্মেরই অঙ্গগত—প্রকৃতির মতই ইহা দুর্লভ্য। ভাষার বিশুদ্ধি-রক্ষা জাতির স্বাস্থ্যরক্ষার মতই অত্যাवশ্যক। ভাষার শৈথিল্য শক্তিহীনতার লক্ষণ—ভাষায় অনাচার প্রবেশ করিলে জাতিধর্মই লোপ পায়।

এই জন্যই সকল আত্ম-সচেতন উন্নতিকামী জাতিই ভাষার বিশুদ্ধি-রক্ষায় অতিশয় যত্নশীল। যাহাদের সত্যকার সাহিত্যজ্ঞান ও রসবোধ আছে তাহারা অতি সাবধানে তাহাদের ভাষাকে রক্ষা করিয়া থাকে। ভাষা সম্বন্ধে মনস্তত্ত্বের প্রমাণ এখানে আলোচনা করিব না। সাধারণ জ্ঞানেও একটু গভীর ভাবে চিন্তা করিলেই বুঝিতে পারা যাইবে যে, ভাষার সঙ্গে ভাবের অতি ঘনিষ্ঠ যোগ আছে—ভাষা ভাবের উপর, এবং ভাব ভাষার উপর নির্ভর করে। ভাব যদি সত্য হয়, অর্থাৎ প্রাণের গভীর প্ররোচনায় তাহার উদ্ভব হয়—যদি তাহা খাঁটি আত্মপ্রকাশ-মূলক হয়, তবে জাতির অঙ্গর-প্রকৃতির প্রতিক্রমণ যে ভাষা, তাহাকেই সে আশ্রয় করিবে; সেই ভাষা যত সুস্থ, অবিকৃত ও শক্তিশালী হইবে, ততই তাহার আত্মপ্রকাশ সুন্দর ও যথাযথ হইবে। প্রাণ যদি ব্যাধিগ্রস্ত না হয় তবে তাহা নিজস্ব ভাষাতেই সৃষ্টি লাভ করে। জাতির সাধনা ও সংস্কৃতির অহুপাতে তাহার ভাষাও পুষ্টি হইয়া উঠে। পিতৃপিতামহগণের পুরুষপরম্পরাগত সাধনার ফল এই ভাষা; যে জাতির ভাষা তাহার আত্মপ্রকাশের পক্ষে যত সুমনীয় ও সুসমৃদ্ধ হইয়া উঠিয়াছে, সে জাতি তত পুণ্যবান।

সাহিত্যের জাতিধর্ম ও তদনুযায়ী ভাষার মূল্য সম্বন্ধে ইহার অধিক বলিবার স্থান নাই। এইবার আমাদের সাহিত্য ও ভাষার বর্তমান প্রবৃত্তি ও অবস্থার সম্বন্ধে কিছু বলিব। বর্তমান বাংলা সাহিত্যের অবস্থা যেমন অরাজক, তেমনি বাংলা ভাষাও স্বৈরাচারের প্রবল স্রোতে ভাসিয়া যাইতে বসিয়াছে। সাহিত্যের আদর্শ লইয়া বাদপ্রতিবাদ যথেষ্ট হইয়াছে—আমি নিজে এতদিন প্রায় একক ভাবে সংগ্রাম করিয়াছি। এক্ষণে স্পষ্ট বুঝিতেছি, ব্যাধি আরও গভীর ভলে মূল বিস্তার করিয়াছে। সাহিত্যের আদর্শ-বিচার এখন নিস্প্রয়োজন। জাতির যেক-স্বচ্ছ

দুর্বল হইয়া পড়িয়াছে—অরকষ্ট, কুশিকা এবং কুশখ্যের প্রাচুর্যে আমরা মনঃপ্রাণের স্বাস্থ্য হারাইয়াছি। শ্রুতি বলিয়াছেন ‘নাগমায়া বলহীনেন লভ্যঃ’ ; রসোপলব্ধিও আত্মোপলব্ধির মত ; এই ক্ষীণজীবী বৃত্তু লালসা-কান্তর জাতি রসপিপাসু হইতে পারে না—বলহীনের পক্ষে আত্মার সাধনা দুষ্কর। সাহিত্যের নামে আজকাল যাহা চলিত হইয়াছে, তাহার অধিকাংশ সাহিত্য নহে—রসসৃষ্টি বা রসান্বাদন তাহার অভিপ্রায় নহে। একথা আধুনিক লেখকগণ স্পষ্ট ভাষায় ঘোষণা করিতেছেন। ইহারা স্পষ্টই বলিয়াছেন—দেহের ক্ষুধা নিবারণই পরম পুরুষার্থ, তাহাই জীবন-ধর্ম, তাহাই সত্য ও বাস্তব। যাহারা আত্মায় বিশ্বাস করে না তাহারা রসের আদর্শ স্বীকার করিবে কেন? জীবন-যুদ্ধে যাহারা অপারগ—ভোগের বস্তু আহরণ করিবার শক্তি নাই, অথচ দীনদরিদ্র-সুলভ কাঙালপনা যাহাদের মজ্জাগত, দেহে শক্তি নাই অথচ দেহের ক্ষুধা আছে,—এমনই অভিশপ্ত শ্রেত-দশা যাহাদের, সাহিত্যে তাহাদের কি কাজ? তাই সাহিত্যের নামে তাহারা যাহা করিতেছে তাহা ভোগের আনন্দ নহে, ব্যর্থ ভোগ-পিপাসার লালসা। এই হতভাগ্য জাতির আরও হতভাগ্য এই সকল সাহিত্যিকগণকে দেখিয়া দুঃখ হইবারই কথা—ইহাদের বিরুদ্ধে সাহিত্যিক সমালোচনা নিতান্তই অল্পযুক্ত বলিয়া মনে হইতেছে। কিন্তু তথাপি একটা বিষয় ভাবিয়া শঙ্কিত হইয়াছি। ইহারা সাহিত্যের আদর্শ লইয়া যাহাই করুক—বাংলা ভাষাকে একেবারে নষ্ট করিতে উদ্বৃত হইয়াছে। সাহিত্য এক্ষণে মুমূর্ষু, কিন্তু তাই বলিয়া ভাষাকে গলা টিপিয়া মারিবার কারণ কি? কারণ অনেক, তাহার কয়েকটি এখানে উল্লেখ করিব।

প্রথমতঃ, সম্প্রতি বাংলা ভাষার আদর্শ সাহিত্যিক-রীতি বিচলিত হইয়াছে। কথ্য-ভাষা ও লেখ্য-ভাষা লইয়া যে বিবাদ, তাহারই ফলে ভাষার প্রাদেশিক স্বেচ্ছাচার প্রবল হইয়াছে। এমন আর কোন সাহিত্যে হয় নাই। সাহিত্যের ভাষা স্বভাবের নিয়মেই শতাব্দী ধরিয়া একটা আদর্শে দৃঢ় প্রতিষ্ঠিত হইয়া উঠে—আইনের সাহায্যেও নয়, সজ্ঞান চেষ্টা দ্বারাও নহে। বাংলা সাহিত্য বলিয়া একটা যে বস্তু গড়িয়া উঠিয়াছে তাহার মূল কারণ—এইরূপ একটা ভাষা ক্রমশঃ পুষ্টি লাভ করিয়া সাহিত্যসৃষ্টির উপযোগী হইয়া উঠিয়াছিল। এই ভাষায় কোনও বিশেষ প্রদেশের বাক-ভঙ্গী যদি প্রতিষ্ঠা লাভ করিয়া থাকে, তবে বৃষ্টিতে

হইবে, সমগ্র জাতি রসসংবেদনার ক্ষেত্রে সেই বাক-ভঙ্গীকে প্রাণের প্রেরণাবশে আশ্রয় করিয়াছে—সেই ভাষাই তাহার গভীরতম রসজীবনে সাড়া জাগাইয়াছে। এই ভাষা প্রাদেশিক হইয়াও যে সম্পূর্ণ প্রাদেশিক নহে, তাহা যে রসিকমাত্রেরই আপন ভাষা, তাহার প্রমাণ—জাতির শ্রেষ্ঠ সাহিত্যিক প্রতিভা সেই ভাষাকে আশ্রয় করিয়াছে। এ ঘটনা সৰ্বত্রই ঘটিয়াছে; আধুনিক জগতের শ্রেষ্ঠ সাহিত্যগুলি সেই সেই দেশের একটি কোন বিশেষ প্রাদেশিক বুলিকে আদর্শরূপে অবলম্বন করিয়া গড়িয়া উঠিয়াছে। তথাপি এ ভাষা কোন প্রদেশের সম্পূর্ণ কথ্য-ভাষা নহে—ইহার বিশেষ বিধি আছে, ইহার রূপ কথ্য-ভাষা হইতে উন্নত ও স্বতন্ত্র। সাধুভাষা বলিয়া এই সাহিত্যিক ভাষাকে গালি দিয়া ইহার বিরুদ্ধে একটি কৃত্রিমতর ভাষাকে উদ্ভূত করিয়া কিছুকাল ধরিয়া যে আন্দোলন চলিয়াছে, এবং শ্রেষ্ঠ সাহিত্যরথিগণও সেই আন্দোলনে যোগ দিয়া তাহাকে যতখানি সফল করিয়া তুলিয়াছেন, তাহাতে সাহিত্যের সেই পূর্ব-প্রতিষ্ঠিত ভাষার মেরুদণ্ড ভাঙিয়াছে। ইহারই ফলে, অতঃপর ভাষার কোনও আদর্শ বা বিধি আর টিকিতেছে না। যত বড় অজুহাতেই হোক, স্বেচ্ছাচার একবার প্রশ্রয় পাইলে তাহা সীমা অতিক্রম করিবেই।

কথ্য-রীতির উপরে অতি মাত্রায় জোর দেওয়ার ফলে অতঃপর সাহিত্যের ভাষার জন্ম কাহারও সাধনা করিতে হয় না, ব্যাকরণের অতি সাধারণ নিয়ম, এমন কি অর্থ-সঙ্গতির দিকেও, কাহারও দৃষ্টি নাই। কথ্য-রীতিই যে ইহার জন্ম দায়ী আমি তাহা বলি না, কিন্তু ভাঙ্গন একবার ধরিলে তাহা এমনই করিয়া মূল পর্য্যন্ত বিচলিত করিয়া তোলে। ভাষার অনুশীলন অভাবে রসবোধও স্তুমার্জিত হইতে পারে না; যাহার যেমন স্বাভাবিক রুচি তাহাই অশিক্ষিত পটুত্বের অধিকার লইয়া ভাষাকে মলিন ও অপরিচ্ছন্ন করিয়া তোলে। বাংলা লিখিতে বসিয়া অবাধে ও নির্বিবাদে ইংরেজী শব্দ—তাহাও অশুদ্ধ ব্যবহার করা—যেমন রীতি হইয়া উঠিতেছে, তেমনই এক ইডিয়ম-এর সঙ্গে অন্য প্রাদেশিক বুলি এমন ভাবে মিশ্রিত হইতেছে যে, অনেক সময়ে ভাষার কোন রীতিই লক্ষ্য করা যায় না।

কিন্তু সবচেয়ে লজ্জা ও আশঙ্কার কারণ—একদল লেখক যেন পণ করিয়াছেন, ভাষার ভিত্তি আমূল উৎপাটন করিয়া বাংলাকে ইংরেজী করিয়া তুলিবেন। তাঁহারা যে-ভাষায় লিখিয়া থাকেন তাহা মাতৃভাষামাত্র-স্বল কোনও বাঙ্গালীর

পক্ষে বৃদ্ধিতে পারা ছুড়র। এই ভাষা যাহারা তারিফ করিয়া পড়েন—তাহারা আর যাহাই হউন, বাঙ্গালী নহেন, এ কথা বলা বোধ হয় অশাস্ত্য হইবে না। ভাষার উপর অত্যাচার চরমে উঠিয়াছে এইরূপ বিজাতীয় ভঙ্গির রচনায়।

এই সকল হইতে মনে হয় যে, আজকাল শিক্ষিত বাঙ্গালীর মনেও একটা সংস্কার জন্মিয়াছে যে—ভাষার কোন নিজ স্বরূপ নাই, কোন স্বধর্ম নাই। যে যাহা লিখিবে তাহাই ভাষা—এবং তাহা যতই ব্যভিচারী হইবে ততই তাহা মৌলিক প্রতিভার নিদর্শন। ভাষার ব্যক্তিগত রীতি বা ষ্টাইল যাহাকে বলে সেই ষ্টাইল এবং তাহার অন্তর্গত মৌলিক সূক্ষ্মা যে প্রতিভার পক্ষেই সম্ভব, এবং তাহা যে ভাষার শ্রীবৃদ্ধি সাধন করে—এ কথা সকল সাহিত্যরসিকই স্বীকার করিবেন। কিন্তু ব্যক্তিগত ষ্টাইল বাতুলের স্বেচ্ছাচার নয়, এবং প্রতিভার প্রমাণ যে-ষ্টাইল তাহার লক্ষণ এই যে—ভাষার জাতি রক্ষা করিয়াই ব্যক্তির একটি নিজস্ব ভঙ্গিয়া ফুটিয়া উঠে; ইহাই লেখকের শক্তি, এই জন্য তাহা রসিকের শ্রদ্ধা আকর্ষণ করে। যেখানে ভাষার জাতি মারিয়া একপ্রকার ব্যক্তিস্বের ঘোষণা হইয়া থাকে, সেখানে দুইটি কারণ বিদ্যমান। প্রথম—লেখকের ভাষা-জ্ঞানের অভাব, দ্বিতীয়—অতিরিক্ত আত্মসত্ত্বিতা। এই দুয়েরই মূল কারণ এক—তাহা স্নায়বিক দুর্বলতা ও প্রাণের শক্তিহীনতা। কোনও দেশের সাময়িক সাহিত্যে লেখকবিশেষের বা কোন লেখক-গোষ্ঠীর এইরূপ দুষ্কৃতি অসম্ভব নয় বলিয়াই তাহা উপেক্ষার যোগ্য; কিন্তু আমাদের দেশে বর্তমান সাহিত্যে এই অনাচার এতই সংক্রামক হইয়া উঠিতেছে যে, সে সম্বন্ধে উদাসীন থাকা আর চলিবে না।

ভাষার এই অবস্থা, বা লেখক সাধারণের এই প্রবৃত্তি ইহাই প্রমাণ করে যে, জাতির মেরুদণ্ড দুর্বল হইয়া পড়িয়াছে। কুৎসিত সাহিত্যরচনার প্রবৃত্তিও এতখানি আশঙ্কার বিষয় নহে। ভাব কুৎসিত হইলেই ভাষাও কুৎসিত হয়, অথবা কুৎসিত ভাষা ব্যবহার করিবার একটা কামনা ব্যাধির মতই প্রবল হইতে পারে; কিন্তু সেখানেও বুলি যদি খাঁটি জাতীয় বুলি হয়, তবে বৃদ্ধিতে হইবে, লেখকের নৈতিক অধঃপতন হইলেও তিনি জাতিভ্রষ্ট হন নাই। অতিশয় ক্রোভের মধ্যে ইহাও একটা বড় কথা—কারণ, সেখানে বৃদ্ধিতে পারি, মাকুষটা ব্যাধিগ্রস্ত হইলেও বাঁচিয়া আছে। কিন্তু কোন জাতির সাহিত্যসাধনার ভাষাই যদি বিভাষা বা অপভাষা হইয়া উঠে, তবে সে জাতির অপমৃত্যু যে আসন্ন, এমন

আশঙ্কার যুক্তিসঙ্গত কারণ আছে। জাতির সাহিত্য ও জাতির ভাষা এবং জাতীয় জীবনের সহিত তাহার ঘনিষ্ঠ সম্বন্ধের বিষয় ইতিপূর্বে যাহা বলিয়াছি তাহা হইতে আশা করি সকলেই একথা স্বীকার করিবেন। জগৎঘটিত বা মনুষ্যঘটিত যত কিছু ব্যাপার সকলই যে পরিবর্তনশীল, এবং সেই পরিবর্তনই প্রগতি-মূলক একথা না হয় মানিলাম; একথাও মানি, সাহিত্যের আদর্শ বা ভাষার রীতি ঠিক একস্থানে অচল হইয়া থাকিতে পারেনা; এবং ইহাও মানি যে, স্বাভাবিক বা স্বাধীনতা ব্যক্তিজীবনে যেমন—লেখক-জীবনেও তেমনই অত্যাবশ্যক, বরং তাহাই শ্রদ্ধার যোগ্য। কিন্তু আশা করি, কোন প্রজ্ঞাবান বুদ্ধিমান ব্যক্তিই স্বীকার করিবেন না যে, পরিবর্তন বা প্রগতির অর্থ আমূল উৎসাদন—বিবর্তনের অপর নাম অস্তিত্বলোপ। পুরাতন নূতন হয়, কিন্তু মরে না; আমি একালের মনুষ্য-জীব হইলেও আমার দেহটার বীজের বয়স কোটি বৎসর। যাহা নব নব যুগে নিত্য নূতনরূপে পল্লবিত ও কুসুমিত হইতেছে তাহারও প্রাণধারার একটা প্রাচীন নিয়তি আছে; যেদিন সেই নিয়তি-নিয়ম নিবৃত্ত হয় সেদিন হইতে সে আর বাঁচে না।

আমাদের ভাষার বয়স বোধ হয় এক হাজার বৎসরও নয়, সাহিত্যের বয়স আরও অল্প; কিন্তু যে মুহূর্তে সে জন্মিয়াছে এবং বৃদ্ধি পাইতে শুরু করিয়াছে, সেই দিন হইতেই তাহার একটা নিয়তি-নিয়ম আরম্ভ হইয়াছে। জীবনের তথা সৃষ্টির ইহাই নিয়ম। দেহ যেমন প্রাণমনের স্থির ভিত্তি—মনের আয়তন যতই পরিবর্তিত হউক, দেহের কাঠামো বদলাইতে পারে না, মানুষের মন উড়িতে চাহিলেও তাহার স্বন্ধে পক্ষোদগম হয় না, সেই পুরাতন গঠনের দেহ লইয়াই তাহাকে উড়িতে হয়—তেমনই জাতির চিন্তা, কৰ্মণের ফলে যতই প্রসারিত হউক, তাহার সাহিত্য-বুদ্ধি বা রসিকতা যতই উন্নত হউক এবং ভাবের অভিনবত্বের প্রয়োজনে প্রকাশভঙ্গি যতই পরিবর্তিত হউক, ভাষার কাঠামো বা তাহার মূলপ্রকৃতি কখনও বিধ্বস্ত হইতে পারে না। ভাষা যদি বিকলাঙ্গ হয় তবে বৃদ্ধিতে হইবে লেখক অক্ষম, দুর্বল ও বিছাটান; যদি তাহা বিভাষার অনুকারী হয় তবে বৃদ্ধিতে হইবে, লেখকের জাতিধর্ম তথা প্রাণধর্ম লোপ পাইয়াছে। যদি কোন দেশে শিক্ষিত-সাধারণের মধ্যেও ভাষায় এই ব্যভিচার দোষ প্রদ্রব পাইতেছে দেখা যায়, তাহা হইলে নিঃসংশয়ে বৃদ্ধিতে হইবে সে জাতি ধরাপৃষ্ঠ হইতে স্বরায় বিলুপ্ত হইবে।

একগুণে জিজ্ঞাস্য এই, আমরা কি জাতি হিসাবে মরিতে প্রস্তুত? আমরা সত্যই বিশ্ববিহার করিবার জন্য লালায়িত হইয়াছি? বিশ্বসাহিত্য, বিশ্বমানব, বিশ্বভারতীর মত বড় বড় শূন্যগর্ভ বচনের মোহে আমরা কি আমাদের জাতি বিকাইব? ঐ সকল কথা যাহারা বলিয়া থাকেন, তাঁহারা অবশ্য ক্ষুদ্র-প্রেমের পরিবর্তে মহাপ্রেমের জয়ঘোষণা করেন। ইহারা আকাশ-বিহারী ভাববিনাসী নয়—অতিক্ষুদ্র, স্বার্থপর, অসত্যসন্ধ ব্যক্তি। বিশ্বের নামে আত্মীয়কে তাঁহারা বর্জন করেন, অপ্রেমকে উদারতার আবরণে ঢাকিয়া রাখেন, অক্ষমতাকে অতি উচ্চ আদর্শের দুর্লভতায় মহিমাম্বিত করেন। ইহা যে সত্য তাহার প্রমাণ, এষুগে এই অধঃপতিত সমাজে, এইরূপ মতবাদীর সংখ্যাই বেশী,—নিশ্চয়ই হঠাৎ আমরা এতগুলি মানুষ দেবতা হইয়া উঠি নাই! আজিকার সাহিত্যেও এইরূপ বিশ্বতান্ত্রিক যাহারা, তাঁহারা ভাষা সম্বন্ধেও এইরূপ উদার হইয়া উঠিয়াছেন; ভাষার কোন স্বকীয় রীতির সংকীর্ণতা ইহারা মানেন না—বিশ্বসাহিত্যের মত একপ্রকার বিশ্বভাষা এই বাংলাভাষার ভিতর দিয়া আবির্ভূত হউক, ইহাই তাঁহাদের প্রকাশ্য যুক্তি। কিন্তু আসল কথা তাহা নয়; ইহারা নিজেদের বুলি ভুলিয়াছে—ইহারা আত্মভ্রষ্ট, তাই মাতৃভাষা বিভাষা অপেক্ষাও অপরিচিত। জাতির প্রাণের সহিত ইহাদের প্রাণ আর স্পন্দিত হয় না; ভাবনায় কামনায়, আশা ও বিশ্বাসে, সুখে ও দুঃখে ইহারা পরম্পর-বিচ্ছিন্ন, অতিশয় একা—ব্যক্তি-সর্বস্ব, Individualist। তাই ইহারা সামাজিক ও জাতীয় জীবনের অগ্রতম আধার যে ভাষা, তাহার ভঙ্গী ভুলিয়া গিয়াছে।

আজিকার প্রসঙ্গে আমার কথা আর বেশী নাই। আজ আমি যে বিষয়টির আলোচনা করিলাম সাহিত্যের দিক দিয়া তাহা গুরুতর বটে, তথাপি শিক্ষালয়ের প্রাঙ্গণে দাঁড়াইয়া, জাতির ভবিষ্যৎ যাহারা—সেই বালকবৃন্দের কথা স্মরণ করিয়া আমি এই সমস্যাটিকেই উপস্থাপিত করিলাম, সাহিত্যরসের পরিবর্তে এই অপেক্ষাকৃত কটুরস পরিবেশন করিলাম। যাহারা শিক্ষাদানের ভার লইয়াছেন—বিশেষতঃ যাহারা শিক্ষার গোড়ার দিকটি লইয়া আছেন, তাঁহারাই এই আশঙ্কা দূর করিবার উপায় উদ্ভাবন করিবেন। এই শিক্ষা যদি সুনিয়ন্ত্রিত হয়, বাঙ্গালীর ছেলে যদি ভাল করিয়া বাংলা শিখিবার এবং মাতৃভাষায় আত্মপ্রকাশ করিবার পূর্ণ স্বযোগ প্রাপ্ত হয়, তবেই এই দারুণ সঙ্কট হইতে আমরা পরিত্রাণ পাইব।

বাল্য হইতেই রীতিমত মাতৃভাষার চর্চার অভাবে যাহারা প্রায় নিরক্ষর থাকিয়া যায় তাহারাই পরে বিদেশী সাহিত্যের অধুক্রমে আত্মপ্রকাশ করিতে বাধ্য হইয়া ভাষার মুগ্ধপাত করিয়া থাকে। নিরক্ষর থাকিয়া যায় বলিয়াছি, তাহার কারণ আছে। প্রথমতঃ, অতি কদর্য ভাষায় লিখিত পাঠ্যপুস্তক গলাধঃকরণ করিতে তাহারা বাধ্য হয়—এই সকল পুস্তকে সাহিত্যরস ত থাকেই না, ভাষাও এমনই যে, তাহাতে উন্মুখ চিন্তাও বিমুখ হইয়া উঠে। নানা আদর্শের নানা রীতির রচনা পড়িয়া তাহারা ভাষা সম্বন্ধে দিশাহারা হয়, এবং ভ্রমপরিপূর্ণ অশুদ্ধ শব্দযোজনা ও ইডিয়মের অপব্যবহার দেখিয়া, ভাষার আদর্শ-বিষয়ে শ্রদ্ধা রক্ষা করিতে পারে না; একজ্ঞ নিজেরাও স্বৈরাচারী হয়। ভাষা-শিক্ষার মূলে এই অধর্ম প্রবেশ করিয়াছে বলিয়াই—ভাষার অশুদ্ধি এবং রচনার উৎকৃষ্ট রীতির প্রতি প্রথম হইতেই এই অবত্ন ও অসাবধানতায় অভ্যস্ত হয় বলিয়াই—শেষে এমন সংস্কার দাঁড়াইয়া যায় যে—বাংলা ভাষার কোন অভিজাত্য নাই, ইহার মূল প্রকৃতি বলিয়া কিছু নাই; ইহাকে যেমন ইচ্ছা ব্যবহার করা যাইতে পারে; লেখক হইতে হইলে ব্যাকরণের প্রাথমিক সূত্র, অভিধান-নির্দিষ্ট অর্থ, অথবা কোন রীতির সম্মান রক্ষা করিবার প্রয়োজন নাই। আজ সর্বত্র ইহাই প্রকট হইয়া উঠিয়াছে।

যাহারা এই ভাষা শিক্ষা দিবেন তাঁহাদের প্রতি আমার কয়েকটি নিবেদন আছে। বাঙ্গালীর জাতীয় সংস্কৃতি যাহাতে বাংলাদেশের সর্বত্র জাতিধর্ম-নির্বিশেষে সকল বাঙ্গালীর মধ্যে জাগ্রত ও অটুট থাকে—সেই মহৎ লক্ষ্যের অধুপ্রেরণায় তাহারা যেন বাংলাভাষার বিশুদ্ধ আদর্শটিকে কখনও কলুষিত হইতে না দেন; কারণ, আমাদের বর্তমান সামাজিক ও রাষ্ট্রীয় অবস্থায় এই ভাষাই জাতীয়তার প্রধান বন্ধন—আর কিছুই আমাদের নাই।

এই ভাষাই এ যুগে আজ পর্যন্ত বাঙ্গালীর তপস্বালঙ্ক একমাত্র পুণ্যফল। ইহারই প্রসাদে আমরা নবজীবন লাভ করিয়াছি, জগতের জাতিসমূহের মধ্যে কিঞ্চিৎ মর্যাদার আসন পাইয়াছি। এই ভাষাই আমাদের মৃত্যু হইতে অমৃত্যুতে উত্তীর্ণ করিয়াছে, ইহারই অপূর্ব শক্তিবলে আমরা আমাদের আত্মার পরিচয় পাইয়াছি। এই ভাষার প্রথম সঙ্গীত-ধ্বনি জয়দেবের কোমলকান্ত সংস্কৃত পদাবলীর মধ্যে উঁকি দিয়াছিল; এই ভাষাই মৈথিলী ও মাগধীর মিশ্রণজাত গৌড়ী-ব্রজবুলির মধ্যে লুকাচুরি খেলিয়াছিল; ইহাই চণ্ডীদাস জ্ঞানদাস গোবিন্দদাসের

কবিতায় প্রেমের অরূপ-মৌদুমীকে শব্দ-শরীর ধারণ করাইয়াছিল; মুকুন্দরাম কুন্তিবাস ও কালীদাসের লেখনী-মুখে ইহাই বাঙ্গালীর ঘরলংসারের নিত্যপরিচিত ডাব-জগতের বাণী বহন করিয়াছিল; ইহাই ভারতচন্দ্রের হাতে রাজ-দরবারের মাল্যচন্দনে ভূষিত হইয়া অভিনব সারস্বত-শ্রী ধারণ করিয়াছিল; বাংলার শাক্তসাধক, সূফী-মজ্জুব, ও বৈষ্ণব বাউল-কীর্তনীয়ার মন্যাস্ত অমুভূতির মূর্ছনা-যুক্ত হইয়া এই ভাষায় যে গীতাবলী উৎসারিত হইয়াছে, আজও এই বিংশ-শতাব্দীর বিজাতীয় অথবা বিশ্বমানবীয় কালচারের যুগে, বাঙ্গালী তাহাতে জন্মান্তর-স্মৃতির মত অসম্পূর্ণকে শিহরিয়া উঠে; এই ভাষার নিগূঢ় প্রকৃতি ও প্রচ্ছন্ন শক্তির আশ্বাসে বঙ্কিম-মধুসূদন-রবীন্দ্রনাথের লোকোত্তর প্রতিভা সঞ্জীবিত হইয়াছে—ইহারই কল্যাণে আমরা ভারতীয় অপর সকল জাতির উপরে সাহিত্যিক অধিরাজত্ব লাভ করিয়াছি।

সেই ভাষার স্বরূপ-পরিচয় উদ্ধার করিতে হইবে, বিদ্যার্থী বাঙ্গালী সম্ভানকে তাহার সেই পৈতৃক সম্পদের অধিকারী করিতে হইবে—ভাষার অতি-আধুনিক অভিনবত্ব হইতে তাহার চিত্তকে সংযত করিয়া, শিক্ষার প্রথম অবস্থায় তাহাকে ভাষার এই মূল সুরটি ধরাইয়া দিতে হইবে। বর্তমানে একটা প্রধান অসুবিধা এই যে, বাংলাভাষার বিশুদ্ধ সাহিত্যিক ইডিয়ম নির্ধারণ করিবার মত একখানিও পূর্ণাঙ্গ ব্যাকরণ এ পর্য্যন্ত প্রণীত হয় নাই। এই বিশাল দেশের বিভিন্ন প্রাদেশিক ইডিয়ম-এর গোলযোগ হইতে ভাষার সেই বিশুদ্ধ রীতিটিকে উদ্ধার করিয়া লইবার কোনও উপায় এ পর্য্যন্ত উদ্ভাবিত হয় নাই। এজন্য যতদূর সম্ভব—যে তুলিকে বাংলা-সাহিত্যের ক্লাসিক বলা যাইতে পারে—কি প্রাচীন কি আধুনিক—সেই সকল গ্রন্থ হইতে প্রচুর পরিমাণে পাঠ্য নির্দেশ করিয়া ভাষার রীতি হৃদয়ঙ্গম করাইতে হইবে। আমার মনে হয়, বিদ্যালয়ে বাংলাশিক্ষার সংস্কার এই প্রণালীতে কতকটা স্বাধীন ভাবেই করিয়া লইতে হইবে।

আর একটি কথা আমি সসঙ্কোচে নিবেদন করিব, আশা করি কেহ আমার অভিপ্রায় সম্বন্ধে সন্দেহ করিবেন না। গত ৬৭ বৎসর আমি ঢাকা-বিশ্ববিদ্যালয়ে বাংলা-সাহিত্যের অধ্যাপনায় নিযুক্ত আছি, তাহাতে একটি বিষয়ে আমার দৃষ্টি বিশেষ ভাবে আকৃষ্ট হইয়াছে। তাহা এই; অধিকাংশ ছাত্রেরই পাঠ বা আবৃত্তির অভ্যাস নাই—উচ্চারণ-দোষে সাহিত্যের রস তাহারা উপলব্ধি করিতে

পারে না। ইহার কারণ, বাল্যশিক্ষার কালে শব্দের বিশুদ্ধ উচ্চারণ ও স্পষ্ট পাঠ বা আবৃত্তির দিকে শিক্ষক বা অভিভাবক কাহারও দৃষ্টি থাকে না। ইহা একটি গুরুতর ত্রুটি বলিয়া মনে করি। ভাষার আসল রূপ তাহার ধ্বনি; এই ধ্বনির সৌন্দর্য্য যদি কানে না ধরা দেয় তবে প্রাণেব রসে ভাষা রসায়িত হইতে পারে না—এই জগ্গই বোধ হয়, কোন স্কন্দদৃষ্টি সমালোচক বলিয়াছিলেন—“আবৃত্তিঃ সর্বশাস্ত্রাণাং বোধাদপি গরীয়সী”। বৈদিক মন্ত্রোচ্চারণের বিশুদ্ধতা সম্বন্ধে ঋষিদের যে অতিসাবধানতা ছিল তাহাও এই কারণে; মন্ত্র ঠিক মত উচ্চারিত না হইলে মন্ত্রের দেবতা অভীষ্ট বরদান করেন না—একথা সত্য; ভাষার উচ্চারণ বিশুদ্ধ না হইলে বাণী-দেবতা সেবকের প্রাণে অধিষ্ঠিত হইয়া তাহাকে রসান্বাদনের অধিকার দেন না। ভাষার এই দিকটিতেও যথাসাধ্য মনোযোগ দেওয়া আবশ্যিক। উচ্চারণ-দোষ দূর করিবার চেষ্টা প্রথম হইতে করা চাই—পাঠ ও আবৃত্তি আরও অধিক পরিমাণে নিত্যকর্মের তালিকাভুক্ত করিতে হয়। আবৃত্তি-প্রতিযোগিতার জগ্গ সকলকেই চেষ্টা করিতে হইবে—উহা যেন সখের কাজ না হয়। আমার বিশেষ অনুরোধ, ভাষাশিক্ষার অতিপ্রয়োজনীয় অঙ্গরূপে বিদ্যালয়ে যেন এই ব্যবস্থা থাকে। ভাষার ধ্বনিই ভাষার প্রাণ—শিক্ষার্থীর প্রাণের সঙ্গে সেই প্রাণের যোগ না হইলে ভাষার ভিতর দিয়া তাহার আত্মস্ফূর্তি ঘটিবে না।

আমার যথাজ্ঞান ও যথাবিশ্বাস বর্তমান প্রসঙ্গের অবতারণা ও আলোচনা করিলাম; বিষয়টির আলোচনায় আমি যে মতবাদ আশ্রয় করিয়াছি তাহার কোন কোন অংশে মতভেদ থাকিতে পারে—তাহা লইয়া বিতর্ক করিবার অবকাশ নাই। বিতর্কের স্থলগুলি আমি জানি, তথাপি আশা করি, আপনারা আমার আদর্শ ও অভিপ্রায় সম্বন্ধে ভুল বুঝিবেন না। আমার এই অভিভাষণ আধুনিক সাহিত্য-রথিগণের উদ্দেশ্যে নয়—সাহিত্য-সৃষ্টির পরিবর্তে যাহারা ভবিষ্যৎ সাহিত্যিক সৃষ্টি করিবার ভার লইয়াছেন সেই শিক্ষক-ব্রতধারী স্ত্রী ও পণ্ডিতমণ্ডলীকে সম্বোধন করিয়া আমি আমার এই বক্তব্য নিবেদন করিলাম। *

* নেত্রকোণা চন্দ্রনাথ হাইস্কুলের সারস্বত-উৎসব উপলক্ষে সাহিত্য-সভায় সভাপতির অভিভাষণ।

সাহিত্যিক বিদ্যাসাগর

বঙ্গীয়-সাহিত্য-পরিষৎ কর্তৃক বিদ্যাসাগর গ্রন্থাবলী (প্রথম খণ্ড) প্রকাশিত হইয়াছে । এ ধরণের গ্রন্থ-প্রকাশ বাংলা সাহিত্যের ক্ষেত্রে একটি নূতন যুগের সূচনা করিতেছে ; কেন তাহাই বলিব । যাহা বিগত হইয়াছে তাহার প্রতি বাঙ্গালীর মমতাও প্রায় বিগত হইয়া থাকে । আমরা বর্তমানের উপাসক, আমাদের ঐতিহাসিক চেতনা নাই বলিলেই হয় । সম্ভবতঃ পলিমাটির দেশ বলিয়াই আমাদের জীবনের কোন ভাগে কোনও বনিয়াদ পাকা হইতে পারে না—মাটির উপরেও যেমন কোন চিহ্ন থাকে না, মনের ভিতরেও তেমনই কোনও স্মৃতি পুষ্টি রাখি না । বিংশ শতাব্দীর আরম্ভ হইতেই আমরা জোর করিয়া আমাদের দেশ ও জাতি সম্বন্ধে অতিশয় সচেতন হইতে চেষ্টা করিতেছি, কিন্তু কিছুতেই, সেই চেতনার যাহা প্রধান সহায়—সেই অতীতের স্মৃতি, পিতৃ-গণের পরিচয় উদ্ধার করিতে পারি নাই ; সে কুচি নাই, সময় নাই । আমরা কালের ধ্যান করি, ভূত-ভবিষ্যতের হিসাব আমরা করি না—ভবিষ্যতের উৎসাহ নাই, বর্তমানের উত্তেজনা আছে । তাই বেশী দিন নয়,—গত শতাব্দীর যে ইতিহাস যাহা এখনও এ যুগ হইতে একেবারে বিচ্ছিন্ন হয় নাই, এবং যে যুগ গত সহস্রবৎসরের ইতিহাসে একটি বিশিষ্ট স্থান অধিকার করিয়া আছে—সেই যুগের যাহা শ্রেষ্ঠ কীর্তি—সেই সাহিত্যও আমরা ভুলিতে চাহিয়াছি । এক একজন বিরাট পুরুষরূপে, মনীষায় ও প্রতিভায়, যাহারা এ জাতির নূতন জাতকর্ম সম্পন্ন করিয়াছিলেন তাঁহাদের বাণী বিস্তৃত ও সম্পূর্ণরূপে রক্ষা করিবার চেষ্টা আমরা করি নাই, সে সাহিত্য ক্রমেই দুর্লভ হইয়া উঠিয়াছে ।

এতদিন পরে আজ আমরা সেই কর্মে প্রবৃত্ত হওয়ার যে পরিচয় পাইতেছি তাহা যেমন অভূতপূর্ব তেমনই আশাপ্রদ । প্রাচীন-সাহিত্যের সম্পর্কে কিছু কাজ বহুপূর্বে আরম্ভ হইয়াছে, অনেকগুলি গ্রন্থ সম্পাদিত ও মুদ্রিত হইয়াছে বটে, কিন্তু যে-সাহিত্য জীবন্ত—যাহার রসধারায় পুষ্ট হওয়ার প্রয়োজন এখনও শেষ হয় নাই, যাহাকে এখনও ভাল করিয়া বুঝিবার অবকাশই হয় নাই, এবং না বুঝিয়া লইলে বর্তমানের সংশয় ঘুচিবে না,—সে

গুলিকে এ পর্যন্ত প্রায় অর্ধশতাব্দীর ধূলিস্তর হইতে কেহ উদ্ধার করেন নাই ; বিকৃত, বিক্লিষ্ট ও বিচ্ছিন্ন অবস্থায় তাহাদের পরিচয় একরূপ অজ্ঞাত হইয়াই আছে। বর্তমান গ্রন্থাবলী সেই অভাব মোচনের প্রথম উদ্যম—ঠিক এইভাবে এমন কাজ ইতিপূর্বে আর কেহ করে নাই ; তাই বলিয়াছি, ইহা এক নূতন যুগের সূচনা করিতেছে।

বিদ্যাসাগর-গ্রন্থাবলীর এই প্রথম খণ্ডে বাংলা গদ্যসাহিত্যের আদি-রূপটি ধরিয়া দেওয়া হইয়াছে ; এবং বিদ্যাসাগর মহাশয়ের যে সাহিত্যিক মূর্তি ইহাতে প্রকাশ পাইয়াছে, তাহা তাঁহার চিরপরিচিত প্রতিকৃতিকেও অ-পূর্বপরিচিত করিয়া তুলিয়াছে। তিনি যে কেবল বাংলা গদ্যের আবিষ্কর্তা নহেন, পরন্তু তাঁহার রচনা যে বাংলা গদ্যসাহিত্যের সর্বশ্রেষ্ঠ ক্লাসিক—‘বেতাল পঞ্চ-বিংশতি’ হইতে আরম্ভ করিয়া তাঁহার আত্ম-জীবনচরিত পর্যন্ত পাঠ করিলে প্রতি-পত্রে ও প্রতি-ছত্রে তাহার প্রমাণ মিলিবে। বিদ্যাসাগর মহাশয়ের রচনার সহিত পরিচয় নাই এমন শিক্ষিত বাঙ্গালী কে আছে ? তথাপি এই গ্রন্থের পাতাগুলি একটির পর একটি উন্টাইয়া পড়িবার কালে যে রস আন্বাদন করিলাম, ইহার ভাষায় যে একটি মৃদু-মধুর কস্তুরী-সৌরভ অনুভব করিলাম, তাহার কারণ কি ? ইহার বাক্যগুলিতে এমন একটি নির্মল প্রসন্নতা ও স্নিগ্ধ-গম্ভীর মাধুর্য আছে, যাহা বাংলা গদ্যের আজিকার এই বিচিত্র-বিকাশের পরেও একটি বিশিষ্ট ও দুর্লভ লক্ষণ বলিয়া মনে হয়। মনে হইল, এতদিন পরে একটি বস্তুর প্রকৃত পরিচয় পাইলাম, যে বস্তু—বাংলা গদ্যসাহিত্যের—রোমান্টিক নয়, খাঁটি ক্লাসিক্যাল রীতি ; এ বস্তু যদি না থাকিত, তবে বাংলা সাহিত্যের একটি বড় অভাব থাকিয়া যাইত। গ্রন্থাবলীর সাহায্যে এক সঙ্গে এমন করিয়া সাজাইয়া না দিলে কোন লেখকের সাহিত্যিক প্রতিভার সম্যক পরিচয় সম্ভবপর হয় না।

বিদ্যাসাগর-গ্রন্থাবলীর এই ‘সাহিত্য’-ভাগ নূতন করিয়া পড়িতে হইবে—কেমন করিয়া বাংলা গদ্যের জন্ম হইয়াছিল তাহাই আজ এই পৃষ্ঠাগুলির মধ্যে সন্নিহনে উপলব্ধি করিতে হইবে। যাহা ছিল না তাহা সৃষ্টি করা যে কত বড় প্রতিভার কাজ—‘বেতাল পঞ্চবিংশতি’র ভাষা তাহারই পরিচয় দিতেছে। এই ভাষা যাহার প্রাণে ও কানে এক নূতন ধ্বনিরূপ অঙ্কুরিত করিয়াছিল,

তাঁহার চিন্তা কোন ছাঁচে গঠিত ছিল, আজ তাহা বুঝিতে পারি। সেকালে, তাঁহার জীবনশায়, বিজ্ঞানাগরচরিত্রের সেই সারস্বত-রূপ কেহ দেখিবার অবকাশ পায় নাই—পর্কতের শিখরই সকলে দেখিয়াছিল, সান্ন্যদেশ দেখে নাই! কত বড় সাধনা ও রসবোধ থাকিলে তবে ভাষার এই শুদ্ধ-সংযত স্রী, ও মধুর-গভীর ধ্বনি আয়ত্ত করা যায়, তাহা আজিকার দিনেই বিশেষ করিয়া অনুভব করিতে পারি। বিজ্ঞানাগরের চরিত্রে যে দুই বিরুদ্ধ প্রকৃতির সমন্বয় হইয়াছিল—যাঁহার মত আশ্চর্য ঘটনা সে যুগের ইতিহাসে আর নাই—তাহারই ফলে, বাংলা গদ্যে এই রূপ এমনভাবে প্রকাশিত হইয়াছিল। সংস্কৃত সাহিত্যের—অর্থাৎ আমাদের প্রাচীন সংস্কৃতির—অতিশয় পেলুব ও মার্জিত, শুদ্ধ ও সংযত রস-নৈপুণ্যের সঙ্গে আধুনিক মনোবৃত্তির অনুযায়ী যুক্তিনিষ্ঠা, পরিমাণ-বোধ ও স্বাভাবিকতা, এই দুইয়ের মিলন ঘটিয়াছে—এই রচনার ঠাইলে। সংস্কৃত কবিগণের প্রতি তাঁহার যে অনুরাগ ছিল তাহাই আধুনিক আদর্শে, যুগপ্রবৃত্তির শাসনে সংযত হইয়া বাংলাভাষার নবরূপ নির্মাণের প্রেরণা হইয়াছিল; মধুসূদন দত্ত কান ও প্রাণের যে সাধনায় বাংলা অমিত্রচ্ছন্দ আবিষ্কার করিয়াছিলেন, বিজ্ঞানাগরও আর এক পথে তেমনই সাধনার ফলে এই গদ্যচ্ছন্দ আবিষ্কার করিয়াছিলেন। ভাষার সঙ্গীতগুণই যে সাহিত্যসৃষ্টির আদি প্রেরণা, তাহা যাঁহারা বুঝিয়াছেন তাঁহারা জানেন, বাংলাগদ্যের রূপটি উদ্ধার করিতে কোন্ নিগূঢ় শক্তির প্রয়োজন হইয়াছিল। বিজ্ঞানাগর মহাশয় বাংলা গদ্যের ছন্দ-ভিত্তি স্থাপন করিয়াছিলেন, তাহারই উপরে বঙ্কিম ও পরে রবীন্দ্রনাথ তাঁহাদের কারুকীর্তির অশেষ নিদর্শন নির্মাণ করিয়াছেন। বিজ্ঞানাগরের প্রথম গদ্য-রচনা ‘বেতাল পঞ্চবিংশতি’র ভাষা মনোযোগ সহকারে বিশ্লেষণ করিয়া দেখিলে দেখা যাইবে, এই মহাপুরুষের মহত্ব তাঁহার অপর কীর্তিনিচয়কে আশ্রয় করিলেও, তিনি তাঁহার অশ্রান্ত অবকাশহীন কর্মজীবনে বাংলাসাহিত্যের নম্পর্কে যে প্রতিভার পরিচয় দিয়াছেন তাহা বিশ্বয়কর। আমি বিজ্ঞানাগর মহাশয়ের পরিণত লেখনীর লিপি-কৌশলের কথা বলিব না, কিংবা তাঁহার ভাষার নানা ভঙ্গির কথাও বলিব না; এই গ্রন্থ মনোযোগ সহকারে আত্মোপাস্ত পড়িলে, ভাষাকে অবলীলাক্রমে যে-কোন ছাঁচে ঢালিবার সেই শক্তি সকলেই নক্ষ্য করিয়া মুগ্ধ হইবেন। আমি কেবল তাঁহার এই প্রথম গ্রন্থ ‘বেতাল পঞ্চ-

বিংশতি' হইতে একটি বাক্যচ্ছন্দের উদাহরণ দিব। ইহার শব্দাঙ্কুর লক্ষ্য না করিয়া—লেখকের প্রাণ যে শব্দার্থনিরপেক্ষ সুর-মহিমায় অভিভূত হইয়াছে, এবং কান সেই সুরকে ভাষায় ধরিবার চেষ্টা করিয়াছে—তাহাই লক্ষ্য করিতে বলি। এইরূপ বাক্যযোজনায় মোহ তাঁহার রচনায় মাঝে মাঝে প্রকাশ পাইলেও এমন দৃষ্টান্ত অধিক নাই। আমি যে কথাগুলি উদ্ধৃত করিতেছি তাহাতে বিজ্ঞাসাগরের সাহিত্যিক প্রাণের গূঢ় রূপটি অসম্ভূত হইয়া পড়িয়াছে।

একই ঘটনা কাহিনীর মধ্যে প্রসঙ্গক্রমে দুইবার বিবৃত হইয়াছে ; প্রথমবারের কথাগুলি এইরূপ—

তথায় তিনি, রামচন্দ্রের প্রতিষ্ঠিত দেবাদিদেব মহাদেবের মন্দিরে প্রবেশপূর্বক দর্শনাদি করিয়া নির্গত হইলেন ; এবং সমুদ্রে দৃষ্টিপাত মাত্র দেখিতে পাইলেন, প্রবাহমধ্য হইতে এক অদ্ভুত স্বর্ণময় মহীকুহ বহির্গত হইল। ঐ মহীকুহের শাখায় উপবিষ্ট হইয়া, এক পরমসুন্দরী পূর্ণযৌবনা কামিনী, হস্তে বীণা লইয়া, মধুর কোমল তানলয় বিশুদ্ধ স্বরে সঙ্গীত করিতেছে। (বিজ্ঞাসাগর-গ্রন্থাঙ্কলী, সাহিত্য, পৃঃ ৬৮)।

এই কথাগুলির পুনরাবৃত্তি সম্পূর্ণ অন্তরূপ—

যে স্থানে ত্রেতাযুগের ভগবান রামচন্দ্র, দুর্ভুক্ত দশাননের বংশ ধ্বংসবিধান বাসনায়, মহাকায় মহাবল কপিদল সাহায্যে, শতযোজন বিস্তীর্ণ অর্গবের উপর, লোকাভীত কীর্ত্তিহেতু, সেতু সঙ্ঘটন করিয়াছিলেন—তথায় উপস্থিত হইয়া দেখিলাম, কল্লোলিনীবল্লভের প্রবাহমধ্য হইতে, অকস্মাৎ এক স্বর্ণময় ভূকুহ বিনির্গত হইল ; তদুপরি এক পরম সুন্দরী রমণী, বীণাবাদনপূর্বক, মধুর স্বরে সঙ্গীত করিতেছে। (ঐ, পৃঃ ৬৮-৬৯)।

পূর্বের ঐ ভাষাই যথার্থ ও পরিমিত—বাক্যরচনা হিসাবে অনবদ্য। পরবর্তী রচনায় লেখক বিষয়-বস্তুকে যেন অগ্রাহ্য করিয়া কেবলমাত্র ভাষার সঙ্গীত-তরঙ্গে আত্মসমর্পণ করিয়াছেন। আদর্শ গল্প ইহা নহে, কারণ ইহাতে শব্দ-অর্থের পরিমাণ-সামঞ্জস্য নাই, কিন্তু ইহাতে যতি-তাল-সংযোগে কি অপূর্ব ধ্বনি-তরঙ্গের সৃষ্টি হইয়াছে—একটি অথও সুর অল্প-পরিসরের মধ্যে পূর্ণবিকশিত হইয়া ঝরিয়া পড়িয়াছে ! এই শক্তি যাহার ছিল তিনি বালকপাঠ্য গল্পও লিখিয়াছেন—‘কথামালা’র মত অতি-সরল মিতাকুর ভাষায়, সেই জাতীয় একখানি ইংরাজী ক্লাসিকের অনুবাদ করিয়াছেন ! এই যে প্রতিভা ইহার সাহিত্যিক পরিচয় আবার ভাল করিয়া করিতে হইবে। বিজ্ঞাসাগরকে এই দিক দিয়া চিনিবার বিশেষ প্রয়োজন আছে, তাঁহার সৃষ্ট সাহিত্যের মধ্যেই তাঁহার হৃদয়-মনের যে প্রতিবিম্ব

আছে তাহা আরও উজ্জল ও অশ্রান্ত। 'কথামালা'র সম্বন্ধে একটি যে প্রশ্ন আমার মনে জাগিয়াছে তাহা এইখানে বলিয়া রাখি। ইংরেজীতে James-এর Aesop's Fables একখানি ক্লাসিক হইয়া আছে; মূল গ্রীক কেমন জানি না, কিন্তু এই অনুবাদ নাকি মূলকে অনুসরণ করিয়াই এমন উপাদেয় হইয়াছে; সে যাহা হউক, ইহার ইংরাজী ভাষা ও রচনাভঙ্গি অতিশয় বৈশিষ্ট্যপূর্ণ। বিজ্ঞাসাগর মহাশয় তাঁহার অনুবাদে এই পুস্তকই ব্যবহার করিয়াছিলেন মনে হইবার কারণ আছে এবং তাঁহার অনুবাদের ভাষাও এমন সরল সংহত ও বিশুদ্ধ যে, ইংরাজীর মত এই বাংলা অনুবাদের একটি বিশেষ মূল্য আছে। এজন্য আমার মনে হয়, এই পুস্তকখানি স্কুলপাঠ্য হইলেও বর্তমান খণ্ডে সন্নিবিষ্ট করা যাইত। এবং তাহা হইলে একদিকে 'বেতালপঞ্চবিংশতি' ও অপরদিকে 'কথামালা'র ভাষায় বিজ্ঞাসাগর মহাশয়ের লিপিচাতুর্যের দুই বিভিন্ন ভঙ্গিও যেমন সহজে চোখে পড়িত, তেমনই ভাষার আদর্শ সম্বন্ধে তাঁহার রুচি বা অভিপ্রায়ের আরও সাক্ষ্য হইয়া উঠিত।

বিজ্ঞাসাগর মহাশয়ের ভাষা সম্বন্ধে নূতন কিছু বলিবার নাই—এই ভাষাই যে বাংলা গল্প সাহিত্যের আদি সাধুভাষা তাহা কাহারও অবিদিত নাই। তথাপি এই গ্রন্থাবলীতে তাঁহার ঠাইলের যে কালানুক্রমিক বিকাশ লক্ষ্য করিবার সুবিধা হইয়াছে, তাহাতে সে সম্বন্ধে আমার কিছু বলিবার আছে। 'বেতালপঞ্চবিংশতি' এবং তার পরেই 'শকুন্তলা'য় আমরা ভাষার যে রূপ দেখিতে পাই তাহা বাংলারই সাধুরূপ—যেমন বিশুদ্ধ তেমনই প্রাঞ্জল। শকুন্তলায় কথোপকথনের ভাষা বিশেষতঃ নারী-চরিত্রগুলির—একেবারে খাঁটি বাংলা বলিলেই হয়। কিন্তু 'সীতার বনবাসে' দেখিতেছি, ভাষার সে লঘুলীলা আর নাই—সে ভাষা শুধুই সাধু নয় গুরু-ভাষা। 'শকুন্তলা'য় কালিদাসের, এবং 'সীতার বনবাসে' ভবভূতির—ভাব ও ভাষার আবহাওয়াই ইহার কারণ নয়, এই দুই রচনার মধ্যে যে আর একটি বৃহত্তর রচনার ব্যবধান রহিয়াছে তাহাই ইহার কারণ। এই রচনা—মহাভারতের অনুবাদ; এবং ইহাই এই খণ্ডের বৃহত্তম রচনা। ইহার পূর্বের দুইখানি গ্রন্থে তিনি ভাষার যে স্বাধীনতা রক্ষা করিয়াছিলেন, এখানে তাহা করিতে পারেন নাই। মূলের ভঙ্গি যথাসম্ভব অক্ষুণ্ণ রাখিবার জন্য তিনি পদবিজ্ঞাসে সংস্কৃতের রীতি স্বীকার করিয়াছেন; ইহার ফলে মহাভারতের ভাষা একটি স্বতন্ত্র

ভাষা হইয়া উঠিয়াছে—কালীপ্রসন্ন সিংহের অনুবাদেও সেই আদর্শ বজায় আছে। আমার মনে হয়, এইভাবে মহাভারত অনুবাদ করার ফলে, অতঃপর বিদ্যাসাগর মহাশয়ের একটা সংস্কার বা অভ্যাস জন্মিয়া গিয়াছিল, এবং ‘সীতার বনবাস’ বা ‘রামের রাজ্যাভিষেক’ রচনা কালে তিনি এই আদর্শ সম্পূর্ণ ত্যাগ করিতে পারেন নাই। ‘ব্রাহ্মবিলাসে’র ভাষা অপেক্ষাকৃত সরল ও প্রাঞ্জল হইলেও বিষয়বস্তুর তুলনায় উহা আরও লঘু হইতে পারিত। কিন্তু এই কথা বলিবার অভিপ্রায় এই নয় যে, বিদ্যাসাগর মহাশয়ের ভাষার শেষ পরিণতি বা বিকাশ ঐরূপ দাঁড়াইয়াছিল, এবং ইহাই তাহার কারণ। বরং বিদ্যাসাগরের ভাষা ও ভঙ্গির বৈচিত্র্য লক্ষ্য করিলে, আমি উপরে যে ভাষার সম্বন্ধে বলিয়াছি তাহাই বিদ্যাসাগরী ভাষার একমাত্র আদর্শ নয়—ইহাই আমার বক্তব্য।

বর্তমান খণ্ডে তাঁহার সমুদয় সাহিত্য-রচনা সংগৃহীত হইয়াছে। সে রচনার পরিমাণ বেশী নয় বটে, কিন্তু তথাপি আশ্চর্য্য হইতে হয়—তাঁহার মত কর্মবীর যোদ্ধাপুরুষের পক্ষে সাহিত্যচর্চার এই অবসরটুকুও মিলিয়াছিল কেমন করিয়া! অপর খণ্ডগুলি সম্পূর্ণ হইলে দেখিতে পাওয়া যাইবে তিনি সারাজীবন সেবা-ধর্মের যে অগ্নি বক্ষে বহন করিয়া যে ধরণের কর্মক্ষেত্রে আপনাকে উৎসর্গ করিয়াছিলেন তাহার মধ্যে এবং তাহারি কারণে কি পরিমাণ লেখনী-কর্মও করিয়াছিলেন। শেষ বয়সের রচনা ‘রামের রাজ্যাভিষেক’ যে কারণেই অসমাপ্ত হইয়া থাকুক, তাহার সঙ্গে ক্লাস্তির দীর্ঘনিঃশ্বাস জড়িত হইয়া আছে। আত্ম-জীবনচরিতের অধ্যায়গুলি যেখানে আসিয়া হঠাৎ শেষ হইয়াছে, তাহাতে আমাদের চিত্ত হায় হায় করিয়া উঠে। আপনার জীবনের কথা লিখিবার বাসনা ছিল—স্বতি অটুট ছিল, উপকরণ একটিও হারায় নাই—তথাপি লেখা আর হইয়া উঠিল না! তাহার কারণ আলস্য নয়, সংকল্পের শৈথিল্যও নয়—এতবড় পুরুষসিংহের পক্ষে তাহা অসম্ভব; কিন্তু সময় হইয়া উঠিল না! সাহিত্যিক ঈশ্বরচন্দ্রের জীবনের সেই ট্রাজেডিই তাঁহাকে মহিমাম্বিত করিয়াছে। যে প্রাণ এত কোমল, এত তীব্র যাহার জ্ঞান-পিপাসা, যাহার সাহিত্যপ্রেম এত প্রবল,—এবং প্রতিভা ও পাণ্ডিত্য অবিসংবাদিত, সেই ব্যক্তি আপনাকে লইয়া বসিবার, আপনার হৃদয়ের সঙ্গে আলাপ করিবার সময় পায় নাই! তাঁহার দেশ কাঁদিতেছে—নিজের কথা শুনিবার সময় তাঁহার নাই; অন্য়, অসত্য, অশিক্ষা, অনাচার ও অনাহার তাঁহার

দেশের মানুষকে অমানুষ করিয়া কেলিতেছে—ভাবকল্পনায় মজিবার সময় নাই ; নিজের চেয়ে পর বড়, সাহিত্যের চেয়ে মানুষ বড়—তাই পণ্ডিত, সাহিত্যিক, ভাবুক ঈশ্বরচন্দ্র আপনাকে সবলে সংযত করিয়াছিলেন । কিন্তু এই সংগ্রামশীলতার মধ্যে যে প্রেম ছিল, এবং তাহারি কারণে তাঁহার চরিত্রে যে কঠোর সংযম ছিল—রচনাবলীর ভাষার ছত্রে ছত্রে তাহাই পুষ্পিত হইয়া উঠিয়াছে ।

তথাপি এই গ্রন্থাবলীর অন্তর্গত দুইটি রচনা, এই মহাপুরুষের কীর্তিগত পরিচয়কে ব্যক্তিগত পরিচয়ের দ্বারা পূর্ণতর করিয়া তুলিবে । ইহাদের একটির নাম ‘প্রভাবতী-সন্তোষণ’, অপরটি তাঁহার স্বরচিত ‘জীবন-চরিত’ । এই দুইটি রচনাই পূর্বে প্রকাশিত হইয়া থাকিলেও একালের লোকের পক্ষে সম্পূর্ণ নূতন । আত্মজীবন-চরিতে অল্প অংশই লিখিত হইয়াছিল, এজন্য কেহ মনে না করেন যে এই পৃষ্ঠাগুলির তেমন কোন মূল্য নাই । বিদ্যাসাগর মহাশয় তাঁহার বাল্য-জীবনের যে স্মৃতি, নিজ বংশ-পরিচয় ও পিতৃমাতৃকুলের যে কয়েকটি চরিত্র, এবং নিজ পরিবারের যে কঠোর দারিদ্র্য ইহাতে যেরূপ নির্ভর সহিত বিবৃত করিয়াছেন, তাহাতে সেই ভবিষ্যৎ মহামহীকৃৎের মৃত্তিকানিহিত শিকড়গুলির এবং অন্ধুর-কালের যে পরিচয় পাওয়া যায় তাহার মত মূল্যবান আর কিছুই নাই । উত্তর কালে যে বিরাট মনুষ্যত্বের চূড়া বাংলাদেশের আকাশ ভেদ করিয়া উঠিয়াছিল, তাহার ভিত্তিস্থাপনা যদি কেহ চাক্ষুষ করিতে চান, তবে এই অসমাপ্ত আত্ম-জীবন-চরিত সে পক্ষে যথেষ্ট । একদিকে যেমন দারিদ্র্যের কঠোর পীড়নেও তিনি তাঁহার আত্মীয়গণের ত্যাগ, দৃঢ়তা, স্বল্পে-সন্তোষ ও সদাচারের আদর্শে ভিতরে ভিতরে আপনাকেও গড়িয়া তুলিয়াছিলেন—তাহার প্রভাব এই ক্ষণজন্মা বালকের পক্ষে নিষ্ফল না হইবারই কথা, তেমনই, আর একদিকে সংসারের স্বার্থপরতা ও হৃদয়হীনতার মধ্যে তিনি সেই বয়সেই যে দুই একটি স্নেহ মমতা ও করুণার মূর্তি দেখিয়াছিলেন তাঁহার হৃদয়ে তাহা অতি গভীর ভাবে মুদ্রিত হইয়াছিল ; এইরূপ একটি মহিলার কথা তিনি যেভাবে এই জীবনকাহিনীর মধ্যে উল্লেখ করিয়াছেন, তাহাতে—সেই দয়ার সাগরের দয়া-ধর্ম্মে দীক্ষা লাভ হইয়াছিল কবে ও কি ভাবে,—জানিয়া চমকিত হইতে হয় । একস্থানে লেখক বলিতেছেন—“আমি স্ত্রীজাতির পক্ষপাতী বলিয়া অনেকে নির্দেশ করিয়া থাকেন । আমার বোধ হয়, সে নির্দেশ অসঙ্গত নহে । যে ব্যক্তি স্নেহ দয়া সৌজন্ম প্রভৃতি প্রত্যক্ষ

করিয়াছে এবং ঐ সমস্ত সদৃশ্যের ক্ষণভোগী হইয়াছে, সে যদি স্ত্রীজাতির পক্ষপাতী না হয়, তাহা হইলে তাহার তুল্য কৃত্রিম পামর ভূমণ্ডলে নাই।” পড়িয়া মনে হয় সমগ্র বাংলা দেশ এই দেবীর নিকটে চিরঋণী হইয়া আছে। স্ত্রীজাতির প্রতি তাঁহার ভক্তির কারণ আরও একস্থানে উল্লেখ করিয়াছেন। অতি অল্প বয়সে চাকুরীর সন্ধানে কলিকাতায় আসিয়া তাঁহার পিতার যখন উপবাস করিয়া কাটাইতে হইত, সেই সময়ে একটি সামান্য স্ত্রীলোক যে ভাবে তাঁহার প্রাণরক্ষা করিয়াছিল—“পিতৃদেবের মুখে এই হৃদয়বিদারণ উপাখ্যান শুনিয়া আমার অন্তঃকরণে যেমন দুঃসহ দুঃখানল প্রজ্জ্বলিত হইয়াছিল, স্ত্রীজাতির উপর তেমনই প্রগাঢ় ভক্তি জন্মিয়াছিল। পুরুষ হইলে, ঠাকুরদাসের উপর কখনই এরূপ দয়াপ্রকাশ ও বাৎসল্য প্রকাশ করিতেন না।”

কিন্তু ‘প্রভাবতী সম্ভাষণ’ নামক ক্ষুদ্র রচনাটি পড়িয়া বিজ্ঞানাগর-চরিত্রের যে পরিচয় পাওয়া যায়, তেমন আর কোথাও নয়। এই “বিলাপ”—তিনি প্রকাশ করিবার জন্ম রচনা করেন নাই, কারণ, ইহার মধ্যে যে মর্মান্তিক দুঃখের অতি করুণ কাতরধ্বনি রহিয়াছে, তাহা অপরকে শুনাইবার উচ্চ রোদনরব নহে। এখানে আমরা যেন মানব-হৃদয়ের এমন একটি নিভৃত গোপন কক্ষে প্রবেশ করিয়াছি যেখানে প্রবেশের অধিকার আমাদের নাই—সে কাজ করিলে প্রত্যাবায়ভাগী হইতে হয়। আমার মনে হয়, ইহাতে মৃত মহাত্মার অনুমতি ছিল না, আমরা যেন সত্যই অন্বেষণে কাজ করিয়াছি; তথাপি ইহা পাঠ করিয়া আমরা ধন্য হইয়াছি। সেই সিংহবৎ পুরুষের হৃদয় যে কিরূপ কোমল ছিল, সে কথা বাংলা দেশে কাহারও অবিদিত নাই; কিন্তু সে কোমলতা সর্বদাই পৌরুষযুক্ত হইয়া দেখা দিয়াছে—পরের দুঃখে কেবল বিগলিত হওয়াই নয়, সেই দুঃখ নিবারণের জন্ম অসীম হৃদয়-বলের অভিব্যক্তিও হইয়াছে। কিন্তু এই দুঃখ নিজের দুঃখ—এ দুঃখের প্রতিকার-চেষ্টা যেমন নিষ্ফল, তেমনই অনাবশ্যক। একটি বন্ধুকণা শিশুর শোকে এতবড় জ্ঞানী ও প্রবীণ পুরুষ যে কেমন করিয়া কাঁদিতে পারে, তাঁহার হৃদয়ও যে এত দুর্বল ছিল, তাহা কে জানিত? কাহার প্রত্যেক কথাটির মধ্যে হৃদয়ের কি ক্ষুধা প্রকাশ পাইয়াছে! বিজ্ঞানাগর চরিত্রের এই অতি বৃহৎ মনুষ্যসুলভ দুর্বলতা আমাদের চক্ষে তাঁহাকে এক নূতন মহিমা দান করিয়াছে। জীবনে যে কোন দুর্বলতার অধীন হয় নাই, যাহার কীৰ্ত্তি-গৌরবের শতাংশের

এক অংশ লাভ করিলে মানুষের আত্মপ্রসাদের অস্ত থাকে না, যে কত মানুষের কত দুঃখ দূর করিয়াছে, তিনি যে একদিনের জগৎ আপনাকে অতিশয় সাধারণ মানুষ ভিন্ন আর কিছু মনে করেন নাই,—যে দুঃখ যে শোক সার্বজনীন তাহা হইতে অব্যাহতি লাভ করিবার মত আত্মদর তাঁহার কিছুমাত্র ছিল না—‘প্রভাবতী সস্তাষণ’ পাঠ করিয়া আমরা মুগ্ধচিত্তে তাহাই ভাবিয়াছি। এ যেন কোন মহাকাব্য-রচিত নাটকের একটি অতি গভীর রসাত্মক মর্মান্তিক দৃশ্য আমাদের সম্মুখে উদ্ঘাটিত হইয়াছে।

গ্রন্থাবলীর মধ্যে যে চিত্রগুলি সন্নিবিষ্ট হইয়াছে তাহার সবগুলিই যেমন মূল্যবান, ছাপাও তেমনই উত্তম হইয়াছে। ‘শ্মশানে বিদ্যাসাগর’ চিত্রটি অতিশয় চমকপ্রদ, এমন কি, রোমাঞ্চকর বলিলেও হয়। এ অবস্থার এরূপ চিত্র প্রতিকৃতি-হিসাবে যথার্থ না হইতে পারে, তথাপি চিত্রের এ মূর্তি এখনও জীবিত—ইহার মধ্যে সেই মহাজীবনের নির্বাণ প্রত্যক্ষ করিতেছি। জরা ও ব্যাধিপীড়িত মুমূর্ষু দেহে—বিশেষ করিয়া ওই মুখে—যাহা প্রকাশ পাইতেছে তাহা শ্রেষ্ঠ চিত্রকরের তুলিকার অযোগ্য নহে। যে জীবনের মত প্রবল প্রচণ্ড জীবন প্রায় কেহ ভোগ করে না—সে জীবনের অবসান হইয়াছে, এ মানুষ আর সে মানুষ নহে; সকলের মধ্যে যে আপনাকে বিলাইয়া দিয়াছিল, সে আজ একা! সেই বীর্য, সেই প্রতিভা, সেই জনস্ত আত্মপ্রত্যয়—ও-মুখে সে সকলের চিহ্নও নাই। তথাপি এ মুখও বিদ্যাসাগরের মুখ—স্পষ্ট, প্রত্যক্ষ কোন বিকৃতি ইহাতে নাই। এই অতি অসহায় দীন মূর্তি দেখিলে মনে হয়, এতদিনে এই মহাপুরুষের মহাত্মত উদ্ঘাটিত হইয়াছে—নিজেকে নিঃস্ব করিয়া, নিঃশেষে সর্বস্ব বিলাইয়া দিয়া, আজ তিনি জাহ্নবীতীরে বালুশয্যা গ্রহণ করিয়াছেন। আজ তাঁর ছুটি—মহাবিশ্রাম, মহানিষ্কৃতি! এ চিত্র দেখিয়া বিবেকানন্দের কথা মনে পড়ে। তাই বলিয়াছি এক হিসাবে অপর প্রতিকৃতিগুলি হইতে উহার মূল্য স্বতন্ত্র—চিত্র হিসাবেও ইহা অতুলনীয়। আমাদের দেশের আর কোন মহাপুরুষের এমন শ্মশান-চিত্র দেখি নাই।

বঙ্কিম-প্রতিভার একটি বৈশিষ্ট্য

আজ আমরা বঙ্কিমচন্দ্রকে স্মরণ করিতেছি—স্মৃতি-উৎসবের অনুষ্ঠান করিয়া তাঁহার প্রতি বাঙ্গালী জাতির শ্রদ্ধা নতন করিয়া উদ্বেক করিবার চেষ্টা করিতেছি। বঙ্কিমের প্রতিভা ও বঙ্কিমের কীর্তি, জাতির জীবনে তাঁহার দান ও ইতিহাসে তাঁহার স্থান—আমরা এ পর্য্যন্ত ভাল করিয়া নিরূপণ করি নাই, বিস্মৃতির কারণ তাহাই। কিন্তু আজ আমরা এই যে স্মৃতিপূজার অনুষ্ঠান করিয়াছি, ইহা কি কেবল তাঁহাকে স্মরণ করিবার জন্ম? কেবল স্মরণ করিয়া লাভ কি? বঙ্কিম-চন্দ্রের মত পুরুষকে কেবল স্মরণ করিলেই পরমার্থ লাভ হইবে না—তাঁহার সহিত সাক্ষাৎ পরিচয় স্থাপন করিতে হইবে, এবং এক্ষেত্রে সে পরিচয় জাতির আত্ম-পরিচয়েরই মত। কারণ, তাঁহার মত পুরুষ একটা জাতি ও যুগের প্রতীক—সে পুরুষের মধ্যে বাঙ্গালী আপনাই প্রতিভার দীপ্ত রূপ দেখিতে পাইবে; যুগ-সন্ধির সেই মহাসঙ্কটকালে এই পুরুষের মধ্যেই সে একদিন নিজের পূর্ণশক্তি কেন্দ্রীভূত হইতে দেখিয়াছিল, তাহার নিজেরই স্তিমিতচেতনা এই প্রতিভার দিব্যচ্ছটায় স্ফুরিত হইয়া তাহার যাত্রাপথ আলোকিত করিয়াছিল। বঙ্কিমচন্দ্রের যে মূর্তি সকল নশ্বরতা হইতে মুক্ত হইয়া দীপ্যমান রহিয়াছে, তাহা যেন এই জাতির জীবন-জলাশয়ের গভীর তল হইতে উখিত একটি প্রস্ফুট প্রাণ-শতদল। অতএব কেবল নাম স্মরণ নয়, সেই মূর্তির পূর্ণ ধ্যান করিয়া আমাদের পুনরায় আত্মসাক্ষাৎকার করিতে হইবে।

উনবিংশ শতাব্দীতে বাঙ্গালী জাতির ইতিহাসে যে যুগান্তর অবশ্যস্তাবী হইয়াছিল, সে যুগান্তরের প্রাণান্ত বিকোভকে নবজীবনধারায় নতন সৃষ্টির পথে প্রবাহিত করিবার জন্ম যে প্রতিভার ও মনীষার স্মরণ আমরা ঐ যুগে নানাভাবে হইতে দেখিয়াছি বঙ্কিমচন্দ্রে তাহাই সার্থক হইয়াছিল। আজ বাঙ্গালী সে যুগের সেই বিকোভ আর প্রত্যক্ষ করিতেছে না বটে, কিন্তু তাহার আধুনিক মনো-জীবনের অন্তঃস্থলে সেদিনের সেই বণ্ণা হইতে যে পলিমূর্তিকার স্তর সঞ্চিত হইয়া আছে, তাহা বঙ্কিমচন্দ্রেরই অসাধ্য-সাধনের ফল। এখনও—বিংশশতাব্দীর প্রায়

মধ্যভাগে—আমরা যে ইয়টি প্রধান ভাবচিন্তা লইয়া আন্দোলন আলোচনা করিয়া থাকি তাহারও মূলে আছেন বঙ্কিমচন্দ্র। বঙ্কিমচন্দ্রই আমাদের নূতন মনোভাব ও নবসংস্কৃতির প্রধান প্রবর্তক। ইহা বুঝিতে হইলে ঊনবিংশ শতাব্দীর শেষার্ধের বাংলার ইতিহাস সম্যক আলোচনা করিতে হইবে, এবং তদানীন্তন কালের সঙ্গে বঙ্কিমের কীর্তির তুলনা করিতে হইবে। বিধাতার আশীর্বাদস্বরূপ আমরা সেই এক ব্যক্তিকে পাইয়াছিলাম, পাইয়াও হেলায় হারাইতে বসিয়াছি। বঙ্কিমের প্রভাব যে পরিমাণে মন্দীভূত হইয়াছে, ঠিক সেই পরিমাণেই আমরা এই ভীষণ যুগ-সঙ্কটে সকল দিকেই দিক্‌ভ্রান্ত হইতেছি।

বঙ্কিমচন্দ্রের সেই প্রতিভার একটা দিক—একটা বিশিষ্ট লক্ষণ সম্বন্ধে, আমি যৎকিঞ্চিৎ আলোচনা করিব। বঙ্কিমচন্দ্রের প্রতিভা বলিতে যে মনীষা, ভাবুকতা ও কবিশক্তির কথা আমাদের সর্বাগ্রে স্মরণ হয়, সে সম্বন্ধে আমি এখানে কিছু বলিব না; কিন্তু সেই প্রতিভার সঙ্গে যে আর একটি বস্তু ছিল, তাহার বলে তিনি বাঙ্গালীর কেবল মনের উৎকর্ষসাধনই করেন নাই—তাহার মনের সংস্কার ও প্রাণের প্রবৃত্তিকেও নূতন পথে চালিত করিয়াছিলেন, তাহার কথাই বলিব; কারণ, কেবল ভাবুকতা বা সাহিত্যিক প্রতিভার দ্বারা একটা জাতির জীবনের গতি-মুখ পরিবর্তন করা সম্ভব নহে। তাহা যে সম্ভব হইয়াছিল, তাহার কারণ সেই প্রতিভার সঙ্গে ছিল একটি বজ্রবিদ্যুৎস্বরূপ ব্যক্তি-সত্তা, তুঙ্গগিরিশৃঙ্গের মত সূদৃঢ় ও স্নগভীর পুরুষ-মহিমা। তাঁহার দৃষ্টি ছিল যেমন গভীর তেমনই অপলক, সঙ্কল্পও তেমনই নির্বিকল্প। এই কথাটি ভাল করিয়া না বুঝিলে বঙ্কিম-প্রতিভার প্রকৃত মহত্ত্ব, তাহার ভাস্বর ছাতির বারো আনা আমাদের দৃষ্টিগোচর হইবে না। বঙ্কিমচন্দ্র কেবল সাহিত্য সৃষ্টি করেন নাই—স্বল্প মনোবিলাসের বা কাল্‌চারের আয়োজন প্রচুর করিয়া তোলেন নাই; তিনি এই জাতির বক্ষে বল ও প্রাণে আশার সঞ্চার করিয়াছিলেন; ভাব ও চিন্তার প্রচণ্ড শক্তি-বলে তাহার জীবনের জীর্ণ ভিত্তি সংস্কার করিয়া নূতন সৌধের পত্তন করিয়াছিলেন। ইহার জন্ম, তাঁহার প্রতিভার যে বৈশিষ্ট্য তাহাই এ যুগের অপর সকল সাহিত্যিক প্রতিভা হইতে তাঁহাকে একটি অতিশয় পৃথক আসনে প্রতিষ্ঠিত করিয়াছে। ইহা বুঝিতে না পারিলে বঙ্কিমকে বুঝিবার সকল চেষ্টা নিষ্ফল হইবে।

অতএব বঙ্কিম-প্রতিভাই শুধু নয়, বঙ্কিম-চরিত্র আমাদের দৃষ্টি আকর্ষণ না

সাহিত্য-বিজ্ঞান

করিয়া পারে না ; ইহাকে আমি প্রতিভার পৌরুষ বলিব—কবি-প্রতিভার সঙ্গে সেই পৌরুষের মিলন আমাদের দেশে কচিং ঘটিয়াছে। কবি, সাহিত্যিক, ভাবুক বা মনীষী আমাদের দেশে আরও অনেকের আবির্ভাব হইয়াছে ; কিন্তু সেই সঙ্গে এমন পুরুষোচিত ঐকান্তিকতা, অটল আত্ম-মর্যাদাবোধ, এবং কবি-ধর্মের মধ্যেও মনুষ্যধর্মের এমন অবিচলিত প্রেরণা, এ জাতির ইতিহাসে অতিশয় দুর্লভ। কোনও চিন্তা বা কোনও ভাবই তাঁহার নিকটে খেলার সামগ্রী ছিল না—তিনি সাহিত্যিক ভাববিলাসী ছিলেন না। তিনি যাহা ভাবিতেন তাহার সহিত সেই সিদ্ধিলাভের চিন্তা তাঁহার হৃদয়ে সদা জাগরুক ছিল। যে সকল চিন্তা অলস শক্তিহীন পুরুষের ভাববিলাস মাত্র, অথবা যাহা ব্যক্তির একক সাধনা বা আত্মোৎকর্ষের সহায়—তাহাকে তিনি সাহিত্যের ক্ষেত্রেও প্রশ্রয় দেন নাই ; কারণ, তাহা অতিশয় স্বার্থপরতার লক্ষণ, এবং স্বার্থপরতা ও কাপুরুষতার মধ্যে তিনি কোন ভেদ মানিতেন না। এই জন্মই, কবি বঙ্কিম, ভাবুক বঙ্কিম, মনীষী বঙ্কিম তাঁহার সমগ্র সাহিত্যিক সাধনায় এমন একটি পুরুষ-মূর্তিরূপে ফুটিয়া উঠিয়াছেন—যাহাকে তাঁহার প্রতিভা হইতে পৃথক করিয়া লওয়া দুঃসাধ্য। এই জন্মই বঙ্কিমচন্দ্রের উপন্যাসগুলিতেও কাব্যকল্পনার সূত্রধাররূপে তাঁহাকে সর্বদা সন্মুখে উপস্থিত থাকিতে দেখি ; কল্পনা যত উৎকৃষ্ট হউক, কবির পশ্চাতে একটি পুরুষের সত্তাকে কখনও ভুলিয়া থাকিতে পারি না। এই জন্মই, যাহারা নিছক আর্টপন্থী তাঁহারা বঙ্কিমচন্দ্রের উপন্যাসে অনেক ক্রটি আবিষ্কার করিয়া থাকেন ; কিন্তু সেই আর্ট-ঘটিত ক্রটি সত্ত্বেও তাঁহার গল্প কাব্যগুলিতে পরিপূর্ণ রসসৃষ্টি হইয়াছে রসিক যাত্রাই যখন ইহা স্বীকার করেন, তখন বঙ্কিমচন্দ্রের কাব্যগুলির জন্ম আর্টের একটি স্বতন্ত্র আদর্শকেই স্বীকার করিতে হয় ; অর্থাৎ, কবি-চরিত্র ও কবি-প্রেরণা এই দু'য়ের একটি আশ্চর্য্য সময় যবে সম্ভব, সে বিষয়ে আর সন্দেহ থাকে না।

বঙ্কিম-প্রতিভার এই যে লক্ষণ ইহারই কারণে বঙ্কিমের প্রতিভা কখনও অতিচারী হইতে পারে নাই—তিনি যত বড় উচ্চ ভাবের ভাবুক হউন, কঠিন যুক্তিকার শাসন কখনও অগ্রাহ করেন নাই। সকল তত্ত্বকে তিনিও নর-নারীর চরিত্রে প্রত্যক্ষ জীবন্তরূপে ক্রিয়ানীল করিয়া দেখাইয়াছেন ; যাহা চিন্তালব্ধ সত্য, যাহা একটা যুক্তি বা সিদ্ধান্ত মাত্র, তাহাকে নরনারীর হৃদয়-শোণিতে চিত্রিত

করিয়া আমাদের নেত্রগোচর করিয়াছেন। এ শক্তি কেবল কল্পনাশক্তিই নয়— ইহার মূলে আছে অসীম বিশ্বাসের শক্তি। ভাবে যাহাকে পাইতেছি, বস্তুতেও তাহাই আছে। প্রাণ ও মনের মধ্যে কোনও বিরোধ নাই, বাস্তব ও আদর্শের মধ্যে কোন সংশয়ের ব্যবধান নাই। এই স্থির দ্বিধাহীন দৃষ্টির মূলে যে আত্ম-প্রত্যয় আছে, তাহাই সর্ববিধ পৌরুষের নিদান; কিন্তু কবি-শক্তির সহিত পুরুষ-শক্তির এমন মিলন আমাদের সাহিত্যে এ পর্যন্ত ঐ একবারই ঘটিয়াছে। একদিকে যেমন ভাবের প্রাবল্য ও কল্পনার অসীম ক্ষুধা, অপরদিকে তেমনই লোক-ব্যবহার ও মনুষ্য-চরিত্র সম্বন্ধে সদাজাগ্রত চেতনা; সৃষ্টির নিগূঢ় নিয়ম এবং ইতিহাসের সাক্ষ্য-প্রমাণ, এই দুইয়ের প্রতি যেমন শ্রদ্ধা, তেমনই, সহজ ও সুস্থ মনের যে বিধিদত্ত সম্পদ, সেই বিবেক বা বিচারবুদ্ধিকে কখনও পরাস্ত হইতে না দেওয়া; এই সকল গুণ সেই প্রতিভার যে বৈশিষ্ট্য সম্পাদন করিয়াছে, এই প্রসঙ্গে আমি তাহাও স্মরণ করাইতে চাই।

কিন্তু বঙ্কিম-প্রতিভার এই পৌরুষের আলোচনায় সে যুগের বাঙ্গালী সমাজকে বিস্মৃত হইলে চলিবে না। সে যুগের ইতিহাস এখনও সম্যক আলোচিত ও লিপিবদ্ধ হয় নাই—সেই জন্ম বঙ্কিমচন্দ্রের মত প্রতিভার অভ্যুদয় একটু বেশি আকস্মিক ও বিস্ময়কর বলিয়া মনে হয়। ঊনবিংশ শতাব্দীর সেই নবজাগরণের মূলে যে একটি প্রধান কারণ ছিল তাহা আমরা প্রায়ই ভুলিয়া যাই; তখনও বাঙ্গালী জাতি যে এত নির্জীব হইয়া পড়ে নাই, তাহার দেহ-মনের স্বাস্থ্য যে অটুট ছিল সে কথা আমরা ভাবিয়া দেখি না। সে যুগের বাঙ্গালী সমাজের রক্ষণশীলতাকে আমরা আজ অতিশয় কুপার চক্ষে দেখি, এবং সে জন্ম আমাদের পিতৃ-পিতামহ-গণের পরিচয় দিতে আজ আমরা লজ্জাবোধ করি বটে, কিন্তু সেই সঙ্গে ইহাও চিন্তা করি না যে, সেই অতি রক্ষণশীল কুসংস্কারাচ্ছন্ন মানুষগুলার ঔরসেই এই সকল বীৰ্য্যবান প্রতিভাবান পুরুষের জন্ম হইয়াছিল। রামমোহন, বিদ্যাসাগর অতিশয় গোঁড়া ব্রাহ্মণ-পরিবারে জন্মগ্রহণ করিয়াছিলেন; যাহারা সে যুগে ধর্ম ও সমাজ-সংস্কারে মাতিয়া উঠিয়াছিলেন এবং সে বিষয়ে স্ফূর্তি হইয়া বোষণা করিয়াছিলেন তাঁহাদের অধিকাংশই সেই অবজ্ঞাত পূর্বপুরুষের বীৰ্য্য তাঁহাদের বক্ষে বাহুতে অহুভব করিয়াছিলেন। অতএব একথা স্বীকার করিতেই হইবে যে, সে যুগের সেই উদ্দীপ্তির জন্ম বিদেশ হইতে অগ্নি-চয়ন করিতে হইয়াছিল বটে, কিন্তু তাহার

উৎকৃষ্ট ইকন তখনও এ জাতির দেহে-মনে ছাপা প্য হয় নাই; এবং সেই কারণে এখন বাহাকে অতিশয় বিস্ময়কর বলিয়া মনে হয়, তাহা সত্যই ততটা বিস্ময়কর নহে। সেকালের বাঙ্গালীর দেহের আকৃতিও আঙ্গিকার মত খর্ব ছিল না, তখনও বাঙ্গালীর 'race-type' অক্ষুণ্ণ ছিল, এমন অবনতি প্রাপ্ত হয় নাই।

তথাপি বঙ্কিম-বিজ্ঞানাগর-বিবেকানন্দের মত পুরুষের আবির্ভাব এ জাতির মধ্যে একটু বিস্ময়কর বলিয়া মনে হয়। বাঙ্গালী জাতির সাধারণ প্রকৃতির পক্ষে পৌরুষের এইরূপ অভিব্যক্তি আমাদের চক্ষে যেন একটু অসাধারণ, আঙ্গিকার বাঙ্গালীকে দেখিয়া তাহাই মনে হয়; পূর্বের ইতিহাস না জানা থাকাও একটা কারণ। বাঙ্গালী-চরিত্রের যে ধরণের পৌরুষ আমরা এই তিন মহাপুরুষের মধ্যে লক্ষ্য করি, তাহা হয়ত কোন কালেই দুর্লভ ছিল না; উপযুক্ত ক্ষেত্র এবং অনুকূল অবস্থার অভাবে ইতিহাসে তাহা চিহ্নিত হইতে পারে নাই। ব্রিটিশ-যুগে বাঙ্গালী জাতির যে অভাবনীয় অভ্যুদয় ঘটিয়াছে তাহার কারণ ঐতিহাসিকেরা নির্দ্ধারণ করিবেন, কিন্তু এই যুগে আমরা যে তিনটি আদর্শ-পুরুষের সাক্ষাৎ পাই তাহাতে বিস্মিত না হইয়া পারি না। বিজ্ঞানাগর ও বিবেকানন্দের পৌরুষ, তাঁহাদের কর্মময় জীবনে, দুর্জয় সঙ্কল্প ও অসাধারণ ত্যাগের ভিতর দিয়া আমাদের প্রত্যক্ষগোচর হইয়াছে। বঙ্কিমচন্দ্রের পৌরুষ ততটা সহজ-গোচর নহে; তাহার কারণ, সে পৌরুষ কোনও সামাজিক কর্মানুষ্ঠানে প্রকাশ পায় নাই, সাহিত্য-কর্মের মধ্যেই প্রচ্ছন্ন থাকায় তাহা আমাদের দৃষ্টি-বহির্ভূত হইয়া আছে। বঙ্কিমচন্দ্রের কোনও স্থলিখিত জীবনবৃত্তান্ত নাই, থাকিলে, বাহিরের জীবনেও তাঁহার দৃষ্ট পুরুষ-চরিত্রের বহু চাক্ষুষ প্রমাণ আমরা পাইতাম। তথাপি আমি ইতিপূর্বে তাঁহার যে সাহিত্যিক পৌরুষের কথা বিবৃত করিয়াছি তাহাতে আশা করি সকলেই একমত হইবেন। সেই সাহিত্য-সাধনার মধ্যেই আমরা যে পুরুষ-বীরের পরিচয় পাই—তাহা বিজ্ঞানাগর, বিবেকানন্দ হইতে কোন অংশে নিকৃষ্ট নহে। সেখানেও দেখিতে পাই, একটি মূল লক্ষ্যের অভিমুখে, অতিশয় অবিচলিত পদক্ষেপে, আপনার মনঃপ্রাণের সমগ্র শক্তিকে কেন্দ্রীভূত করিয়া একজন পুরুষ-বীর, এই জাতির আধি-ভৌতিক ও আধ্যাত্মিক মুক্তি-পন্থা নির্মাণ করিতে অগ্রসর হইয়াছে। তাঁহার চতুর্পার্শ্বে যত কিছু বাধা—অশিক্ষিতের অবিশ্বাস, শিক্ষিতের অপ্রত্যাশা, বিধর্মীর আক্রোশ, প্রেমহীনের পরিহাস—এই

সকলই অগ্রাহ্য করিয়া কেবল আপনার অন্তরের অগ্নি ও তাহারই আলোক-শিখাকে সঞ্চল করিয়া, এই নির্ভীক পুরুষ যে অসীম বিশ্বাসে সেই অসাধ্য সাধন করিয়াছিলেন—তাঁহার সেই বিশ্বাসই আর সকলকে বিশ্বাসী করিয়া তুলিয়াছিল, সেই দুর্জয় আত্মপ্রত্যয়ের বলেই তিনি একটা জাতির মনোরাজ্যে অধিকার বিস্তার করিয়াছিলেন। বঙ্কিম-সাহিত্য যিনি আত্মস্ব মনোযোগ সহকারে পাঠ করিবেন তাঁহার পক্ষে এই ধারণা অনিবার্ধ্য; এমন কি, তাঁহার মনীষা ও কবিশক্তি অপেক্ষা তাহার ব্যক্তি-চরিত্রের এই পৌরুষ সকলকে অধিকতর আকৃষ্ট করিবে। বঙ্কিমচন্দ্রের রচনারাশি হইতে উদাহরণ দিয়া ইহা প্রমাণ করিতে হইবে না। তথাপি আমি ইহার প্রমাণস্বরূপ দুইটি মাত্র তথ্যের উল্লেখ এখানে করিব। প্রথমটিই অধিকতর প্রণিধান-যোগ্য। তাহা এই যে, বঙ্কিমচন্দ্রের সমগ্র রচনাবলীর মধ্যে কোথাও একটি বৃথাবাক্য নাই। তাঁহার ভাষা যেমন স্পষ্ট, তেমনই পরিমিত; যেমন বাহুল্যবর্জিত, তেমনই অর্থপূর্ণ। যেখানে বাগ্‌বাহুল্যের বা বিষয়-বিস্তারের প্রলোভন দুর্দমনীয়—সেই উপস্থান-রচনাতেও—তাঁহার সংযম বিশ্বয়কর; সেখানেও একটি পংক্তি নাই যাহা অতিরিক্ত বা অকারণ। এই জগ্‌ই তাঁহার উপস্থাসের কলেবর এত ক্ষুদ্র। এই যে বাক্‌সংযম—ইহার মত পুরুষোচিত ধর্ম আর নাই; আবার, উপস্থাসের মত কাব্যরচনায় এতখানি আত্মশাসন শক্তির পরাকাষ্ঠা বলিলেও হয়। এই যে সংযমের কথা বলিলাম ইহা শুধুই আর্টের সংযম নয়; রচনাকে মনোহারী করিবার জগ্‌ যে সকল কৌশলের প্রয়োজন হয় ইহা তাহার অন্তর্গত একটি কৌশলমাত্র নয়। কারণ, যাহা নিরর্থক—এমন কি, মিথ্যা, যাহার মূলে আত্ম-প্রত্যয়ঘটিত প্রেরণা নাই, তাহাকেও সুবিন্যস্ত কথার সাহায্যে একপ্রকার রস-রূপে পরিণত করা অসম্ভব নয়; বলা বাহুল্য সে সাহিত্যও বড়দের সাহিত্য নয়। কিন্তু আমি এখানে রসতত্ত্বের জটিল তর্কজালে প্রবেশ করিব না; বঙ্কিমচন্দ্রের রচনায় কোথাও বৃথাবাক্য নাই, এই কথাটির মধ্যে যে অতি সরল সহজ অর্থ আছে, সেই অর্থই যথেষ্ট; এবং তাহা যে লেখকের কোন্‌ গুণের পরিচয় দেয় আমি তাহাই সকলকে ভাবিয়া দেখিতে বলি।

বঙ্কিমচন্দ্রের এই লক্ষণ আর একটি ঘটনায় প্রকাশ পাইয়াছে—যিনি এত বিষয়ে এত লিখিয়াছেন তিনি নিজের সম্বন্ধে একেবারে নীরব। বঙ্কিমচন্দ্র

এ-কালের মানুষ—একালের কবি ও মনীষিগণ সাধারণতঃ অতিশয় আত্মসচেতন হইয়া থাকেন ; এজন্য, আত্মচরিত কিম্বা Journal, বা আত্মচিত্তায় দিন-লিপি রচনা, অথবা বন্ধুবান্ধবকে পত্রাচ্ছলে আত্মকথা নিবেদন—ইহার কোন না কোনটি এ যুগের প্রায় সকলেই করিয়া থাকেন । কিন্তু বহুিমচন্দ্র ইহার কোনটাই করেন নাই । অতিশয় ব্যক্তিগত ভাব ও ভাবনা, আশা ও নিরাশা, সাংসারিক ও সামাজিক কারণে মানসিক অশান্তি, অন্তরের হৃদয় সংশয়—তাঁহার মত পুরুষের জীবনে কত গভীর ও বিচিত্র ছিল তাহা আমরা অনুমান করিতে পারি, কিন্তু কুত্ৰাপি বন্ধুজনের নিকটেও তিনি নিজের সেই একান্ত ব্যক্তিগত কাহিনী ব্যক্ত করেন নাই । মনে হয়, সেখানে তিনি অতিশয় নিঃসঙ্গই থাকিতে চাহিয়াছিলেন ; অথবা যে বিরাটকে তিনি অহরহ আপনার আত্মার সমক্ষে রাখিয়াছিলেন, তাহার তুলনায় নিজের ব্যক্তি-জীবনের যাবতীয় ব্যাপার অতিশয় ক্ষুদ্র ও তুচ্ছ মনে করিতেন । আত্মকথা প্রচারের মধ্যে যে সূক্ষ্ম আত্মসত্ত্বরিতা আছে তাহাকে তিনি অতিশয় হীন বলিয়াই বর্জন করিয়াছিলেন । সাধারণ মানুষ জ্বীলোকের জ্বায় দর্পণে আপনার মুখশোভা দেখিতে ভালবাসে, কত ভঙ্গিতে মুখ-প্রসাধন করিয়া তাহার প্রতিবিম্বকে সুন্দর করিয়া তুলিতে চেষ্টা পায় । এইরূপ আত্মপ্রীতি যে দুর্বলতার পরিচায়ক বহুিমচন্দ্রের তাহা ছিল না । বহুিম আপনার কথা যেখানে বলিবার, সেখানে স্ফটিকরূপেই বলিয়াছেন,—তাঁহার সমগ্র রচনাবলীই তাঁহার সেই আত্মকথা, এবং সে কথা তাঁহার আত্মার কথা, ব্যক্তি-জীবনের কথা নয় । যে উচ্চ আদর্শনিষ্ঠাকে ভারতীয় ভাষায় ব্রহ্মনিষ্ঠা বলে, এবং যাহা পুরুষের শ্রেষ্ঠ পৌরুষের লক্ষণ—ইহাতে তাহারই পরিচয় পাওয়া যায় । তথাপি, নিজের সম্বন্ধে এই যে কঠিন মৌনাবলম্বন, ইহার আর একটি কারণ আমি পূর্বেই উল্লেখ করিয়াছি—একটা দারুণ নিঃসঙ্গতা-বোধ ; তাঁহার হৃদয়গত উৎকর্ষা সমর্পণ করিবার মত কোন দোসর যেন তাঁহার মেলে নাই । কিন্তু তাহার জন্ম কোন কাতরোক্তি বা অভিযোগ নাই, অন্তরের নির্জন নিশীথে সে পুরুষ নিজের স্বপ্ন নিজেই দেখে, নিজ হৃদয়-ভার সে আর কাহাকেও অর্পণ করিতে চায় না । এই অভিমান যেমন আত্মার একরূপ আভিজাত্যের লক্ষণ, তেমনই এমন ভাবে আত্মসংবরণ করিবার শক্তিও অতিশয় শক্তিমান পুরুষের পক্ষেই সম্ভব ।

বঙ্কিমচন্দ্রের প্রতিভাগত পৌরুষের সম্বন্ধে আমি যাহা বলিলাম তাহাতে নূতন কিছুই নাই—বঙ্কিম-সাহিত্যের সঙ্গে একটুকু পরিচয় যাহার আছে তিনিও তাহাতে বঙ্কিম সম্বন্ধে কোন নূতন জ্ঞানলাভ করিবেন না। তথাপি আমি বঙ্কিম-প্রতিভার সেই সর্বজনবিদিত দিকটির প্রতি আজিকার দিনে বিশেষ করিয়া সকলের দৃষ্টি আকর্ষণ করিয়াছি; তার কারণ, বর্তমান যুগের বাংলা-সাহিত্যের গতি-প্রকৃতি দেখিয়া মনে হয়, বঙ্কিম-সাহিত্যের রসবিচার অপেক্ষা সেই সাহিত্যের প্রেরণামূলে যে মনুষ্যত্ব, পৌরুষ ও ধর্মজ্ঞান ছিল, তাহাই ভাবিয়া দেখিবার প্রয়োজন অধিক হইয়াছে। আজিকার বাংলা-সাহিত্যে প্রতিভার বন্ধ্যা আসিয়াছে, সে বন্ধ্যা বঙ্কিম বহুপূর্বেই ভাসিয়া গিয়াছেন; কিন্তু প্রতিভার সহিত পৌরুষ যুক্ত না হইলে যাহা হয়, এক্ষণে আমাদের দেশে তাহাই হইতেছে—কণজীবী ওষধিলতার মত কবিতা ও গল্পে মাঠ বাট আচ্ছন্ন হইয়া উঠিতেছে; কিন্তু বৎসরান্তে তাহাদের চিহ্নও থাকে না, আর একদল গুল্ম ও লতার জঙ্গলে চলিবার পথ রুদ্ধ হইয়া যায়। সাহিত্যের ক্ষেত্রে এই পৌরুষ ও আত্মপ্রত্যয়ের অভাব আজ সকল দেশেই অনুভূত হইতেছে। চারিত্রিক স্বাস্থ্যহানির ফলে আয়বিক উত্তেজনাই প্রতিভাবিকাশের একমাত্র উপায় হইয়া দাঁড়াইয়াছে, এজন্য সাহিত্যেও আর সত্যকার সৃষ্টিশক্তির পরিচয় পাওয়া যাইতেছে না। এ যুগের মানুষের মত বা মনের স্থিরতা নাই—ক্রমাগত একের পর এক বিদ্রোহ ঘোষণা চলিয়াছে। উনবিংশ শতাব্দীর সেই বীর মনীষিগণের কীর্ত্তিকে অপসারিত বা অপদস্থ করিবার অভিপ্রায়ে একালের বালখিল্য-প্রতিভা যে সকল মতবাদের আশ্রয় লইয়া থাকে—যে ধরণের বিদ্রোহ ঘোষণা করে, তাহার মূলে কোনও চিন্তাগত সত্যনিষ্ঠা নাই, অতিশয় হাল্কা মনোবৃত্তির সৌখীন বিলাসমাত্র আছে। মতগুলিও সত্যকার মত নয়, খেয়াল মাত্র; সেই খেয়াল কেবলই পরিবর্তিত হইতেছে, কোনটাই দুদিনের বেশী টিকিতে পারে না। দেখিয়া শুনিয়া মানুষ হতভম্ব হইয়া যায়, তাবে—আবার না জানি কোন নূতন মতের আবির্ভাব হইবে, সাহিত্য ও শিল্পকলার ক্ষেত্রে আবার কোন্ খেয়াল-খুশী আধিপত্য লাভ করিবে। গত শতাব্দীর সর্ববিধ সাধনার মূলে যে নীতিনিষ্ঠা ছিল, একালে তাহাকে পরিহার করিয়া উচ্ছৃঙ্খলতা ও নীতিহীনতার জয়ঘোষণা হইতেছে। সেকালে অন্যান্য ভাবচিন্তার মত সাহিত্যের ক্ষেত্রেও, শক্তিশালী প্রতিভাবান পুরুষের প্রতি জনসাধারণ একটি হৃগভীর প্রত্যাহার ভাব

পোষণ করিত; তাহারা জানিত, এমন ব্যক্তির সাধনা মিথ্যা হইতে পারে না, সে সাধনায় কালক্রমে সিদ্ধিলাভ ঘটবেই। একালে সাধনা বলিয়া কিছুই নাই, —কিছুই কালসাপেক্ষ নহে, সকলই আকস্মিক, অপ্রত্যাশিত; এবং অপ্রত্যাশিত বলিয়াই চমকপ্রদ। এখন কোনও ভাব বা চিন্তার মূলে লেখকের কোনও দায়িত্ববোধ নাই—বিশ্বাসের দৃঢ়তা নাই; সকলেই স্ব স্ব প্রধান। প্রেরণা এক না হইলেও, সাহিত্য বা শিল্প-কলার সাধনায় যে এক একটি গোষ্ঠী আপনা হইতে গড়িয়া উঠে—এক একটি পদ্ধতির সৃষ্টি হয়, একালে তাহাও আর সম্ভব নয়। এখন প্রত্যেকেই আপনাকে আহির করিতে চায়—যে সব চেয়ে বেশী চীৎকার করিতে পারে সেই তত বেশী দৃষ্টি আকর্ষণ করে। যে লেখক ব্যাকরণ ও অভিধানের মূণ্ডপাত যত বেশী করে, তাহার রচনায় ভাষার প্রাথমিক নিয়মগুলিও তিরস্কৃত হইয়া থাকে, সেই তত অধিক হাততালি অর্জন করে। কিন্তু এই সৌভাগ্যও তাহাকে বেশী দিন ভোগ করিতে হয় না, কারণ তাহার ঠিক পশ্চাতেই আর একজন আসিয়া উপস্থিত হয়—এক হাততালি না থামিতেই আর এক হাততালি শুরু হয়; কারণ, এই পরবর্ত্তীর চীৎকার আরও গগনভেদী, তাহার রচনা আরও অভূত, আরও চমকপ্রদ। বঙ্কিম-যুগের প্রভাব যেদিন লোপ পাইয়াছে সেইদিন হইতেই আমাদের সাহিত্যে এই ধর্মহীন নীতি ও নিষ্ঠাহীন স্বেচ্ছাচার উত্তরোত্তর প্রবল হইয়াছে। তথাপি এই বর্ণনাটি আমাদের সাহিত্য সম্বন্ধে মোটামুটি প্রযোজ্য হইলেও পূরাপূরি প্রযোজ্য নহে; কারণ, সে সাহিত্য আধুনিকতার বায়ুগ্রস্ত হইলেও এতই দুর্বল ও ক্ষীণজীবী যে, তাহার সম্বন্ধে এইরূপ আলোচনা একটু বাড়াবাড়ি বলিয়া মনে হইবে। আমাদের সাহিত্যে তাহারা অনাচার করিতেছেন, তাহারা কেহই উল্লেখযোগ্য কুখ্যাতিরও অধিকারী নহেন; তাহাদের সেই অনাচারও অল্পকরণ-মূলক। তথাপি সেই অল্পকরণের মধ্যে যে প্রবৃত্তি রহিয়াছে এবং তাহার ফলে আমাদের এই ক্ষুদ্র সাহিত্যিক জলাশয়ে যে পঙ্কিল আবর্ত্তের সৃষ্টি হইয়াছে, তাহার মূল উৎস সম্বন্ধে কিঞ্চিৎ জ্ঞানলাভের প্রয়োজন আছে, তাই আমি আধুনিক ইংরাজী সাহিত্য ও শিল্পকলা সম্বন্ধে একজন ইংরাজ সমালোচকের উক্তি উপরে বাংলায় উদ্ধৃত করিয়াছি। তথাপি, পাছে কেহ সন্দেহ করেন যে, আমি অল্পবাদে কিছু রং ফলাইয়াছি, এবং যেহেতু বাংলা কথা অপেক্ষা ইংরাজী

কথার মাহাত্ম্য অধিক, অতএব মূল ইংরাজীও অতঃপর উদ্ধৃত করিতেছি। এ বিষয়ে আমার এতখানি আগ্রহের কারণ, আমি বঙ্কিমচন্দ্রের যুগ ও বঙ্কিম-সাহিত্যের প্রসঙ্গে এই আধুনিকতার স্বরূপ বিশেষ করিয়া উদ্ঘাটন করিতে চাই। এই আধুনিকতার সম্বন্ধে উক্ত ইংরাজ সমালোচক লিখিয়াছেন—

Literature, painting and sculpture have indeed been affected by not one but several revolutions since the men who made the nineteenth century notable in these spheres, passed to the Great Beyond. True, that in many respects they were merely tinsel revolutions, establishing no great principles in the stead of those they displaced—or, rather ignored; revolutions based on passing whims, which quickly gave place to others equally ephemeral, the sum-effect of which has been to leave the world wondering as to what the next "ism" will be to dominate for the time-being, in the domain of Art. Instability of belief has succeeded the orthodoxy which characterised the mid-nineteenth century art doctrine. The mid-Victorian Age was marked by the solidity of its popular belief in its leaders in literature and art; the certainty that what they did was right; that work expected of them would in due course be presented. But we have changed all this. The feature of the "Georgian" era is its unexpectedness. There is no stabilised "school", instead there are individuals, each anxious for notice, and the one who screams the loudest secures the most attention. The author who pays the least regard to the rules of syntax and composition, the painter who disregards most the niceties of drawing and the harmonies of colour—he is king for the moment, and receives the fashionable plaudits. Their reign is of brief duration, for their successor is on their heels with an even louder scream, and even more bizarre effect ere the echo of the acclamation has died away. (*Introduction to the Life and Work of Sir John Everett Millais in the 'Modern Painters of the World' series*)

উনবিংশ শতাব্দীর ইংরাজী সাহিত্য সম্বন্ধে লেখক যাহা বলিয়াছেন আমাদের উনবিংশ শতাব্দীর সর্বশ্রেষ্ঠ প্রতিনিধি বঙ্কিমচন্দ্রের সাহিত্য সম্বন্ধে তাহা অক্ষরে অক্ষরে সত্য। আধুনিক যুগের যে চিত্র তিনি অঙ্কিত করিয়াছেন তাহাতেও স্পষ্ট প্রতীয়মান হয়, আমাদের আধুনিক সাহিত্যে এই পাপ কোথা হইতে প্রবেশ করিয়াছে—রোগের বীজ সেই একই, তবে দেহ তেমন সবল নহে বলিয়া, বিষের ক্রিয়াও তেমন প্রচণ্ড হইতে পারে নাই; এ পর্য্যন্ত কতকগুলি ব্রণক্ষোভক মাত্র দেখা দিয়াছে।

এই যে অবস্থা, ইহাই প্রত্যক্ষ করিয়া আজ বঙ্কিমচন্দ্রকে স্মরণ করিতে হইবে,

বাংলার উনবিংশ শতাব্দী ও বিশতম শতাব্দীর প্রতিভা এই দু'য়ের সঠিক ধারণা দ্বারা প্রবুদ্ধ হইতে হইবে; কেবল সাহিত্যিক রসতত্ত্বের সৌখীন আলোচনা করিলে চলিবে না। বহু-প্রতিভার যে পৌরুষ একদিন মহাকালের জটাজাল-বাসিনী ভাবগঙ্গার উন্মাদ তরঙ্গস্রোতকে এই বাংলার সমভূমিতে তটশালিনী ভাগীরথীরূপে প্রবাহিত করিয়াছিল, আজ সেই পৌরুষের ধ্যান করিয়া আমরাগকে আর এক মহাসঙ্কট হইতে পরিত্রাণ লাভের উপায় করিতে হইবে।

বঙ্কিম-সাহিত্যের রস-বিচার

বঙ্কিমচন্দ্র যে যুগের লোক সে যুগ গত হইয়াছে, সে সাহিত্যও এখন অচল— যুগের সঙ্গে সাহিত্যও কালের কুক্ষিগত হইয়াছে, এ বিষয়ে আধুনিক সাহিত্যসম্রাট হইতে ক্ষুদ্রতম ভৌমিক পর্য্যন্ত কাহারও মতভেদ নাই। যেহেতু উনবিংশ শতাব্দী বিংশ শতাব্দীর অগ্রবর্তী নয়—পূর্ববর্তী, সেই হেতু সে যুগের সকল কীর্ত্তিই এক্ষণে গলিত ফলের মত মাটি হইয়া গিয়াছে—ইহাই প্রগতিবাদের অবশ্য-স্বীকার্য সিদ্ধান্ত। আমার মনে হয়, এইরূপ মনোভাবের ফলেই বাংলাদেশের আধুনিক পণ্ডিতগণ, পুরাতনের উপর আধুনিকের, এবং আধুনিকের উপর অতি-আধুনিকের স্থান নির্দেশ করিতে এত ব্যগ্র, এবং ইহারই ফলে ইতিমধ্যেই রবীন্দ্রনাথের উপরেও পর্দা টানিয়া দিবার ভাব দেখা যাইতেছে। এ-হেন কালে বঙ্কিমচন্দ্র সম্বন্ধে কোনও আলোচনা অতিশয় অসাময়িক বলিয়াই মনে হয়, অনেক কৈফিয়ৎ দিয়াও মুখরক্ষা করা কঠিন। তথাপি আমি বঙ্কিম-সাহিত্য সম্বন্ধে সাধারণভাবে যৎকিঞ্চিৎ আলোচনা করিতে মনস্থ করিয়াছি; বঙ্কিম-সাহিত্যকে কোন দিক দিয়া বিচার করিলে, আধুনিক রুচি ও রসবোধ ক্ষুণ্ণ হইলেও—সাহিত্যের মর্যাদা ক্ষুণ্ণ হইবার আশঙ্কা নাই, আমি তাহাই ভাবিয়া দেখাইবার চেষ্টা করিব।

ক্রমোন্নতিই যে সৃষ্টির একমাত্র নিয়ম, কাল যতই অগ্রসর হইতেছে মানুষও যে ততই উন্নত হইতেছে—না হইয়া পারে না, এইরূপ একটা বৈজ্ঞানিক মনোভাব আজ জীবনের সকল ক্ষেত্রে প্রাধান্য লাভ করিয়াছে। কোন চিন্তা, কোন ভাব—এমন কি, কোনও কারুসৃষ্টির একটা কালনিরপেক্ষ মূল্য নাই; কাল-শ্রোতের ঘূর্ণাবর্ত্ত যেমন স্থিরকেন্দ্রিক নয়, তেমনই মানুষের অন্তরেও কোন-কিছুর ঞ্বেচ্ছায়া প্রতিফলিত হইতে পারে না—এই তত্ত্ব এ যুগের মানুষকে সর্ব বিষয়ে অবিশ্বাসী করিয়াছে। সাহিত্যের ক্ষেত্রেও এই অনিত্যের উপাসনা চলিয়াছে; সেখানেও সকল সৃষ্টিই কণিক, পূর্বকণকে পরকণ স্বীকার করে না, এবং প্রগতিবাদের মর্যাদা রক্ষার জন্য, যাহা পরবর্ত্তী তাহা যে অগ্রবর্ত্তী অপেক্ষা উৎকৃষ্ট, ইহা প্রমাণ করিতেই হয়।

কিন্তু এই বৈজ্ঞানিক বুদ্ধি আর যে ক্ষেত্রেই যথার্থ হউক, সাহিত্যের ক্ষেত্রে তাহাকে প্রায় দেওয়া চলে না, দিলেই সত্যভ্রষ্ট হইতে হয়। সাহিত্যের জগৎ ও যথাপ্রাপ্ত জগৎ এক নয়; একটি—দেশে ও কালে বিবর্তিত হইতেছে, অপরটি—দেশকালকে আশ্রয় করিয়াও যে পরিমাণে তাহা হইতে মুক্ত, সেই পরিমাণেই তাহা উৎকৃষ্ট সাহিত্যপদবীতে আরোহণ করে। রামায়ণ, মহাভারত, ইলিয়াড—শেক্সপীয়ার, কালিদাস, গেটে—বিশ্ব সাহিত্যের এই সকল প্রকাশ দেশকাল-সম্পর্কিত হইলেও ক্রমবিকাশ বা প্রগতিবাদের প্রমাণ নহে—জাগতিক কার্য-কারণতত্ত্ব বা বৈজ্ঞানিক মতবাদ এই ঘটনাগুলির সম্যক ব্যাখ্যা করিতে পারিবে না। ঠাহারা সাহিত্যের ইতিহাস-রচনার প্রয়োজনে, সাহিত্যিক রূপ-বিবর্তনের একটা কালক্রম, অথবা কবি-কল্পনার নানা ভঙ্গির একটা ঋতুপর্যায় আবিষ্কার করিয়া, বৈজ্ঞানিক অনুসন্ধিৎসা চরিতার্থ করেন, তাঁহারা প্রকৃতপক্ষে সাহিত্যের কেবলমাত্র—ঠাহারা সাহিত্য-পণ্ডিত হইতে পারেন, সাহিত্য-রসিক নহেন। কারণ, সাহিত্যের যাহা সার অংশ তাহার ইতিহাস নাই, কালপ্রবাহে যে কণগুলি পরস্পরকে দ্রুত অনুধাবন করিয়া চলিয়াছে, এবং যাহাদের মধ্যে একটা পৌর্বাপর্য্য বা ক্রমশৃঙ্খলা আছে, সেইরূপ কোনও কণ শ্রেষ্ঠ সাহিত্যের জন্ম-কণ নহে; সে সাহিত্যের জন্ম হয় মাহেজ্জকণে, এবং যিনি তাহার স্রষ্টা তিনিও কণজন্মা।

অতএব বঙ্কিমচন্দ্রের যুগ যে অর্থে বিগত হইয়াছে, বঙ্কিম-সাহিত্য সে অর্থে বিগত হয় নাই; বরং আজিকার বাংলা-সাহিত্যের যে অবস্থা—রবীন্দ্রনাথের মতো ঐরাবতও যে অবস্থায় স্রোতোমুখে নিরুপায়ভাবে ভাসিয়া চলিয়াছেন—সেই অবস্থায়, বঙ্কিমচন্দ্রকে সকাল হইতে একালে আনিয়া প্রতিষ্ঠিত করিতে পারিলে, এই যুতকল্প সাহিত্যের বলাধান হইতে পারিত; কিন্তু সে সম্ভাবনা ক্রমেই সুদূরপরাহত হইয়া পড়িতেছে। আমি যে কণজন্মা পুরুষের কথা বলিয়াছি, বাংলা-সাহিত্যে সেইরূপ কণজন্মা পুরুষ যে কল্পজন জন্মিয়াছেন তাঁহাদের মধ্যে বঙ্কিমচন্দ্রই যে সর্বশ্রেষ্ঠ, একথা আজিও জাত-সাহিত্যিক ছাড়া সকল শিক্ষিত ও ধর্মজ্ঞানসম্পন্ন বাঙ্গালীই স্বীকার করিবে।

আমি পূর্বে বলিয়াছি, খুব বড় যে সাহিত্য, তাহা কালস্রোতের উর্দ্ধে বিরাজ করে; কিন্তু সেই সঙ্গে ইহাও সত্য যে, সকল সাহিত্যই দেশ কাল ও জাতির

বিশিষ্ট ভঙ্গিমায় আত্মপ্রকাশ করে। কবিমানসের যে উপলক্ষি, তাহা এমনই পূর্ণ ও প্রত্যক্ষ যে, দেশ কাল জাতির বিশিষ্ট লক্ষণ তাহার বাধা না হইয়া, তাহাকে রূপ দিবারই সহায়তা করে। সেই রূপের যে বৈশিষ্ট্য ও বৈচিত্র্য তাহা বাহিরের এই উপাদানের জন্তই ঘটে—এবং কবির অন্তরস্থ প্রেরণা এতই উজ্জল যে, ভাব ও এই রূপের মধ্যে কোনও বিরোধ ঘটে না। এইরূপ পূর্ণদৃষ্টি-সম্পন্ন প্রতিভার যাহা-কিছু রচনা, সে সকলের মধ্যে প্রথম হইতে শেষ পর্যন্ত এমন একটি স্ফুটন লক্ষ্য করা যায় যে, মনে হয়, এই ব্যক্তি যেন কোন পরমক্ষণে বিদ্যাদীপ্তির মত একটা কিছুকে সমগ্রভাবে লাভ করিয়াছে—তারপর তাহার সেই উপলক্ষির যত কিছু বিচিত্র বাণীসৃষ্টি, তাহা সেই কেন্দ্রগত জ্যোতি-বিন্দুকে আশ্রয় করিয়াই মণ্ডলায়িত হইয়া উঠিয়াছে। বাংলা-সাহিত্যে এইরূপ স্বপ্রতিষ্ঠ ও সম্যক্দ্ৰষ্টা কবিমনীষী এ পর্যন্ত একটিরই আবির্ভাব ঘটিয়াছে—সে প্রতিভার পূর্ণ পরিচয় আমরা এখনও পাই নাই; সে পরিচয় একবার রীতিমত আরম্ভ হইলে কখনও শেষ হইবে না—বঙ্কিমচন্দ্র যে যুগের প্রবর্তক, সে যুগ বাঙালী জাতির ভবিষ্যতের বীজরূপে এখনও কালগর্ভে নিহিত আছে।

আজ বিংশ-শতাব্দীর এই যুগে বাংলা-সাহিত্যে বঙ্কিমের এই পরিচয় কি? বঙ্কিমচন্দ্র বাংলার প্রথম ঔপন্যাসিক, সেকালের সেই অপরিপুষ্ট সাহিত্যের অতিশয় সঙ্গীর্ণক্ষেত্রে বঙ্কিমচন্দ্রের কয়েকখানি উপন্যাসে যৎকিঞ্চিৎ রসসৃষ্টির পরিচয় আছে; সার্ব ওয়াল্টার স্কটের উপন্যাসাবলীর মতই সেগুলি অল্পবয়স্ক পাঠক-পাঠিকাদের মনোরঞ্জন করিতে পারে,—হয়তো তাহাও পারে না, কারণ, আজিকার অল্পবয়স্ক পাঠক-পাঠিকারাই সাহিত্যরসে অধিকতর প্রবীণ। একালের যে তিনজন মহাপ্রতিভাশালী লেখকের মতামত সাহিত্যিক মাঝেই শিরোধার্য করিয়া থাকেন, তাঁহাদের নানা সময়ের নানা উক্তি এইরূপ ধারণারই সমর্থন করে। ইহাদের মধ্যে একজন, আধুনিক বাংলা-সাহিত্যের পূর্বসূরিগণের মধ্যে সর্ব-প্রথম রবীন্দ্রনাথকে ও পরবর্ত্তীরূপে আপনাকে নির্দেশ করিয়াছিলেন। এ সমাজে বঙ্কিমচন্দ্রের পক্ষে কিছু বলিতে যাওয়া নিতান্তই পক্ষসমর্থনের মত হয়; বর্ত্তমান লেখকের পক্ষে সেরূপ কাজ আদৌ রুচিকর নহে। একালে রুচি ও রসবোধের যে বিকাশ, এবং সাহিত্য-সমালোচনার যে পদ্ধতি দেখা যাইতেছে—বড় বড় পণ্ডিতগণ যে ভাবে এই রুচির জয় ঘোষণা করিতেছেন, তাহাতে বঙ্কিমচন্দ্র

কেন, যে কোনও শক্তিমান লেখকের সম্বন্ধে সাহিত্য-নীতিসম্বন্ধ আলোচনা তুফর হইয়া পড়িয়াছে।

বঙ্কিমচন্দ্রের সর্বশ্রেষ্ঠ সাহিত্যিক কীর্তি যে তাঁহার উপন্যাস, তাঁহার প্রতিভার পূর্ণ পরিচয় যে তাহাতেই আছে—অর্থাৎ এই উপন্যাসগুলির মূল্যেই তাঁহার কবি-প্রতিভার মূল্য নির্ণয় করিতে হইবে, তাহাতে সন্দেহ নাই। তথাপি, ইহাও মনে রাখিতে হইবে যে, বঙ্কিমচন্দ্র কেবল উপন্যাস-লেখকই নহেন। স্বর্ট, জর্জ এলিয়ট, ডিকেন্স, থ্যাকারে, মেরিডিথ, হার্ডির সঙ্গে তুলনা করিয়া, অথবা আধুনিক বাংলা উপন্যাসের নবতন আদর্শ ও নব্যতম ভঙ্গিমার মাপকাঠিতে যাচাই করিয়া লইলেই ঔপন্যাসিক বঙ্কিমের পরিচয় সম্পূর্ণ হইবে না। ঐতিহাসিক উপন্যাস, নভেল, রোমান্স প্রভৃতির আকৃতি-প্রকৃতি—এবং ঐ জাতীয় সাহিত্যের ইতিহাস প্রভৃতির সূত্র ধরিয়া, কতকগুলি বাঁধা ফরমুলার সাহায্যে, বঙ্কিমচন্দ্রের গল্পকাব্য-গুলিকে কেবল পুঁথি-পড়া করিয়া বিদায় করিলেই চলিবে না। কারণ, ইহাই আধুনিক সমালোচনাশাস্ত্রের নীতি যে, উৎকৃষ্ট মৌলিক সৃষ্টির জাতিবিচার চলে না—তাহার যে জাতি সে তাহারই, আর কাহারও সহিত তাহার জাতি-সম্পর্ক নাই; তাহাকে বিচার করিতে হইবে তাহারই আদর্শে। বঙ্কিমচন্দ্র উপন্যাস লিখিয়াছেন, সেই হেতু তিনি ঔপন্যাসিক, অতএব, তাঁহার গ্রন্থগুলিতে উপন্যাস-রসরসিক পাঠকের ক্রটি ও কলাকুতূহলী চিন্তা কতখানি তৃপ্ত পায়, ইহাই দেখিতে হইবে, তাহার অতিরিক্ত কোনও কথাই অবাস্তব—এমন পণ করিয়া যসিলে, বঙ্কিমচন্দ্র সম্বন্ধে সকল আলোচনাই নিষ্ফল হইবে। উপন্যাস তো সকলেই লেখে, আজকাল রামা-শ্যামাও উপন্যাস লিখিতেছে, এবং প্রায় সকলেই, অন্তত বঙ্কিমের চেয়ে, বড় আর্টিষ্ট। স্বয়ং রবীন্দ্রনাথ হইতে কলেজের অধ্যাপক পর্যন্ত সকলেরই এই মত; সাহিত্যিক প্রগতিবাদীরা যে সকল প্রতিভার আগমনী-গান করিতেছেন, এবং তাহার ফলে সাহিত্যের যে ষ্টাইল ও উপন্যাসের যে আদর্শ জয়যুক্ত হইতেছে, তাহাতেও বঙ্কিমচন্দ্রকে ঔপন্যাসিক নামে অভিহিত করিতে কুণ্ঠা বোধ হওয়াই স্বাভাবিক। আধুনিক সমালোচনার এই প্রবৃত্তি দেখিয়াই আমাকে এ বিষয়ে সাবধান হইতে হইয়াছে।

আমি জানি, একথা অনেকের মনঃপুত হইবে না; এজন্য আমার বক্তব্য আর একটু ব্যাখ্যা করিয়া বলা প্রয়োজন। বঙ্কিম-প্রতিভার সাহিত্যিক বিচারই

আমারও অভিপ্রায়, যে বিচারে বঙ্কিমচন্দ্রের স্থান এতটুকু নামিয়া যাইবে না ; আমিও কবি-বঙ্কিমের কথাই বলিতে চাই । বঙ্কিমচন্দ্র ঔপন্যাসিকই বটেন, কিন্তু তাঁহার সেই উপন্যাসের প্রেরণা অতিশয় স্বতন্ত্র ; সেই প্রেরণার দিক দিয়া না দেখিয়া—কেবলমাত্র একটা বিশিষ্ট সাহিত্য-কলার দিক দিয়া দেখিলে, তাহার রসান্বাদনেও যেমন বাধা ঘটিবে, তেমনই একজন বিশিষ্ট কবি-ব্যক্তির ব্যক্তি-মানসের সহিত পরিচয় করা যাইবে না ।

ইংরাজীতে একটি কথা আছে—‘Style is the man’, কথাটা একজন বিখ্যাত ফরাসী লেখকের সৃষ্টি ; এই কথাটিই আধুনিক সাহিত্য-সমালোচনায় সর্বপ্রথম যুগান্তর আনয়ন করিয়াছিল । সকল শ্রেষ্ঠ সাহিত্যের মত বঙ্কিম-সাহিত্য সম্বন্ধেও এই উক্তি সত্য, এবং অতিশয় স্বার্থভাবে সত্য । প্রত্যেক সাহিত্য একটি বিশিষ্ট সাহিত্য, তাহার বাণী তাহারই । এই বাণী কথাটিও বাংলায় একটু বিশেষ অর্থে ব্যবহার করিলে ভাল হয় । প্রথমত, ভাষা অর্থেই বাণী নয় ; আবার অধুনা-প্রচলিত অর্থে বাণী বলিতে যাহা বুঝায় তাহাও নয়—অর্থাৎ, কোনও মত, উপদেশ বা মূল্যবান উক্তি নয় । (ভাব যখন ভাষায় রূপপরিগ্রহ করে, তখনই তাহাকে বাণী নাম দিব । ভাবের এই যে বাস্তব রূপ বা বাণী, ইহা সম্ভব হয়—যখন সেই ভাব ব্যক্তিবিশেষের ভাব, অতিশয় মৌলিক ও স্বতন্ত্র ; এই বাণী ব্যক্তিরই আত্মপ্রকাশ—ইহারই নাম ষ্টাইল ।) এক ব্যক্তির যে বাণী, তাহার বিস্তার ও বৈচিত্র্য যেমনই হউক, তাহা সর্বত্র এক, তাহার সমগ্র রচনাই একই ব্যক্তির আত্মপ্রকাশ । এক ভাষার সাহিত্যে এইরূপ বহু বাণী থাকে—প্রত্যেকটি এক একটি স্বতন্ত্র ষ্টাইল, এক একটি ব্যক্তি । সেই ব্যক্তির ব্যক্তিত্ব যদি পূর্ণবিকশিত হইয়া থাকে, তাহার সমস্ত ভাব চিন্তা কল্পনা যদি সেই একটা ব্যক্তি-কেন্দ্রে স্ফুটমান হইয়া থাকে, তবে তাহার সকল রচনায় সেই এক ষ্টাইল পরিস্ফুট হইয়া উঠিবে—তাহার সেই মানসপদের দলবিস্তারে কেন্দ্রটি হারাইয়া যাইবে না ; পুষ্প যতই নব-নব দলে বিকশিত হউক, তাহা সেই বৃক্ষটিরই চতুর্দিকে মণ্ডলায়িত হইয়া উঠিবে । এই জন্ত উৎকৃষ্ট প্রতিভার যাবতীয় বাণী সেই একই ব্যক্তির একই ভাবের প্রকাশ, এবং তদ্রূপিত সমগ্র সাহিত্যকে একটি ষ্টাইল বলিতে হইবে ।

(এই অর্থে যে ষ্টাইল, তেমন ষ্টাইল বাংলা-সাহিত্যে বঙ্কিমের তুল্য আর কুত্রাপি নাই । অল্পাঙ্গ ছোট-বড় লেখকের লেখায় যে ধরণের ব্যক্তিত্ব লক্ষ্য করা যায়,

তাহা অনেক সময়ে একটা বহির্গত বস্তু ; তাহার পরিধিও যেমন সর্বাঙ্গ, তেমনই তাহাকে একটি বিশিষ্ট টেকনিক-ভঙ্গিও বলা যাইতে পারে। যে ব্যক্তিত্বের কথা আমি উপরে বলিয়াছি, সেই ব্যক্তিত্বের মূলগ্রন্থি খুব বড় লেখকের সাহিত্য, সৃষ্টিতেও বার বার ছিঁড়িতে ও নূতন করিয়া জোড়া লাগিতে দেখা গিয়াছে—লেখক যেন তাঁহার জীবনে কখনও আত্মস্থ হইতে পারেন নাই। যাহারা সাহিত্য-কলা-বিলাসী, তাঁহাদের এই ব্যক্তিত্ব অতিশয় দুর্বল,—নানা রং, রূপ ও আলোর নিত্য নব-আকর্ষণে তাঁহাদের আত্মা বিক্ষিপ্ত ও বিভ্রান্ত হইয়া পড়ে। ভাবের পরিধি যদি সর্বাঙ্গ হয়, তাহা হইলে একপ্রকার ব্যক্তিত্ব পরিস্ফুট হয় বটে ; কিন্তু ভাবের লীলা যদি অক্ষুরস্ত হয়, তাহা হইলে তাহার মূলগ্রন্থি যেমন শিথিল হইয়া যায়, তেমনই, সেই প্রতিভা আপন ব্যক্তিত্বকে বার বার খণ্ডিত করে। বঙ্কিম-সাহিত্যের গোড়া হইতে শেষ পর্যন্ত একটি ব্যক্তি-কেন্দ্রিক ভাবের বিচিত্র ও পূর্ণতম বিকাশ সূক্ষ্ম হইয়া আছে ; তাঁহার সর্ববিধ রচনার মধ্যে সেই এক ব্যক্তি, এক ষ্টাইল জ্বলিয়ায়—বঙ্কিম নামক ব্যক্তি-কেন্দ্রে একটি ভাব-জগৎ সকল দিকে পূর্ণমণ্ডলায়িত হইয়া রহিয়াছে। এই ব্যক্তিগত অথচ সমগ্র-দৃষ্টিই তাঁহার প্রতিভার অননুসাধারণ লক্ষণ ; ঔপন্যাসিক বঙ্কিমচন্দ্র, এবং ‘কৃষ্ণচরিত্র’, ‘ধর্মতত্ত্ব’ ও ‘সাম্যে’র বঙ্কিমচন্দ্র একই ব্যক্তি। জীবনকে খণ্ডিত করিয়া তাহার অংশবিশেষে সাহিত্যিক কলা-কুতূহলতৃপ্তি সে প্রতিভার প্রবৃত্তি নহে। এই জন্যই, আমি ষ্টাইল কথাটা লইয়া এতক্ষণ যে আলোচনা করিলাম, তাহা এই প্রসঙ্গে অবাস্তব নহে।

বঙ্কিমচন্দ্রের সাহিত্যিক প্রতিভা যে কোন্ শ্রেণীর তাহা বুঝিতে হইলে আর একটা কথাও এ স্থানে উল্লেখ করা প্রয়োজন। আমরা আজকাল যাহাকে আর্ট বলি—যে সাহিত্যনীতির দোহাই দিয়া থাকি, এবং যাহার অনুশাসনে—একদিকে যেমন রোমাটিকের উপরে রিয়ালিষ্টিকের জয় ঘোষণা করি, তেমনই অপর দিকে সাহিত্য হইতে সর্ববিধ আধ্যাত্মিক উৎকর্ষকে বহিষ্কার করিতে চাই, সেই আর্ট প্রকৃতপক্ষে সাহিত্যকে ধ্বংস করে, সাহিত্যে মানব-চৈতন্যের পূর্ণ অভিব্যক্তির বাধা হইয়া দাঁড়ায়। জীবনই সাহিত্যের একমাত্র উপজীব্য, সেই জীবনের কোনও রূপ যখন বাণী হইয়া উঠে তখনই তাহা সাহিত্য হয় ; প্রথমে ইহাই হওয়া চাই। পরে, আমরা যখন সেই বাণীরূপের কৌশল পৃথকভাবে লক্ষ্য করিতে পারি, তখন

আর্ট সম্বন্ধে সজ্ঞান হই—আর্ট আগে, পরে সাহিত্য নয়। জীবনকে যে দেখে নাই, সে সাহিত্যে সেই জীবনের প্রকাশকে বুঝিবে কেমন করিয়া? ঠাইলেরই বা সে কি বুঝিবে? কতকগুলি সুপরিচিত, সহজবেগ *emotion*-কে কলা-কৌশলে বাণীরূপ দিবার শক্তিই শ্রেষ্ঠ প্রতিভার লক্ষণ নয়; জীবনের একটা খণ্ডকে লইয়া যে সাহিত্য রচিত হয়, তাহা *good art* হইতে পারে—*great art* নয়; এবং জীবন বলিতে যতদূর সম্ভব একট সমগ্র ভাব বা সমগ্র দৃষ্টির কথাই মনে রাখিতে হইবে। বঙ্কিমচন্দ্র, তাঁহার মত করিয়া, তাঁহারই দৃষ্টি দ্বারা, এই জীবনের একটা সমগ্র-রূপ কল্পনা করিয়াছিলেন, এবং সে কল্পনা বাস্তবের সহিতই বোঝাপড়া করিতে চাহিয়াছিল। জীবনের খণ্ড-সমস্তা নয়, আজকাল যাহাকে সমস্তা বলা হয় সেই সমস্তা নয়,—তাঁহার ভাব-কল্পনার পরিধিতে যে সমগ্র-বাস্তব বৃহৎরূপে প্রবেশ করিয়াছিল, তিনি তাঁহাকে আত্মসাৎ করিয়া একটি সুসমঞ্জস-রূপে পুনঃসৃষ্টি করিয়াছিলেন; তাঁহার সমগ্র সাহিত্য ইহারই প্রকাশ। উপন্যাসিক বঙ্কিমচন্দ্রের কোনও সজ্ঞান আর্ট-সাধনা ছিল না—জীবনকে উপেক্ষা করিয়া কেবল তাহার খণ্ডরূপের রসোদঘাটনই তাঁহার সাহিত্যিক ধর্ম ছিল না। জীবন ও জগতের যে রূপ তিনি আত্মগোচর করিয়াছিলেন, তাহাই বীজরূপে তাঁহার কল্পনায় অঙ্কুরিত হইয়া সপল্লব শাখাকাণ্ডে একটি বৃহৎ সূঠাম বৃক্ষের আকার ধারণ করিয়াছিল। এই বৃক্ষের মূল কুত্রাপি মৃত্তিকার আশ্রয় ত্যাগ করে নাই, ইহার শীর্ষদেশ উর্দ্ধমুখী হইলেও, কখনও শূন্য ব্যোমকে আকাজক্ষা করে নাই। তিনি সেই জীবনকে যে কাব্যগুলিতে প্রতিফলিত করিয়াছেন, তাহার *Romantic*ও নয়, *Realistic*ও নয়—পুরুষের প্রবুদ্ধ চেতনায় বাস্তবের যে সর্বাত্ম-শোভন রূপ প্রকাশ পাওয়া সম্ভব, তাহারই একটি ব্যক্তি-স্বতন্ত্র ভঙ্গি সেগুলিতে ফুটিয়া উঠিয়াছে। বঙ্কিমচন্দ্র জীবনকে অতিশয় বাস্তবরূপেই দেখিয়াছিলেন—রস-ব্রহ্মের সাক্ষেতিক প্রকাশরূপে নয়, নীতিনিয়মহীন জড়বাস্তবরূপেও নয়। তাঁহার জগৎ যেমন প্রত্যক্ষ, তেমনই জীবন্ত। সে জগৎ সুন্দর বলিয়াই তাহার মূলে একটা নীতি বা ধর্ম আছে, কারণ নীতিই সকল সৌন্দর্য—সকল মহিমা ও সুখমার নিদান; এই নীতির উর্দ্ধে আর কিছুকে স্থাপন করিবার প্রয়োজনও নাই। সেই নীতির পূর্ণলীলার বিগ্রহ যে মানুষ, তাহাকে অতিক্রম করিয়া কোনও অলৌকিক সত্তা বা পরলোকের ভাবনাকে তিনি প্রশ্রয় দেন নাই। এই যে মনোভাব—ইহা নিশ্চয় বিশুদ্ধ দর্শন বা বিজ্ঞানের

মনোভাব নহে ; আবার যে সুসঙ্গত ভাব-চিন্তার দ্বারা তিনি এই মনোভাবকে শোধন করিয়া লইয়াছিলেন তাহাও কবিজনোচিত রসাবেশের লক্ষণ নয় । ইহার কি নাম দিব ? কবি, দার্শনিক, বিজ্ঞানবিদ, ঐতিহাসিক—তিনি খাঁটি কোনটাই নহেন ; বরং ইহাই বলিতে হয় যে, এখানে এমন একটি দৃষ্টির সৃষ্টি হইয়াছে যাহাতে মানব-মানসের বিভিন্ন বৃত্তি একযোগে কাজ করিতেছে—বাস্তব ও আদর্শের সমন্বয়সাধন হইয়াছে । জীবনের যে বাস্তব-রূপ মানুষকে চিরদিন উদ্ভ্রান্ত করিয়াছে, সেই বিরাট দুঃসহ বাস্তবের সম্মুখীন হইবার সাহস বা শক্তি যাহাদের নাই, তাহারাই বঙ্কিমচন্দ্রকে অবাস্তব-ভাববিলাসী বলিয়া নামা কুঞ্চিত করে, এবং বাস্তবের নামে অবাস্তব সাহিত্য রচনা করে ।

বঙ্কিমচন্দ্রের উপন্যাসগুলির বিরুদ্ধে আধুনিক রসিকমণ্ডলীর অভিযোগ এই যে, তাহাতে প্রবল নীতিনিষ্ঠা ও যুক্তিবিরুদ্ধ কল্পনা, এমন কি অলৌকিক ও অপ্ৰাকৃতিক স্থান পাইয়াছে । এই অভিযোগের কোনটি তথ্য হিসাবে মিথ্যা নয় ; এবং তত্ত্ববিচারের দ্বারা তাহা মিথ্যা প্রতিপন্ন করিলেও কোনও ফললাভ হইবে না । কারণ, সাহিত্যের বিরুদ্ধে যে আপত্তি, তাহা প্রধানতঃ তত্ত্বঘটিত নয়, রুচিঘটিত ; রসের কথাটা অনেক সময়েই অবাস্তব—রসের ধার খুব কম লোকেই ধারে । রুচি ও রসজ্ঞান এই দুইটি প্রায় একসঙ্গে অবস্থান করে না—রসজ্ঞানশাসিত রুচি ও রসজ্ঞানবর্জিত রুচি, এ দুইয়ের বিরোধ অবশ্যস্বাভাবী । জীবনকে দেখিবার ভঙ্গি সাধারণ রসিকের একরূপ, আর্টতাত্ত্বিক সাহিত্যবিলাসীদের একরূপ, এবং ভাবুক, মনস্বী, অথচ রসরসিক পুরুষের আর একরূপ । বঙ্কিমচন্দ্র যে রসিক ছিলেন, এ কথা বোধ হয় আজিকার অধ্যাপকেরাও স্বীকার করিবেন ; এবং ভাবকে ভাষারূপ দিবার শক্তি যে তাঁহার ছিল, এ কথা ছাত্রসভায় স্বীকার না করিলেও, মনে মনে বোধ হয় স্বীকার করেন । বাকি দাঁড়াইতেছে এই যে, বঙ্কিমচন্দ্র জীবনের একটা অর্থ করিতে চাহিয়াছিলেন, তিনি তথাকথিত আর্ট লইয়াই তৃপ্ত ছিলেন না । ইহাতে যদি কোনও অভিযোগের কারণ থাকে, তবে এ ক্ষেত্রে তাহা যে রুচিঘটিত তাহাতে সন্দেহ নাই ; কারণ বঙ্কিমচন্দ্রের সেই জীবনবাদ তাঁহার কাব্যে রূপ পরিগ্রহ করিয়াছে, তিনি যে কত বড় কবি তাহা স্বীকার করিবার মত রসজ্ঞানী রসিকের অভাব পূর্বেও যেমন হয় নাই, পরেও হইবে না ; কোন বড় কবির পক্ষে ইহাই যথেষ্ট ।

বঙ্কিমচন্দ্রের বিরুদ্ধে যে অভিযোগ, সাক্ষাৎভাবে আমি তাহার প্রতিবাদ করিলাম না। কারণ, সে প্রতিবাদ নিষ্ফল। রসবোধ যুক্তির চেয়ে বড়, সেখানে যুক্তির প্রয়োজনই হয় না; কিন্তু রুচি যদি মাহুষের প্রবৃত্তির মত—রিপুর মত—অন্ধ ও প্রবল হইয়া উঠে, এবং সেই সঙ্গে মহামূর্খতাকে পরম পাণ্ডিত্য বলিয়া গর্ব করিবার মত একটি সমাজের সৃষ্টি হয়, তবে তাহার বিরুদ্ধে কোন যুক্তি কোন তর্ক চলে না; আরও কারণ এই যে, আজিকার দিনে এইরূপ পাণ্ডিত্যই অতিশয় সুলভ হইয়াছে। আমি পূর্বে শুধুই রসিকতা নয়, রসজ্ঞানেরও উল্লেখ করিয়াছি, এখানে সে সম্বন্ধে আরও কিছু বলিব। নিছক কাব্য-রসের আন্বাদনে আমাদের যে বৃত্তি চরিতার্থ হয়, তাহার সঙ্গে জীবন বা জগৎ-সমস্যার কোনও সম্পর্ক নাই। আমাদের সাহিত্যে বঙ্কিমচন্দ্রই প্রথম—যিনি জীবন-সত্যকে উৎকৃষ্ট কবিকল্পনার সহিত যুক্ত করিয়াছিলেন; জীবনের সহিত সেই বোঝাপড়ার ভার তিনি ধর্মশাস্ত্র বা মোক্ষশাস্ত্রের উপরে বরাত দিয়া তাহাকে কাব্যসাহিত্য হইতে দূরে রাখেন নাই। কিন্তু কবিমানসের এই যে জীবন-জিজ্ঞাসা ইহাও রূপরসপ্রধান—ইহারও মূলে আছে অপরোক্ষ অনুভূতি, অতএব ইহা উৎকৃষ্ট কবিকল্পনার পরিপন্থী নহে। ইহাকে রসিকতা না বলিয়া রসজ্ঞান বলিয়াছি এই জন্য যে, এইরূপ প্রেরণায় ব্রহ্মান্বাদের পিপাসা নাই; ব্রহ্মের পরিবর্তে এই জগৎসৃষ্টিই সর্বদা সমক্ষে বিদ্যমান থাকে, এবং তাহারই রহস্যভেদজনিত একটি আন্বাদ কবিচিত্তে আনন্দ দান করে—এখানে শুধু আনন্দ নয়, সেই আনন্দের হেতু সম্বন্ধেও সজ্ঞানতা থাকে। পূর্বে বলিয়াছি, বঙ্কিমচন্দ্রের কল্পনা জগৎ ও জীবনকে অতিক্রম করিতে চাহে নাই, তিনি জীবনের বাহিরে আর কিছুকে স্বীকার করেন নাই; তাঁহার আধ্যাত্মিকতাও সম্পূর্ণ আধি-ভৌতিক, এজন্য খাঁটি হিন্দুয়ানির দিক দিয়া তিনি নাস্তিক ছিলেন। আবার এই জীবনের বাস্তব-গভীর সমস্যাকে রসবাদী আর্টিস্টের মত—পাশ্চাত্য সংশয়বাদীর মত, অগ্রাহ্য করিয়া নিশ্চিন্ত থাকিবার মত প্রবৃত্তি তাঁহার ছিল না; তাই আর এক অর্থে তিনি ঘোরতর আস্তিক; এই আস্তিকতার জন্যই তিনি সাহিত্যে নীতি-পরায়ণতার অপরাধে অপরাধী। জীবনের প্রতি যাহাদের সত্যকার শ্রদ্ধা নাই, আপন আত্মারও প্রতি যাহাদের আস্থা নাই, তাহারাই বাস্তববাদের নামে বঙ্কিমের বিরুদ্ধে কলরব করিয়া থাকে।

রসের বিচারে কোনরূপ ফিলজফি বা মতবাদের পৃথক মূল্য নাই তাহা জানি, কিন্তু ইহাও সত্য যে, উৎকৃষ্ট কবিপ্রেরণার যে বাণী, তাহাতে জীবন বা ভাগবত সৃষ্টির সম্বন্ধে একটা বিশেষ উপলক্ষি ফুটিয়া উঠে ; এই উপলক্ষির নানা রূপ আছে। শেক্সপীয়রের নৈব্যক্তিক কল্পনায় মানুষের ভাগ্য ও জগৎবিধানের কোনও সুস্পষ্ট অর্থ ধরা না পড়িলেও, মহাকবির একটা মনোভাব তাহার মূলে নিশ্চয়ই বিদ্যমান আছে। সেই মনোভাবের প্রকাশ-ভঙ্গি হইয়াছে নাটক। বঙ্কিমচন্দ্রের চিন্তে যে জগৎ-সাক্ষাৎকার ঘটিয়াছিল, তাহার ফলে, একরূপ মনোভাব এক নূতন সাহিত্যিক রূপ আশ্রয় করিয়া ফুটিয়া উঠিয়াছে—অলঙ্কার-শাস্ত্রের শ্রেণীবিভাগ অনুসারে আমরা সেই রূপকে উপন্যাস নামে নির্দিষ্ট করিয়াছি। তাঁহার অপরাপর রচনায় যে সজ্ঞান চিন্তা ও বিচারবুদ্ধি আছে, তাহাও সেই এক ভাবদৃষ্টির দ্বারা নিয়ন্ত্রিত—সে যেন সেই একই ভাবানুভূতির টীকা-ভাষ্য। বুদ্ধিবৃত্তি ও কল্পনা এই দুইয়ের এমন আশ্চর্য্য একমুখিতা সচরাচর দেখা যায় না। পূর্ণ মনুষ্যত্বের যে আদর্শ তাঁহাকে প্রলুক করিয়াছিল, তিনি আপনার মধ্যেই যেন তাহার কতকটাকে পাইয়াছিলেন। ইহা যে তাঁহার নিজ ব্যক্তিত্বেরই একটা স্বতঃস্ফূর্ত প্রকাশ—কোনও তত্ত্ব বা চিন্তাগ্রন্থি নহে, তাঁহার উপন্যাসগুলিই তাহার প্রমাণ। কারণ, চিন্তামাত্রেরই বিশ্লেষাত্মক, তাহা দ্বারা রূপসৃষ্টি হয় না ; সকল তত্ত্বই নিরাকার—তত্ত্বও ভাবরূপেই অপরোক্ষ হয় ; এবং যখন সেই ভাব রূপধারণ করিবার সামর্থ্য লাভ করে, তখনই তাহা সেই শক্তির বলে সৃষ্টির সত্যে পরিণত হয়। বঙ্কিমচন্দ্রের উপন্যাসগুলিতে ইহার সাক্ষ্য রহিয়াছে। গ্রন্থের মুখবন্ধে, বা আখ্যা-পত্রের উপরে নানা বচন উদ্ধৃত করিয়া, তিনি যে তত্ত্বটির প্রতিষ্ঠা করিতে চাহিয়াছেন, তাহাই আখ্যানমুখে, ভাবকল্পনার অব্যবহিত বেগে, জীবনের পটভূমিকার উপরে রঙে ও রেখায় প্রত্যক্ষ হইয়া উঠিয়াছে। ‘দেবীচৌধুরাণী’র প্রফুল্ল এমনই একটি শরীরী চিন্তা ; তথাপি কে বলিবে, সে একটি রূপক মাত্র—জীবন্ত নারীমূর্তি নহে ! ‘আনন্দমঠ’ এমনই একটা ভাবচিন্তার বাণীরূপ—শুধু তাহাই নহে, একটা সম্পূর্ণ বিদেশী ভাব-সত্যকে, তিনি এই দেশের জল মাটি আকাশ ও অরণ্যের পরিবেশে, এবং এই জাতির মজ্জাগত সংস্কারের অঙ্কুল করিয়া, কি জীবন্ত জগৎরূপে সৃষ্টি করিয়াছেন ! আমি এখানে তাঁহার কল্পনা বা সৃষ্টিশক্তির কথাই বলিতেছি না—সে কবিত্বের যে নিদর্শন তাঁহার কাব্যে আছে, তাহা সকল শ্রেষ্ঠ কবির পক্ষেই

গৌরবজনক ; এখানে আমি কেবল ইহাই বলিতেছি যে, বঙ্কিমচন্দ্রের সমগ্র সাহিত্যকীর্তির মূলে ছিল যে প্রেরণা তাহা কোনও চিন্তা বা মতবাদের প্রেরণা নহে ; তাহা সেই পূর্ণ দৃষ্টি—যাহার বলে, ভাব ও রূপ, তথ্য ও তত্ত্ব, বাস্তব ও আদর্শ এক হইয়া যায়, রসপিপাসা ও জীবন-জিজ্ঞাসার মধ্যে কোনও বিরোধ আর থাকে না।

এই যে প্রতিভা—ইহা এমনই স্বতন্ত্র যে, ইহার বাণী সাহিত্যবিচারে একটা নূতন আদর্শ ও নূতন রুচির দাবী করিতেছে। বঙ্কিম-সাহিত্যে একটা জীবন-বাদেরই প্রতিষ্ঠা হইয়াছে। সে জীবনবাদের একদিকে আছে প্রত্যক্ষের উপাসনা—যাহা আছে তাহা ছাড়া আর কিছুকে স্বীকার না করিয়া, তাহারই ইচ্ছিত-অমুযায়ী পূর্ণ মনুষ্যত্বের সন্ধান। অপর দিকে আছে, সেই প্রত্যক্ষকে একটি সমগ্র উপলব্ধির উপরে প্রতিষ্ঠিত করা—জ্ঞান, প্রেম ও কৰ্ম এই ত্রিবিধ উৎকর্ষার নিবৃত্তিসাধন। প্রথম দিকটির প্রেরণা যুরোপীয় ; দ্বিতীয়টি ভারতীয় সংস্কারের ফল। তিনি জীবনকে কেবলমাত্র আর্টের অধীন করিয়া দেখেন নাই, মানুষের চরিত্রে অন্ধ নিয়তির লীলাই প্রত্যক্ষ করেন নাই। বঙ্কিমচন্দ্রের উপলক্ষে যে রোমান্স-রস আছে তাহার কারণ রসাবেশের অসংঘম নহে ; অতিশয় স্থিরদৃষ্টিতে জীবনের বাস্তব-মহিমাকে বরণ করিয়া যথার্থ প্রকাশ করিবার আকাঙ্ক্ষাই তাহার কারণ। এজন্য তাঁহার রচনায় যে নীতিজ্ঞানের প্রভাব আছে, তাহাতে যদিও আর্ট ক্ষুণ্ণ হইয়াছে, কাব্যের কিছুমাত্র ক্ষতি হয় নাই। কারণ সাহিত্যের উৎস আর্ট নহে—ব্যক্তির প্রতিভা ; এবং জীবনকেই যে যত বড় করিয়া দেখিয়াছে সেই তত বড় ব্যক্তি—তাহার যে বাণী তাহাই উৎকৃষ্ট ষ্টাইল, তাহাই GREAT ART ; আর সকল আর্ট—আর্ট মাত্র ; সে আর্ট মরসুমী ফুলের মত, যেমন চমকপ্রদ তেমনই ক্ষণস্থায়ী। যে সকল কাব্য আদিকাল হইতে মানুষের জীবন-রসে অভিষিক্ত হইয়া আজও পর্যন্ত বাঁচিয়া আছে, যাহার বাণী মানুষের প্রাণের আকুল উৎকর্ষা নিবারণ করে, যাহার মধ্যে তাহার ভয়-ভাবনা দ্বন্দ্ব-সংশয় একটি পরম উপলব্ধির দ্বারা আশ্বস্ত হয়, তাহাই শ্রেষ্ঠ সাহিত্য। বঙ্কিমচন্দ্রের প্রতিভা সেই শ্রেণীর, তাঁহার সাহিত্য-কীর্তিও সেই প্রশস্ত ভিত্তির উপর প্রতিষ্ঠিত। তথাপি, তাঁহার তুলনা তিনিই। বর্তমান যুগে সেই সাহিত্যের যে পরিণতি লক্ষ্য করা যায়, তাঁহার গণ্যকাব্যগুলি তাহারই শেষ নিদর্শন। উনবিংশ শতাব্দীর শেষ পর্বে,

যুরোপীয় জ্ঞান-সাধনা একজন বাঙালীর প্রতিভাকে আশ্রয় করিয়া যে ভারতীয় মনীষাকে প্রবুদ্ধ করিয়াছিল, তাহার ফলে জীবনের বাস্তব যে ধরনের কল্পনায় এক নূতন রূপে প্রকাশিত হইয়াছে, তাহার ষথার্থ মূল্য নিরূপণে এখনও বিলম্ব আছে।

মৃত্যুর আলোকে রবীন্দ্রনাথ

রবীন্দ্রনাথ অবশেষে এই মর্ত্যের মলিনতামুক্ত হইয়া সেই লোকে প্রস্থান করিলেন—‘বাচো যতো নিবর্তন্তে অপ্রাপ্য মনসা সহ’; যেখানে চন্দ্রতারকার ভাতিও স্নান, বিদ্যুৎ ছ্যুতিহীন, অগ্নির তো কথাই নাই। কিন্তু রবীন্দ্রনাথের যে মর্ত্যমমতার কথা আমরা জানি, তাঁহার উদয়কালের সেই ‘মরিতে চাহি না আমি সুন্দর ভুবনে’ হইতে অন্তকালের—

একদা কোন্ বেলাশেষে মলিন রবি করুণ হেসে
শেষ বিদায়ের চাওয়া আমার মুখের পানে চাবে—

—পর্যন্ত, প্রাণের আকুতি ও দীর্ঘশ্বাসের গীতি স্মরণ করিলে আমরাও যেমন সেই জ্যোতির্ময় পরপারের দিব্যস্বপ্নে আশ্বস্ত বোধ করি না, তেমনই খেয়াপারের সেই ক্ষণটিতে রবীন্দ্রনাথও কেমন বোধ করিয়াছিলেন, তাহাই ভাবিতে ইচ্ছা হয়। এ ভাবনা দুর্বল মানবচিত্তের ভাবনা;—মানুষ আমরা, এবং এতকাল রবীন্দ্রনাথের অতি গভীর মানবতার কাব্যদুগ্ধধারে আমাদের প্রাণ পুষ্ট হইয়াছে, তাই, আজ মৃত্যুর আলোকে সেই মহামানবের মূর্তি একবার আমাদের চোখ দিয়া দেখিতে চাই। আমরা জানি, মৃত্যুর দ্বারপথে রবীন্দ্রনাথ কোন নূতন পথে প্রবেশ করিলেন না—চিররাত্রির সেই তিমিরাবরণ তিনি অনেক আগেই ছিন্ন করিয়াছিলেন, তিনি এই পারে থাকিতেই তমসার ওপার পর্যন্ত সেতু রচনা করিয়াছিলেন। কিন্তু জানার ভিতর দিয়া তিনি যে অজানাকে জানিয়া-ছিলেন, মৃত্যুর আবির্ভাবে যখন সেই অজানাকে তাহার সাক্ষাৎরূপে জানিলেন, তখন তাঁহার প্রাণ কি একটুও চমকিত হয় নাই? তিনি অরূপ-অসীমকে রূপের সীমায় দেখিবার সাধনা করিয়াছিলেন, তাঁহার সকল দেখাই রূপরঞ্জিত ছিল; এক্ষণে তিনি সেই অরূপকে সর্বোন্দ্রিয়বর্জিত অবস্থায় কিরূপ দেখিলেন? মৃত্যুর সে রূপ কি একটুও ভিন্ন নহে? রবীন্দ্র-কাব্যে, জীবন ও মৃত্যুর স্বরূপ-সাধনার যে অপূর্ব গীতিস্বর বাঁশির রঞ্জে রঞ্জে নিঃশব্দিত হইয়াছে, আজ সেই স্বর আমাদের প্রাণে নূতন করিয়া আরও গভীরভাবে বাজিয়া

সাহিত্য-বিতান

উঠিতেছে ; আজ রবীন্দ্রনাথ যে-মৃত্যুকে বরণ করিলেন, সে মৃত্যু কি সেই জীবনের দাবীও স্বীকার করিয়াছে—রবীন্দ্রনাথের কবি-প্রাণ কি সেই ভাবের শরীরে শরীরী হইয়াই দিব্যধামে পৌঁছিয়াছে ? এ প্রশ্ন হয়তো অল্প সময়ে অবাস্তব, এমন কি অশোভন—তাঁহার একান্ত নিজস্ব আত্মিক উপলব্ধির সম্বন্ধে আমাদের কোনও কৌতূহল যেমন অনাবশ্যক, তেমনই নিরর্থক ; রবীন্দ্রনাথের মত বিরাট ব্যক্তির ব্যক্তিচেতনার সেই অপর পৃষ্ঠে—তাঁহার গূঢ়তম সত্তায়—কোনু বিশ্বাস, কোনু ধ্রুব-জ্ঞান কি ভাবে বিद्यমান ও বিকাশমান ছিল, সেই অপ্রকাশকে জানিবার শক্তিও আমাদের নাই—অধিকারও নাই। কিন্তু আমরা তাঁহার জীবনের যে প্রকাশের দিকটি দেখিয়াছি, যাহা আমাদের এই মর্ত্যসংস্কার-মলিন প্রাণকেই আশ্বস্ত ও উজ্জীবিত করিয়াছে, তাহার অবসান ও পরপারের সেই জ্যোতির্গয় লোকে প্রবেশ, এই দুইয়ের মধ্যে—লোকান্তরের মত—ব্যক্তিত্বেরও একটা রূপান্তর করিয়া, মর্ত্যের সহিত অমর্ত্যের ব্যবধান বিন্মত হইতে পারিতেছি না ; সেই মৃত্যুর ছায়া, রবীন্দ্র-কাব্যের আলোকে আলোকিত আমাদের চিত্তপ্রাঙ্গণে পড়িয়া, যে ভাবের উদ্বেক করিতেছে—আজ তাহারই কিঞ্চিৎ ব্যক্ত করিতে প্রবৃত্ত হইয়াছি।

২

সেদিন কবির শ্রাদ্ধবাসরে যখন সেই ঋষিমন্ত্র পাঠ হইতেছিল—‘মধুবাভা ঋতায়তে মধু ক্ষরন্তি সিদ্ধবঃ’—তখন কবির নিজের রচিত আর একটি মন্ত্র আমাদের প্রাণে আর এক ভাবের উদ্বেক করিতেছিল—

ভেঙ্গেছে দুয়ার এসেছ জ্যোতির্গয়,

তোমারি হউক জয়।

তিমির-বিদার হউক অভ্যুদয়,

তোমারি হউক জয়।

হে বিজয়ী বীর নব জীবনের প্রাতে

নবীন আশার খড়্গ তোমার হাতে,

জীর্ণ আবেশ কাটো স্কর্চোর যাতে,

বন্ধন হোক ক্ষয়,

তোমারি হউক জয় ॥

—এখানে, পৃথিবীর মলিন আলোক অপসারিত করিয়া, অপ্রকাশের ভিম্বিত-
তোরণ ভেদ করিয়া যাহার প্রকাশকে কবি বন্দনা করিতেছেন, তাহা যে এই
বায়ু, জল, ওষধি ও পার্থিব রজ্জ্বঃ প্রভৃতিকে মধুমৎ করিয়া তুলিবার সেই একই
অমৃত-আলোক-ধারা—এ আশ্বাস আমাদের প্রাণে জাগে না। এ গান শুনিয়া
মনে হয়, জীবনের কক্ষে শতদীপ জালিয়া আমরা বাহিরের অন্ধকার রাত্রিকে
যতই তুলিয়া থাকিতে চেষ্টা করি না কেন, জীবনের সেই কক্ষ হইতে নিষ্ক্রমণের
পথে, সেই মৃত্যুই দুজ্জের রহস্যপূরীর প্রাকারতলে, নক্ষত্রশলাকাখচিত বিরাট
তোরণদ্বার রুদ্ধ করিয়া দাঁড়াইয়া আছে। তখন যে ভিম্বিত-বিদার উদার
অভ্যুদয়ের প্রার্থনা আত্মার আর্ন্তরবের মতই উখিত হয়—‘মৃত্যুর হোক লয়’
বলিয়া মৃত্যুর যে রূপকে স্বীকার করিতে হয়—মনে হয়, তাহা হইতে ঋষি
অথবা কবি কাহারও নিষ্কৃতি নাই। রবীন্দ্রনাথের মহাপ্রস্থান-গীতিও চিরযুগের
মৃত্যুভয়-পীড়িত মানুষের অন্তিম আকৃতি-স্বরে ভরিয়া উঠিয়াছে। জীবনের যে
উৎসবশালায় তিনি স্বহস্তে অসংখ্য দীপ জালিয়াছেন, স্বরচিত বিচিত্র কুসুমমালায়
আমাদের ললাট ভূষিত করিয়াছেন, সেই উৎসবশালা হইতে নিষ্ক্রান্ত হইয়া
যখন তিনি বাহিরের অন্ধকারে পদক্ষেপ করিলেন, তখন তাঁহার দূরগত কণ্ঠের
আর এক গীত আমরা এখানে বসিয়া শুনিলাম—

ভাসাও তরণী হে কর্ণধার ।

তুমি হবে চির সাথী

লও লও ক্রোড় পাতি

অসীমের পথে জলিবে জ্যোতি

ঋণতারকার ॥

হয় যেন মর্ত্যের বন্ধন ক্ষয়

বিরাট বিশ্ব বাহু মেলি লয়

পায় অন্তরে নির্ভয় পরিচয়

মহা অজানার ।

—তাহাতে আমাদের উৎসবশালায় এই দীপাবলী আর তেমন উজ্জ্বল বোধ হয়
না। তখন আমাদের সেই উৎসবশালায় রবীন্দ্রনাথকে সেই মহা-অজানার সম্মুখে
যে মন্ত্র উচ্চারণ করিয়া অন্তরের অভয় কামনা করিতে শুনি, তাহাতে মনে হয়,
জীবনেই মৃত্যুকে জয় করিবার যে সাধনাই করি না কেন, জীবিতের চক্ষে

মৃত্যুর আবরণ ঘোচে না—মৃত্যুর সেই জলজ্জটাকলাপ জীবনের আলোককে উপহাস করিয়া, আমাদের চক্ষু ধাঁধিয়া দিয়া, অন্ধকারকেই অন্ধতর করিয়া তোলে; মর্ত্যের বন্ধন ক্ষয় না হইলে, অসীমের পথে সেই অন্ধকার পার হইবার ধ্রুবতারাটির সন্ধান মেলে না। কবি যে ‘বন্ধন-ক্ষয়ে’র কামনা করিলেন, তাহাতে কি ইহাই বুঝিতে হইবে না যে, দেহের ইন্দ্রিয়-বেটনীর মধ্যে তাঁহার মনের সেই মণিপদ্ম, রূপ-রস-স্পর্শের বর্ণ, গন্ধ ও মধুর যে অশেষ আনন্দে দলে দলে বিকশিত হইয়াছিল, তাহার সকল সংস্কার, মৃত্যুর সহিত মুখামুখী হইবার কালে, তিনি মোচন করিতেই চাহিয়াছিলেন? একদিন যে গাহিয়াছিলেন—

তার অন্ত নাই গো যে আনন্দে গড়া আমার অঙ্গ,
তার অণু পরমাণু পেল কত আলোর সঙ্গ।
আছে কত সুরের সোহাগ তার সুরে সুরে লগ্ন,
সে যে কত রঙের রসধারায় কতই হ’ল মগ্ন।
সে যে সঙ্গিনী মোর আমারে যে দিয়েছে বরনাল্য,
আমি ধন্ত সে মোর অগ্নে যে কত প্রদীপ জ্বাললো ॥

—আজ এই মুহূর্তে সে কথা কি তিনি বিশ্বৃত হইতে পারিলেন! কবির প্রাণ কি তখন ‘কান্নাহাসির দোল-দোলানা পৌষ ফাগুনে’র সকল মোহ দূর করিয়া—নিজের সেই অপরিমেয় প্রাণ-বহির নির্বাণ কামনা করিয়া—স্নিগ্ধ শীতল শান্তি-পারাবারে তরী ভাসাইবার জন্ত, মুক্তিদাতা কর্ণধারকে ডাক দিল—তাহারই ক্ষমা ও দয়া ভিক্ষা করিল! এত সাধ ও সাধের জীবন পিছনে পড়িয়া রছিল; যে কণ্ঠ অন্ধকারের বক্ষ চিরিয়া গানে গানে আলোকের উৎস অব্যবহিত করিয়াছিল, সে কণ্ঠ শুধুই নীরব হইল না—গানের সেই সুরও ভুলিয়া গেল!

রবীন্দ্রনাথের শ্রাদ্ধবাসরে গভীর বেদগাথার মতই উদগীত তাঁহার সেই স্বরচিত গানগুলির মধ্যে, অনন্তের পথে সেই দেহমুক্ত আত্মার যে যাত্রী-বেশ মানস-চক্ষে দেখিতে পাইলাম, তাহা জীবনের নিকট বিদায় লওয়ার বেশ; মহাত্মারতকার যুধিষ্ঠিরাদির যে মহাপ্রস্থান-বেশ বর্ণনা করিয়াছেন, ইহাও সেই বেশ। এই মহাযাত্রার পথে পশ্চাতের আকর্ষণ এতটুকু থাকিবার ঘো নাই—সকল স্মৃতি মুছিয়া ফেলিতে হয়, সকল মমতা, সকল মোহ জয় করিতে হয়।

কবি এইখানে থাকিতে যে আলো দুই চক্ষে ভরিয়া লইয়াছিলেন, সে আলোকে মৃত্যুর পথ আলোকিত হইল না ; গানের সহস্র ফুলে যে মালা গাঁথিয়াছিলেন, সেই মালার কথাও মনে রহিল না ; পৃথিবীর আর কোন কবির জীবনে যে আনন্দ এমন নিরবচ্ছিন্ন গীতময় হইয়া উঠে নাই, সেই আনন্দের অফুরন্ত ভাণ্ডারও খেয়াপারের কড়ি যোগাইল না। যখন, সেই চরম মুহূর্ত্তে, কবির মুখ হইতে, সকল যুগের সকল মানবের সেই এক আৰ্ত্ত আবেদন, কম্পিত কণ্ঠে, নিরাভরণা বাণীর বেশে, বাহির হইয়া আসিল—

মুক্তিদাতা, তোমার ক্রমা তোমার দয়া
হবে চিরপাথের চিরযাত্রার।

তখন, শোকস্তব্ধ হৃদয়কে বারবার কেবল এই কথাই বলিলাম—

সকল অভ্যাসহারা সর্ব আবরণ ছাড়া
সস্ত শিশুসম
নগ্ন-মূর্ত্তি মরণের নিষ্কলঙ্ক চরণের
সম্মুখে প্রণম'।

৩

আমরা জানি রবীন্দ্রনাথ তাঁহার জীবন-সাধনায় মৃত্যুকে কখনও ভোলেন নাই, বরং জীবন ও মৃত্যুর যে দ্বন্দ্ব সেই দ্বন্দ্ব উত্তীর্ণ হইবার সাধনাই তাঁহার কবিজীবনের শ্রেষ্ঠ সাধনা। মানুষ যাহার কথা চিন্তা করিতে ভয় পায়, আমাদের যাবতীয় মর্ত্যসংস্কার যাহার বিরুদ্ধে বিদ্রোহ করে,—যাহার বর্ণনায় সকল কালের সকল কবির কণ্ঠ বাষ্পরুদ্ধ, এবং গান রোদন হইয়া উঠিয়াছে,—রবীন্দ্রনাথ সেই মৃত্যুকে বারংবার যে সঙ্গীতে অর্চনা করিয়াছেন, তাহাতে ব্যথাও সুখ হইয়া উঠে, হর্ষ ও বিষাদ একই অশ্রুজলে বিগলিত হয়। কবি জীবনকে ভালবাসিতেন বলিয়াই—যে-মৃত্যু সেই জীবনেরই পরিণাম, তাহাকে একটা সর্বনাশ বা মহাশূন্য বলিয়া বিশ্বাস করিতে পারেন নাই, করিলে জীবন অর্থহীন হইয়া পড়ে। জীবনকে শুধুই ভোগ করা নয়—সেই ভোগ যে একটা মোহ, তাহার মূলে যে কেবল অন্ধ ইন্দ্রিয়-চেতনাই আছে, ইহা বিশ্বাস করিতে বাধিত বলিয়াই তিনি জীবনের সহিত মৃত্যুর সঙ্গতি-সাধনে এমন উৎসুক ছিলেন। এই ভাব-সাধনায়

তিনি জীবন ও মৃত্যুর অভেদ উপলব্ধি করিতেই প্রয়াস পাইতেন ; কখনও বা, জীবন হইতে জীবনে আত্মার প্রয়াণ-লীলায়, মৃত্যু একটা ক্ষণচ্ছেদ মাত্র, ইহাই মনে করিয়া আশ্বস্ত হইতেন । জীবনের দেবতা যিনি, মরণের দেবতাও তিনি — ইহা না হইয়া পারে না ; অতএব জীবনে যিনি এত স্নেহময়, এত সুন্দর, মরণে তিনি অন্তরূপ হইবেন কেমন করিয়া ?—

যবে মরণ আসে নিশীথে গৃহঘারে
যবে পরিচিতের কোল হ'তে সে কাড়ে
যেন জানি গো সেই অজানা পারাবারে
এক তরীতে তুমিও ভেসেছ ।

কিংবা—

বিচ্ছেদেরি ছন্দে লয়ে
মিলন ওঠে নবীন হয়ে ।
আলো অন্ধকারের তীরে,
হারিয়ে পাই ফিরে ফিরে,
দেখা আমার তোমার সাথে
নূতন ক'রে নূতন প্রাতে ॥

অথবা—

জীবনে ফুল-ফোটা হ'লে মরণে ফল ফলবে

এবং—

মুদিত আলোর কমল কলিকাটিরে
রেখেছে সন্ধ্যা আঁধার পর্ণ-পুটে,
উতরিবে যবে নব প্রভাতের তীরে—
তরণ কমল আপনি উঠিবে ফুটে ।

—এত বড় আশ্বাস ও বিশ্বাস যাহার, মৃত্যু তাহাকে বিচলিত করিবে কেমন করিয়া ? যদি বা তাহার সেই আঘাত, দেহ-বিচ্ছেদের সেই যাতনাও স্বীকার করিতে হয়, তাহাও ক্ষণিক—

স্তন হতে তুলে নিলে কাঁদে শিশু ডরে,
মুহূর্ত্তে আশ্বাস পায় গিয়ে স্তনাস্তরে ।

কিন্তু মৃত্যু সঙ্ক্ষে কবির এই যে মনোভাব, ইহার কারণও খুব স্পষ্ট । অতি

গুঢ় ও গভীর জীবন-রস-পিপাসাই এই মনোভাবের কারণ। কবির নিকটে মৃত্যুর কোন পৃথক সত্তা নাই এইজন্য যে, আত্মার অমরত্ব—জীবনের বাহিরে, মৃত্যু নামক কোন সীমানার অপর পারেই—আরম্ভ হয় না। যে-চেতনা অমরত্বের অনুভবী তাহা কোন নির্বিকল্প কৈবল্যের অবস্থা নয়, সীমা ও অসীমার মিলন-ভূমি—এই অপরূপের নাট্যশালায় সেই অমরত্বের নিত্য আন্বাদন হইয়া থাকে; আত্মা অমর এই অর্থে যে, সে—রূপ হইতে রূপান্তরে—সেই রস-সম্ভোগ হইতে বঞ্চিত হইবে না। সেইজন্যই জীবনের শেষ নাই; এই রূপের খেলাও যেমন অনন্তকাল চলিতে থাকিবে, তেমনই, সেই খেলার সঙ্গী বা চেতন-সহচররূপেই আত্মার আত্ম-চেতনার কখনও লয় হইবে না। ইহার কোন দার্শনিক ব্যাখ্যা না করিয়া, একটা স্থূল অর্থ করিলেই চলিবে—এবং সহজ মানবতার দিক দিয়া তাহা সত্যও বটে। সে অর্থ এই যে, কবি এই জগৎ-দৃশ্যের বাহিরে কোন অস্তিত্বের কামনা করিতেন না—সেইজন্য, সেই কামনারই রঙে রঙিন হইয়া মৃত্যুও তাঁহার নিকটে মনোহর হইয়াছিল। জগতের রস-রূপ এতই মনোহর যে, এ রূপের সঙ্গ ত্যাগ করিতে কখনও তাঁহার মন সরে নাই। যে ব্যক্তিত্বের বৃন্তবন্ধনে রূপের এই মধুসৌরভময় সহস্রদল ফুটিয়া উঠিয়াছে, সেই ব্যক্তিত্বের লয় যদিও বা মনে উদ্দিত হইত, মহানির্বাণের বর্ণহীন তাপহীন জ্যোতিঃ-সমুদ্রে ডুবিয়া যাইবার ইচ্ছা হইত,—তথাপি, তখনও সেই অকূল পারাবার অপেক্ষা জীবনের এই তটভূমি, এই জগৎ, সুন্দরতম বলিয়া বোধ হইত, এবং মৃত্যুকেও জীবনের স্নহদ বলিয়া মনে করিতে বাধিত না। যখন—

আমি বলে, মিলাই আমি
আর কিছু না চাই,

তখন—

ভুবন বলে তোমার তরে
আছে বরণ-মালা,
গগন বলে, তোমার তরে
লক্ষ এদীপ জ্বালা।

প্রেম বলে যে, যুগে যুগে
তোমার লাগি আছি জেগে,
মরণ বলে, আমি তোমার

জীবন-স্তরী বাই ॥

এই কামনাকে, এই প্রেমকেও, তিনি শোধন করিয়া লইয়াছেন—পরমার্থ-লাভের সহায়রূপে ; এই রূপরসচর্চাকেই তিনি আত্মার সহিত মিলন বা আত্মোপলব্ধির একমাত্র পন্থা বলিয়া বার বার নিজেকে আশ্বস্ত করিয়াছেন—

তোমায় আমার মিলন হবে ব'লে

যুগে যুগে বিশ্ব ভুবন তলে

পরায় আমার বধুর বেশে চলে

চির স্বপ্নধরা ॥

অতএব, যে প্রবল কামনা মৃত্যুকেও জয় করিতে চাহিয়াছে—সে কামনা জগতেরই এই রূপরস-সম্ভোগের কামনা। মৃত্যুও সেই কামনার জোরে অমৃত হইয়া উঠিয়াছে। আর একটি গানে কবির সেই কামনা, ব্যর্থতার করুণ সুরকে চাপিয়া রাখিবার চেষ্টায়, যে স্বপ্ন দেখিতেছে, তাহাতে প্রাণ যেন মৃত্যুকে স্বীকার করিয়াও করিবে না। পৃথিবী হইতে বিদায় লওয়ার—একেবারে গত হওয়ার—যে বেদনা, তাহাই আকাশ ও পৃথিবীর শোভাকে যেমন মমতায় মেতুর করিয়া তুলিয়াছে, তেমনই, সেই বেদনাই শান্তিলাভ করিতে চায় এক অপূর্ব স্বপ্ন-কল্পনায় ;—

যখন পড়বে না মোর চরণ-চিহ্ন এই বাটে,

বাইবো না মোর খেয়াতরী এই ঘাটে,

ঘাটে ঘাটে খেয়াতরী

এমনি সেদিন উঠবে ভরি,

চরবে গোক, খেলবে রাখাল ঐ মাঠে ।

আমায় তখন নাই বা মনে রাখলে

তারার পানে চেয়ে চেয়ে

নাইবা আমার ডাকলে ।

—এই গানের ঐ শেষ তিনটি পংক্তিতে যে দীর্ঘনিশ্বাস জমাট হইয়া আছে, তাহাই ইহার মূল সুর ; ঐ তিনটি পংক্তিই ফিরিয়া ফিরিয়া আমাদেরও হৃদয়ের তন্ত্রীতে ষেরূপ আঘাত করে, তাহাতে বিদায়ের ব্যথাই তীব্রতর হইয়া উঠে ; উহার মধ্যে সেই ব্যথাকে অগ্রাহ করিবার যে ভাব আছে, তাহা নিতান্তই গোঁণ বলিয়া মনে হয়। কবি যখন সাস্তনার ছলে বলেন—

তখন কে বলে গো সেই প্রভাতে নেই আমি,
সকল খেলায় করবে খেলা এই আমি ।
নতুন নামে ডাকবে মোরে,
বাঁধবে নতুন বাহর ডোরে,
আসবো যাবো চিরদিনের সেই আমি ।

—তখন সে আশ্বাস, সেই ব্যথার তুলনায়, অতিশয় অবাস্তব বলিয়া মনে হয় । কারণ, যে-প্রাণ পৃথিবী ছাড়িয়া যাইবার সময়ে এমন বিদার-বিধুর হয়, সে প্রাণের পক্ষে এ আশ্বাস সত্য নয় । মৃত্যুতে যদি ব্যক্তিত্বের লোপ হয়—তাহাই যদি স্বীকার করিতে হয়, তবে সেই সঙ্গে এই প্রাণও মরিয়া যাইবে ; তখন ‘কান্না-হাসির এই দোল-দোলানি’—এই “pleasing anxious being”-ও যে আর থাকিবে না ! সেই ভয়ই যে সব চেয়ে বড় ভয়—সেই ক্ষতিই যে সব চেয়ে বড় ক্ষতি ! তাহার বদলে, ঐ যে ব্যক্তিত্বহীন অস্তিত্বের চেতনা—সর্বভূতে নির্বিশেষে ব্যাপ্ত হওয়ার আনন্দ—তাহা কি সত্যই একটা সাধনা ! কবি এখানে এই যে ‘চিরদিনের সেই আমি’র অমরত্বের জয় ঘোষণা করিয়াছেন, ইহাতে একটা তত্ত্বজ্ঞানের আনন্দ হয়তো আছে, কিন্তু প্রাণের আশ্রয় ইহাতে কোথায় ? যে-আমি সকল খেলায় খেলা করে—সে আমি একটি সুন্দর কল্পনা মাত্র ; তাহাতে একটা ভাবের সৌন্দর্য্যই আছে, প্রাণের ক্ষুধার বস্তু সে নয়—সে একটা মনের বিলাসের সামগ্রী । এইরূপ কল্পনা রবীন্দ্রনাথের আর একটি কবিতায় আছে, তাঁহার ‘শিশু’ বিদায় লইবার কালে তাহার মাকে বলিতেছে—

বাদলা যখন পড়বে ঝরে’
রাতে শুয়ে ভাববি মোরে,
ঝরঝরানি গান গা’ব ঐ বনে ।
জান্‌লা দিয়ে মেঘের থেকে
চমক দিয়ে যাব দেখে,
আমার হাসি পড়বে কি তোর মনে
থোকার লাগি’ তুমি মাগো
অনেক রাতে যদি জাগো
তারা হ’য়ে বলব তোমায় ‘ঘুমো.’

তুই ঘুমিয়ে পড়লে পরে

জ্যোৎস্না হয়ে চূৰ্ণ করে,

চোখে তোমার খেয়ে যাব চুমো ॥

—ইহাও কবিতা-হিসাবেই উপভোগ্য, কিন্তু পূর্বোক্ত গানটির মধ্যে এই কল্পনাই একটি তত্ত্বরূপে উকি দিয়াছে। কবি, মৃত্যু হইতে মুক্তি, বা ব্যক্তির অমরত্বের যে আশ্বাস সেখানে ঘোষণা করিতেছেন, তাহা একটা তত্ত্বগত আশ্বাস মাত্র; অথচ সেই তত্ত্বজ্ঞান ও প্রাণের কামনার মধ্যে একটা বিরোধ রহিয়াছে। তাহাতে ব্যক্তি চেতনাও যেন লোপ পাইতেছে না, বিশ্ব-চেতনার মধ্যেই তাহা জাগিয়া থাকিতে চায়; যে রূপরস-সন্তোগ ব্যক্তি-দেহে ব্যক্তির চেতনাতেই সম্ভব, তাহাকেই দেহহীন নৈর্ব্যক্তিক চেতনায় ভোগ করিতে চায়। জীবনের প্রতি এই অতি-গভীর ও দুশ্ছেদ মমতার বশে রবীন্দ্রনাথ মৃত্যুকে কখনই একেবারে সম্মুখে আসিয়া দাঁড়াইতে দেন নাই, তাহাকে বার বার দূরে রাখিতে চাহিয়াছেন। যৌবনে একদা তিনি মৃত্যুকে সম্বোধন করিয়া এই যে বলিয়াছিলেন—

এ যদি সত্যই হয় মৃত্তিকার পৃথ্বী পরে

মুক্তির খেলা,

এই সব মুখোমুখী এই সব দেখা-শোনা

ক্ষণিকের মেলা;

* * *

তুমি শুধু চিরস্থায়ী, তুমি শুধু সীমাশূন্য

মহা পরিণাম,

যত আশা যত প্রেম তোমার তিমিরে লভে

অনন্ত বিশ্রাম;

তবে মৃত্যু দূরে যাও, এখনি দিয়োনা ভেঙে

এ খেলার পুরী,

ক্ষণেক বিলম্ব কর, আমার দু'দিন হ'তে

করিয়ো না চুরি।

—ইহাই তাঁহার প্রাণের অকপট উক্তি, এই মনোভাবই মৃত্যুসম্বন্ধে তাঁহার প্রকৃত মনোভাব। ইহারই বশে, মৃত্যুকে দূরে রাখিবার আকুল আগ্রহে তিনি কত ভাবেই না জীবনের অমৃত-রূপ ধ্যান করিয়াছেন!

তথাপি মনে হয়, আমরা তাঁহার যে-জীবন কাব্যের চলচ্চিত্র-পটে নানা বর্ণে বিলসিত হইতে দেখিয়াছি, তাহার অন্তরালে আত্মার যে নিশ্চল নিষ্কম্প জ্যোতিঃ-শিখা 'ঘূর্ণির মাঝখানে একটি বিন্দু'র মত স্থির হইয়া বিরাজ করিতেছিল—তাহার সন্ধান কখনও পাই নাই। যে-পুরুষ জীবনের এই নাট্যশালায় অজস্র ফুল ও অফুরন্ত আলোর আয়োজন আপনিই করিয়া লইয়াছিলেন—তিনি যে অন্ধকারকে কখনও ভোলেন নাই, তাহা আমরা দেখিয়াছি ; কিন্তু এত মমতা, এত মোহের মধ্যেও, যে বিশ্বাস তাঁহার অন্তরের অন্তস্তলে চিরদিন অটুট ছিল, যাহার বলে তিনি সকলই জানিয়া শুনিয়া এই অনিত্যের সঙ্গে নিত্যের খেলায় মাতিয়া উঠিয়াছিলেন—সে কথা তিনিই জানিতেন, আমরা জানিতাম না। তাই মৃত্যুর তরণীতে পা দিবার সময়ে তিনি যখন সেই অনিত্য-লীলার নটবেশ ত্যাগ করিয়া নিত্যের আশ্রয় প্রার্থনা করিলেন, তখন আমাদের চমকিত হইবার কারণ থাকিলেও, কবির আত্মা চমকিত হয় নাই ; তিনি তখন অতি ধীর গম্ভীর দৃঢ় কণ্ঠেই তাঁহার আত্মার সেই অভয়মন্ত্র ঘোষণা করিলেন। মৃত্যুর বিভীষিকা যেমন তাঁহাকে জীবনের প্রতি বিমুখ করিতে পারে নাই, তেমনই জীবনের হাসি-কান্নায় নিজের প্রাণকে নিঃশেষে সমর্পণ করিয়াও, তিনি মৃত্যুকে কখনও বিশ্বৃত হন নাই, যথা সময়ে তাহার দাবী মিটাইয়া দিতে প্রস্তুত ছিলেন। মৃত্যুর উৎসঙ্গে বসিয়াই তিনি নিজের অফুরন্ত প্রাণ-শক্তির বলে জীবনকে একটি উৎসবশালায় পরিণত করিয়া-ছিলেন—মৃত্যুকে জয় করিবার ভাবনাই যেন তাঁহার ছিল না। আমরা কবির সেই প্রাণের লীলাকে তাঁহার কবিতার মধ্যে যে-রূপে প্রকাশ পাইতে দেখিয়াছি—কবি হয়তো নিজে কখনও তাহাকে সেইরূপে দেখেন নাই ; আমাদের নিকটে তাহা যেমন ছিল, কবির নিকটে তেমন ছিল না। সেই একান্ত একক আত্মসাক্ষাৎ-কারের দিককে কবি তাঁহার কাব্য-সাধনাতেও পৃথক রাখিয়াছিলেন—সেই দিকটি আমাদের চোখে পড়িবার নয় বলিয়াই কখনও পড়ে নাই। এই জীবন-রঙ্গভূমির নেপথ্য-অস্তঃপুরে—যেখানে কোন দর্শক নাই, শ্রোতা নাই, যেখানে রূপ-রস-শব্দ-স্পর্শের বিচিত্র বেশ-বিলাস, আলো-ছায়ার অপূর্ব ইন্দ্রজাল সরিয়া মুছিয়া যায়, সেখানে রূপশিল্পী নিজেকে নিজের সৃষ্টি হইতে পৃথক করিয়া দেখে। সেখানে যে আত্মসাক্ষাৎকার অনিবার্য—রবীন্দ্রনাথ, রূপের ভাষাতেই অপরূপের সুর যোজনা

করিয়া, তাঁহার গানগুলিতে, নিজের সেই ব্যক্তি-চেতনার শেষ স্বাক্ষর দিয়া তাহা ব্যক্ত করিয়াছিলেন ; কারণ, প্রাণের সেই গভীরতম আকৃতি ও আশ্বাস—সেই অতিশয় আত্মগত অমুভূতি—জাগ্রত ব্যক্তি-চেতনাকেও অতিক্রম করে, তাহা অনির্করচনীয় ; তাই তাহাকে গানের সুরেই কথঞ্চিৎ ব্যক্ত করা যায় । সে সুরও যেন নিজের সঙ্গে নিজেরই আলাপন—অন্তের নিকট তাহা স্পষ্ট হইবার নয়,—

আমার একটা কথা বাঁশী জানে,
বাঁশীই জানে ।
সুরে রৈল বুকের তলা,
কারো কাছে হয়নি বলা,
কেবল ব'লে গেলেম বাঁশীর
কানে কানে ॥

কিংবা—

মোর হৃদয়ের গোপন বিজন ঘরে
একেলা রয়েছ নীরব শয়ন-পরে—
প্রিয়তম হে জাগো, জাগো, জাগো ।
জীবনে আমার সঙ্গীত দাও আনি'
নীরব রেখোনা তোমার বাঁশীর বাণী—
হৃদয়পাত্র সুধায় পূর্ণ হবে,
তিমির কাঁপবে গভীর আলোর রবে—
প্রিয়তম হে, জাগো, জাগো, জাগো ॥

অথবা—

নিবিড় ব্যথায় কাটিয়া পড়িবে প্রাণ,
শূন্য হিয়ার বাঁশীতে বাজিবে গান,
পাষণ তখন গলিবে নয়ন জলে ॥

ইহা হইতেই, তাঁহার গান যে কি বস্তু তাহা বুঝিতে পারা যাইবে । এই গানের ভিতর দিয়াই কবি নিজের গভীরতম বেদনা, কামনা বাসনা, আশা ও বিশ্বাস—প্রাণের অতিশয় নিভৃত নির্জনে যেন সকলের অগোচরে যে দেবতার নিকটে নিবেদন করিয়াছিলেন, সে দেবতা কি শুধুই জীবনের দেবতা, না শুধুই মৃত্যুর ? যখন শুনি—

শতদল-দল খুলে যাবে ধরে ধরে
লুকানো রবে না মধু চিরদিন তরে ।
আকাশ জুড়িয়া চাহিবে কাহার আঁধি,
ঘরের বাহিরে নীরবে লইবে ডাকি',
কিছুই সেদিন কিছুই রবেনা বাকি,
পরম মরণ লভিব চরণ-তলে ।

—তখন কোন প্রশ্নই আর থাকে না ।

এই যে আর এক প্রকার পরম আশ্বাসের অনুভূতি, ইহা আপনাকে নিঃশেষে হারাইয়া ফেলার—একটি চরম পূর্ণতার মধ্যে আপনাকে পূর্ণ করিয়া দেওয়ার—যে 'অকূল শাস্তি ও বিপুল বিরতি', তাহারই পূর্বস্বাদ । এই যে মৃত্যু—এ মৃত্যু রূপপিপাসার গুঞ্জরণ-শেষে মধুপানে নীরব হওয়ার মৃত্যু । এ অবস্থা মানুষের সাধারণ অনুভূতির অতীত, ইহাকে বাক্যের দ্বারা বোধগম্য করা যায় না । রবীন্দ্রনাথ এখানে কবি নন—মিষ্টিক-রসের সাধক । এ অবস্থায় জীবনের প্রতি মমতা, এবং তাহারই ফলে মৃত্যুকে আড়ালে রাখিবার কোন প্রয়োজনই আর নাই ; এমনও বলা যাইতে পারে যে, এ অবস্থায় পৌঁছিলে জীবন ও মৃত্যু দুইয়েরই কোন সাক্ষাৎ চেতনা আর থাকে না । অতএব, রবীন্দ্রনাথের কবি-জীবনের সেই অপর ও প্রায় সর্বকালীন যে ভাব-কল্পনা—যাহাতে মৃত্যুর সঙ্গে লুকাচুরি খেলার একটি নূতন রসে তিনি আমাদের মনকে আকুল, 'এবং জীবনেরই পূজায় উন্মুখ করিয়া দেন,—তাহাই কবির সঙ্গে আমাদের ঘনিষ্ঠতর পরিচয়ের নিদান ।

জীবনের ধন কিছুই যাবে না ফেলা
ধূলায় তাদের যত হোক অবহেলা,
পূর্ণের পদ-পরশ তাদের পরে ।

—এই যে আশ্বাস, ইহাই মানব-সাহিত্যে রবীন্দ্রনাথের সর্বশ্রেষ্ঠ দান । এক দিকে জীবন-বিরহ, ও অপর দিকে মৃত্যু-মিলন—এই উভয়েরই গান তিনি কত ছন্দে কত সুরে গাহিয়াছেন, কিন্তু তথাপি, মৃত্যুর সহিত মিলনের স্মৃতি নয়—জীবনের বিরহ-ভয়ই তাঁহার কাব্যে জীবনকে যে দুর্লভতার গৌরব দান করিয়াছে, তাহাই আমাদের চরিতার্থ করে । কবি রবীন্দ্রনাথের সাধনায় নানা স্তর আছে, সোপান-পরম্পরাও হয়তো আছে,—একই মন্ত্রের সাধনায় তিনি হয়তো আসন

পরিবর্তন করিয়াছেন, কিংবা যেখানে পৌঁছিয়াছেন, সেখান হইতে ফিরিয়া আসিয়াছেন ; তাহাতে কখনও প্রেমের অতৃপ্তি-সুখ, কখনও ভক্তির আত্মসমর্পণ, কখনও জ্ঞানের দৃঢ় প্রত্যয় আছে—কিন্তু কোন অবস্থাতেই তিনি জীবনকে লেশমাত্র অশ্রদ্ধা বা অবিশ্বাস করেন নাই। এই জগৎ ও জীবনের প্রতি যে আসক্তি তাহা যদি একটা মোহমাত্রই হয়, তথাপি সেই মোহই মুক্তিরূপে জ্বলিয়া উঠিবে—একদা তাঁহার কবিচিত্তে এই যে প্রত্যয় জাগিয়াছিল, তাহার পশ্চাতে এক সুগভীর উপলব্ধি ছিল ; সেই উপলব্ধিও অতি উৎকৃষ্ট বাণীতে প্রকাশ পাইয়াছিল, তেমন আশ্বাসবাণী তাঁহার কাব্যে আর কোথাও তেমন ভাবে ফুটিয়া উঠে নাই। সে বাণী যেন একটি প্রকাশ—একটি Revelation ; তাহাতে ভাব-কল্পনার সম্পূর্ণ প্রভাব থাকিলেও, সে বাণী যেন এক অপৌরুষেয় প্রজ্জ্বল আলোকে সমুজ্জ্বল। আমি এখানে কবির সেই উক্তিগুলি উদ্ধৃত করিতেছি—

প্রলয়ে সৃজনে না জানি এ কার যুক্তি,
ভাব হ'তে রূপে অবিরাম যাওয়া আসা ;
বন্ধ ফিরিছে খুঁজিয়া আপন যুক্তি,
যুক্তি মাগিছে বাধনের মাঝে বাসা ।

এবং—

চিরকাল একি লীলা গো—
অনন্ত কলরোল ।
অশ্রুত কোন্ গানের ছন্দে
অদ্ভুত এই দোল ।
তুলিছ গো দোলা দিতেছ
পলকে আলোকে তুলিছ, পলকে
আধারে টানিয়া নিতেছ ।

* * *

ডান হাত হ'তে বাম হাতে লও
বাম হাত হ'তে ডানে ।
নিজ ধন তুমি নিজেই হরিয়া
কী যে করো কে বা জানে !

* * *

এই মত চলে চিরকাল গো,
 শুধু যাওয়া, শুধু আসা।
 চিরদিনরাত আপনার সাথ
 আপনি খেলিছ পাশা।
 আছে ত' যেমন যা' ছিল
 হারাননি কিছু, ফুরায়নি কিছু
 যে মরিল যে বা বাঁচিল।...
 আছে সেই আলো, আছে সেই গান
 আছে সেই ভালবাসা।
 এইমত চলে চিরকাল গো
 শুধু যাওয়া, শুধু আসা।

—মনে হয়, রবীন্দ্রনাথের বাণী ইহার পরে আর কোথাও পূর্ণতর বা স্ফুটতর হইয়া উঠে নাই, ইহার নিকটে—

তখন কে বলে গো সেই প্রভাতে নেই আমি,
 সকল খেলায় করবে খেলা এই আমি।

—এক প্রকার তত্ত্বরসের কুহক-সৃষ্টি বলিয়াই মনে হয়।

৫

কিন্তু কোথা হইতে কোথায় আসিয়া পড়িয়াছি! এ প্রসঙ্গের অবতারণা করিয়াছিলাম এই বলিয়া যে, রবীন্দ্রনাথের জীবনকে, ও সেই জীবনের সাধনাকে আমরা এতকাল যে ভাবে যেভাবে বুঝিয়াছিলাম, আজ তাঁহার মৃত্যুসংক্রান্ত কতকগুলি ব্যাপারে সেই জীবন ও সেই সাধনার সম্পর্কে আমাদের মনে একটা সংশয়-ব্যাকুলতার সৃষ্টি হইয়াছে। জীবনকে নূতন করিয়া দেখিবার জগৎ যে আলোক তিনি জ্বালিয়াছিলেন—উপনিষদের সেই ঋষিমন্ত্র, সেই “মধুবাতা ঋতায়তে” মন্ত্রের যে কবিভাষ্য তিনি রচনা করিয়াছিলেন, তাহাতে, আমাদের বহুকালের অভ্যস্ত সংস্কার—জীবনের বহিঃপ্রাঙ্গণে যে পরলোক ও মৃত্যুর অন্ধকার যুগ যুগ ধরিয়া ঘনাইয়া উঠিয়াছিল—তাহার ঘোর কাটিয়া যাইতেছিল। কিন্তু রবীন্দ্রনাথের শ্রদ্ধাবাসরে তাঁহার স্বরচিত ও অভিপ্রেত যে মন্ত্রগান সহকারে তাঁহার আত্মীয়িক সম্পন্ন হইয়াছিল, তাহাতে—মৃত্যুর সেই রহস্যাকার জীবনের উপরে আবার

তেমনই ভাবে নামিয়া আসিয়াছে, জীবন যেন নিতান্তই কুদ্র তুচ্ছ হইয়া গিয়াছে। আমার চিন্তে এই যে ভাবান্তর ঘটিয়াছে, ইহার আরও প্রকৃষ্ট কারণ আছে। মৃত্যু যখন আসিল, এবং আরও পরে যখন কবি তাহার প্রায় সাক্ষাৎ-মূর্তি দেখিলেন, তখন তিনি যে দুই কবিতায় তাহার চরম বাণী লিপিবদ্ধ করিলেন, তাহাও কম অর্থপূর্ণ নয়; আমি তাহাই স্মরণ করিয়া প্রসঙ্গের আরম্ভে, কবির আজন্ম-সাধনায় মৃত্যুকে জয় করিবার সেই প্রয়াস আর এক চক্ষে দেখিয়াছি। হয়তো সে দেখাও ঠিক নহে,—গূঢ়তর তত্ত্বদৃষ্টির সাহায্যে কবির সেই সাধনাকে একটি নিদ্বন্দ্ব-ধারণার উপরে প্রতিষ্ঠিত করা খুব সহজ, অথবা সম্ভব। কিন্তু আজ কোনরূপ তত্ত্বের গহনে প্রবেশ করিবার মত প্রাণের অবস্থা নয়; তাহার উপর, কবির সেই চরম বাণী প্রাণ মন বিকল করিয়াছে। এক্ষণে আমি সেই কবিতা দুইটি হইতে কয়েকটি বিশেষ পংক্তি উদ্ধৃত করিয়া, তাহাদের অর্থ যেমন বুঝিয়াছি, তাহাই বলিব।—

তোমার সৃষ্টির পথ রেখেছ আকীর্ণ করি'

বিচিত্র ছলনা জালে,

হে ছলনাময়ী।

নিখ্যা বিশ্বাসের ফাঁদ পেতেছ নিপুণ হাতে

সরল জীবনে।...

অনায়াসে যে পেরেছে ছলনা সহিতে

সে পায় তোমার হাতে

শান্তির অক্ষয় অধিকার ॥

এবং—

দুঃখের আধার রাত্রি বার বার

এসেছে আমার দ্বারে।...

যতবার ভয়ের মুখোশ তার করেছি বিশ্বাস,

ততবার হয়েছে অনর্থ পরাজয়।

এই হার-জিত খেলা জীবনের এ মিথ্যা কুহক,

...দুঃখের পরিহাসে ভরা।

জয়ের বিচিত্র চলচ্ছবি—

মৃত্যুর নিপুণ শিল্প বিকীর্ণ আধারে।

—এখানে জীবন ও মৃত্যু দুয়েরই এক মূর্তি; জীবন সরল-বিশ্বাসীকে মিথ্যার ফাঁদে ফেলিবার জন্ত সৃষ্টির পথ বিচিত্র চলনাজালে আকীর্ণ করিয়াছে, এবং মৃত্যুও আধারে তাহার নিপুণ শিল্প—‘ভয়ের বিচিত্র চলচ্ছবি’—ছড়াইয়া রাখিয়াছে, ইহাও জীবনেরই মিথ্যা কুহক—‘দুঃখের পরিহাসে ভরা’। একদিকে চলনা, আর একদিকে ভয়—জীবন ও মৃত্যু কেহই সত্য, শিব, বা সুন্দর নয়। কিন্তু কবি এই প্রবন্ধনাকেও মূল্যহীন মনে করেন নাই, কারণ, যে মহৎ—যে আপনার অন্তরের চিরস্বচ্ছ, ঋজু, বিশ্বাস-সমুজ্জল পথে এই কুটিলকে জয় করে, ইহাকে সহ্য করিয়াই—

সত্যেরে সে পায় আপন আলোকে ধৌত

অন্তর-অন্তরে

—অর্থাৎ, যে ইহাকে অস্বীকার করিবার প্রয়োজন অনুভব করে নাই—‘লোকে তারে বলে বিড়ম্বিত’; কিন্তু, এই চলনাকেই অনায়াসে সহিয়া—

সে পায় তোমার হাতে

শান্তির অক্ষয় অধিকার।

এই উক্তি আরও গভীর গম্ভীর হইয়া উঠিয়াছে ইহার শিথিল বাক্যযোজনায়; ভাষা যেন সেই মর্মান্তবিদারী চরম অভিজ্ঞতার অর্থ বহন করিতে না পারিয়া, একপ্রকার মস্তচ্ছন্দের বাণীরূপ ধারণ করিয়াছে। ইহাই স্বাভাবিক; কারণ, ইহা সেই সময়ের উক্তি—যখন এক অতিতীক্ষ্ণ দেহচেতনা-কাতর আত্মার শেষ মর্ত্যবন্ধন খসিয়া যাইতেছে; ইহাতে কেবল এক প্রাণাস্তিক বিশ্বাসের ঘোষণাই আছে—যাহাকে সহ্য করিয়া সেই জীবন-ক্লান্ত পথিক অবশেষে অনন্তের পথে যাত্রা করিলেন।

তথাপি, ইহাতেও—জীবনের চলনা, মৃত্যুর নিপুণ শিল্প, প্রভৃতির—অর্থ খুব স্পষ্ট। সে অর্থ এই যে, শেষ পর্যন্ত আত্মাই আত্মার পরম নির্ভর; আত্মার বাহিরে যাহা কিছু, তাহার একটা নেতি-মূলক (negative) মূল্যই আছে; জীবন ও মৃত্যু—দুইয়েরই বন্ধনপাশ এই হিসাবে তুচ্ছ নয় যে, তাহাকে কাটিয়া বাহির হইবার শক্তিই আত্মার মহত্ব প্রমাণ করে। এই মিথ্যা—সুন্দর কিম্বা ভয়ঙ্কর হইয়াও—আত্মার কোন ক্ষতি করিতে পারে না; কারণ, আত্মার অন্তরের আলোকে সত্যই ধৌত হইয়া উঠে।

ইহাই কবির শেষ বাণী । এ বাণী একদিকে যেমন সত্য-স্বীকারের বাণী—
আত্মার অভয়-ঘোষণার বাণী, তেমনি, আর একদিকে ইহা জীবনকে বিদায়
দেওয়ার—জীবনের সহিত সকল সম্বন্ধ মুছিয়া ফেলার—বাণী । কবির আত্মা যেন
জীবনের সকল দেনা শোধ করিয়া মৃত্যুস্থানে নির্মল ও শুচি হইয়া উঠিয়াছে ।
কবি এতদিনে জীবনের যে পরিণামকে বরণ করিলেন, সে পরিণাম পূর্বেও তাঁহার
অজ্ঞাত ছিল না, কারণ, তাঁহাকেই আমরা গাহিতে শুনিয়াছি—

চোখের আলোয় দেখেছিলাম
চোখের বাহিরে ।
অন্তরে আজ দেখব, যখন
আলোক নাহি রে ।
ধরায় যখন দাওনা ধরা
হৃদয় তখন তোমায় ভরা,
এখন তোমার আপন আলোয়
তোমায় চাহি রে ।
তোমায় নিয়ে খেলেছিলাম
খেলার ঘরেতে,
খেলার পুতুল ভেঙ্গে গেছে
প্রলয় ঝড়েতে...

অতএব, এই মনোভাব—এই বৈরাগ্যের সুর—অনেক পূর্ব হইতেই আরম্ভ
হইয়াছিল, প্রাণের মোহের উপরে এই আধ্যাত্মিক মুক্তি-পিপাসা জয়ী হইয়া
উঠিতেছিল । আজ তাঁহার এই শেষের বাণী শুনিয়া আমরা চমকিত হইয়াছি
বটে, মনে হইতেছে, রবীন্দ্রনাথের সেই দুর্দ্বন্দ্ব মানবতাও অবশেষে আধ্যাত্মিকতার
নিকটে পরাজয় স্বীকার করিয়াছে । তিনি জীবনের মধ্যই, ‘সহস্র বন্ধনমাঝে
মুক্তির স্বাদ’ লাভ করিতে পারিলেন না ; শেষ পর্যন্ত সেই বন্ধন ছিন্ন করিয়াই
তাঁহাকে আত্মার মুক্তি বা অভয় প্রার্থনা করিতে হইল । কিন্তু হয়তো আমরাই
ভুল বুঝিয়াছিলাম ; এতদিন জীবনের বহিরাবরণে বিচ্ছুরিত কবি-শিল্পীর সেই
অসাধারণ শিল্প-প্রতিভার রশ্মিচ্ছটাই আমরা দেখিয়াছি, সেই শিখার অন্তঃস্থলের
স্থিররশ্মি দেখি নাই । জীবনকে যে বাহিরের দৃষ্টিতে তিনি দেখিয়াছিলেন, সে
দৃষ্টি তিনি আমাদের জন্য রাখিয়া গিয়াছেন ; যাহা শুধু বাণীতেই ধরা যায়, শুধু

তাহাই নয়—যাহাকে বাণীতেও ধরা যায় না, তাহাকেও তিনি স্বরে ধরিয়া দিয়াছেন; কিন্তু যাহা বাণী ও স্বর দুইয়েরই অতীত, তাহাকে তিনি সঙ্কে লইয়া গিয়াছেন—তাহার মৃত্যুকালীন মুখ-জ্যোতি তাহার আভাস মাত্র দিয়াছে। সেই আভাসের সাহায্যেই রবীন্দ্র-জীবন ও রবীন্দ্র-কাব্য আর একবার ভাল করিয়া আত্মোপাস্ত বুদ্ধিয়া লইতে হইবে।

রবীন্দ্রনাথের গদ্য-কবিতা

১

ইংরেজীতে ‘রিদ্মিক প্রোজ’ নামে যে রচনা-রীতির নামকরণ হইয়াছে তাহা স্বরসংঘাতের বিগ্ৰাসজনিত একপ্রকার ধ্বনিতরঙ্গের উপরে প্রতিষ্ঠিত। এই ‘রিদ্মিক প্রোজ’কেই বাংলায় আনিবার জন্য রবীন্দ্রনাথ অনেক দিন ধরিয়া প্রাণান্ত পরিশ্রম করিয়াছেন, কিন্তু আজিও সফল হইতে পারেন নাই। রবীন্দ্রনাথের এইরূপ চেষ্টা হয়তো শুধুই খেয়ালের ব্যাপার নহে—তাঁহার আর্টবিলাসী মনের বৈচিত্র্য-লিপ্সাও ইহার কারণ বটে; কিন্তু মনে হয়, তদপেক্ষা গভীরতর কারণ তাঁহার কবি-স্বভাবের মধ্যেই নিহিত আছে। রবীন্দ্রনাথের প্রতিভা গীতিধর্মী, তিনিই বাংলা ভাষার ধ্বনিপ্রকৃতি হইতে কাব্যের গীতিচ্ছন্দকে সহস্রধারায় প্রবাহিত করিয়াছেন; ছন্দোবন্ধের যে বন্ধন, তাহাকে মিলের বাঁধনে দৃঢ়তর করিয়া তিনি আপনাদিগের বিশিষ্ট কবি-প্রবৃত্তিকে চরিতার্থ করিয়াছেন। কিন্তু এই মিল ও ছন্দের স্বভাবসুলভ বশুতাও তাঁহাকে বিদ্রোহী করিয়া তুলিয়াছে—নিজ স্বভাবকে অতিক্রম করিবার বাসনা তাঁহাকে বারবার অধীর করিয়াছে। তাই দেখিতে পাই, মানসীর ‘নিষ্ফল কামনা’র মত কবিতা এবং অমিত্রাক্ষর-কবিতা রচনার ইচ্ছা প্রবল হইলেও, তিনি সাহস করিয়া তাহার চর্চায় মনোনিবেশ করেন নাই—তেমন সাফল্যলাভ করেন নাই বলিয়া, ইচ্ছা থাকিলেও আত্মসংযম করিয়াছেন। অমিত্রাক্ষর ছন্দ তাঁহার কবিধর্মের অনুকূল নহে, যাহা লিখিয়াছেন তাহাতেও অমিত্রাক্ষরের যতি-কৌশল নাই—গীত-স্বর-বর্জিত, ছন্দ-মাত্র-সহায় স্বরমূর্ছনায় তাহা সঙ্গীত সৃষ্টি করে না; বরং তাঁহার সেই কবিতার পংক্তিগুলি যেন শব্দ-মাত্রের বর্ণবিগ্ৰাস-গুণে গীতিবাহারে মুখরিত হইয়া উঠে। প্রমাণ স্বরূপ কিঞ্চিৎ উদ্ধৃত করিতেছি—

(১) এস নাথ, ওই দেখ

গাঢ়ছায়া শৈলগুহামুখে, বিছাইয়া

রাখিয়াছি আনাদের মধ্যাহ্ন-শয়ন,

কচি কচি পীতশ্যাম কিশোর তুলি'
 আর্জ করি' বরণার শীকরনিকরে ।
 গভীর পল্লবছায়ে বসি', ক্রান্তকণ্ঠে
 কাঁদিছে কপোত, 'বেলা যায়' 'বেলা যায়'
 বলি' । কুলু কুলু বহিয়া চলেছে নদী
 ছায়াতল দিয়া । শিলাখণ্ডে স্তরে স্তরে
 সরস স্নানিধি সিন্ধু শ্যামল শৈবাল
 নয়ন চূষন করে কোমল অধরে ।
 এস নাথ, বিরল বিরামে ।

(২) মৌনমুগ্ধ সন্ধ্যা ওই মন্দ মন্দ আসে
 কুঞ্জবন মাঝে, প্রিয়তমে, লজ্জানম্র
 নববধুসম ; সম্মুখে গভীর নিশা
 বিস্তার করিয়া অন্তহীন অন্ধকার
 এ কনক কাঙ্ক্ষিতুকু চাহে গ্রাসিবারে ।
 তেমনি দাঁড়ায়ে আছি হৃদয় প্রসারি,
 ওই হাসি, ওই রূপ, ওই তব জ্যোতি
 পান করিবারে ; দিবালোক-তট হ'তে
 এস, নেমে এস, কনক-চরণ দিয়ে
 এ অগাধ হৃদয়ের নিশীথ-সাগরে ।
 কোথা ছিলে, প্রিয়ে ?

এই সকল পংক্তিতে যে ছন্দঃ-স্রোত বহিয়াছে, তাহা অমিত্রাকরে রচিত
 হইলেও আবেগময় গীতিস্বরযুক্ত ; এই স্বরই যদি মিলের সাহায্য পায় তবে
 রবীন্দ্রনাথের কাব্য-সুন্দরী আরও লীলা-চঞ্চল, আরও বিলাস-বিহ্বল হইয়া
 উঠে ; যথা—

কতদিন এই বনে
 দিক্ দিগন্তরে আষাঢ়ের নীল জটা
 শ্যামস্নিগ্ধ বরণার নবঘনঘটা
 নেবেছিল, অবিরল বৃষ্টিজলধারে
 কর্মহীন দিনে সঘন কল্পনাতারে
 পীড়িত হৃদয় ; এসেছিল কতদিন

অকস্মাৎ বসন্তের বাধাবন্ধহীন
 উল্লাস হিল্লোলাকুল যৌবন উৎসাহ,
 সঙ্গীতমুখর সেই আবেগ-প্রবাহ
 লতায় পাতায় পুষ্পে বনে বনান্তরে
 ব্যাপ্ত করি দিয়াছিল লহরে লহরে
 আনন্দ-প্লাবন ; ভেবে দেখ একবার
 কত উষা, কত জ্যোৎস্না, কত অন্ধকার
 পুষ্পগন্ধযন অমানিশা, এই বনে
 গেছে মিশে সুখে দুঃখে তোমার জীবনে—
 তারি মাঝে হেন প্রাতঃ, হেন সন্ধ্যাবেলা,
 হেন মুকুরাত্রি, হেন হৃদয়ের খেলা
 হেন সুখ, হেন মুখ দেয় নাই দেখা
 যাহা মনে আঁকা রবে চির চিত্ররেখা—
 চিররাত্রি চিরদিন ?

উপরি-উদ্ধৃত কাব্যখণ্ডগুলিতে গীতিসুর প্রবল হইয়া আছে। অমিত্রাক্ষর ছন্দ সর্ব ভাবের বাহন বটে ; এমন কি, ইংরেজী কাব্যে গীতিপ্রধান (lyrical) অমিত্রাক্ষর ছন্দ একটি পৃথক আসন লাভ করিয়াছে। কিন্তু রবীন্দ্রনাথের পক্ষে অমিত্রাক্ষর মিত্র না হইয়া সত্যই অমিত্র হইয়া উঠে ; নিম্নোদ্ধৃত পংক্তিগুলি তাহার প্রমাণ—

(১) নেহারিল নত করি' শির, পরিস্ফুট
 দেহতটে যৌবনের উন্মুখ বিকাশ ।
 দেখিল চাহিয়া নব গৌর তনুতলে
 আরক্তিম আলঙ্কার আভাস ; সরোবরে
 পা' হুখানি ডুবাইয়া দেখিল আপন
 চরণের আভা ।—বিস্ময়ের নাই সীমা ।

(২) নয়নে নয়নে হয়ে
 কিরে আসে আঁখি, বেধে যায় হৃদয়ের
 কথা ; হাসে চাঁদ কোঁতুকে আকাশে ; চাহে
 নিশীথের তারা, লুকায়ে জানালা পাশে ।
 সেই নিশি-অবসানে আঁখি ছলছল,

সেই বিরহের ভয়ে বন্ধ আলিঙ্গন,

তিলেক বিচ্ছেদ লাগি' কাতর হৃদয় !

—এইরূপ অসংখ্য আছে। ইহাতে স্পষ্টই বুঝা যায়, রবীন্দ্রনাথের ছন্দ-লক্ষ্মী গীতিপ্রাণা,—নূপুর খুলিয়া এক পা'ও চলিতে তাহার বাধ' বাধ' ঠেকে। তাই, ছন্দোহীন—অর্থাৎ, পদমাত্রা ও মিলের শাসন-মুক্ত, অথচ সুরলয়যুক্ত—রচনার আকাজক্ষা তিনি গণ্ডেই মিটাইয়াছেন। রবীন্দ্রনাথের গল্প পুরুষের চালে পা ফেলিয়া চলে না, নট বা নটিনীর বিলাস-লীলায় তাহার ভঙ্গিমা সর্বত্রই লীলায়িত। তাঁহার গল্পও ভাবে ও রূপে কাব্যধর্মী। গল্পের অব্যবহিত অনিয়ন্ত্রিত গতিভঙ্গিকে তিনি কেমন সুরময় করিয়া তোলেন, তাহার উদাহরণ তাঁহার রচনা-রাশির মধ্যে সর্বদাই মিলিবে, আমি এখানে একটি প্রকৃষ্ট উদাহরণ দিব।—

আমি কে ! আমি কেমন করিয়া উদ্ধার করিব ! আমি এই বৃণ্যমান পরিবর্তমান স্বপ্নপ্রবাহের মধ্য হইতে কোন্ মজ্জমানা কামনাসুন্দরীকে তীরে টানিয়া তুলিব ! তুমি কবে ছিলে, কোথায় ছিলে হে দিবাকরপিনী ! তুমি কোন্ অতল উৎসের তীরে খজুরকুণ্ডের ছায়ায় কোন্ গৃহহীনা মরুবাসিনীর কোলে জন্মগ্রহণ করিয়াছিলে ? তোমাকে কোন্ বেদুয়ীন্দ্রিয়, বনলতা হইতে পুষ্প-কোরকের মত, মাতৃক্রোড় হইতে ছিন্ন করিয়া বিদ্রাংগামী অশ্বের উপর চড়াইয়া জলন্ত বালুকারাশি পার হইয়া কোন্ রাজপুরীর দাসীহাটে বিক্রয়ের জন্ত লইয়া গিয়াছিল ? সেখানে কোন্ বাদশাহের ভৃত্য তোমার নববিকশিত সলজ্জকাতর বৌবনশোভা নিরীক্ষণ করিয়া স্বর্ণমুদ্রা গনিয়া দিয়া, সমুদ্র পার হইয়া তোমাকে সোনার শিবিকায় বসাইয়া প্রভুগৃহের অন্তঃপুরে উপহার দিয়াছিল ! সেখানে সে কি ইতিহাস ! সেই সারঙ্গীর সঙ্গীত, নূপুরের নিকণ এবং সিরাজের সুরবর্ণ-মদিরার মধ্যে মধ্যে ছুরির ঝলক, বিষের জ্বালা, কটাকের আঘাত। কি অসীম ঐশ্বর্য, কি অনন্ত কারাগার ! দুইদিকে দুই দাসী বলয়ের হীরকে বিজুলি খেলাইয়া চামর দুলাইতেছে ; শাহেন্শা বাদশা শুভ্র চরণের তলে মণিমুক্তাখচিত পাদুকার কাছে লুটাইতেছে ;—বাহিরের দ্বারের কাছে যমদূতের মত হাব্‌শী, দেবদূতের মত সাজ করিয়া, খোলা তলোয়ার হাতে দাঁড়াইয়া। তাহার পরে সেই রক্তকলুষিত ঈর্ষাফেনিল ষড়যন্ত্রসঙ্কুল ভীষণোজ্জ্বল ঐশ্বর্যপ্রবাহে ভাসমান হইয়া, তুমি মরুভূমির পুষ্পমঞ্জরী কোন্ নিষ্ঠুর যত্নের মধ্যে অবতীর্ণ অথবা কোন্ নিষ্ঠুরতর মহিমাতটে উৎক্ষিপ্ত হইয়াছিলে ? (“ক্ষুধিত পাবাণ”—গল্পগুচ্ছ)

২

কাব্যে ছন্দকে রবীন্দ্রনাথ কখনও ত্যাগ করিতে পারেন নাই, ছন্দ কেন—মিল ত্যাগ করাও তাঁহার পক্ষে দুঃসাধ্য হইয়াছে। কিন্তু স্বপ্নপরিসর সুসঙ্গীর্ণ

পদবিষ্ঠাসের গীতিচাতুরী তাঁহাকে মুগ্ধ করিলেও, উদারতর ছন্দ-স্বাধীনতাও তাঁহাকে চিরদিন লুপ্ত করিয়াছে; তাই, কখনও পয়ারের চতুর্দশ মাত্রা বৃদ্ধি করিয়া, কখনও তাহাকে লঙ্ঘন করিয়া, তাঁহার কাব্য-বিহঙ্গ পক্ষবিস্তার করিবার প্রয়াস পাইয়াছে। ইহারই প্ররোচনায় তাঁহার ছন্দঃসৃষ্টির সর্বশেষ সফল প্রয়াস—‘বলাকা’। মিল ও ছন্দ কোনটাকে ত্যাগ না করিয়া তাঁহার ভাব-কল্পনার ‘হংসবলাকা’* কবিতার চরণ-চারণকে ইচ্ছামত দীর্ঘ বা হ্রস্ব করিয়াছে—অমিত্রাক্ষরের যতি-স্বাচ্ছন্দ্যকে মিত্রাক্ষরে ধরিবার চেষ্টা করিয়াছে। কিন্তু ইহাতেও ছন্দ-মুক্তি ঘটে না। গণ্ডে যে মুক্তির উপায় আছে, পণ্ডে তাহা নাই। যে-শৃঙ্খল রবীন্দ্রনাথের কাব্যলক্ষীর চরণে, বাহুতে, ও কটিতে শৃঙ্খল না লইয়া নূপুর-কাঞ্চী-কঙ্কণের মত স্বচ্ছন্দ নৃত্যচ্ছন্দে বিচিত্র বঙ্গারে বাজিয়া উঠে—সেই শৃঙ্খল মোচন করিবার আগ্রহে রবীন্দ্রনাথ বাংলা ভাষায় vers libre-এর উদ্ভাবনায় এখনও পরিশ্রান্ত হইতেছেন। একদা ‘লিপিকা’র গণ্ডকাব্যে তিনি ইহার এক রূপ ধরিতে পারিয়াছেন বলিয়া মনে করিয়াছিলেন; কিন্তু তাহা যে কাব্যচ্ছন্দের প্রতিদ্বন্দ্বী হইতে পারে না—গণ্ডেরই সে একটা আবেগময় ভঙ্গিমা মাত্র, ইহাও নিশ্চয় বুঝিয়াছিলেন। গণ্ডের এই ভঙ্গিমা ইতিপূর্বে আরও এক জন আয়ত্ত করিতে চেষ্টা করিয়াছিলেন,—যিনি ‘রাজকাহিনী’র মত গণ্ড-কাব্য লিখিয়া বাংলা সাহিত্যে একটি অপূর্ব বস্তু দান করিয়াছেন, তিনিও এই খেয়ালের বশে পণ্ডগন্ধী গণ্ড লিখিবার হাস্তকর প্রয়াস হইতে মুক্ত হইতে পারেন নাই। প্রসঙ্গক্রমে এইখানে ‘রাজকাহিনী’ হইতে কিঞ্চিৎ উদ্ধৃত করিব—তাহাতে, গণ্ডের গণ্ডত্ব বজায় রাখিয়াই রচনাকে কতটা কাব্যের অধিকারে প্রতিষ্ঠিত করা সম্ভব তাহার নিদর্শন আছে।—

(১) যেদিন বলভীপুরে শিলাদিত্য যুদ্ধক্ষেত্রে প্রাণ দিলেন, সেইদিন চন্দ্রাবতীর রাজপ্রাসাদে রাণী পুষ্পবতী মায়ের কাছে বসে সেই রূপার চাদরে ছুঁচের কাজ করছিলেন। কাজ প্রায় শেষ হয়ে এসেছিল, কেবল সূর্য্যমুর্তির নীচে সোণার অক্ষরে শিলাদিত্যের নামটি লিখতে বাকী ছিল মাত্র। পুষ্পবতী বন্ধ ক’রে নিজের কালো চুলের চেয়ে মিহি, আঙুলের চেয়ে উজ্জ্বল, এক গাছি সোনার তার, সর হ’তেও সর একটি সোনার ছুঁচে পরিয়ে একটি ফোঁড় দিয়েছেন মাত্র, আর চাঁপার কলির মত পুষ্পবতীর কচি আঙুলে সেই সোনার ছুঁচ বোলতার ছলের মত বিঁধে

* ইহাও একটি আর্ধপ্রয়োগ; ‘প্রদোষ’ অর্থে যেমন ভোর-রাত্রি নয়, তেমনি ‘বলাকা’ অর্থে ‘বক’—হংসের শ্রেণী বা পংক্তি নয়।

গেল। স্বপ্নগায় পুষ্পবতীর চোখে জল এল ; তিনি চেয়ে দেখলেন একটি কৌটা রক্ত জ্যোৎস্নার মত পরিষ্কার সেই রূপার চাদরে ঝাড়া এক টুকরো মণির মত ঝক্ ঝক্ করছে। পুষ্পবতী তাড়া-তাড়ি নির্মল জলে সেই রক্তের দাগ ধুয়ে ফেলতে চেষ্টা করলেন ; জলের ছিটে পেয়ে সেই এক বিন্দু রক্ত ক্রমশ ক্রমশ বড় হয়ে, একটু ফুলের গন্ধ যেমন সমস্ত হাওয়াকে গন্ধময় করে, তেমনি পাতলা ফুরফুরে চাদরখানি রক্তময় করে ফেললে। এই রক্তের দিকে চেয়ে পুষ্পবতীর প্রাণ কেঁপে উঠল, তিনি ছলছল চোখে মায়ের দিকে চেয়ে বললেন—“মা, আমাকে বিদায় দাও, আমি বনভীপুরে ফিরে যাই, আমার প্রাণ কেমন করছে, বৃষ্টি বা সেখানে কি সর্বনাশ ঘটল !”

(২) বাঙ্গালিতা সেই সূর্য্যকুণ্ডের জলে সূর্য্য-পূজা করে, গায়নীর রাজপ্রাসাদে বেতপাথরের শয়ন-মন্দিরে বিশ্রাম করতে গেলেন। হঠাৎ অর্ধেক রাত্রে কার একটি মধুর গান শুনতে শুনতে বাঙ্গার ঘুম ভেঙে গেল। তিনি শয়ন-মন্দির থেকে পাথরের ছাদে বেরিয়ে দাঁড়ালেন ;—সম্মুখে মুসলমানদের প্রকাণ্ড মসজিদ জ্যোৎস্নার আলোর ধপ্ ধপ্ করছে, আকাশে আধখানি চাঁদ, চারিদিকে নিশুতি। বাঙ্গা জ্যোৎস্নার আলোয় দাঁড়িয়ে গান শুনতে লাগলেন। তাঁর মনে হ’ল এ গান যেন কোথায় শুনেছেন। হঠাৎ দক্ষিণের হাওয়ায় গানের কথা আরও স্পষ্ট হয়ে বাঙ্গার কানের কাছে ভেসে এল ; বাঙ্গা চমকে উঠে শুনলেন—“আজ কি আনন্দ, বুলত বুলনে শ্রামর চন্দ !”—এ যে সেই গান। নগেন্দ্রনগরের রাজপুত্র রাজকুমারীর বুলন-গান।

—এ রচনা পাঠ করিয়া স্বতই মনে হয়, এই বস্তু কি কাব্যচ্ছন্দে রীতিমত কবিতার আকারে আরও রমণীয় হইত না? কিন্তু বার বার ইহাই প্রতীতি হয় যে, এই রূপই ইহার যথার্থ রূপ, অন্য কোনও রূপে ইহার সৌন্দর্য্য বৃদ্ধি হইত না। উৎকৃষ্ট রচনার ইহাই নিঃসংশয় লক্ষণ।

এ ভাষাও গল্প, তথাপি ইহার বিষয়বস্তু একপ্রকার কাব্যই বটে। ভাবের সহিত রূপের নিখুঁত সামঞ্জস্য রক্ষার ফলে ইহা এইরূপ গল্পভঙ্গিতে রচিত হইতে বাধ্য—ইহাকেই বলে ‘ফর্ম্’ ও ‘কন্টেন্ট’-এর ঐকাত্মিক পরিণয়। কারণ ইহা যে-ধরণের কাব্য তাহা নিছক রস-পরিণামী নয়, এখানে ভাব-সৌন্দর্য্য কথাকেই আশ্রয় করিয়া আছে। ইহাতে চিত্রের পট-বিস্তার আছে ; বর্ণনা ও বিবৃতির গল্পই ভাবাকুলতার সৃষ্টি করিয়াছে। এ কাহিনী শুনিতে শুনিতে মনে হয়, এক সুদূর সুন্দর রূপকথার রাজ্যে স্বপ্নপ্রয়াণ করিয়াছি। সেখানে সুধাধবল মর্ষর প্রাসাদের অলিন্দে বসিয়া অক্ষুট জ্যোৎস্নালোকে দূরবিসর্পী প্রান্তরসীমায় চাহিয়া আছি। পৃথিবী রহস্যময়, কিন্তু মাহুষের জীবন অতিশয় সরল ও সংক্ষিপ্ত ; সে জীবনের ছবিগুলি রেখা-বিরল ও বর্ণ-বহুল,

এবং সেই বর্ণ-বৈচিত্র্যকে উজ্জ্বল করিয়াছে ভাবের একটিমাত্র স্বর—জ্যোৎস্না রাত্রে বাঁশির আলাপের মত। সে স্বরে জয়-পরাজয়, হাসি-কান্না, বর্ণদুন্দুভি ও বুলনগান, রাজা ও রাখাল, আর্টের ঐশ্বর্য ও প্রাকৃতিক বস্তু-শোভা—এমন একটি কোমল মধুর রাগিণীতে মিলিত হইয়াছে যে, রসিক মানুষের মধ্যে যে চিরন্তন বালকটি রহিয়াছে সে উৎকণ্ঠিত উৎকর্ণ হইয়া সারারাত্রি জাগিয়া থাকে—রূপকথার সমাপ্তি চায় না। ইহাই রূপকথা, ইহার এমন রূপ আর কোথায়ও দেখি নাই।

৩

কিন্তু গল্প নয়—চাই পণ্ডেরই পরিবর্ত; ছন্দকে বর্জন করিয়া কবিতা রচনা করিতে হইবে; ইহাই হইল এ যুগের শ্রেষ্ঠ কাব্য-সাধন, রবীন্দ্রনাথের শেষ সাধনাও তাহাই। রবীন্দ্রনাথও তাঁহার প্রতিভার অস্তিমকালে বুঝিয়াছেন, ‘মডার্ন’ না হইলে এ যুগে সকল কীর্তি নিষ্ফল। যে রস-কল্পনার বশে ভাষায় অর্থাভীত ব্যঞ্জনার প্রয়োজন ছিল, সে রস এ যুগের রস নয়। রবীন্দ্রনাথের ইদানীন্তন কবিতাগুলির ভাষা এবং ভাববস্তু লক্ষ্য করিলেই বুঝা যায়—ইহা সে কাব্য নয়। এ ভাষা অতিমাত্রায় ‘বাস্তব’। ইতিমধ্যে তরুণসম্প্রদায় সর্ববিধ বন্ধনমোচনের মত কাব্যেরও ছন্দোবন্ধন মোচনের জগু অধীর হইয়াছে, নহিলে কবি হওয়ার বড়ই অসুবিধা। ইহারাও ‘মডার্নিজম’-এর দোহাই দেয়, কিন্তু আসলে ইহাদের রসবোধের বালাই নাই; তাই ভাষাও নাই—সে প্রাণও নাই, সে কানও নাই। তাহাদের এই উচ্ছৃঙ্খলতা রবীন্দ্রনাথও সমর্থন যে করেন, তাহার বহু প্রমাণ আছে। বাংলা ভাষায় ধ্বনিচ্ছন্দের যত রাজ্য আছে তাহার সকলই তিনি আবিষ্কার ও অধিকার করিয়াছেন; এখন ছেলেরা ছইটম্যান হইবার চেষ্টায় নিষ্ফল তাণ্ডবে মাতিয়াছে, তিনি তাহাদিগকে সাফল্যের পন্থা দেখাইবেন। সাহিত্যিক গল্পের অবয়বরীতি উল্টাইয়া, এবং যেমন করিয়া হউক, শব্দের বর্ণসংঘাত-সাহায্যে ধ্বনিম্পন্দ সৃষ্টি করিয়া, যদি কবিতা রচনা করিতে হয়, তবে তাহার সেই কৃত্রিমতা ছন্দোবন্ধন অপেক্ষাও দুঃসহ। যাহা সহজ গল্পে অথবা সরলতর পণ্ডে আরও সুন্দর করিয়া ব্যক্ত করা যাইত, তাহার এইরূপ মূর্ত্তি দেখিয়া মনে হয়, অতঃপর কাব্য—ভাবের বাণীরূপ না

হইয়া, শব্দ নাচাইবার রসস্থল হইয়া উঠিবে। যেহেতু ইহাতে ভাব অপেক্ষা শব্দের প্রাধান্যই অধিক, রসস্থটির পরিবর্তে ধ্বনিস্থিতিই ইহার মুখ্য অভিপ্রায়, এজন্য ইহাতে কবি ও কাব্যের প্রাণান্ত ঘটে। উদাহরণ দিব। যাহা আদৌ গল্প, তাহাকে কাব্যরূপ দিতে চাহিলে—অথবা যে ভাষায় ছন্দোহীন ‘রিদ্ম’ সম্ভব নয়, তাহাতে কেবলমাত্র বর্ণসংঘাত ও পংক্তিপর্বের সাহায্যে কাব্যচ্ছন্দের অমুরূপ শ্রুতি-স্বথ উৎপাদন করিতে চাহিলে, যাহা হয়—তাহাই যে রচনাটিতে বিশেষ করিয়া হইয়াছে, আমি সেই ‘পৃথিবী’ সন্দর্ভটির সম্পর্কেই কিছু আলোচনা করিব।

কারণ, এই রচনাটিতেই ছন্দোহীন ছন্দের ভঙ্গিমা অতিশয় পরিশ্রুট হইয়াছে। এই ধরনের অগ্ন্যাগ্ন ‘কবিতা’গুলিতে আর সকলই ছিল; কিন্তু ভাষার এমন শব্দ-সঙ্কর, সমাস-সন্ধিযুক্ত শব্দ-ঘনঘটার গুরু-গুরু গরগর উষ্মকনাদ আর কোথায়ও এমন সার্থক হইয়া উঠে নাই। শব্দের এই ঘনঘটা যেখানেই একটু নরম হইয়া পড়িয়াছে, সেইখানেই—

হাওয়ার মুখে ছুটলো ভাঙা কুঁড়ের চাল

শিকল-ছেড়া কয়েদী ডাকাতের মতো—

অথবা

চাঁদের পেয়ালা ছাপিয়ে দিয়ে উপচিয়ে পড়েছে

স্বর্গীয় মদের ফেনা।

—ভাষা এমনই ভব্য, এবং উপমা এমনই উদ্ভ্রান্ত হইয়া উঠিয়াছে!—কারণ, ‘চাঁদের পেয়ালা’ অপেক্ষা ‘চায়ের পেয়ালা’ শুনিতে অনেক ভাল, এবং ‘স্বর্গীয় মদের ফেনা’ বাংলাভাষার বস্তু-হরণ ছাড়া আর কিছুই নয়। ‘ভাঙা কুঁড়ের চাল’ ‘হাওয়ার মুখে’ উড়িবার মত হালকা হইতে পারে, কিন্তু ‘কয়েদী ডাকাতের মত’ জোয়ান সে নয়, এবং ছিঁড়িবার মত শিকল তাহার দেহের কোথায়ও শক্ত করিয়া বাঁধা থাকে না। এই কবিতার আর একটি চিত্র এইরূপ—

বৈশাখে দেখেছি বিহ্বলচকুবিদ্ধ দিগন্তকে ছিনিয়ে নিতে এল

কালো শোন পাখীর মত তোমার ঝড়,

সমস্ত আকাশটা ডেকে উঠল যেন কেশর-ফোলা সিংহ,

তার ল্যাজের ঝাপটে ডালপালা আলুখালু করে’

হতাশ বনস্পতি ধূলায় পড়ল উবুড় হয়ে—

কালবৈশাখীর ঝড়ের ছবি,—কিন্তু কোনও একটা রূপ স্পষ্ট হইতে পারে নাই। আকাশটা কেশর-ফোলা সিংহ, ঝড় হইয়াছে শোনপাখী, এবং দিগন্ত—বিদ্যুৎচঞ্চুবিক একটা কিছু; চিত্রের অংশগুলি সামঞ্জস্য-হীন। কিন্তু ভাষার এই ঘনঘটা স্বেদেও ভাবের মহত্ব কুত্রাপি নাই। কালবৈশাখীর ভীষণতা উপলব্ধি করিতে হইবে কেবল বাক্যের ঘনঘটায়, শব্দের ঝড়ে; অর্থাৎ ইহা বিশুদ্ধ Onomatopœia। নতুবা, ঝড়ের সঙ্গে শোনপাখীর তুলনা! আকাশজোড়া কালো মেঘ আর একটা বড় চিল!—তার চঞ্চু হইল বিদ্যুৎ! ছোটকে বড়র উপমান করিলে বড়ই ছোট হইয়া যায়; এরূপ কল্পনাকে সূস্থ বলা যায় না। আদিম যুগের কাব্যে এইরূপ উপমাই আমরা বেশি দেখিতে পাই, তাহাতে কবিকল্পনার শৈশব-সারল্য ও প্রাবল্যই প্রকাশ পায়; আধুনিক কবির পক্ষে সে কৈফিয়ৎ খাটে না।

এই কবিতার ভাষাও বিশেষভাবে অনুধাবনযোগ্য। অতি আধুনিক কাব্যে বাণীর বাণীত্ব নাই—ছন্দ অনাবশ্যক হইয়াছে সেই জগুই। এখানেও শব্দের ঝড় বহাইতে গিয়া কবি শব্দের মর্যাদা রক্ষা করিতে পারেন নাই। তাই ‘আধ-পোষা নাগ-দানবে’র ‘আধ-পোষা’ অভিপ্রেত অর্থ বহন করে না; ‘ডাল-পালা আলুথালু করে’র মত ইডিয়ম-বিরুদ্ধ প্রয়োগ আর্ষপ্রয়োগ হইয়া দাঁড়ায়। ‘অসংখ্য মানুষের লুপ্ত দেহ পুঞ্জিত তার ধূলায়’ এবং ‘বনের মৃদু মর্ম্মর উচ্ছ্বসিয়া উঠেছে অধীর কল কল্লোলে’—প্রভৃতিতে, আওয়াজের খাতিরে যেমন ‘ধুলো’র বদলে ‘ধূলায়’ লিখিতে বাধে নাই, তেমনই ‘উঠেছে’র সঙ্গে ‘উচ্ছ্বসিয়া’র মত সাধু ক্রিয়াপদ ব্যবহার করিতে কবি সঙ্কোচ বোধ করেন নাই। কোনখানে ‘আঁকড়ে’ আবার কোথায়ও ‘উপচিয়ে’ (‘উপ্চে’ নয়)—ভাষা সম্বন্ধে এতটা নিরঙ্কুশ কবি বোধ হয় পূর্বে কখনও হইতে পারেন নাই। ‘আতপ্ত দক্ষিণে-হাওয়া ছড়িয়ে দিয়েছে বিরহ মিলনের স্বগত প্রলাপ আত্মমুকুলের গন্ধে’—ইহা স্বগত প্রলাপ হইতে পারে, কিন্তু বাক্য নয়,—শব্দসমষ্টি মাত্র। রেখা ও রঙের জাল বোনা—চিত্ররচনা হইতে পারে, কিন্তু এইরূপ কথার জাল বোনাও কি কাব্যকলা? ‘তোমার স্বভাবের গর্ভ থেকে হঠাৎ বেরিয়ে আসে এঁকে বেকে’—বাংলার শ্রেষ্ঠ ভাষাশিল্পী রবীন্দ্রনাথের কাব্য-ভাষা কোথায় আসিয়া পৌঁছিয়াছে! ‘তার ক্রটির পূর্ণ মূল্য শোধ হয়েছে বিনাশে’, ‘সংখ্যা গণনার অতীত প্রত্যবে’,

‘জীবনের কোনও একটি ফলবান খণ্ড’—এ সকল শব্দযোজনা কি বাংলা? শব্দের ব্যুৎপত্তিগত অর্থও তিনি স্বীকার করেন না, অট্টহাস্তের স্থলে ‘অট্ট বিক্রপ’ শুনিতে নূতন, এবং সেজ্ঞ জোরালো বলিয়া মনে হয়; কিন্তু হাস্তের আওয়াজ আছে—বিক্রপের তো আওয়াজ নাই; তাহা হইলে ‘অট্ট-বিক্রপ’ হয় কেমন করিয়া? ‘বিক্রপ’ অর্থে নিশ্চয়ই ‘হাস্ত’ নয়! রচনার সব চেয়ে বড় দোষ—অকারণ বাগ্‌বাহুল্য, তাহাও ইহাতে আছে, যথা—

তোমার অযুত নিযুত বৎসর সূর্য প্রদক্ষিণের পথে

যে বিপুল নিমেষগুলি

উন্মীলিত নিমীলিত হ’তে থাকে

তারই এক ক্ষুদ্র অংশে কোনো এক আসনের

সত্য মূল্য যদি দিয়ে থাকি—

—ইহাতে ভূগোল গণিত ও জ্যোতিষ শাস্ত্র মিলিয়া কালকে ঘেরূপ অসীম করিয়া তুলিয়াছে, তাহা কাব্যরসের উপযোগী বটে; কিন্তু ‘বিপুল নিমেষের’ ক্ষুদ্র অংশ তো ক্ষুদ্র নয়, অন্তত দশ হাজার বৎসর হইবে। তার পর—‘আসনের সত্য মূল্য’; এই কবিতারই আর এক স্থানে আছে—‘ক্রটির পূর্ণ মূল্য শোধ হয়েছে বিনাশে’; এ ভাষা মূল্যবান বটে।

৪

রবীন্দ্রনাথ-রচিত ‘রিদ্মিক প্রোজ’-এর একটি বিশিষ্ট নমুনা এইরূপ। স্বীকার করি, ইহাতে একটা ধ্বনিশ্রোত রহিয়াছে,—এবং তাহা কাব্যচ্ছন্দকে বর্জন করিয়া। কিন্তু প্রশ্ন এই, ইহা কি কবিতা হইয়াছে? এই রচনায় আগাগোড়া একটা আতিশয্য বা জ্বরদস্তি—‘এফেক্ট্’-সৃষ্টির প্রাণপণ প্রয়াস—থাকাতে সত্যকার কাব্যপ্রেরণা কোথায়ও স্ফুর্তি পায় নাই। ইহাতে আছে কতকগুলি কথা, কথা, আর কথা। এমনতর কথা আরও সহজ ভঙ্গিতে, বিস্তৃত্তর ভাষায় লিপিবদ্ধ করিলে আরও সরল ও কৃত্রিমতাশূন্য হইত। রবীন্দ্রনাথের মত ভাবকের চিন্তাগভীর ভাবরাশি অর্থপূর্ণ হইবেই—অর্থগৌরবকে কাব্যগৌরব দান করিবার জন্য কতকগুলি কষ্টকল্পিত তাক্-লাগানো উপমার কোনও প্রয়োজনই ছিল না। এ সকল বস্তু যে কাব্যবস্তু নয়, তাহা রবীন্দ্রনাথ নিশ্চয়ই জানেন। ভাষা ও সাহিত্যের এই দুর্গতির দিনে কেবলমাত্র ভঙ্গিচাতুর্যের লোভে রবীন্দ্রনাথের মত

ঋষিকল্প রসস্রষ্টার এই আধুনিকত্বের মোহ কেন? বাংলা ভাষা ও ছন্দ লইয়া যে কারিগরি তিনি করিয়াছেন তাহা বাঙালীর স্বপ্নেরও অগোচর ছিল। অসামান্য গীতি-প্রতিভা বলে তিনি বাংলাভাষাকে রূপ-যৌবনের লাস্ত্রলীলায় উর্ধ্বশীর মতই মনোহারিণী করিয়াছেন। কিন্তু শেষ বয়সে যখন যৌবন-প্রতিভা আর নাই, তখন তাঁহার কাব্য-অঙ্গুরী রূপের পরিবর্তে অপ-রূপের সাধনা করিতেছে। ভাব-অর্থ-নিরপেক্ষ চিত্রকলার রেখা-লেখ-বিলাসের মত, অতিশয় তুচ্ছ ও সামান্য বস্তুকে—জীর্ণ ভাব ও জরাগ্রস্ত কল্পনাকে—কেবল ভঙ্গিমার সাহায্যে চিত্তাকর্ষক করিয়া তোলা কবিকর্ম্য নহে। এ সকল রচনায় যে ‘রিদ্ম’ আছে, তাহার কোনও বিশিষ্ট গৌরব নাই; টানা সহজ গঞ্জে সেটুকু অনায়াসে চলিতে পারে, তার জন্ত নূতন পংক্তি-প্রথার প্রয়োজন নাই। হসন্ত ও যুক্তবর্ণের স্খবিধা যতই থাকুক, বাংলা ভাষায় ‘রিদ্ম’কে শ্রুতিগম্য ও স্মৃতিশ্রাব্য করিতে হইলে, ছন্দের দৃঢ়বন্ধন চাই। মধুসূদনের অমিত্রাক্ষর ছন্দেই এই ‘রিদ্ম’-রহস্য প্রথম ধরা পড়িয়াছিল—এক দিকে যেমন যতিস্থাপনের স্বাধীনতা, অপর দিকে তেমনই পদ্যের পদবন্ধনকে স্বীকার করিয়া, তিনি বাংলা কাব্যে ‘রিদ্ম’-এর প্রতিষ্ঠা করিয়াছিলেন। রবীন্দ্রনাথ তাঁহার এই ‘পৃথিবী’ কবিতায় যাহা করিয়াছেন তাহা একটা *tour de force* বা ‘পালোয়ানী প্যাচ’ বলিয়া গণ্য হইতে পারে—তাহার অতিরিক্ত আর কিছু দাবী ইহার নাই।

রবীন্দ্রনাথ জন্ম-মৃত্যুর উদ্ধে, তাই একই জীবনে বহু জন্মের সাধনা তিনি করিলেন। এই জীবনেরই কোনও এক পূর্বজন্মে তিনি ভাষা ও ছন্দের যে সাধনা করিয়াছিলেন আজ তাহাকে পায়ের ধুলার মত ঝাড়িয়া ফেলিয়াছেন। একদিন তিনিই লিখিয়াছিলেন—

মানুষের ভাষাটুকু অর্থ দিয়ে বন্ধ চারিধারে,
ঘুরে মানুষের চতুর্দিকে। অবিরত রাত্রিদিন
মানবের প্রয়োজনে প্রাণ তার হয়ে আসে ক্ষীণ।
পরিষ্কট তবু তার সীমা দেয় ভাবের চরণে;
ধূলি ছাড়ি একেবারে উর্দ্ধমুখে অনন্ত গগনে
উড়িতে সে নাহি পারে সঙ্গীতের মতন স্বাধীন
মেলি’ দিয়া সপ্তম্বর সপ্তপক্ষ অর্থভারহীন।

মানবের জীর্ণ বাক্যে মোর ছন্দ দিবে নব সুর,
অর্থের বন্ধন হ'তে নিরে তারে বাবে কিছু দূর
ভাবের স্বাধীন লোকে, পক্ষবান অধরাজসম
উদ্যম স্তম্ভর গতি,—সে আশ্বাসে ভাসে চিত্ত মম ।

—সেদিনের সে আশ্বাস আজ আর নাই । পঞ্চাশোর্ধ্বে বনে যাইবার বিধি তিনি
অগ্রভাবে পালন করিতেছেন । বাংলা-সাহিত্যই অরণ্য হইয়া উঠিয়াছে, তিনি
সেই অরণ্যে পরমস্থখে বাস করিয়া তাহারই বৃদ্ধি সাধন করিতেছেন । আমরা
সেই অরণ্যে বৃথাই রোদন করিতেছি ।

[অগ্রহায়ণ ১৩৪৩ ।]

রবীন্দ্র-কাব্যের কবিপুরুষ

১

যতদূর মনে পড়ে, রবীন্দ্রনাথকে আমি প্রথম দেখিয়াছিলাম স্বদেশী-আন্দোলনের সময়ে—জাতির যুবশক্তির সেই বিরাট বোধন-যজ্ঞে, টাউন-হলের শিবাজী-উৎসব সভায়—নূতন সাম্রাজ্যের উদগাতারূপে ; সেদিন তিনি শিবাজীর উদ্দেশে রচিত তাঁহার বিখ্যাত কবিতাটি পাঠ করিয়াছিলেন । সেই সভায় যঁাহারা তাঁহার সেই মূর্ত্তি দেখিয়াছিলেন এবং সেই কণ্ঠের সেই আবৃত্তি শুনিয়াছিলেন, তাঁহাদের অনেকেই আজ আর ইহজগতে নাই ; থাকিলে স্মরণ করিবেন, সেদিন আমরা রবীন্দ্র-কবিপুরুষের কোন্ রূপ দেখিয়াছিলাম । রবীন্দ্রনাথের কবি-জীবনের মধ্যাহ্ন তখন অতীতপ্রায়, অথচ সে-যাবৎ উষা ও প্রভাতের রবিরশ্মি ত দূরের কথা—সেই মধ্যাহ্ন-পূর্ব প্রহরের ভাস্বর কিরণচ্ছটাও দেশবাসীর দৃষ্টি আকর্ষণ করে নাই ! তখন 'নৈবেদ্যে'র যুগও শেষ হইয়াছে ; তাহার অনেক পূর্বেই কবির জীবন-কুঞ্জে বসন্তের যৌবন-উৎসব প্রায় সমাধা হইয়া গিয়াছে, অথচ দেশের মধুব্রতগণ তাহার কোন সংবাদই রাখেন নাই । কবি যখন গাহিতেছিলেন—

আজি মোর জাঙ্কাকুঞ্জবনে
গুঞ্জে গুঞ্জে ধরিয়াছে ফল ।
বসন্তের ছরস্তু বাতাসে
নুয়ে বৃষ্টি নমিবে ভূতল,
রসভরে অসহ উচ্ছ্বাসে
গুঞ্জে গুঞ্জে ধরিয়াছে ফল ।

—তখন তাঁহার সেই গান কাহারও রসপিপাসাকে উতলা করে নাই । এত বড় কবির এমন নিঃসঙ্গ কবি-জীবন কেমন করিয়া সম্ভব হইল, এবং সেই প্রায় অবজ্ঞাত, আত্মপ্রত্যয় ও আত্মতৃপ্তিমাত্র-সম্বল সাহিত্য-সাধনায় তিনি যে কখনও কিছুমাত্র নিরুৎসাহ হন নাই—রবীন্দ্রনাথের কবি-প্রতিভা, ও কবিপ্রাণের স্বরূপ-নির্ণয়ে ইহা মনে রাখিবার প্রয়োজন আছে ; এই প্রসঙ্গে আমি, এক অল্পরূপ উপলক্ষে, রবীন্দ্রনাথেরই একটি উক্তি স্মরণ করিতেছি—

সহায়তা নাই, কৃতজ্ঞতা নাই, অনুকূলতা নাই, কেবল আপনার অন্তরের অপ্রতিরোধ্য ঐশ্বর্য ও উপবাস-সহিষ্ণু অকাতর অনুরাগে চিরজীবন একাকী কাজ করিয়া বাইতে হইবে।

—বঙ্কিমচন্দ্রের সম্বন্ধে রবীন্দ্রনাথ এই যে কথা বলিয়াছিলেন—তাঁহার নিজের জীবনে তাহা সম্ভব হইয়াছিল আরও একটা কারণে, আমি উপরে তাহারই আভাস দিয়াছি।

কিন্তু আমি যখন রবীন্দ্রনাথকে দেখিলাম তখন তিনি তাঁহার সেই নিভৃত নিঃসঙ্গ সাধনার আসন ত্যাগ করিয়া বাহিরে আসিয়া দাঁড়াইয়াছিলেন। তখন তিনি বঙ্কিমচন্দ্র ও বিবেকানন্দেরই উত্তরসাধকরূপে, সেই দুই মহাপুরুষের দ্বারা সৃষ্টি-কর্ষিত বাংলার যুবজন-মনোভূমিতে যে ভাব-বীজ বপন করিয়া তাহা হইতে যে আশু পুষ্পোদগম করাইতেছিলেন, তাহাতে আমাদের সকালের সেই আকাশ বাতাস ‘সুরার মত সুরভি’ হইয়া উঠিতেছিল—তাহাতেই রবীন্দ্রনাথের সহিত আমাদের প্রথম পরিচয়। কিন্তু সে পরিচয়ও রবীন্দ্রনাথের আসল পরিচয় নয়; তখন তাঁহার কবি-প্রাণে বাহির হইতে একটা বাতাস লাগিয়াছিল—তাঁহার সেই নিঃসঙ্গ নির্জনতার কূলে জনতার হৃদয়-তরঙ্গ আছাড়িয়া পড়িতেছিল। এইরূপ বিচলিত হওয়ার মূলে কবির নিজেরই অস্বস্তির দুইটি কারণ হয়তো ছিল। প্রথমটি—মহুষ্ণহৃদয়-সুলভ দুর্বলতা। সকল প্রতিবেশ-প্রভাব জয় করিয়া, দেশ ও কালের সকল অনিত্য প্ররোচনা অস্বীকার করিয়া, তিনি এক নিরুদ্দেশ সাধন-তীর্থের অভিমুখে চলিয়াছিলেন বটে—পথের পথ-সঙ্কট অপেক্ষা দূর দিগন্তবলয়ের রহস্য-সীমা তাঁহাকে অধিকতর আকুল করিত বটে, কিন্তু তিনি যে-দেশে যে-সমাজে জন্মিয়াছিলেন তাহার অশুচি অবস্থা তাঁহার আত্মমর্ষ্যাদাবোধে আঘাত করিত, তাঁহার সেই অতিশয় দৃষ্ট ও স্বতন্ত্র আত্মিক সাধনায় বিলম্ব ঘটাইত, বাংলার সেই নবজাগরণের যে ক্ষণে, এবং যে পরিবারে তাঁহার জন্ম হইয়াছিল তাহাতে তাঁহার ভাব-জীবনের স্বাভাবিক বোধ যতই প্রথর হোক, এ অস্বস্তি হইতে তাঁহার অব্যাহতি ছিল না। তাই যতদিন তাঁহার দেহে ও মনে যৌবনের পূর্ণ আধিপত্য ছিল, ততদিন তাঁহার চিন্তে সেই ব্যথা বাজিত; কখনও অধীর আক্ষেপে গাহিয়া উঠিতেন—

“ইহার চেয়ে হতেম যদি আরব বেহুইন!”

কখনও বা সবলে আত্মসংযম করিয়া মগ্ন-স্বরে গুঞ্জন করিতেন—

এখনো সময় নয় !

এখনো একাকী দীর্ঘ রজনী

জাগিতে হইবে পল গণি' গণি'

অনিমেব চোখে পূর্ব-গগনে

দেখিতে অরণোদয় ।

এই দুইটি কবিতাকেই তিনি পরে তাঁহার স্বনির্বাচিত কবিতা-সংগ্রহ হইতে বাদ দিয়াছিলেন ।

আর একটি যে অস্বস্তি, তাহা তাঁহার কবিচিত্তেরই বিবেক-দংশন । রবীন্দ্রনাথের কবিকল্পনা যেমন অতিশয় অস্তম্বী—আত্মভাবপরায়ণ, তেমনই, তাঁহার কবি-মানস অতিশয় আত্মসচেতন ছিল ; তাঁহার প্রকৃতিতে ভাবানুভূতির সূক্ষ্মতা ও তত্ত্বজ্ঞানের তীক্ষ্ণতা এই দুইএরই এক আশ্চর্য মিলন ঘটিয়াছিল । তাই নিজ কবি-স্বভাবের বশত যতই অলজ্ঞানীয় হোক, তিনি ইহাও জানিতেন যে, তাঁহার কাব্যলক্ষ্মী অস্তঃপুরচারিণী, আত্ম-বিহারিণী, উচ্চ-অবরোধবাসিনী ; তাহার বিচরণস্থান সাধারণ মানুষের সমাজ নয়, সে আপনার জন্ম একটি স্বতন্ত্র স্বপ্নলোক সৃজন করিয়া তাহার মধ্যে স্বেচ্ছাবন্দী হইয়া আছে । সেখানে সে আপনাকে আপনি প্রদক্ষিণ করিয়া যে গীত গাহিয়া থাকে, তাহাতে মানুষের হাসি-কান্নার ধ্বনি নাই—প্রতিধ্বনিমাত্র আছে ; তাহাতে মানুষের বাস্তব দেহ-দশার প্রতিই সেই সশ্রদ্ধ সহানুভূতি নাই, যাহা না থাকিলে কবিকেও অমানুষ হইতে হয় । ইহাই ভাবিয়া তিনি সময়ে সময়ে বড়ই লজ্জিত ও অনুতপ্ত বোধ করিতেন । তাই একবার বড় আক্ষেপ করিয়া লিখিয়াছিলেন—

এবার কিরাও মোরে, লয়ে যাও সংসারের তীরে
হে কল্পনে, রঙ্গময়ী, ছুলায়ো না সমীরে সমীরে
তরঙ্গে তরঙ্গে আর, ভুলায়ো না মোহিনী মায়ায় ।
বিজন বিবাদঘন অন্তরের নিকুঞ্জ ছায়ায়
রেখোনা বসারে !

*

সৃষ্টিছাড়া সৃষ্টিমাঝে বহুদিন করিয়াছি বাস
সঙ্গীহীন রাত্রিদিন, তাই মোর অপরূপ বেশ,
আচার নূতনতর, তাই মোর চক্ষে স্বপ্নাবেশ,

বন্ধে জলে মুখানল । যেদিন জপতে চলি আসি
 কেন মা আমারে দিলি শুধু এই খেলাবার বাণী ?
 বাজাতে বাজাতে তাই মুগ্ধ হয়ে আপনার সুরে
 দীর্ঘ দিন দীর্ঘ রাত্রি চলে গেল একান্ত হৃদয়ে
 ছাড়িয়ে সংসার-সীমা ।

কিন্তু সেদিনও এই আবেদনে একটা প্রবল আত্মধিকারমূলক বাসনাই ছিল, তাহার বেশী কিছু ছিল না। তখন তাঁহার কবি-স্বভাবেরই উন্মেষকাল, তাই লোকালয়ে ফিরিবার—জাতির জীবনে যুক্ত হইবার—আকুল উৎকর্ষার মধ্যেও, তিনি তাঁহার জরা ও যৌবন উভয়েরই সেই এক অধিষ্ঠাত্রী দেবীর—তাঁহার সেই দিব্যালোকবাসিনী কাব্য-লক্ষ্মীর ধ্যানেই শেষে সকল লজ্জা সকল আক্ষেপ নিবারণ করিয়াছিলেন ; তখনও তিনি গাহিলেন—

“হৃদ্বিনের অশ্রুজলধারা

মস্তকে পড়িবে ঝরি ; তারি মাঝে যাব অভিসারে
 তাঁর কাছে, জীবনসর্ব্বাধ-ধন অর্পিয়াছি যারে
 জন্ম জন্ম ধরি' ।— কে সে ? জানিনা কে, চিনি নাই তারে !
 শুধু এইটুকু জানি, তাঁরি লাগি রাত্রি অন্ধকারে
 চলেছে মানবযাত্রী, যুগ হতে যুগান্তর পানে
 বড় ঝঞ্জা বজ্রপাতে, জ্বালায়ে ধরিয়া সাবধানে
 অন্তর-প্রদীপখানি ।”

এই ‘অন্তর-প্রদীপখানি’র কথাই আজ আমি বলিতে বসিয়াছি ; রবীন্দ্রনাথ সে বিষয়ে—নিজের জীবনব্যাপী সেই সাধনার মূলমন্ত্র সম্বন্ধে—কখনও কোন কালে ভুল করেন নাই। কবি তাঁহার পূর্ণ যৌবনকালে, কবি-শক্তির উন্মেষের ক্ষণে, একটা স্ববিরোধী প্রেরণার প্রতিক্রিয়া-মুখে অনেকটা আবেশবিহ্বল অবস্থায় এই যে আত্মপরিচয় দিয়াছিলেন, তাহা যে কত সত্য তার প্রমাণ—এই কবিতার শেষ কয় পংক্তি আজ যখন আমরা পাঠ করি, তখন স্পষ্টই মনে হয়, কবিজীবনের সুদীর্ঘ সাধনার অবসানে, উহাই যেন রবীন্দ্রনাথের শেষ উক্তি—কবির সৃষ্টি-নীরব কণ্ঠধ্বনি এই শ্লোকগুলির মধ্যেই যেন এখনও শোনা যাইতেছে—

তারপর দীর্ঘ পথশেষে

জীবযাত্রা অবসানে ক্রান্তপদে রক্তসিক্ত বেশে

উত্তরিব একদিন আন্তিহারা শান্তির উদ্দেশে
 দুঃখহীন নিকেতনে । প্রসন্ন-বদনে মন হেসে
 পরাবে মহিমা-লক্ষ্মী ভক্তকণ্ঠে বরমালাখানি,
 করণম-গরণনে শান্ত হবে সর্ব দুঃখ গানি
 সর্ব অমঙ্গল । লুটাইয়া রক্তিম চরণতলে
 ধৌত করি দিব পদ আজন্মের রক্ত অশ্রুজলে ।
 সূচির-সঙ্কিত আশা সম্মুখে করিয়া উদঘাটন
 জীবনের অক্ষমতা কাঁদিয়া করিব নিবেদন,
 মাগিব অস্তিম ক্রমা । হয় ত' ঘুচিবে দুঃখ-নিশা,
 তৃপ্ত হবে এক প্রেমে জীবনের সর্ব প্রেম-ভূষা ।

—ইহারই সাধনা কবি সারাজীবন ধরিয়া করিয়াছিলেন ! সেদিন ও আজিকার মধ্যে মাত্র এইটুকু তফাৎ যে, কবির মনে শেষে আর কোন সংশয় ছিল না ; তিনি এইখানেই তাঁহার সাধনায় পূর্ণ সিদ্ধিলাভ করিয়াছিলেন—এই জীবনেই দেবী প্রসন্নবদনে ভক্তের কণ্ঠে বরমালা পরাইয়া দিয়াছিলেন । সেই কথাই পরে বলিব ।

২

আজ রবীন্দ্র-জীবনের দীর্ঘ যাত্রাশেষে, বিদায়কালীন তাঁহার সেই মূর্তির পাশে, আমার সেই প্রথম-দেখা মূর্তিটিকে স্মরণ করিতেছি । সেই যৌবন আর এই জরা—এই দুয়ের মধ্যে কোন ব্যবধান আছে ? কালের ব্যবধান আছে, ভাবেরও আছে কি ? আমরা জানি, তাঁহার কল্পনা নব নব ক্ষেত্রে প্রসারিত হইয়া সেই ব্যক্তিত্বকে বহুরূপী করিয়াছে । তথাপি সে কল্পনা কি চিরদিন ভাবের একটা ক্রমধ্য-বিন্দুতে সংবদ্ধ ছিল না ? রবীন্দ্রনাথ যখন অনতিকাল পরেই স্বদেশ ও স্বজাতির প্রতি-বিশেষ মমত্ব সংবরণ করিয়া নিৰ্কিশেষ মানবপ্রেমের সাধনায় অগ্রসর হইয়া চলিলেন, তখন কি তাঁহার কবিচিন্তে কোন ভাবাস্তর ঘটিয়াছিল ? ভাবে ভাষায় ছন্দে, রচনার নিত্য-নূতন আদর্শ-সঙ্কানে, তাঁহার কবি-মানস যে নিরন্তর বৈচিত্র্য কামনা করিয়াছে, তাহার মূলে কোথায় সেই ঐক্যমূত্র আছে যাহা আবিষ্কার করিতে না পারিলে রবীন্দ্রনাথের ব্যক্তিত্বের মত তাঁহার কবিধর্মও দুর্কোধ্য হইয়া পড়ে ? আমাদের দেশের পণ্ডিতেরা

প্রতিভাকে যে অর্থে নবনবোন্মেষশালিনী বলিয়া থাকেন, রবীন্দ্রনাথের প্রতিভা কেবল সেই অর্থেই নবনবোন্মেষশালিনী নহে ; কাব্যের অন্তরালে যে কবি-পুরুষ থাকে—রবীন্দ্র-কাব্যের সেই কবিপুরুষও যেন নিত্য নবীনরূপে আমাদের কাছে বিস্মিত ও চমকিত করিয়াছে। তথাপি রবীন্দ্র-কাব্য তথা সাহিত্যের ভিতরে দৃষ্টিপাত করিলে, এত রূপান্তর সত্ত্বেও, কবির একটি স্থির মূর্তির দর্শন লাভ দুর্বল হইবে না—যৌবন ও জরার মধ্যে কোন ব্যবধান আছে বলিয়া মনে হইবে না ; কিন্তু সে কোন্ দিকে, কোথায় ?

এ প্রশ্ন প্রায় কেহ করে না। রবীন্দ্রপ্রতিভার বহুমুখিতা, রবীন্দ্রসাহিত্যের বহুবিষয়িতার বিশ্বয়পূর্ণ আলোচনাই হইয়া থাকে ; তাহার সেই নানা ভাব ও নানা রূপের সমন্বয়-চেষ্টাও যেভাবে হইয়াছে তাহার মূলে আছে সেই এক কথা—‘বিশ্ব’ বা ‘ভূমা’ ; ইহাও আমরা শিখিয়াছি রবীন্দ্রনাথেরই মুখ হইতে, এবং তাহার যে-অর্থে আমরা সন্তুষ্ট হই, রবীন্দ্রসাহিত্যের ব্যাখ্যাকালে সে অর্থ আমাদের মনে থাকে না। তখন ভূমার যাহা সাক্ষাৎ-বিরোধী, সেই সকল তত্ত্ব ও মতবাদ তাহার উপরে—যেখানে যেমন প্রয়োজন—আরোপ করিয়া, আমরা সেই সাহিত্যের নানাভাই স্বীকার করি ; এক-এক জন এক-এক দিক দেখাইয়া অন্ধের হস্তীদর্শন সম্পন্ন করিয়া থাকেন। রবীন্দ্রনাথের কবিকীর্তি ও কবি-মানসের অতি নিপুণ দার্শনিক ব্যাখ্যাও আমরা শুনিয়াছি, তাহাতে তত্ত্বজ্ঞান লাভ হয় বটে, কিন্তু কাব্যরস উবিয়া যায়। রবীন্দ্রনাথ কোন দার্শনিক তত্ত্বের কবি-ভাষ্য রচনা করেন নাই ; তিনি কবি—কাব্য-রচনাই করিয়াছেন। কাব্যে কবিশিল্পীর পক্ষে রূপচর্চাই স্বাভাবিক, সেই রূপ-বৈচিত্র্যই আমাদের কাছে উপভোগ করিতে হইবে ; তাহার মধ্যে কোন ঐক্যতত্ত্বের সন্ধান করাই ভুল—‘একে’র সন্ধান তত্ত্বনিষ্ঠা কবির কাব্যপ্রেরণারও অনুরূপ নয়। রবীন্দ্রনাথের ‘এক’ কোন তত্ত্ব নয়, সে তাঁহারই ‘আমি’—যে-আমি বাহিরের এই বস্তু-বিশ্ব বা জীবন-দৃশ্যকে জ্ঞানের বিষয় করে নাই, রসান্বাদনের বিষয় করিয়াছে মাত্র। তাহার নিকটে আত্মজ্ঞান ভিন্ন আর কোন জ্ঞানের প্রয়োজন নাই—এবং সে জ্ঞানও আনন্দের আত্মপ্রত্যয়, কোন স্থায় বা নীতির—কোন নিয়তি-নিয়মের সংস্কারই তাহাতে নাই। তাই সে সাহিত্যের যত-কিছু জটিলতা ও বৈচিত্র্য, সে জীবনের যত কিছু প্রয়াস-প্রচেষ্টা, সে চিন্তের যত কিছু ভাবান্তর—সকলই একটি অন্তঃস্থির দীপশিখার অস্থির রশ্মি-বিকিরণ

বলিয়া মনে করিতে হইবে; ভিতরে ভাবস্থির আত্মোপলব্ধির আনন্দ, উপরে রূপ-চঞ্চল মানস-রশ্মিপ্রবাহ। রবীন্দ্র-কাব্যের মূল প্রেরণা—এই ভাব ও রূপের সম্মতি-সাধন; সেজন্ত তাঁহার কবিচিত্ত যেমন আকুল আগ্রহে সর্ববিধ বিরোধ ও বৈচিত্র্যকে বরণ করিয়াছে, তেমনই, সারাজীবন ধরিয়া কবি যে সাধনা করিয়াছেন তাহা এই বিরোধকে—এই বেস্বরাকে—বশ করিবার জন্ত। বিরোধ থাকুক, তাহাকে মানিব না—এই যাহার সাধন-মন্ত্র, তাহার জীবনে ও তাহার কাব্যে কোনরূপ বিরোধকে গ্রাহ্য করিবার লক্ষণ যে থাকিবে না, ইহাতে আশ্চর্য্য হইবার কিছুই নাই। কবির সব-চেয়ে বড় আশ্বাস এই যে—বাহিরের এই নানা রঙের নানা রূপের যে বসনখানি তিনি একদা গানের সুরে রচনা করিয়া তাঁহার মনের সজ্জা-সাধ মিটাইয়াছিলেন, তাহাও শেষে আর থাকিবে না—

এই আবরণ ক্ষয় হবে গো ক্ষয় হবে,

এ দেহ-মন ভূমানন্দময় হবে।

* * *

বাসনা তার ছড়িয়ে গিয়ে লয় হবে।

উপরে যাহা বলিলাম তাহাও তত্ত্বকথার মত হইল; উপায় নাই। যাহা উপলব্ধির বস্তু, যাহা অপরোক্ষ করিবার বিষয়—সজ্জান মনের জিজ্ঞাসায় যে স্বন্দের অবসান নাই, সে স্বন্দ-নিরসনের চেষ্টাই বৃথা। কবির উৎকৃষ্ট রসচৈতন্যে যাহা নির্বন্দ হইয়া—অর্থাৎ সকল যুক্তি, সকল নীতি-নিয়ম বা ব্যবহারিক সত্যনিষ্ঠার দায় হইতে মুক্ত হইয়া—কেবল অস্তিত্বমাত্রের আনন্দস্বাদ হইয়া বিরাজ করিতেছে, তাহাকে বুঝাইবার ভাষা নাই, বুঝাইতে গেলেই তাহা আর একরূপ হইয়া দাঁড়াইবে। রবীন্দ্র-কাব্যের অন্তরালে যে কবি-পুরুষ রহিয়াছে—যে আপনাকে সেই কাব্যের রূপ-দর্পণে শত ইঙ্গিতে সহস্র ভঙ্গিতে প্রকাশ করিয়াছে, তাহাকেই অপরোক্ষ করিতে হইবে; এবং সেই অপরোক্ষ করার একমাত্র উপায়—সকল দার্শনিক মতবাদ, সামাজিক নীতি বা রাষ্ট্রীয় মঙ্গল-অমঙ্গল সংস্কার মন হইতে দূর করিয়া, রবীন্দ্রকাব্যের মূল সুরটি বার বার কাণ পাতিয়া শোনা—প্রাণ মনকে অতিশয় ঋজু করিয়া সেই সুরের মুখে স্থাপন করা। রবীন্দ্রনাথ যে বিপুল ও বিচিত্র বাণী-হর্ম্য নির্মাণ করিয়াছেন তাহার সকল কক্ষ পার হইয়া সেই একটি কক্ষে উপনীত হইতে হইবে—যেখানে কবি তাঁহার মনের সকল অভিমান ও

ঐশ্বর্য্য মোচন করিয়া নিভূতে আপন হৃদয়-লক্ষীর সহিত কেবলমাত্র স্বরের কটাকট বিনিময় করিতেছেন। অথবা, এমন স্থানে এমন অবস্থায় কবির সহিত সাক্ষাৎ করিতে হইবে, যখন কবির মুখেই শুনিতে পাইব—

এবার মোর মকরচূড় মুকুট নাহি মাখে,
ধনুক-বাণ নাহি আমার হাতে,
—এনেছি শুধু বীণা,
দেখ তো চেয়ে আনারে তুমি চিনিতে পার কি না।

৩

রবীন্দ্রসাহিত্য একটি বহুরূপময় বিচিত্র শিল্পসত্তার, তাহাতে নব নব রেখা ও বর্ণবিজ্ঞাসের অন্ত নাই। সেই বর্ণ ও রেখার বুনানীতে মানবমানসের অতি সূক্ষ্ম উৎকর্ষা এবং সূক্ষ্মতর ইন্দ্রিয়ানুভূতির ইন্দ্রজাল ভাষা ও ছন্দের অপূর্ব কৌশলে যে রূপ পরিগ্রহ করিয়াছে, তাহাও মুখ্যত ভাবাত্মক—সেই ভাষা ও সেই ছন্দ রূপকে বরণ করিয়াও অপরূপেরই আরাধনা করে। রবীন্দ্রনাথের কবিচিত্ত বা কাব্যপ্রেরণা এতই অভিনব, এতই অনন্যসাধারণ—যে, কোন পূর্বপ্রতিষ্ঠিত সুপরিচিত সাহিত্যিক আদর্শে তাহার বিচার, পরিচয়, বা উৎকর্ষ-প্রমাণ সম্ভব নয়। এ সাহিত্যে ব্যক্তি-সত্তার যে একটি অদ্ভুত প্রকাশ ঘটিয়াছে, যে ব্যক্তি-স্বাতন্ত্র্য-মন্ত্রের সাধনা ইহাতে প্রতিফলিত হইয়াছে—আমাদের দেশে সে সাধনা নূতন নয়, কিন্তু তাহার ক্ষেত্র সম্পূর্ণ স্বতন্ত্র। যে সাধনা দেশকালকে অতিক্রম করিবার সাধনা—তাহা কখনও এমন করিয়া দেশ-কালের অবিরাম চলচ্চিত্র-ছায়াকে কাব্যের প্রেক্ষাপটে প্রক্ষিপ্ত করিয়া এমনতর সিদ্ধিলাভ করে নাই। ভারতীয় সাধনার যে বিশিষ্ট ধারায়—যে বহুভাবজটিল ঐতিহ্যের গভীর গহনে—ইহার মূল নিহিত আছে, তাহা হইতেও পূর্বে এ জাতীয় কবিপ্রতিভার উদ্ভব হয় নাই, ইহাই বোধ হয় এ প্রতিভার আধুনিকত্ব। আজ সেই নিঃসঙ্গ নির্জন সাধনার গুহা-প্রাচীর ভাঙ্গিয়া পড়িয়াছে; জগৎ ও জীবনকে অন্তরালে রাখিয়া—কালকে অগ্রাহ করিয়া—কেবল সর্বরূপরাগবর্জিত শাস্ত্রের ধ্যানে বসিলে শাস্ত্রকেই যেন সর্বস্পর্শ হইতে বাঁচাইয়া তাহার প্রাণরক্ষার চেষ্টা করা হয়। একালে জীবন-চেতনা এতই বাড়িয়াছে, জগৎ-দৃশ্য মানুষের মনকে এত দিক দিয়া এত

ভাবের আক্রমণ করিয়াছে যে, অনিত্যের আফালনে সেই নিত্যের আসন টলিয়াছে। তাই আজ সেই শাস্ত-পন্থী ভারতের আত্মাই যেন রূপের আসরে অরূপকে নামাইয়া আপনার সঙ্গে নূতন করিয়া বোঝাপড়া করিবার জন্ত কাব্যকেই সাধন-পন্থা করিতে বাধ্য হইয়াছে। রবীন্দ্রনাথের কাব্যসাধনা এক অর্থে যেমন প্রাচীন, আর এক অর্থে তেমনই আধুনিক ; সেই প্রাচীন উৎস হইতেই যে ধারা কাব্যরূপে প্রবাহিত হইয়াছে, তাহাতে আধুনিক জীবনের তটচ্ছায়া ও আধুনিক মানসের খরসূর্যালোকিত আকাশ—দুই-ই পূর্ণ-প্রতিবিম্বিত হইয়াছে। তথাপি সেই ছায়া তাহার বৃকের উর্দ্ধশোভা বৃদ্ধি করে, পথের উপল-রাশি তাহাকে গীতিমুখর করে মাত্র ; আকাশের সেই সূর্য্যকর তাহার অন্তরের শীতলতাকে আরও মধুর করিয়া তোলে। দেশ ও কালের প্ররোচনা সে কোথাও রোধ করে নাই, কিন্তু তাহার প্রভাবকেও সে এড়াইয়া গিয়াছে। সে স্রোত আপনার গতিবেগেই আপনি মুগ্ধ, আপনাতেই আপনি তৃপ্ত। তাহার আত্মার সেই আনন্দময় নিত্যসত্তা—অস্তিত্বের সেই কালবিজয়ী নিশ্চল স্রোত-ধারা—কোন চিহ্ন কোন কলঙ্ক কখনও ধারণ করে না ; কিছুই তাহাকে বাধিতে পারে না, কারণ তাহার নিকটে সকল বন্ধনই লীলাচ্ছলে আত্মসমর্পণ ; আপনাকে মুগ্ধ করিবার জন্ত আপনার দ্বারাই মোহসৃষ্টি।—

আমারে বাধবি তোরা সেই বাধন কি

তোদের আছে ?

আমি যে বন্দী হ'তে সন্ধি করি

সবার কাছে ॥

আমারে ধরবি বলে মিথ্যা সাধা,

আমি যে নিজের কাছে নিজের গানের সুরে বাধা,

কেবলি এড়িয়ে-চলার ছন্দে তাহার

রক্ত নাচে ॥

অতএব রবীন্দ্র-কাব্যের একেবারে মূলে—প্রাচীন বা আধুনিক, বিগত বা বর্তমান মানব-সংসারের কোন নিয়তি-নিয়মের প্রেরণা নাই, কোন প্রয়োজন-চেতনাই নাই। ইহার নিজস্ব মূল্য যেমন সংসার সমাজ বা রাষ্ট্রঘটিত কোন ভাবনা—কোন ইজ্জৎ (-ism)-এর দ্বারা যাচাই করিয়া লইবার নয়, তেমনই, প্রত্যক্ষ-প্রয়োজনহীন মানবজীবন সম্বন্ধে কোন আদর্শের প্রতিষ্ঠাও ইহার দ্বারা সম্ভব

হইবে না। রবীন্দ্রনাথ নামক একটি ব্যক্তিকে আশ্রয় করিয়া মানবচৈতন্যের যে এক প্রকাশ সাহিত্যে ঘটিয়াছে, সাহিত্যের ইতিহাসে তেমনটি আর ইতিপূর্বে ঘটে নাই। কিন্তু ভাষায় ছন্দে যাহা কখনও এমন রূপময় হইয়া উঠে নাই, মানব-চৈতন্যের সেই নিগূঢ় উপলব্ধি—দূর প্রান্তরপারের অপরূপ গোধূলি-আলোর মত, কত মৌনী সাধকের নিঃসঙ্গ সাধনায় ক্ষণে ক্ষণে চমকিয়া উঠিয়াছে। এককাল পরে ভারতবর্ষে এমন এক কবির উদয় হইয়াছে, যিনি সেই সঙ্ক্যাকালের নিত্য-বিলীয়মান আলোকচ্ছটাকে ধরণীতলের সর্বত্র, এবং দিবালোকের সকল প্রহরে ব্যাপ্ত ও দীপ্ত করিয়াছেন; সেই আলোর সেই আভাটিকে, সেই স্থির নিস্পন্দ শাস্ত জ্যোতিকে, তিনি মধ্যাহ্নের খর-ঝঙ্কার আলোক-বীণায় স্পন্দিত করিয়াছেন।

কিন্তু ইহা সম্ভব হয় কেমন করিয়া? মৌন এমন মুখর, গূঢ় এমন প্রকাশ হয় কেমন করিয়া? আমরা জানি, যাহা প্রকাশ তাহাই সাহিত্য—তাহাই কাব্য, তাহাই সৃষ্টি; কবির আত্ম-দর্পণে বাহিরের রূপের যে ছায়া পড়ে তাহাকেই নূতন কাব্য দান করা কবির কাজ। সেই ছায়ার সহিত কবির মনের মায়া জড়িত হইয়া যাহার সৃষ্টি হয় তাহাই বাণীর আকারে একটি নূতন কাব্য; কিন্তু যতই নূতন হউক, তাহা ঐ বাহিরের কাব্যরই একটা প্রতিক্রম। কাব্যসৃষ্টিতে ইহাই কবিকল্পনার কাজ—বিশেষত, গীতি-কবিতায়। কিন্তু এ কবির কল্পনা আরও স্বরাট, আরও স্ব-তন্ত্র; আমি রবীন্দ্র-কাব্যের মূল-প্রকৃতির কথাই বলিতেছি। এখানে কাব্য অর্থে, কবির চিত্তফলকে প্রতিবিস্তৃত ও রূপান্তরিত—জগতেরই একটা প্রতিচ্ছায়া নয়; এ যেন বহিঃসৃষ্টির আধারে কবিরই আত্মার বিসৃষ্টি, বা প্রক্ষেপ। ভিতরে যে ‘আমি’, বাহিরেও সেই ‘আমি’; এক ‘আমি’ যেন দুই ভাগ হইয়া আপনাকেই আপনি—একটি মধুর চলনা বা লীলার সাহায্যে—উপভোগ করিতেছে! কেবল এই উপভোগ করাটাই কিন্তু কবির কাজ নয়; তেমন কাজ অনেক সাধক, অনেক তত্ত্বরস-রসিক (Mystic) করিয়াছেন ও করিবেন। সেই উপভোগের আনন্দকে বাণীর সাহায্যে আমাদিগের অন্তরগোচর করাই কবির কাজ—এবং গানের সুরে তাহাকে মূর্তিমান করিয়া তোলা গীতি-কবির চরম সিদ্ধিলাভ। সমগ্র রবীন্দ্র-কাব্যই এইরূপ গান, রবীন্দ্রনাথের কবিপ্রতিভা শুধুই ‘নিরিক’ বা গীতিধর্মী নয়—আরও গভীরতর অর্থে সঙ্গীতাত্মক। কবি-কল্পনার এই প্রবৃত্তি ও পরিণতির

মূলে ভারতীয় ভাব-সাধনার রীতিকে রূপে বিস্তারিত, তাহাতে সন্দেহ নাই। কিন্তু যে অল্পভূতি অরূপের অল্পভূতি, তাহাই এককাল পরে ভাষায় এমন রূপ পাইয়াছে; যাহা বাক্যবিরহিত, যাহা একক, স্থির, অল্পভেল, তাহাই এমন বহু-বিচিত্র, চঞ্চল, পরিবর্তমান প্রবাহের রূপ ধারণ করিয়াছে—রূপের সহিত অরূপের এক অপূর্ণ সম্বন্ধ স্থাপিত হইয়াছে। রবীন্দ্র-কাব্যে এই অঘটন সংঘটনের কথা আমি পূর্বে বলিয়াছি; ইহা যে কেমন করিয়া সম্ভব হয়, সে প্রশ্ন অবাস্তব; কারণ, যাহা রহস্য তাহাই কাব্যে যখন রস-রূপ ধারণ করে, তখন আর কোন প্রশ্নই থাকে না—জিজ্ঞাসায় যাহা পরোক, আন্বাদনে তাহা অপরোক হয়। তখন কবির ভিতরকার সেই ‘আমি’ এই রহস্যের স্বপ্রাবেশে গাহিয়া উঠে—

হৃদয় আমার প্রকাশ হ'ল
অনন্ত আকাশে,
বেদন-বাণী উঠল বেজে
বাতাসে বাতাসে।

এই যে আলোর আকুলতা
আমারি এ আপন কথা,
উদাস হ'য়ে প্রাণে আমার
আবার ফিরে আসে।

আবার—

যে-আমি ঐ ভেসে চলে
কালের চেটেয়ে আকাশতলে
ওরি পানে দেখছি আমি চেয়ে।
ও-যে সদাই বাইরে আছে
হৃৎখে হৃৎখে নিত্য নাচে
চেউ দিয়ে যায়, দোলে যে চেউ গেয়ে।
একটু ক্ষয়ে ক্ষতি লাগে
একটু ঘরে ক্ষত জাগে
ওরি পানে দেখছি আমি চেয়ে।
যে-আমি যায় কেঁদে হেসে
তাল দিতেছে হৃদয়ে সে
অন্ত আমি উঠতেছি গান গেয়ে।

কিন্তু তবু—

এই-বে আমি ঐ আমি নই

আপন রাবে আপনি যে রই,

যাইনে ভেসে মরণধারা বেয়ে

মুক্ত আমি, তৃপ্ত আমি,

শান্ত আমি, দীপ্ত আমি,

ওরি পানে দেখছি আমি চেয়ে ॥

—এই দুই আমি তত্ত্বও অতি পুরাতন, ইহাই শ্রুতির সেই—“দ্বা সুপর্ণা সযুজা সখায়া—দুইটি সুন্দর পক্ষী, দুই সখা, পাশাপাশি একই বৃক্ষে বসতি করে ; তাহাদের একজন স্বাদু পিঙ্গল-ফল ভক্ষণ করে, আর একজন নিজে না খাইয়া অপরের পানে চাহিয়া থাকে” । রবীন্দ্রনাথের মধ্যে সেই দুই-আমির আরও নিকট সহযোগিতা ঘটিয়াছে, তাই তিনি ঋষি না হইয়া কবি । এখানেও সেই দেখা আছে বটে, কিন্তু সেই দেখা ভোগ-সম্পর্কশূন্য নয়—সেই দেখারই আনন্দে অপর ‘আমি’-পার্থীটি গানে গানে দিগ্‌মণ্ডল প্রাবিত করিয়াছে ।

৪

রবীন্দ্র-কাব্যের অন্তরালে এই যে কবিপুরুষ—ইহার সংজ্ঞা কি ? ইহা কি আমাদের সাধারণ অর্থের সেই Personality ? এই দুই আমির লুকা-চুরির মধ্যে কোন্ ব্যক্তি-আমি স্পষ্ট হইয়া উঠে ? Personality-র যে ব্যক্তিত্ব সেই ব্যক্তিত্ব রবীন্দ্রনাথের ব্যক্তিজীবনে নিশ্চয়ই একটা আছে ; কিন্তু তাহাকে সম্পূর্ণ ছাপাইয়া যে কবি-ব্যক্তি—যাহাকে আমি কবি-পুরুষ বলিয়াছি—তাঁহার কাব্যের মর্ম্মমূলে আত্মপ্রকাশ করিয়াছে, এবং যাহা মানুষটি হইতে পৃথক একটি কবি-অভিমান মাত্র নয় (কারণ, রবীন্দ্রনাথের কাব্য-সাধনা তাঁহার জীবন-সাধনা হইতে স্বতন্ত্র নয়) কবির সেই যে অন্তরঙ্গ সত্তাকে আমরা তাঁহার কাব্যের আদি হইতে অন্ত পর্য্যন্ত সর্বত্র অনুভব করি, তাহাকে কোন্ সাইকলজির দ্বারা চিনিয়া লওয়া যায় ? সেই দুই ‘আমি’র মিলনক্ষেত্রস্বরূপ এই যে এক ব্যক্তি-চৈতন্য—এখানে এক আমি সর্বদা আর-এক আমির মধ্যে নিজেকে মিলাইয়া বিলাইয়া দেয়, ব্যক্তি আপনাকে অস্বীকার করিয়াই আপন ব্যক্তিত্বের ঘোষণা

করে। দুই-আমির এই স্বপ্নে মিলন ও বিরহ একই কালে নিরবচ্ছিন্ন হইয়া আছে। রবীন্দ্রনাথের 'জীবন-দেবতা'র ধ্যানেও যে ব্যক্তিগত অভিমান আছে— পরমুহূর্ত্তেই তাহা বিশ্বদেবতার ধ্যানে লয় পায়—

আমার বেলা যে যায় সাঁঝ-বেলাতে
তোমার হুরে হুর মেলাতে ॥
আমার একতারাটির এই তারে
 গানের বেদন বইতে নারে,
 তোমার সাথে বারে বারে
 হার মেনেছি এই খেলাতে ।

—একথা তিনি বার বার বলিয়াও শেষ করিতে পারেন নাই।—

বিশ-হৃদয় হ'তে ধাওয়া
প্রাণে পাগল গানের হাওয়া ;
সেই হাওয়াতে হৃদয় আমার
 হুইয়ে দাও ॥

কবির কবিতা যখন একেবারে গান হইয়া উঠে নাই—যখন ইন্দ্রিয়-যন্ত্রে সেই ব্যক্তি-আমি আরও ঘন রূপ-রস পান করিতেছে, তখনও কবির সেই এক কথা—

দেহে আর মনে প্রাণে হ'য়ে একাকার
একি অপক্লপ লীলা এ অঙ্গে আমার ॥
 ...একি বিচিত্র বিশাল
অবিশ্রাম রচিত্তেছে সৃজনের জাল
আমার ইন্দ্রিয়-যন্ত্রে ইন্দ্রজালবৎ ।...
তোমার মিলন-শয্যা, হে মোর রাজন,
ক্লম্ব এ আমার মাঝে অনন্ত আসন
অসীম বিচিত্রকান্ত । ওগো বিশ্বভূপ,
দেহ মনে প্রাণে আমি এ কী অপক্লপ ।

—এই যে 'আমি', ইহার ব্যক্তিত্বকে কোনও মনস্তত্ত্ব বা মানবীয় জ্ঞানবুদ্ধির জাল ফেলিয়া ধরা যাইবে না ।

অথচ রবীন্দ্রনাথ মিষ্টিকও নহেন—মিষ্টিক হইলে, তাঁহার কবিতাই নিষ্ফল

হইত ; যাহা কখনও কাব্যে ধরা দেয় নাই তিনি যে তাহাকেই কাব্যে এমন করিয়া ধরিয়া দিয়াছেন, ইহাই ত' রবীন্দ্র-প্রতিভার অননুসাধারণ গৌরব। রবীন্দ্রনাথ জ্ঞানকে এতটুকু কোথাও আবৃত হইতে দেন নাই ; তাহার সাধনা অতিশয় আত্ম-সচেতন একথা পূর্বে বলিয়াছি, চোখ বুঁজিয়া নয়—

অপরূপকে দেখে গেলেম দুইটি নয়ন মেলে—

পরশ যারে যার না করা সকল দেহে দিলেন ধরা ।

—বহিরিঙ্গিয় রুদ্ধ করিয়া কোন অচেতন-চেতনায় পাওয়া নয়, 'দুইটি নয়ন মেলে' এবং 'সকল দেহে' তিনি সেই পরম বস্তুকে প্রত্যক্ষ করিয়া ধন্য হইতে চান। ইহার মূলে যে আত্মজ্ঞানের আনন্দ আছে—সে জ্ঞানের সাধনা করিতে হইলে মনের সকল ছয়ার খুলিয়া জগৎকে প্রবেশের অধিকার দিতে হয়। এই সদা-জাগ্রত চেতনার বিরাম নাই, তাই ইহা মিষ্টিকের সাধনা নয়—

আপনাকে এই জানা আমার

ফুরাবে না,

এই জানারই সঙ্গে সঙ্গে

তোমায় চেনা ।

আমারে যে নামতে হবে

ঘাটে ঘাটে,

বারে বারে এই ভুবনের

প্রাণের হাটে,

ব্যবসা মোর তোমার সাথে

চলবে বেড়ে দিনে রাতে,

আপনা নিয়ে করব যবে

বেচা-কেনা ॥

রবীন্দ্র-কাব্যের অন্তরালে যে কবিপুরুষ আছে, তাহার কিঞ্চিৎ পরিচয় দিবার চেষ্টা করিলাম ; ইহা হইতেই, রবীন্দ্র-কাব্য বা রবীন্দ্র-সাহিত্যের যাহা সৃষ্টি-অংশ তাহার আদর্শ ও প্রেরণা সম্বন্ধে একটা সঠিক ধারণা সম্ভব হইবে। এখানে সে আলোচনার অবকাশ নাই, আমি কেবল সংক্ষেপে দুই চারিটি কথা বলিব। রবীন্দ্র-সাহিত্যের বিচার অণু কোন সাহিত্যের মাপকাঠিতে করা সম্ভবও নয়, সম্ভবও নয় ; তাহা এমনই অননুসাধারণ যে, তাহার জন্ম সাহিত্যের একটি নূতন

সংস্কার নির্মাণ করিতে হয়। প্রচলিত আদর্শে যাচাই করিলে, তাহার বিকল্পে যে সকল অভিযোগ উত্থত হইয়া আছে, তাহার অনেকখানিই স্বীকার করিতে হয়। আমি ইতিপূর্বে নানা প্রবন্ধে ও নানা প্রসঙ্গে সেদিকে দৃষ্টি আকর্ষণ করিয়াছি। এ প্রসঙ্গেও সেই দুই-‘আমি’র তত্ত্ব কাজে লাগিবে। জগৎ-দৃশ্যের একান্ত সম্মুখীন সুখ-দুঃখের ভোক্তা যে ‘আমি’, সাহিত্যে আমরা তাহার যে-রূপ দেখিতে পাই—রবীন্দ্র-কাব্যেও চেউয়ের দোলায় দোল-খাওয়া সেই ‘আমি’র সকল উৎকর্ষা অপূর্ব সৌন্দর্য ও সুষমায় বিচিত্রিত হইয়াছে। কিন্তু তথাপি, সুখ-দুঃখের সেই তরঙ্গরাজির কলরোল নয়, তাহার মধ্যে যে ‘মৃদঙ্গ-তাল’ আছে, কবি তাহারই সহিত তাঁহার গানের সুর মিলাইয়াছেন; ভোক্তা নয়—দ্রষ্টা যে ‘আমি’, তাহারই রস-দৃষ্টি সে সাহিত্যে মানুষের জীবনকে ভিন্নতর ভাবভূমিতে তুলিয়া ধরিয়াছে। এ সাহিত্য, মানুষের প্রকৃতিগত যে জীবন-চেতনা তাহাকেই গভীর করিয়া তোলে না, সেই দেহগত আকৃতিকেই একটি গভীরতর প্রাণধর্মের মহিমা-বোধে চরিতার্থ করে না। ইহার কাজ স্বতন্ত্র; ইহা মানুষের মনকে মুক্ত করে, ক্ষুধাকে শান্ত ও সংযত করে, সুখ-দুঃখবোধকে বহিমুখী না করিয়া আত্মানুভূতির সহায় করিয়া তোলে; অতি তুচ্ছকেও দুর্লভতার আসনে বসাইয়া জড়ের উপরে চিং-এর জয় ঘোষণা করে। সর্বোপরি, ইহা মানুষকে এমন একটি মস্ত্রে দীক্ষিত করে যাহাতে, এই জগৎ—এই মানুষের মেলা—একটি পরম-সুন্দর পরম-পবিত্র তীর্থ বলিয়া মনে হয়। এইজন্য, অপর সাহিত্যকে যদি ‘Literature of Power’ বা প্রাণমূলে শক্তিস্ফুরণের সাহিত্য বলা সঙ্গত হয়, তবে রবীন্দ্র-সাহিত্যকে এই অর্থে ‘Literature of Culture’ বলা যাইতে পারে যে, তাহা কোনরূপ শক্তি নয়—একটি সূক্ষ্ম রসবোধের দ্বারাই চিত্তের এমন উৎকর্ষ সাধন করে যে, আকাশের মতই তাহা মুক্ত ও প্রসারিত হয়; নদীর মত, তটের শাসন মানিয়াই গভীর ও বেগবান হয় না।

এই প্রসঙ্গে আরও একটি কথা উল্লেখ করিব। রবীন্দ্র-সাহিত্যের প্রেরণা যে একান্ত ভারতীয় তাহাতে যেমন সন্দেহ নাই, তেমনই, বাঙালী ভিন্ন আর কোন কবির পক্ষে ঐরূপ কাব্য-সাধনা যে সম্ভব হইত না, ইহাও অতিশয় সত্য; ইহা জাতিগত অভিমান বা অবুঝ গর্বের কথা নয়; বাঙালী-জাতির ইতিহাস, তাহার ঐতিহ্য ও সংস্কৃতি সম্বন্ধে একটু জ্ঞান যাহার আছে, তিনিই আমার ঐ

উক্তির মর্ম গ্রহণ করিতে পারিবেন,—যিনি সে তত্ত্ব অবগত আছেন তিনিই রবীন্দ্র-কাব্য ও তাহার অন্তর্কর্তা কবিপুরুষকে উত্তমরূপে বুঝিতে ও বুঝাইতে পারিবেন ; নতুবা, কেবল ‘বিশ্বকবি’ বলিয়াই অভিহিত করিলে রবীন্দ্র-প্রতিভার যথার্থ পরিচয়ে বাধা ঘটিবারই সম্ভাবনা।

৫

আমি রবীন্দ্রনাথের বহিজীবনের যে রূপ প্রথম দেখিয়াছিলাম, এ আলোচনার আরম্ভে তাহারই উল্লেখ করিয়াছি ; এক্ষণে পুনরায় তাহার কথা কিছু বলিয়া এ প্রসঙ্গ শেষ করিব। সেই প্রথম দেখার পরে রবীন্দ্রনাথকে অতি নিকটে ও দূর হইতে দেখিবার বহু সুযোগ আমার হইয়াছিল ; কিন্তু আমি তাঁহার সেদিনের সেই রূপই আজ বিশেষ করিয়া স্মরণ করিতেছি। তার কারণ, রবীন্দ্রনাথের দেহে পরিণত যৌবনের সেই দীপ্তি উত্তরকালে ম্লান হইয়া আসিলেও, তাঁহার মন সেই দীপ্তির পরিচয় শেষ পর্যন্ত বহন করিয়াছে। সে দিনের রবীন্দ্রনাথ স্বদেশের—বাংলার ও ভারতের—রবীন্দ্রনাথ ; তখন তিনি জাতীয়-শিক্ষা-পরিষৎ (National Council of Education)-এর একজন প্রধান কর্মী ; পরে তিনি বিশ্বমানব ও বিশ্ব-ভারতীর রবীন্দ্রনাথরূপে দেখা দিয়াছিলেন। তথাপি আমার মনে হয়, এ দুই-এর মধ্যে যাহা কিছু পার্থক্য তাহা তাঁহার সেই যৌবন, এবং যৌবন-অতিক্রমের পার্থক্য মাত্র ; একটিতে প্রাণের বন্ধন-মোচনের উৎসব, অপরটিতে সেই প্রাণকে বাঁধিয়া ক্ষতিভয়গ্রস্ত মনের সঙ্কল্প-কামনা। কিন্তু দুইটিতেই, ‘এবার ফিরাও মোরে’—কবির সেই আর্ন্ত আবেদন সমান নিষ্ফল হইয়াছে, ভাবে বা কর্মে—কোথাও তাহা বস্তুর বাস্তবতাকে বরণ করিতে পারে নাই। অতএব, দুইই যখন এক, তখন আমি কবির সেই পূর্বেকার রূপটিকেই অধিকতর বরণীয় মনে করি, কারণ, তাহাতেই তাঁহার কবি-মানস মাটিকে একটু অধিক স্পর্শ করিয়াছিল। সেদিন কোন নিভৃত শান্তিনিকেতনে নয়—রাজধানীর অশান্তি-নিকেতনে, সেই কোলাহলময় জনারণ্যে—কবির যৌবন-শেষের সেই পুরুষমূর্তির ললাটে ও মুখ-মণ্ডলে যে আকস্মিক দিব্যদীপ্তি ফুটিয়া উঠিয়াছিল, তাঁহার সেকালের রচনাতে এখনও তাহা অম্লান হইয়া আছে। কিন্তু রবীন্দ্রনাথের অন্তর-গহনের যে কবিরূপের কথা বলিয়াছি—কবি নিজেই যে আত্মপরিচয় দিয়াছেন—তাহার আলোকে সেই

দিকে চাহিলে বুঝা যাইবে, কবির কবি-স্বপ্ন এ সকলের কোনটাতেই বাঁধা পড়ে নাই। নিজের ইষ্ট-দেবতা রবির উদ্দেশে সাবিত্রী-মন্ত্র পাঠ করিয়া কবিই বলিয়াছেন—

তেজের ভাণ্ডার হ'তে কী আমাকে দিয়েছ যে জরে'

কে-ই বা সে জানে।

কী জাল হতেছে বোনা স্বপ্নে স্বপ্নে নানা বর্ণডোরে

মোর গুপ্ত প্রাণে।

তোমার দূতীরা আঁকে ভুবন-অঙ্গনে আলিঙ্গনা

মূর্ত্তে সে ইন্দ্রজাল অপরূপ রূপের করুনা

মুছে যায় স'রে।

ভেমনি সহজ হোক হাসি কান্না, ভাবনা বেদনা

না বাঁধুক মোরে ॥

‘না বাঁধুক মোরে’—ইহাই কবির আত্মার নিগূঢ় কামনা। যখন যাহার পালা তখন সেই সঙ্গে থাকুক—

ঝঙ্কার মদিরামত বৈশাখের তাণ্ডব-লীলায়

বৈরাগী বসন্ত যবে আপনার বৈভব বিলায়—

সঙ্গে যেন থাকে।

কিছু—

তার পরে তারা যেন সর্কহারা দিগন্তে মিলায়,

চিহ্ন নাহি রাখে ॥

ইহার কারণ কি, কবি অকপটে সেই স্বীকারোক্তিও করিয়াছেন—

হে রবি, প্রাক্ষণে তব শরতের সোনার বাঁশিতে

জাগিল মূর্ছনা।

আলোতে শিশিরে বিশ্ব দিকে দিকে অশ্রুতে হাসিতে

চঞ্চল উন্মনা।

জানি না কি মত্ততায়, কি আস্থানে আমার রাগিনী

ধরে যায় অস্ত্রমানে শূণ্য পথে হ'রে বিবাগিনী

ল'য়ে তার ডালি,

সে কি তব সত্যভঙ্গে স্বপ্নাবেশে চলে একাকিনী

আলোর কাণ্ডালী ॥

এই 'বিবাসিনী রাগিনী'ই রবীন্দ্র-কবিপুরুষের প্রাণের রাগিনী—ইহাই রবীন্দ্র-কাব্যের আদি ও অন্ত্য স্বর। এই রাগিনীই একদা যে অপূর্ব অহুরাগে উদ্দীপ্ত হইয়াছিল তাহা যেমন ভুলি নাই, তেমনই, এই 'আলোর কাঙালী'কে ভাল করিয়া চিনিয়া লইতে না পারিলে তাহার স্বপ্নের নানা বর্ণডোরে-বোনা বাণীর সেই দুকুল-বাস—ভুবনের অন্ধনে আঁকা রূপ-কল্পনার সেই ইন্দ্রজাল—যাহা মুহূর্ত্তে সরিয়া মুছিয়া যায়, তাহার মর্ম্ম আমরা বুঝিতে পারিব না।

বাংলার রবীন্দ্রনাথ

আজ রবীন্দ্রনাথের উন-অনীতিতম জন্মদিন উপলক্ষে আপনারা যে উৎসবের আয়োজন করিয়াছেন, তাহার সর্বাত্মক সাফল্য কামনা করি, এ অমুষ্ঠান যেন সর্বপ্রকারে সার্থক হয়। বড়ই সুখের বিষয় যে, এই অমুষ্ঠানটি বাঙালীর একটি প্রিয় অমুষ্ঠান হইয়া উঠিয়াছে, পঞ্জিকার পর্কদিনের মত আমরা এই দিনটিরও নিয়মপালন করিতে শিখিয়াছি।

রবীন্দ্রনাথ বাংলার সর্বশ্রেষ্ঠ কবি—এক হাজার বৎসরের বাংলা-সাহিত্য, সাধনার সোপান-পরম্পরায়, শেষে যে বাণী-মন্ত্র লাভ করিয়াছে, রবীন্দ্রনাথ তাহারই সিক্ত সাধক। কবি জয়দেব ও বাংলার বৈষ্ণব-মহাজনগণের পদাবলীতে, যে ভাষায় ও যে ছন্দ-গীতে, বাঙালীর হৃদয় মন্বন করিয়া এক অপূর্বরূপা সরস্বতীর উদয় হইল—সেই ভাষা ও সেই সুরের ভাগীরথী-ধারাকে শতমুখে প্রসারিত করিয়া রবীন্দ্রনাথ সেই সরস্বতীকে বিশ্বের ভাবসাগরসঙ্গে উপনীত করিয়াছেন ; প্রাচীন ভারতীয় ভারতী ও আধুনিক বিশ্বভারতীকে তিনি এই ভাষারই শব্দে ও ছন্দে তাঁহার অলৌকিক কবি-প্রতিভার বলে সংযুক্ত করিয়াছেন, বাংলা ভাষায় মহামানবের বাণীকে প্রতিষ্ঠিত করিয়াছেন ; এত বড় গৌরব ভারতের আর কোনও জাতির ভাগ্যে ঘটে নাই। রবীন্দ্র-জয়ন্তী-উৎসবে, বৎসরে অন্তত একদিনের জন্মও বাঙালী যেন এই কথা স্মরণ ও হৃদয়কম করিয়া ধন্য হয়, এবং ভারতভাগ্যবিধাতাকে এই বলিয়া ধন্যবাদ দেয় যে, ভারতবর্ষের জাতিসকলের মধ্যে তিনি বাঙালীকেই ইহার জন্ম বরণ করিয়াছেন।

এই কথাটিই আজ বিশেষ করিয়া আমি আমার জাতিকে স্মরণ করাইতে চাই, তার কারণ, আজ আমরা ভারতের রাষ্ট্রীয় সমাজে পতিত হইয়াছি, ঘরে বাহিরে আজ আমাদের লাঞ্ছনার অবধি নাই। রবীন্দ্র-জয়ন্তী-উৎসব আজ আর শুধুই একটা কবিপূজার উৎসব নয় ; রবীন্দ্রনাথ আজ আমার চক্ষে কেবল বঙ্গসরস্বতীর বরণপুত্রই নহেন—তিনি এই অপমানিত, দুর্গত জাতির আত্মমর্য্যাদা ও আত্মপরিচয়ের প্রধান অবলম্বন। বাংলাদেশের উনবিংশ শতাব্দীর সেই

গৌরবময় যুগের সকল নিদর্শন আজ লুপ্ত হইয়াছে ; রামমোহন-বিদ্যালয়, কেশব-রামকৃষ্ণ, বঙ্কিম-মধুসূদন, বিবেকানন্দ-ব্রহ্মবাহুব, রবীন্দ্রনাথ-বিপিনচন্দ্র, অরবিন্দ-চিত্তরঞ্জন—জ্ঞান, ভক্তি, প্রেম ও কর্ম, ধর্মের এই চতুর্বিধ মার্গে—সেই যুগে এই যে-সব লোকোত্তরচরিত্র বীর-সাধকের আবির্ভাব হইয়াছিল, তাঁহাদের কেহ আজ আর নাই, তাঁহাদের স্থান এখনও কেহ পূরণ করে নাই, —বাঙালী জাতি আজ অসাড় অচেতন হইয়া আছে। এইসকল ক্ষণজন্মা পুরুষ ব্যতীত আরও অনেক শক্তিমান বাঙালী সেকালে দিকে দিকে দেখা দিয়াছিল—সাধারণের মধ্যেও কত অসাধারণের অভ্যাগম হইয়াছে ! সমগ্র জাতির মধ্যে সেই যে নবজীবনের স্পন্দন জাগিয়াছিল, তাহার ফলে সারা ভারত মুগ্ধ ও বিস্মিত হইয়া সর্বত্র বাঙালীর নেতৃত্ব স্বীকার করিয়াছিল। আজ আমরা ধূলায় লুটাইতেছি ; দেহে শক্তি নাই, মনে বল নাই, মাথায় বুদ্ধি নাই—প্রতিভা একেবারে নির্ঝাপিত হইয়াছে। তথাপি এত অবসাদ ও নিরাশার মধ্যেও সেই পূর্বজীবন ও পূর্বপ্রতিভার নিদর্শনরূপে রবীন্দ্রনাথ এখনও আমাদের সম্মুখে বিদ্যমান,—বেদনাবিকৃত মুখে, বাষ্পাকুল নেত্রে, আমরা তাঁহার দিকে চাহিয়া মুহূর্তের জগ্গ ও আশ্বস্ত হই—কি ছিলাম তাহা স্মরণ করিয়া ভবিষ্যতের আশা করিতে পারি।

রবীন্দ্রনাথের মত কবিপ্রতিভার পূজা আরও কি কারণে কর্তব্য, তাহা বলিব। সাহিত্যেই জাতির জীবন-বহি—তাহার আত্মার আকৃতি—অমৃতমস্তে নিত্য দীপ্ত হইয়া থাকে। যে-জাতি তাহার ভাষায় সাহিত্যরূপে আত্মপ্রকাশ করিতে পারিয়াছে, সে মৃত্যুর হাত হইতে রক্ষা পাইবার রক্ষাকবচ নির্মাণ করিয়াছে,—দেহ-লাঞ্ছনার উর্দ্ধে সে আপনার আত্মাকে অক্ষত রাখিবার উপায় করিয়াছে। বাংলাভাষায় সেই অমৃতমস্তের মহাশক্তি সঞ্চার করিয়াছেন রবীন্দ্রনাথ। রবীন্দ্র-পূর্ব সাহিত্যে মধুসূদন ও বঙ্কিমচন্দ্রে আমরা ভাষার নবজন্ম ও জীবনীশক্তির প্রথম পরিচয় পাই—রবীন্দ্রোত্তর সাহিত্যে, আমরা—ভাষার শুধু শক্তি নয়—তাহার আশ্চর্য্য লাবণ্যলীলা দেখিয়াছি ; তাহাতে জাতির সর্ববিধ চিন্তা, কামনা ও কল্পনার স্বচ্ছন্দ প্রকাশ সম্ভব হইয়াছে দেখিয়া নিশ্চিন্ত ও নিঃসংশয় হইয়াছি। অতঃপর ভাষার আধারে জাতির যে সংস্কৃতি সঞ্চিত ও উপচিত হইতে থাকিবে, তাহারই বলে আমরা শেষ পর্য্যন্ত বাঁচিয়া যাইব। এইজগ্গ,

বাঙালীর বাণী-জীবনের পূর্ণতা-সাধন করিয়াছেন যে বিশ্বকর্মা কবি, তাঁহাকে জাতীয় জীবনের একজন প্রধান গঠনকর্তারূপে বন্দনা করিতে আমরা যেন কখনও বিস্মৃত না হই।

রবীন্দ্রনাথের কাব্যসাধনার যে সার্বভৌমিক আদর্শের দিকে আমরা প্রায়ই দৃষ্টি দিয়া থাকি, তাহাতে কবি-প্রতিভার একটি উৎকৃষ্ট লক্ষণ থাকিলেও, জাতির বর্তমান অবস্থায় সেই অত্যাচ্ছ ভাবজগতের লোভ সম্বরণ করাই আমি শ্রেয় মনে করি। কবি যেখানে পৌঁছিয়াছেন, সেখানে আমরা সকলেই কখনও পৌঁছিতে পারিব না; অথচ কবিকেও আমাদের এই নিম্নভূমিতে ধরিয়া রাখিতে আমরা অবশ্যই চাহিব না। মাটির দীপ হইতে আকাশের তারা পর্যন্ত রবীন্দ্রনাথের কল্পনা সর্বত্র প্রসারিত হইয়াছে। নক্ষত্রের পানে চাহিবার অবকাশ আমাদেরও মাঝে মাঝে চাই—আত্মার স্বাস্থ্যরক্ষার জন্ত মধ্য মধ্য সেইরূপ আকাশ-গঙ্গায় স্নান করিবার আবশ্যিকতা আছে। কিন্তু যে যুগপ্রদীপের আলোকে এই মাটির উপরেই আমাদের পথ চিনিয়া চলিতে হয়, তাহার শিখা উজ্জ্বল করিবার জন্ত কবি আমাদেরকে যে ধনের অধিকারী করিয়াছেন, তাহার জন্তই আমরা তাঁহার কাছে অধিকতর ঋণী। আজ আমরা কবির নিকটে স্বজাতি-প্রেম, স্বদেশানুরাগ, ও স্বধর্মপ্ৰীতির দীক্ষা নূতন করিয়া পাইতে চাই; কবির গানের সেই মর্মাস্তম্পর্শী সুরে বিদ্ধ হইতে চাই, যাহাতে এই দেশের প্রকৃতি ও এই জাতির আত্মা আমাদের সকলকে সর্বসম্প্রদায়-নির্বিশেষে এক ভাবের ভাবুক করিতে পারে। রবীন্দ্রনাথের কাব্যে আমরা তাহা পাইয়াছি; বাংলার জলমাটি ও বাংলার আকাশ-বাতাসকে তিনি ধ্যানস্বপ্নের সুষমায় বিচিত্রিত করিয়াছেন, বাংলার ঋতুগুলিকে তিনি সকল রঙে ও সকল সুরে তাঁহার গানের ইন্দ্রজালে মূর্ত্তি দিয়াছেন। বাংলার নদ-নদী, বাংলার গ্রাম ও তাহার “অবারিত মাঠ গগন-ললাট”কে তিনি যেমন করিয়া আমাদের চক্ষুচক্রে ও মানসনেত্রে, শরীরী ও অশরীরী শোভায় প্রকাশিত করিয়াছেন, বাংলা কাব্যের সুদীর্ঘ ইতিহাসে তেমনটি আর কোথাও ঘটে নাই। পুরাণ-ইতিহাসের ঐশ্বর্য, নাটকীয় কল্পনার চমকপ্রদ কৌশল, অথবা বিশেষ কোনও ধর্মনৈতিক আদর্শের সাহায্য না লইয়া, তিনিই প্রথম—খাঁটি বাংলাদেশ ও খাঁটি বাঙালী-হৃদয়ের মর্মস্থানকে, বাঙালী-জীবনের অখ্যাত ও অপরিচিত কোণগুলিকে

—অপূর্ব আলোকে উদ্ভাসিত করিয়াছেন। এমন করিয়া আমরা আমাদের দেশকে আগে কখনও দেখি নাই; আমাদেরই দেশের নারী-পুরুষ, বালক-বালিকা ও শিশুর মুখে যে এত সৌন্দর্য আছে, আমাদেরই নিভৃত পল্লীকূলেরে, গৃহ-পরিবারের তুচ্ছ জীবনযাত্রায় যে এত গভীর হৃদয়োৎকর্ষা, মনের মোহের এমন মাধুরী লুকায়িত আছে, তাহা আমরা ইতিপূর্বে জানিতাম না। রবীন্দ্রনাথই তাঁহার কাব্যমুকুরে আমাদের মুখপ্রতিবিম্ব আমাদেরিগকে দেখাইয়াছেন, সে মুখে সুন্দর হাসি ও সুন্দরতর অশ্রুর বিকাশ করিয়াছেন। রবীন্দ্রনাথের সকল শ্রেষ্ঠ গানে আমরা বাঙালীস্বলভ রসকল্পনার অতি সহজ অথচ গভীর আবেগের পরিচয় পাই। এক কথায়, রবীন্দ্র-সাহিত্যের ভিতর দিয়াই আমরা যেমন বাংলা ভাষার সুন্দরতম সৌন্দর্য হৃদয়গোচর করিয়াছি, তেমনই তাহার সাহায্যেই বাংলাদেশ ও বাঙালী-জাতির ঘনিষ্ঠতম পরিচয়, অর্থাৎ আত্মপরিচয় লাভ করিয়াছি।

রবীন্দ্রনাথ তাঁহার ব্যক্তিগত জীবনে আর একটা বস্তুকে খুব বড় করিয়া আমাদের চক্ষে ধরিয়াছেন—জাতীয় আত্মমর্যাদাবোধ। তাঁহার এই জাতীয়তা-বোধ ভূগোল বা ইতিহাস-সম্পর্কিত নয়—মানুষের সহজ মনুষ্যধর্মের অন্তর্গত। প্রত্যেক মানুষেরই একটা জন্ম বা জাতিগত ধর্ম আছে; আচার-ব্যবহারে, পোষাক-পরিচ্ছদে, আমোদ-উৎসবে, ভাষায় ও ভঙ্গতায়—সেই জাতিধর্মের শ্রেষ্ঠ আদর্শকে সে সর্বদা উন্নত রাখিয়া চলিবে, বিজাতির অনুকরণ করিবে না;—বাল্য হইতে বার্দ্ধক্য পর্যন্ত রবীন্দ্রনাথ তাঁহার জীবনে এই নীতি লঙ্ঘন করেন নাই, বরং দেশের ইঙ্গবঙ্গসমাজের লজ্জাহীন আচরণের বিরুদ্ধে তিনি আজীবন একটা স্পষ্ট প্রতিবাদ রক্ষা করিয়া চলিয়াছেন। প্রাচীন ভারতীয় সংস্কৃতির প্রতি সুগভীর শ্রদ্ধাই তাঁহার এই মনোভাবের কারণ—অতএব এই দিক দিয়া তিনি শুধু বাংলার নয়, সারা ভারতের প্রতিনিধি। কিন্তু তথাপি আমরা ইহার মধ্যে বাঙালীর বৈশিষ্ট্যই প্রত্যক্ষ করি—রবীন্দ্রনাথের বাঙালী-প্রতিভাই ভারতের সংস্কৃতিকে এমন করিয়া অন্তরের সত্য করিয়া তুলিয়াছে; ভারতের আর কোনও জাতি প্রাচীন ভারতের মর্যাদাকে এমন করিয়া এ যুগের শিক্ষা-দীক্ষায় উপলব্ধি করিতে পারে নাই। ভারতীয় সভ্যতার প্রাণবস্তুকে বাঙালীই, রূপে রসে, ধ্যানে ও চিন্তায়, নূতন করিয়া গড়িয়া

তুলিয়াছে ; জাতীয়তার সেই আদর্শ বাঙালীর প্রতিভাতেই ধরা দিয়াছে। রামমোহন, দেবেন্দ্রনাথ, ভূদেব, বঙ্কিম, বিবেকানন্দ ও রবীন্দ্রনাথ সেই ভারতীয় সংস্কৃতির দ্রষ্টা ও প্রচারক—এ দৃষ্টির মূলে বাঙালীর বাঙালীত্বই বিশেষভাবে বিদ্যমান ; অর্থাৎ, জ্ঞান ও প্রেমের সমন্বয়ে যে দৃষ্টিশক্তির বিকাশ হয়—কোনও উৎকৃষ্ট ভাব-সত্যকে উপলব্ধি করিবার সেই দৃষ্টি বাঙালী-প্রতিভার একটি বিশিষ্ট লক্ষণ ; তাই সেই আদর্শ আর কোনও ভারতীয় জাতিকে তেমনভাবে প্রবুদ্ধ করিল না ; নব-জাতীয়তার সেই মন্ত্র প্রায় সকলেই প্রত্যাখ্যান করিয়াছে ; বোধ হয় সেইজন্যই আজিকার জাতীয় মহাসভায় বাঙালীর স্থান ক্রমেই সঙ্কীর্ণ হইয়া উঠিতেছে।

তাই, এই রবীন্দ্র-জন্মতিথির উৎসব-সভায় আমি আজ রবীন্দ্র-প্রতিভার সেই বাঙালীত্বের দিকটাই সকলকে বিশেষ করিয়া অনুধাবন করিতে বলি। আজ আমি বিশ্বকবি রবীন্দ্রনাথ অপেক্ষা বাঙালীর কবি রবীন্দ্রনাথকেই প্রাণের পূজা নিবেদন করিতে চাই। রবীন্দ্রনাথের বয়োবৃদ্ধির সঙ্গে সঙ্গে তাঁহার জীবনদেবতার আরাধন-মন্ত্রও গভীর হইতে গভীরতর হইয়াছে,—কবির আত্মা এখন স্বকীয় ইষ্টসাধনার উচ্চতম সোপানে আরোহণ করিয়াছে। এইখানেই রবীন্দ্রনাথ কেবল বাঙালী নহেন ভারতীয় ঋষির সন্তান ; কেবল আধুনিক নহেন, সর্বকালের বা কালাতীতের—অমৃতের—পুত্র। কিন্তু এ কথাও বিস্মৃত হইলে চলিবে না যে, সাধারণ মানবধর্মও কবির জীবনে অল্প বিকাশলাভ করে নাই, না করিলে তিনি আজ আমাদের মত মানুষের আরাধ্য কবি হইতে পারিতেন না। কৈশোরে, যৌবনে ও প্রৌঢ়বয়সে তিনি এই দেশের সঙ্গে ও জাতির সঙ্গে যেভাবে যুক্ত হইয়া, যে আশা ও নিরাশা—উল্লাস ও বেদনায়—অধীর হইয়াছেন, গল্পে-গাথায়, প্রবন্ধে ও গানে—তাঁহার দাহ ও দীপ্তি অনির্বাণ হইয়া আছে। রবীন্দ্রনাথের বিদেশী ভক্ত ও সমালোচকের দল, তাঁহার বাঙালীত্বের দিকটি অস্বীকার করিয়া দেশজাতিনিরপেক্ষ একটা বিশ্বমানবীয় প্রতিভারূপে তাঁহার সম্মান করিতে চায় ; ভারতের অপর প্রদেশেও তাঁহার বাঙালীত্ব বিস্মৃত হইবার আকাঙ্ক্ষা অল্প নহে। ইহারা তুলিয়া যায় যে, যে-মানুষ নিজের দেশকে ভালবাসিতে পারে নাই, আপনার জাতিকে বুকে জড়াইয়া ধরিতে যাহার ইচ্ছা হয় নাই, সে যে মানুষই নয়—এত বড় কবি হওয়া তো দূরের কথা।

রবীন্দ্রনাথের পক্ষে এ কথা আরও সত্য ; সেই সঙ্গে কেবল এইটুকু মনে রাখিতে হইবে যে, দেশ ও জাতির প্রতি তাঁহার সেই মমতা এমন একটি সত্যের উপর প্রতিষ্ঠিত ছিল যে, পরিশেষে সেই সত্যের নিরন্তর সন্ধানে তিনি প্রেমের সকল গণ্ডি উত্তীর্ণ হইয়াছেন। যাহারা বলে, রবীন্দ্রনাথের প্রতিভায় দেশের প্রভাব বা জাতির জাতিগত প্রেরণা নাই—বাংলাদেশে বাঙালী-জাতির মধ্যে তাঁহার আবির্ভাব একটা ভিন্নস্তরের প্রাকৃতিক ঘটনা, তাহারা বাঙালীকেও যেমন ঈর্ষা করে, রবীন্দ্রনাথকেও তেমনই প্রকারান্তরে অসম্মান করে। কেহ কেহ রবীন্দ্রনাথের বংশে বিজাতির রক্ত পর্য্যন্ত সন্ধান করিতে তৎপর হইয়াছে ! ইহার কারণ কি ? একটা অর্ধসভ্য ভারতীয় জাতির মধ্যে এত উচ্চ ভাব-কল্পনা, কাব্যসৃষ্টির এমন অনবদ্য কৌশল, এবং জগতের উৎকৃষ্ট ভাবরাশি আত্মসাৎ করিবার এমন মানসশক্তি যে সম্ভব, তাহা কিছুতেই ইহার বিধান করিতে পারে না। যাহারা ঈর্ষায় অথবা নিজ জাতির শ্রেষ্ঠত্বগর্বে অন্ধ, তাহারা দীপ্তসূর্য্যকেও অস্বীকার করে।

কোনও সত্যকার বড় কবি যে স্বয়ম্ভু বা ভূঁইফোড় হইতে পারে না, তাহার একটা বড় প্রমাণ—এ পর্য্যন্ত জগতের কোনও বড় কবি আপন মাতৃভাষায় ভিন্ন অপর কোন ভাষায় কাব্যরচনা করিতে পারেন নাই। এই ভাষার কথা আমি পূর্বে বলিয়াছি, আবার বলি। ভাষাই জাতির জাতীয়তার নিদান, ভাষাই কবির কবিত্বের আদি ও শেষ উপাদান। রবীন্দ্রনাথের ভাষা যদি মূলে খাঁটি বাংলা ভাষা না হয়, যদি তাহা আধুনিক ছোকরা লেখকদের মত ফিরিঙ্গি-ভাষা হয়, তবে রবীন্দ্রনাথ যেমন বাঙালী কবি নহেন, তেমনই তাঁহার কাব্যও উৎকৃষ্ট কাব্য নয়। আর সকল কথা ছাড়িয়া দিয়া, কেবল ইহাই ভাল করিয়া বুঝিয়া ও মনের মধ্যে দৃঢ় করিয়া ধরিয়া থাকিতে হইবে যে—জাতি, ভাষা ও সাহিত্য এই তিনের সম্বন্ধ অতিশয় ঘনিষ্ঠ ও নিবিড়। রবীন্দ্রনাথ যত বড়, তাঁহার ভাষাও তত খাঁটি বাংলা, এবং তিনিও তত বড় বাঙালী। তাঁহার আত্মার যত কিছু উৎকর্ষা তিনি যে ভাষায় প্রকাশ করিয়াছেন—সেই ভাষা যাহাদের, তিনি বিশেষ করিয়া তাহাদেরই ; আর সকলে ভাবের দিক দিয়া তাঁহার আত্মীয় হইতে পারে, ভাষার দিক দিয়া নহে। কিন্তু ভাষাই কবির দেহ মন ও আত্মার প্রতীক, অতএব অপর সকলের সেই আত্মীয়তা সহজ ও স্বগভীর নয় ; অর্থাৎ, তাঁহার সহিত প্রকৃত রক্তসম্পর্ক

আমাদেরই, অপর সকলের সহিত কেবলমাত্র বন্ধুসম্পর্কই সম্ভব। অতএব, রবীন্দ্রনাথের প্রতিভা জগতের সমক্ষে প্রমাণ করিয়াছে—আমাদের এই বাঙালী জাতির মধ্যেই কত বড় ভাবকল্পনার বীজ নিহিত আছে। যে পর্বতমানার কোন এক শিখর গৌরীশৃঙ্গের গায় উচ্চ, তাহার সাধারণ উচ্চতাও সামান্ত নহে; ভূপৃষ্ঠের কোথাও এমন একটি অত্যুচ্চ পর্বতশিখর দেখা যায় না, যাহা সম্পূর্ণ বিচ্ছিন্ন এককভাবে আকাশে উথিত হইয়াছে।

এই বৎসরের রবীন্দ্র-জন্মতিথি-বাসরে আমি রবীন্দ্র-বন্দনার আর কোনও মন্ত্র প্রাণের মধ্যে পাইতেছি না; রবীন্দ্রনাথের দিকে চাহিয়া আমি আধুনিক ভারতের সর্বশ্রেষ্ঠ জাতির বর্তমান দুর্গতি লাঞ্ছনা ও বিমূঢ়তার কথাই ভাবিতেছি, শোকে দুঃখে লজ্জায় দিক্কারে অবসন্ন হইতেছি। ভারতে ইংরেজ-অধিকারের যুগ, প্রধানত যে জাতির মনীষায় ও আত্মোৎসর্গে, দাসত্বের অর্গোরব হইতে অনেক পরিমাণে মুক্ত হইয়াছে, সমগ্র এশিয়াখণ্ডের যে একমাত্র জাতি জগতের আধুনিক সাহিত্যে একটি রঙিন রেখা অঙ্কিত করিতে পারিয়াছে, যে জাতির প্রতিভায় নব্যভারতের জ্ঞান-বিজ্ঞান, কলাশিল্প, ধর্ম ও রাষ্ট্রনীতি নূতন রূপে সঞ্জীবিত হইয়াছে, আজ সেই জাতির কি নিদারুণ মুচ্ছা ও মোহের অবস্থা! তাই এখনও জীবিত ঐ রবীন্দ্রনাথের দিকে চাহিয়া মনে হয়—এ কি স্বপ্ন! বিগত যুগের বাংলার সেই গৌরব-সৌধ ভাঙিয়া পড়িয়াছে; চারিদিকে ভগ্নস্তুপ—সেই ভগ্নস্তুপের মধ্যে ভগ্ন-পূজামণ্ডপের স্বর্ণকারুখচিত ঐ যে স্তম্ভটি এখনও দাঁড়াইয়া আছে, উহার সাক্ষ্য কি মিথ্যা? কিছুকাল ধরিয়া আমাদের মতিচ্ছন্ন ঘটিয়াছে, ভাবে চিন্তায় ভাষায় ও সাহিত্যে আমরা বড় অনাচার করিতেছি; আমরা স্বধর্মভ্রষ্ট হইয়াছি। এখন তাহার পরিণাম প্রত্যক্ষ হইয়া উঠিয়াছে—আসন্ন বিনাশের মহাভয় আমাদের কাছে ব্যাকুল করিয়াছে। আজিকার দিনে আমাদের সেই নষ্টগৌরবের নিদর্শন চাই—কি ছিলাম, কি হইয়াছি, তাহাই বুঝিবার পক্ষে চাক্ষুষ প্রমাণ চাই। একদিন এমনই অবস্থা স্মরণ করিয়া মহাপুরুষ বঙ্কিমচন্দ্র লিখিয়াছিলেন—

“যাহার নষ্টহৃদের স্মৃতি জাগরিত হইলে হৃদের নিদর্শন এখনও দেখিতে পায়, সে এখনও সুখী, তাহার সুখ একেবারে লুপ্ত হয় নাই। যাহার সুখ গিয়াছে, হৃদের নিদর্শন গিয়াছে—বঁধু গিয়াছে, বৃন্দাবনও গিয়াছে, এখন আর চাহিবার স্থান নাই—সেই দুঃখী, অনন্ত দুঃখে দুঃখী।”

রবীন্দ্রনাথ বাঙালীর সেই বিগত বৈভবের চাক্ষুষ জীবন্ত নিদর্শন; তাহার স্মৃতি
গিয়াছে, কিন্তু স্মৃতির নিদর্শন এখনও একেবারে লুপ্ত হয় নাই; চাহিবার স্থান
এখনও আছে।*

কবি করুণানিধানের কবিতা

কবি করুণানিধানের কাব্য আলোচনা করিবার সময় আসিয়াছে। কিছুকাল হইল কবির কবি-জীবন প্রায় অবসিত হইয়াছে, এজন্য তাঁহার কবিমানস ও কাব্যকীর্তিকে সমগ্রভাবে বুঝিয়া লইবার পক্ষে এখন আর কোন সংশয়ের হেতু নাই। ইতিমধ্যে 'শতনরী' নামে কবির একখানি সুনির্বাচিত কবিতা-সংগ্রহও প্রকাশিত হইয়াছে; এজন্য পাঠক-সাধারণের পক্ষেও এ বিষয়ে সুবিধা হইয়াছে। কিন্তু করুণানিধানের কাব্য-আলোচনার ভূমিকা-স্বরূপ—আমি এইরূপ আলোচনার প্রয়োজন ও পদ্ধতি সম্বন্ধে—সাধারণভাবে দুইচারি কথা বলিয়া লইতে চাই।

আমাদের দেশে সাহিত্য-সৃষ্টির একটা যুগ শেষ হইয়াছে, কিন্তু সাহিত্য-সমালোচনার কোনও একটা আদর্শ বা পদ্ধতি এখনও সুপ্রতিষ্ঠিত হয় নাই। এ অবস্থায় সমালোচকের নিজ সমালোচনা-পদ্ধতির একটু কৈফিয়ৎ দেওয়া বোধ হয় অনাবশ্যক হইবে না। কবি ও কাব্য সম্বন্ধে আলোচনায় নানা কারণে ভুল বুঝিবার সম্ভাবনা আছে। কাব্য বলিতে আমরা ঠিক কি বুঝি, সমালোচনা অর্থে ই বা ঠিক কি বুঝায়, তাহার একটা স্পষ্ট নির্দেশ থাকা ভালো। কবির নিকটে আমরা ন্যূনতম কি প্রত্যাশা করি—কবি যত বড় বা ছোট কবি হউন, তাঁহার কাব্যে সত্যকার কবিত্ব আছে কি না, তিনি আদৌ কবি কিনা—তাহার নির্ণয় হয় কিসে, এ সম্বন্ধে একটা ভূমিকার প্রয়োজন আমাদের দেশে এখনও আছে। আমাদের দেশে এ যুগে কাব্য ও কবির সংখ্যা নিতান্ত অল্প নহে; কিন্তু কবিতা-লেখক হইলেই কবি হয় না,—বড় কবি, মাঝারি কবি, ছোট কবি বলিয়া একটা শ্রেণীবিভাগ করিয়া এই সকল লেখককে যে কোনও একটা শ্রেণীভুক্ত করিয়া কবি-নামে অভিহিত করিলেই এ সমস্যার সমাধান হয় না। কারণ, একথা ভুলিলে চলিবে না, কোনও লেখকের পক্ষে কবিপদবাচ্য হওয়াটাই তাঁহার প্রতিভার প্রথম ও প্রধান পরিচয়; এ বিষয়ে যদি ভুল হয়, তবে গোড়ায় গলদ ঘটিবে। আশা করি, করুণানিধানের কাব্য-আলোচনায় প্রবৃত্ত হইয়া আমি সে ভুল করি নাই।

রসিকসমাজেও কাব্য-রস-আস্বাদনে একটা বিয় আছে ; ব্যক্তিগত রুচি বা মানস-প্রকৃতির পক্ষপাত, বিশিষ্ট চিন্তা বা বিশ্বাসের প্রভাব, কাব্যরস-আস্বাদন কালেও অজ্ঞাতসারে কার্য করিয়া থাকে। কাব্যরস-আস্বাদনে এই ব্যক্তিগত রুচিভেদে হয় ত' আপত্তির কারণ নাই ; কিন্তু কাব্য-সমালোচকের পক্ষে উদার ও অসাম্প্রদায়িক রসবোধের বিশেষ প্রয়োজন আছে। প্রত্যেক কবির কল্পনায় ব্যক্তিগত বৈশিষ্ট্য থাকে ; তাই বলিয়া যদি কবিবিশেষের এইরূপ বৈশিষ্ট্যের পক্ষপাতী হইতে হয়, তাহা হইলে বুঝিতে হইবে যে—যে সাধারণ রস-প্রমাণ সকল কাব্যেই বিদ্যমান থাকে, সমালোচক সেই বস্তুর সন্ধান রাখেন না। এইখানে কবির কবিত্ব সম্বন্ধে ধারণাটা একটু স্পষ্ট করিয়া তোলা ভালো। কাব্যমাত্রেরই যে সাধারণ রস-প্রমাণের কথা বলিয়াছি—যাহা কোনো বিশেষ কাব্যের মধ্যেই সীমাবদ্ধ নয়—তাহাকে যখন 'কবিত্ব'রূপে উপলব্ধি করি, তখন একটা কথা যেন আমরা বিস্মৃত না হই,—এই রস নির্বিশেষ বলিয়াই, প্রত্যেক কবির কাব্যে ইহা একটা বিশিষ্ট রূপ ধারণ করিতে পারে। এই বৈশিষ্ট্যই কবিবিশেষের 'কবিত্ব'। অতএব কোনও বিশেষ ধরণের কবিত্বের পক্ষপাতী হইলে, এই রসকেই অস্বীকার করিতে হয়। সত্যকার রসিক ব্যক্তির চিন্তে এই রসজ্ঞান আছে বলিয়াই তিনি সর্ববিধ বৈশিষ্ট্যের অহুরাগী। এই দিক দিয়া আর একটু অগ্রসর হইলেই এই 'কবিত্বের' প্রকৃত স্বরূপ ধরা পড়িবে। কবির এই যে ব্যক্তিগত বৈশিষ্ট্য, ইহাই কাব্যের মৌলিকতার কারণ ; এই মৌলিকতাই যে কবি-শক্তির প্রধান লক্ষণ ইহা আমরা সকলেই জানি। কিন্তু এই মৌলিকতা অনুভব করিলেও, বিচারকালে আমরা একটা ভুল করিয়া বসি। এ মৌলিকতা কবিতার ভাববস্তুর উপর নির্ভর করে না—ওই ভাবানুভূতির যে ব্যক্তিগত ভঙ্গি, কবিতার ভাষায়, ছন্দে, শব্দযোজনায়—কাব্যের আকারে ও প্রকারে ধরা পড়ে, তাহাই তাঁহার মৌলিকতা। অতি-সাধারণ বহু-পরিচিত ভাব-বস্তুকে আশ্রয় করিয়াও যে একটি বিশিষ্ট প্রাণ-মনের পরিচয়, রঙে ও রূপে, ভাষায় ও ছন্দে সৃষ্টি ধারণ করে—কাব্যের diction ও technique-এর অন্তর্গত সেই personality, সেই style-ই—কবিত্ব-রস-আস্বাদনের প্রধান সহায়। এই অনুভূতি যে কাব্যে যত গভীর ও ব্যাপক হয়—জীবনের যতখানি একসঙ্গে ধরা দেয় ও তাহার জটিল বিস্তার একটি

ভাবৈকরস বাণীরূপে প্রকাশ পায়—সে কাব্য তত বড়। কিন্তু কবিত্বের আলোচনায় এই বড়ত্বের কথাই প্রথমে আসে না। কারণ অহুভূতি যেমনই হউক, তাহাকে যথাযথ প্রকাশ করিতে পারাই কবি-প্রতিভা; এবং অহুভূতির আবেগ সত্য ও স্নগভীর না হইলে ভাষায় ও ছন্দে সেই বস্তু ফুটিয়া উঠে না, যাহাকে আমরা 'কবিত্ব' বলি। যে কাব্যে সেই বাণীরূপ নাই তাহাতে ওই অহুভূতির সত্যও নাই; সে রচনায় যদি কোনও ভাব-চিন্তার সমাবেশ থাকে, তবে বুঝিতে হইবে, তাহা লেখকের নিজস্ব নয়; সে ভাববস্তু লেখকের কবিজনোচিত অহুভূতি-প্রসূত নয়। অতএব, কবির ভাব-গৌরব বা চিন্তাশীলতাই কবিত্ব নয়—সে ভাব, সে চিন্তা যত গভীর, সূক্ষ্ম বা উচ্চ হউক, এমন কি, মৌলিক হউক—তাহা কবিত্ব নয়। এই কথাটি বুঝিয়া লইলে, কাব্য-আলোচনায় কোনও অবাস্তুর আদর্শ প্রশ্রয় পাইবে না। অবাস্তুর আদর্শের উল্লেখ করিলাম এই জন্য যে, অনেকে যেমন সঙ্গীত উপভোগ করিতে বসিয়া, সুর অপেক্ষা কথার কবিত্ব প্রত্যাশা করেন, তেমনই অনেক তথা-কথিত কাব্য-রসিক কবিতায় ভাবের বাণী-রূপ অপেক্ষা—ভাবের ভাবুকতা, তত্ত্বজ্ঞানের ভাবাবেশ, অথবা সূক্ষ্মচিন্তাশক্তির বাহাদুরী প্রত্যাশা করেন।

কাব্য আন্বাদনের বস্তু, আলোচনার সামগ্রী নয়—একথা সত্য; তথাপি কাব্য-আলোচনা অণুবিধ আলোচনার মত নয়, ইহাও মনে রাখিতে হইবে। এই প্রসঙ্গে বিদেশী সমালোচকের একটি উপমা কাজে লাগিবে। আকাশে ইন্দ্রধনুর পাশে যেমন আর একটি ছায়া-ইন্দ্রধনু দেখা যায়—তাহা দ্বারা প্রধান ধনুটি দ্বিগুণিত হইয়া যেমন আরও বেশী করিয়া দৃষ্টি আকর্ষণ করে, কাব্যের পাশে কাব্য-সমালোচনাও সেইরূপ। কাব্যসৃষ্টির পাশে পাশে সমালোচকের রসবোধ—কাব্যগত কবি-প্রেরণার সাহায্যেই—তাহার যে প্রতিচ্ছায়া সৃষ্টি করে, এবং তাহার দ্বারা মূল কাব্যসৃষ্টিকে আরও ভাস্বর করিয়া তোলে—তাহারই নাম কাব্য-সমালোচনা। এইরূপ আলোচনায়, কাব্যে ঠিক যতটুকু যেখানে স্পষ্ট প্রকাশ পাইয়াছে তাহার অধিক কিছু অহুমান করা—যাহা কবি প্রকাশ করিতে অক্ষম হইয়াছেন, সমালোচকের নিজ কল্পনাবলে সেটুকু পূরণ করিয়া কবিকে একটা অতিরিক্ত গৌরবের অধিকারী করাও যেমন অজ্ঞায়, তেমনই, কবি যেটুকু যে ভাবে আমাদের সমক্ষে ধরিয়াছেন তাহার অধিক রস-প্রেরণা দাবী করাও অসঙ্গত।

করুণানিধানের কাব্যে আমরা তাঁহার সেই কবিত্বের সন্ধান করিব। যে ভাষা ও ছন্দ-সৌষ্ঠবে বাণীর রূপ প্রত্যক্ষ হইয়া উঠে, তাব শরীরী হয়—যাহার অভাবে একের অহুভূতি অপরের নিজস্ব হইয়া উঠে না, করুণানিধানের কাব্যে ভাষা ও ছন্দের সেই অমোঘ সৌষ্ঠব সর্বাগ্রে পাঠকের হৃদয়গোচর হয়। কবি যেন মূর্ত্তিমতী বাগ্‌দেবতার আরাধনায় তন্ময় হইয়া, প্রকৃতির রূপ-ভাণ্ডার হইতে বর্ণালোক আহরণ করিয়া, অতি ধীরে সংঘত হস্তে স্ননিপুণ তুলিকাক্ষেপে বাগ্‌দেবতার বেদী-পট্ট অলঙ্কৃত করিতেছেন। বাক্য ও ছন্দের এই সৌন্দর্য্যস্পৃহা তাঁহার কবিত্বদয়ের বিশিষ্ট সৌন্দর্য্যাহুভূতির পক্ষে যতখানি সার্থক হইয়াছে, তাহাই তাঁহার কাব্যের রস-প্রমাণ। আমরা প্রথমেই করুণানিধানের এই বাণী-সাধনার পরিচয় দিব। তাঁহার কবিতায়, ভাষার এই নির্মাণ-কৌশলে যেন তিনটি ভঙ্গি ফুটিয়া উঠিয়াছে—ফুলের গ্ৰায় কোমল নিশ্চল, পরিপক্ব ফলের গ্ৰায় নিটোল ও রসোচ্ছল, এবং মণিগণের মত দৃঢ়সংহত দীপ্তিমান্। এই তিনেরই কিছু কিছু নমুনা উদ্ধৃত করিতেছি।

(১) স্বপ্নসম তার কাহিনী

আজকে প্রিয়ে দ্বিপ্রহরে—

নোনা-আতার সোনার গারে

রবির কিরণ পিছলে পড়ে ;

দূর্বা-শ্রামল নিশ্চল,

দীপ্ত নভো নীলোচ্ছল,

ঢেউয়ের মাধায় মাণিক ভাঙে

গাঙের বৃকে স্তরে স্তরে !

('দ্বিপ্রহরে'—শতনরী, পৃঃ ২-৩)

মেরেটি মোর আগ, বাড়ারে

দাঁড়িয়ে র'বে ঘারে,

দোপাটি-ফুল ধোঁপায় পরে'

সাঁঝের আধিরারে ;

কাজল-দেওয়া চক্ষুহুটি

আদর-দোলে উঠবে কুটি,

'ফলী-মনসা'র খেড়ার-ঘেরা

'হুর্গাদীঘি'র ধারে ।

সাহিত্য-বিভান

শিউলি-ফুলের গন্ধে যাবে
 সন্ধ্যাখানি ভরে',
 জ্যোৎস্না-ধারা পড়বে ঝরে'
 দূর দেউলের 'পরে ;
 অঙ্গ-মাজি' ছুঁধের সরে
 যাটটি হ'তে ঘটটি ভরে'
 মই-এর সাথে গৃহিনী মোর
 আসবে ফিরে ঘরে ।

('বাসনা'—শতনরী, পৃঃ ৯-১০) ।

(২) কোটি বন-ফুল অঙ্গে দোহুল,
 কত রঙ শোভা আলো ;
 দ্বিপ্রহরের ঝিল্লীর তান
 শুনিছে পাষণ কালো !
 স্বপন দেখিছে ভূর্জ-বনানী
 সবুজ চৌপার পরি',
 ঝর্ণা-তলায় ঝরিছে কাহার
 রতনের শতনরী ।

('হিমালয়'—শতনরী, পৃঃ ৯৩)

(৩) কার আলিঙ্গন-আশে অমুরাগ-রসোন্মাসে
 হে বরবর্ষিনী,
 ধাও রক্তে কলস্বরী পারাবার-স্বয়ম্বরী
 বিজ্ঞোর নন্দিনী ?
 কোথা মাহীশূর্তী-পুরী ?— মর্শ্বর-সোপানোপরি
 রাজ-অঙ্গনার
 বিলাসের মৃগমদে দৃপ্ত পদ-কোকনদে
 চকিত-ঝঙ্কার !
 পৌর্ণমাসী অর্ধরাতে, জ্যোৎস্নালোকে তন্দ্রালসে
 অলিনের 'পরে—
 ত্রাঙ্কারসে টলমল স্বর্ণপাত্রে শশি-বিষ
 চূষিত অধরে !

আবর্ত-শোভন বাতি,

অনন্ত কটি-তট

হংস মেখলার—

কোথার রূপসী রেবা

ভুলাইলে কালিদাসে

বোঁবন-বিতায় ?

(‘রেবা’—শতনরী, পৃ. ১১৬)

উপরে যে বিচ্ছিন্ন শ্লোকগুলি উদ্ধৃত করিলাম, তাহা দ্বারা, আমি করুণানিধানের ভাষায়—তঁহার diction-এর মধ্যে—যে শব্দ ও ছন্দ-গত রূপোন্নাস সর্বত্র লক্ষ্য করা যায়, তাহারই আভাস দিয়াছি। এই শ্লোকগুলিকে যে তিনভাগে ভাগ করিয়াছি তাহার সবগুলিতে ষ্টাইল একই, কিন্তু শব্দ-যোজনার রীতি এক নয়, এবং ছন্দও ত্রিবিধ। কিন্তু সর্বত্র বাণীকে সুন্দর করিয়া তুলিবার প্রয়াস, এবং বিষয়ভেদে ভাবানুভূতির বিশিষ্ট আবেগকে অমুরূপ ভাষায় ও ছন্দে প্রকাশ করিবার প্রেরণা সার্থক হইয়াছে। সকল কাব্যে ইহাই কবিদের লক্ষণ ; কিন্তু করুণানিধানের কাব্যে ভাষার এই সৌষ্ঠব বিশেষভাবে উল্লেখযোগ্য। তাঁহার কাব্য-পাঠকালে মনে হয়, শব্দের অক্ষরগুলি পর্যন্ত বর্ণে ও গন্ধে তাঁহাকে মুগ্ধ করে। ভাষা সম্বন্ধে এই অতিরিক্ত সচেতনতার জন্ম তাঁহার কাব্যে ভাবের—প্রাবল্য অপেক্ষা, সৌকুমার্য ও কোমলতাই সমধিক সঞ্চারিত হইয়াছে। কিন্তু কবি এই যে ভাষা নির্মাণ করিয়াছেন—শব্দের বর্ণ, গন্ধ ও স্বর, এই তিন উপাদানকেই তিনি যে কৌশলে বশ করিয়াছেন, তাহা কি কেবল বাণী-চর্য্যার ফল ? তাঁহার ভাষার এই অতিরিক্ত সৌন্দর্য—কল্পনা ও আবেগবিরহিত শব্দচাতুরীই নয় ; ইহা একরূপ রস-বিলাস হইতে পারে, কিন্তু তাহা কাব্য-বিরোধী নয়। কারণ, কোন ভাষাই সুন্দর হইতে পারে না, যদি তাহার মূলে ভাবাবেগ না থাকে ; যদি ছন্দই এ ভাষার সর্বস্ব হইত, তবে সে সন্দেহের কারণ থাকিত ; কিন্তু যে-রচনার ছন্দ ও ভাষা, এমন সুসঙ্গত, তাহার অন্তরালে যে একটা কবি-মানস আছে—একটা mode of perception আছে, তাহা অস্বীকার করিলে রসবোধকেই সঙ্কুচিত করিতে হয়। করুণানিধানের ভাষার এই অনবচ্ছিন্ন চারুতা তাঁহার কবি-প্রকৃতির কোন্ গুণে ঘটিয়াছে এইবার তাহাই দেখাইব। তাঁহার কাব্যে প্রধানতঃ, কোথাও প্রকৃতির রূপরাশি—শব্দচিত্রে, কোথাও বা সেই রূপ-সম্ভোগের আনন্দ—ছন্দলীলায়,

উৎসারিত হইয়াছে। প্রথমে ইহারই আলোচনা করিয়া পরে, তাঁহার কাব্যে এই প্রবৃত্তির প্রতিক্রিয়া-মূলক যে পরিণতির আভাস আছে, সে সম্বন্ধে বলিব। তাঁহার কবিতার যে মূল প্রেরণার কথা বলিয়াছি, নিম্নোক্ত পংক্তিগুলিতে তাহার স্পষ্ট পরিচয় পাওয়া যাইবে।

(১) যাহুকর চন্দ্রকর তালের বাকলে
হেথা-হোথা তুলিয়াছে রূপার ফলক,
মাধবীলতার কাঁকে বকুলের তলে
কে তরুণী মুষ্টি ভরি' ধরে চন্দ্রালোক !
(শতনরী, পৃ: ১)

(২) নাচিছে দামিনী, মেঘে পাখোয়াজ বাজে
(শতনরী, পৃ: ১৩)

(৩) হের সখি সেই দিনাস্ত-তারা
তেমনি জলে—
ডালিম-কুলের রঙ-টি ফলানো
মেঘের কোলে !
(শতনরী পৃ: ২৫)

(৪) খেত বিজুলী নিধর হরে
ঘুমিয়েছে ওই মূর্তি লরে—
শিখানে তার উজল চেউএর সারি ;
ছাড়িয়ে ঐ উষার তারা
সাম্নে নেমে আসছে কারা ?—
কটাক্ষেতে ক্ষটিক হ'ল বারি !

হেরব রূপের নীলাঙ্করে
বিরাট শিখী কলাপ ধরে,
তারায় তারায় বরণ-শোভা জাগে !

('কাঞ্চনজঙ্ঘা'—শতনরী, পৃ: ১০২-৪)

(৬) মাঝনে হেরি সুনীল ঝারি
 তালীবনের ঝাঁকে,
 গেরুয়া-রঙ, ভাঙা মাটি
 চালু পথের বঁকে ;
 ঝর্ণা-ঝালর পড়ছে ঝরি'
 শ্রামল তরু-পর্ণ 'পরি,
 আলোক-লতা অলক-জালে
 কালো পাথর ঢাকে ।

('ওয়ালটেয়ারে'—শতনরী, পৃঃ ১১২)

—এরূপ অনেক আছে । এ সব পড়িতে পড়িতে কার না মনে হয়, যে এই ভাষা ও ছন্দ কবির অন্তরের আনন্দকে মূর্তি দিবার প্রয়োজনে গড়িয়া উঠিয়াছে ? ইহা কেবল বস্তু-বর্ণনা নয়, প্রাকৃতিক দৃশ্যাবলীর যথার্থ অনুলিখন নয়,—ইহা প্রকৃতি-প্রেমিক কবির প্রিয়া-রূপ-বন্দনা । এক প্রসিদ্ধ ইংরাজ-সমালোচকের ভাষায় —“It is love of this kind that gives true significance to the poetry of nature, for only by its alchemy can the thing seen become the symbol of the thing felt.” এই ধরনের প্রকৃতি-প্রেম বাংলা কাব্যে সম্পূর্ণ নূতন । প্রকৃতির রূপ-সম্ভোগে কবির যে আবেগ এই সকল চিত্ররচনা করিয়াছে, সেই আবেগ-মূলক কল্পনা কয়েকটি কবিতায় সৌন্দর্যের যে স্বপ্নলোক সৃষ্টি করিয়াছে, এখানে তাহারও কিছু পরিচয় আবশ্যিক । 'শেফালী'-শীর্ষক কবিতায়, একটি বালিকার মৃত্যুতে কবি যে শোক প্রকাশ করিয়াছেন তাহাতেও এই প্রকৃতিরই মাধুরী করুণ-সুন্দর হইয়া যে রস সঞ্চার করিয়াছে, তাহা ইংরেজী যে কোনও উৎকৃষ্ট Dirge-কবিতার অনুরূপ ।—

ওই যে ওখানে অত্র-রজত
 শ্রোতটি বহিয়া যায়,
 উহারি পুলিনে কোথায় শেফালী
 লুকায়েছে বালুকায় ।

একেকটি করে' তারা জলে জলে,
 চাঁদের রূপালি হাসি পড়ে চলে',
 কাদে গো তটিনী ছল-ছল-ছলে
 অফুরাণ বেদনায় ।

('শেফালী'—শতনরী, পৃঃ ১২)

‘স্বপ্নলোকে’ কবিতাটি সম্পূর্ণ উদ্ধৃত না করিয়া পারিলাম না—

হেথার তারা নাইতে নামে
ভাসিয়ে ভরী জ্যোৎস্না-মাখে,
গিরি-ধরীর মুক্তগধারা
নীরব রাতে উচ্ছে বাজে ।
লুটার তাদের বসন-ঝালর
ধূসর পাবাণ-সিঁথির তটে—
অকুট-ভাবে পথের পাশে
ফুলেরা সব শিউরে ওঠে ।

তাদের চুলের ফুলের বাসে
গন্ধ হারায় গোলাপ, বেলা—
কে অপসরী সারঙ, বাজার,
কি অপরূপ সুরের খেলা !
নিদাঘ-রাতে রাখাল-ছেলে
চাঁদের আলোর ঘুমিয়ে প’লে,
স্বপ্নে শোনে নুপুর তাদের
গুঞ্জরিছে গিরির কোলে ;
তলা ভেঙে দেখে তাদের—
দূর আকাশে মিলিয়ে যায়,
পাখার ঝরে সোনার রেণু
জ্যোৎস্না-মাথা মেঘের গায় ।

আর একটি কবিতায় করুণানিধানের কবি-প্রেরণার অতি সুন্দর অভিব্যক্তি
হইয়াছে। কবিতাটির নাম ‘সন্ধ্যালক্ষীর প্রতি’। নাম শুনিয়া অনেকেরই
ইংরেজ কবি Collins-এর বিখ্যাত Ode to Evening কবিতাটি মনে পড়িবে।
কিন্তু করুণানিধানের ‘সন্ধ্যালক্ষী’ তাঁহার কাব্যলক্ষীরই প্রতিচ্ছবি; ইহাতে
Collins-এর মত কল্পনার প্রসার নাই, সন্ধ্যার বিচিত্র ভাবোচ্ছোধনী চিত্র-পরম্পরা
ইহাতে নাই। উর্দু সন্ধ্যা-রঙ্গীন নভস্তল, ও নিম্নে ধরণীর কানন-শোভা—
ইহাকেই আশ্রয় করিয়া সন্ধ্যা তাহার ‘রঙের ইন্দ্রজালে’ কবির নয়ন ভরিয়া
দিয়াছে। করুণানিধানের প্রকৃতি-প্রেম ও রূপ-রসাবেশের মধ্যে যে সরল

শ্রীতিপিপাসু কবি-প্রাণের আকৃতি আছে, এই কবিতার নিখল গীতি-
শ্রোতে তাহাই উৎসারিত হইয়াছে। কবিতাটির কিয়দংশ মাত্র উদ্ধৃত
করিলাম।—

তোমার আলো সব ভুলানো,
লো অমরী বালা !
তোমার চলীর ঝিলিমিলি,
চুলের তারার মালা ।

* * *

অলক-ঢাকা কোমল পলক,
নয়ন গরবী—
কাঙাল বায়ু বাচে তোমার
চুলের সুরভি ।
কোহিনুরের টীপটি ভালে,
কাণে রতন-দুল—
বরণ-কালের তরণ বধু
রে ছললী ফুল !
এস নেমে আমার ঘরে
তালী-বনের তলে,
এস মানস-নন্দিনি মোর,
এস আমার কোলে !

‘স্বপ্নলোকে’ কবিতাটির গঠন আরও অনবদ্য, তাহাতে ভাবের রূপটি কয়েক
পংক্তির মধ্যেই সুসম্পূর্ণ হইয়া উঠিয়াছে। এ কবিতায় আমরা, ভাবের
সূক্ষ্ম তন্তুজালের উপরে, রূপ-লক্ষীর অতিপেলব ক্ষণ-বিলীয়মান বর্ণ-সুখমাকে
সঙ্ক্যালক্ষীর চুলের তারার মত ‘চঞ্চলিয়া’ উঠিতে দেখি। এখানে রূপের
পরিষ্কৃটতা নাই, কিন্তু চিত্রাৰ্পিত আলো-ছায়ার মোহিনী আছে। এই প্রসঙ্গে
কবির রূপসন্ধানী দৃষ্টির উদাহরণস্বরূপ সঙ্ক্যালক্ষীর ‘চলীর ঝিলিমিলি’ লক্ষ্য
করিতে বলি। কবি অন্তর্ভুক্ত লিখিয়াছেন—

সোনার শলাকা বুনিত গগনে রেশমী বসন-স্তর—

অন্ত-তপন মুদিত নয়ন মহরা-বীথির 'পর। (শতনরী, পৃ: ১৪৩)

গোধূলি-আকাশের স্তিমিত অথচ তরলোজ্জ্বল আলোক-নিশান বাঁহাদের দৃষ্টিকে মুগ্ধ করিয়াছে, তাঁহারা এই বর্ণনার সূক্ষ্মতা ও যথার্থতা উপলব্ধি করিবেন।

এই সকল কবিতায় কবির অর্ধমুদ্রিত চক্রে সৌন্দর্যের যে স্বপ্নাবেশ ফুটিয়া উঠিয়াছে—মনে হয়, তাহাই আর একটু ঘোরালো হইয়া তাঁহার কাব্যে একটা অস্পষ্ট রহস্য-লোকের ছায়াপাত করিয়াছে। সেখানে কবিতার ভাষা স্পষ্ট নয়; কেবল একটা ভাবের সুর আছে—রঙ, রূপ, সব যেন একাকার হইয়া গেছে। সে যেন কবি-প্রাণের নিশ্চিন্তি-নিশীথের অস্ফুট গুঞ্জরণ; যে প্রকৃতি-প্রেমসী তাঁহাকে রূপের কুহকে মুগ্ধ করিয়াছে, তাহারই প্রতিঘন্ধিনী আর এক মূর্তি যেন ইন্দ্রিয়-জগতের ওপার হইতে আর এক ভঙ্গিতে তাঁহাকে উদ্ভাস্ত করিয়াছে। এই আলো-ছায়ার পারে, জীবন-মৃত্যুর সীমান্ত-দেশে, অকূল-অচিহ্নিতের মোহানায় তাঁহার প্রাণ যেন ধর-ধর করিয়া কাঁপিয়া উঠে, রূপ-সৌন্দর্যের সূক্ষ্ম অমুভূতি আচ্ছন্ন হইয়া যায়—‘পথের জ্যোছনা ভুলায় আমারে, কাঁপে প্রাণ-পারাবত’। উদাহরণ স্বরূপ কিছু উদ্ধৃত করিলাম।—

এইখানে সে কখন এসে

স্মৃতির লিপি গেছে ফেলে—

অন্ধকারের আল্পনাতে

স্বল্জলে তার নয়ন মেলে।

শেষ মিনতি শেষ-ভূষাতে

পাইনি নাগাল আকুল হাতে ;—

রূপ হারালো রূপের লীলা

বন-পলাশে আলোক ঢেলে।

(শতনরী, পৃ: ৫৮)

* * *

নেহারিলাম পাবাগ হ'য়ে যায় সে তনু,

নিষ্কেপিছে কটাক-শর ভুরুর ধনু।

ননী-কোমল বন্ধ গেছে মাগিক হয়ে,

হীরার গুঁড়া পড়ছে ঝরি' কপোল ব'য়ে।

চলতে নারি অচিন-পথে,—তরুর শাখে

জড়িয়ে বসন বাধ'হু মোরে শতক পাকে।

(শতনরী, পৃ: ২২০)

কারা যেন আসে সরে'

অশ্রুকাণা বিদ্ধ করে'—

চোখে পড়ে যুথের আদল ;

নিবস্ত চাঁদের কালি,

গলে' পড়ে জ্যোৎস্না-কালি,

প্রহরেরা ছায়ায় পাগল ।

পূর্ণিমার কোন্ পারে

ডাকে যেন কে আমারে

লুপ্ত অজগর রাত্রি-রূপ ;

মৃত্যু সে চুম্বকি-প্রায়

ঝিকিমিকি' নিবে যায়,—

প্রশ্ন করে নক্ষত্র নিশ্চুপ ।

—('শেষ'—ধানদুর্কা)

এই সকল কবিতায় কবির স্বভাবসিদ্ধ রূপপিপাসা যেন দ্বিধাগ্রস্ত হইয়াছে, একটা প্রশ্ন-কাতর উৎকর্ষা তাঁহাকে বিচলিত করিয়াছে । ইহাতে মিষ্টিক-ভাব নাই, বরং প্রাণের একটা জ্ঞান-সঙ্কটের পরিচয় আছে ; করুণানিধানের কবি-প্রকৃতির পক্ষে মিষ্টিক-ভাবাবেশ অসম্ভব বলিয়াই, রূপ ও অরূপের স্বন্দে শেষে তাঁহার কাব্য-প্রেরণা অবসন্ন হইয়া পড়িয়াছে—এই কবিতাগুলিতে তাহারই সূচনা আছে । আমি পরে কবিমানসের এই দিকটির আলোচনা করিব ।

এইবার করুণানিধানের কাব্য-প্রেরণার যে অপর ভঙ্গি তাহার পরিচয় দিব । এই ভঙ্গি পরিস্ফুট হইয়াছে তাঁহার কবিতার ছন্দ-লীলায় । এখানে কবিতার ভাষা ও ছন্দের কথা কিছু বলিব । সঙ্গীতের ভাব রূপ পায় সুরে ; সঙ্গীত নির্ঝাক, কাব্যের বাহন ছন্দোবদ্ধ বাণী । কবির আনন্দ গীতিকারের আনন্দ হইতে ভিন্ন ; সঙ্গীতে অতল অসীম অরূপকে ভাবের নিরাকারেই হৃদয়-গোচর করা হয় ; ইন্দ্রিয় সেখানে মন-বুদ্ধির স্পর্শ-শূন্য হইয়াই চরিতার্থ হয়, সুরই রস-সৃষ্টি করে । কাব্যের ছন্দ বাণী হইতে পৃথক নহে ; বর্ণের অন্তরালে আলোকের মত—অল্পভূতির মূলে যে আবেগ আছে, বাণীর একটি অঙ্গরূপে ছন্দ তাহারই জ্যোতনা করে ।

কাব্য-সরস্বতীর এক চরণ যেমন বাণীর উপরে, অপর চরণ তেমনই ছন্দের উপরে স্থাপিত। এই জন্ম সঙ্গীতের সুর এবং কবিতার ছন্দ ঠিক এক নহে; সুর আর কিছু অপেক্ষা রাখে না, ছন্দ বাণীর অনুগত,—ভাবকে রূপ দিবার পক্ষে বাণীর সহায়তা করে। কাব্য ও সঙ্গীতকলার মধ্যে এই পার্থক্য আছে বলিয়াই এমনও দেখা যায় যে, যে কবি উৎকৃষ্ট ছন্দ-বোধের অধিকারী, সঙ্গীতকলায় তাঁহার কিছুমাত্র অধিকার নাই। আমাদের মধুসূদন যে ছন্দের সৃষ্টি করিয়াছেন, তাহা বাংলা কাব্য-সঙ্গীতের চরম বলিলেও হয়; কিন্তু সঙ্গীতকলায় তাঁহার কোনও অধিকার ছিল বলিয়া আমরা জানি না। ইংরেজ কবি শেলীর মত ছন্দ-প্রতিভা অল্প কবিরই দেখা যায়, কিন্তু শেলীর সঙ্গীত-কলায় অধিকার থাকা দূরের কথা—অনুরাগ-ও ছিল না। অতএব, ছন্দকে বাহারা, সঙ্গীতের সুরের মত মনে করিয়া, কাব্য হইতে পৃথক করিয়া তাহার বিচার করেন, অথবা, ছন্দ-গৌরবকেই কাব্য-গৌরব হিসাবে উপভোগ করেন, তাঁহারা এই দুই বিভিন্ন কলার মধ্যে গোল বাধাইয়া কোনটারই মর্যাদা রক্ষা করেন না। ছন্দ কবিতার প্রসাধন বা অলঙ্কার নয়—ছন্দ কাব্যেরই অঙ্গ; বাণী ও ছন্দ উভয়ে মিলিয়া প্রত্যেক কবিতাকে তাহার ভাবানুযায়ী রূপ-বৈশিষ্ট্য দান করে। ছন্দ যেখানে বাণীর অঙ্গ হইয়া উঠে নাই, সেইখানেই আমরা কাব্যের কৃত্রিমতা অনুভব করি। যেখানে ভাষা ও ছন্দের এই একাত্মতা ঘটে নাই, সেইখানেই সত্যকার কবি-প্রেরণার অভাব ধরা পড়ে। এই দুইএর মিলন না হইলে রচনা ‘কাব্য’ হইয়া উঠে না।

কিন্তু কাব্যে ছন্দের স্থান এইরূপ নিরূপিত হইলেও, গীতিকাব্যে ছন্দের অধিকার কিছু অধিক হইতে পারে। আবেগ যেখানে অধিক, অহুভূতির মূলে আবেগ যেখানে প্রবল, সেখানে সেই নিছক আবেগ ছন্দ-লীলায় কতকটা মুক্তি পাইতে চায়। ভাব যেখানে গদগদ-কলভাষা আশ্রয় না করিয়া পারে না, সেখানে ভাবের রূপ কিছু অধিক পরিমাণে ছন্দের উপর নির্ভর করে। কিন্তু সেখানেও দেখা যাইবে যে, শব্দ-ঘোষনায় ছন্দের আধিপত্য থাকিলেও ভাষাই যেন ছন্দোময় হইয়া উঠিয়াছে। আরও দেখা যাইবে যে, যে ভাবাবস্থা চিন্তালেশহীন প্রীতি-বিহ্বলতার ফল, কেবল সেই ভাবাবস্থাই এইরূপ ছন্দ-লীলায় সার্থক হইতে পারে। এরূপ অনেক কবিতা পাঠকের স্মরণ হইবে, যাহা ছন্দ-হিল্লোলে শ্রুতিমধুর হইলেও চিন্তা জয় করে না; তার কারণ সে গুলিতে কবির ভাবাবেশ অপেক্ষা ছন্দ-নিষ্ঠাই

প্রবল। হৃদয় যেখানে ভাবের আবেশে নৃত্য করে, সেখানেই কবিতার এই ছন্দ-লীলা সার্থক হয়।

করুণানিধানের যে কবিপ্রকৃতির পরিচয় ইতিপূর্বে আমরা পাইয়াছি, তাহাতে তাঁহার কাব্যে এইরূপ ছন্দলীলার যথেষ্ট অবকাশ আছে। ছন্দের উচ্ছলতা তাঁহার প্রায় সকল কবিতায় আছে, তথাপি কতকগুলি কবিতায় বিশেষ করিয়া এই ছন্দের উল্লাস লক্ষ্য করা যায়। আমি উপরে গীতি-কবিতার ছন্দ-প্রাধান্য যে হিসাবে সমর্থন করিয়াছি, সেই হিসাবে সর্বত্র এই ছন্দ-লীলা সার্থক না হইলেও, অনেক স্থলে ছন্দই কবির ভাবাবেগের বাহন হইয়াছে—কাব্যলক্ষ্মীই যেন ‘আনন্দ-কাঁকন’ বাজাইয়াছেন।

(১) আমি, পড়ি নু আদি-কাব্য খানি তার সে বাহু-ইন্দ্রিতে,
ফোটে স্বর্ণ-ভাতি তার শ্রীমুখের শুক্লিতে;
কাঁপে লক্ষ যুগের পদ্ম-ফোটা ঠোঁট দুখানি ধরধরি’—
সে যে চুম্বিল রে পঞ্চশরে জয় করি’!

(শতনরী, পৃ: ৫৭)

(২) ওরে, খোল অর্ধেক উন্মীল চোখ, অঙ্গন আর কাজ নেই,—
ভলো আলতায় লাল পা’র তল তোর, মঞ্জীর ঠিক বোলবেই।
এল উৎসব-লগ্ন,
আধ’-তন্দ্রায় মগ্ন
জাগে বল্লভ তোর বন্ধের ঠাই—ধান-সুন্দর আজ সেই।

(শতনরী, পৃ: ৪৮)

(৩) দেখেছি তায় লোকের ভিড়ে
রাস-দেউলে দাঁড়িয়ে সে—
কঙ্কা-পেড়ে শাড়ীর কোণা
তর্জনীতে জড়িয়েছে।
এক মনে সে স্তম্ভেছিল
কান্থুর গানের অন্তরা—
ব্রজবধুর দীর্ঘশ্বাসে
চোখ দিয়ে জল গড়িয়েছে।

সাহিত্য-বিভান

সে যে আমার গানের মধু,
মানস-বনের অঙ্গরী,
ফুটিয়ে গেছে মাগকে মোর
কাণ্ডন-মুকুল-মঞ্জরী ।
কোন্ সে দেশে হাওয়ার ভেসে
কোথায় সে যে লুকিয়েছে—
কতদিন আর পথের পানে
চাইব দিবা-শর্করী !

('মনোহারিকা', ঝরাফুল)

(৪) নাগ কেশরের গন্ধে পাগল
সাক্ষ্য কাণ্ডন-হাওয়া,
কুণ্ঠিত কেন কণ্ঠ তুহার—
কোন্ সুরে ষায় গাওয়া ?
বন-পথে আজ ফুল-দোল-লীলা,
কুছুম ভাঙে রজন ;
'জল-তরঙ্গ'-ঝঙ্কার তুলে'
বাজাও শব্দে কঙ্কণ ।

(শতনরী—পৃ: ২৭)

(৫) দোল-দোলনে ঢিলা হ'রে সোহাগ-বেণী যাক্ খুলে,
ঢাকা দিয়ে রাখিসনে মুখ, তাকা তোরা চোখ তুলে' ।
মনের কোণে রঙ্ ধরেছে,
আকাশ-বাতাস বদলে গেছে,
মল্লী-চাঁপা-হুই-বেলাতে দধিন্-হাওয়া ষায় বলে'—
তাকা তোরা চোখ তুলে' ।
চৈত্র-রাতি, আকুল রতি কুল-শরে !
ঘর ছেড়ে চল্ তমাল-বীথির পথ ধরে' ।
কোন্ পুলিনে নীল সলিলে
খেলুবি খেলা সবাই মিলে',
মন্ত্র নিবি বন-বিহারীর মস্তুরে—
সে যে বাণীর ভাবায় ডাক দিয়েছে নাম ধরে' !

(শতনরী—পৃ: ৪৪)

এই শেষের কবিতাটিতে কবির ছন্দলীলা কোন কৈকিয়তের অপেক্ষা রাখে নাই ; সৌন্দর্য্য-মুগ্ধ কবি-দরবেশের প্রাণের নৃত্য এই কবিতার শরীরী হইয়া উঠিয়াছে—ছন্দ এখানে 'বন-বিহারীর মস্তরে' পরিণত হইয়াছে। এই কবিতাটি এই হিসাবে করুণানিধানের একটি উৎকৃষ্ট রচনা।

করুণানিধানের কাব্যে যে ধরণের রসমাধুরী যতটুকু আছে, তাহার আশ্বাদনে আমার অভিভূতা লিপিবদ্ধ করিলাম। করুণানিধান যে কবি-শিল্পী, নিজ প্রাণের রস-সংবেদনা তিনি যে অমুরূপ ভাষায় ছন্দে প্রকাশ করিতে পারেন, আশা করি, তাহার প্রমাণ আমরা যথেষ্ট পাইয়াছি। কোনও কবির নিকটে তাহার অধিক কিছু দাবী করা চলে না। কবিকর্ম পুরুষকার-সাপেক্ষ নয়, তাহা দৈবী প্রেরণার অধীন। কবির প্রাণে যাহা স্বতঃস্ফূর্ত—যাহা তাঁহার ভাব-প্রকৃতির অমুবদ্বী, তিনি তাহাই সৃষ্টি করেন, সমালোচকের ইচ্ছামুরূপ দাবী মিটাইতে পারেন না। প্রত্যেক কবির অমুভূতি-ক্ষেত্র স্বতন্ত্র, কিন্তু সেই অমুভূতি যখন শব্দে ও ছন্দে রূপ পায়, তখনই বৃষ্টি, কাব্যসৃষ্টি হইয়াছে ; এবং তাহাই যথেষ্ট। করুণানিধানের সেই অমুভূতি-ক্ষেত্র কিরূপ, তাহার সীমাই বা কোথায়—সমালোচক সেইটুকু ধরাইয়া দিতে পারিলেই তাঁহার বক্তব্য শেষ হয়। আমরা দেখিয়াছি, করুণানিধানের কাব্যে প্রাকৃতিক সৌন্দর্য্যের রূপ-রেখা শব্দ-বর্ণে চিত্রিত হইয়া উঠে, এবং সে চিত্র কবি-চিত্তের মাধুরীতে আলিঙ্গিত হয়। এই রূপ-মোহ একরূপ ইন্দ্রিয়োগ্লাসের আনন্দে কবিকে বিভোর করিয়া তোলে ; সেই তড়িতস্পর্শবৎ রূপরেখাবলী কবি আবিষ্টের মত শব্দপটের উপরে মেলিয়া ধরিয়া ঐকান্তিক তৃপ্তি লাভ করেন ; এ জগৎ কবির অমুভূতি চিন্তা-গভীর হইতে পায় না। তাঁহার অমুভূতিক্ষেত্রে রক্ত কঠিন বীভৎস বস্তুর স্থান নাই ; তার কারণ, তাঁহার প্রাণ প্রকৃতির নিকটে মাধুরী-ভিক্ষাই করে,—তাহাকে কল্পনা-বলে জয় করিয়া আত্ম-চেতনার প্রসার কামনা করে না। কবি শাক্ত নহেন, বৈষ্ণব ; যে নিশ্চিন্ত আত্ম-নিবেদন, অবশ ভাবান্তিরেক ও প্রীতিবিহীন সৌন্দর্য্য-কল্পনা মানুষকে জীবন ও জগৎ সম্বন্ধে উদাসীন করিয়া, তাহার বিচার-বৃত্তি অলস করিয়া, বৃন্দাবন-স্বপ্নের সহায়তা করে, করুণানিধানের চিন্তে সেই বৈষ্ণব-ভাব প্রবল। এই সূত্র ধরিয়া এইবার তাঁহার কাব্যে ভাবের যেমন আলোচনা করিয়াছি, সেইরূপ অভাবের দিকটাও আলোচনা করিব। কোনও কবির কাব্যে যাহা যে কারণে আছে, যাহা

নাই তাহারও কারণ যে সেই একই,—একথাটা বুঝিয়া না লইলে কাব্য-পরিচয় সম্পূর্ণ হয় না।

কল্পানিধানের কাব্যে একটা প্রধান অভাব এই যে, কবি তাঁহার অল্পভূতি-গুলি লইয়া এতই অধীর যে, সেগুলিকে কবিতায় একটা ভাবের ঐক্যসূত্রে গাঁথিয়া তুলিবার দিকে তাঁহার যেন দৃষ্টিই নাই—সামান্য যত্নে অনায়াসে বাহা করিতে পারিতেন, তাহাও করিতে তিনি যেন পরাশুখ। ‘হিমাদ্রি’ কবিতাটিতে এই দোষ সর্বাপেক্ষা প্রকট হইয়াছে—এই সুদীর্ঘ কবিতার পংক্তি-বিভাগেও অযত্ন প্রকাশ পাইয়াছে। ইহার কারণ তাঁহার কবি-প্রকৃতির মধ্যেই রহিয়াছে। পূর্বেই বলিয়াছি, যে প্রকৃতি-প্রেমের ফলে তাঁহার রচনায় “the thing seen becomes the thing felt—transformed from a cause into a symbol of delight”—সেই আবেগের ফলেই কল্পানিধানের অধীর রূপ-সৃষ্টির আগ্রহ কোনখানে স্থির থাকিতে পারে নাই। পূর্বোক্ত সমালোচকের ভাষায়—“It lacks that endorsement from a centre of disciplined experience which is the mark of the poetic imagination at the highest.” উৎকৃষ্ট সৃষ্টিকল্পনার মধ্যে যে বিচারশক্তি প্রচ্ছন্নভাবে কার্য করে, কল্পানিধানের কল্পনায় সেই বৃত্তির অভাবই তাহার কারণ। এই জগৎই জীবন ও জগতের বাস্তব-রূপের মধ্যে Ideal ও Real-এর যে দ্বন্দ্ব আছে, তাহাকে তাঁহার বৈষ্ণবভাব-বিভোর প্রাণ একেবারে পাশ কাটাইয়াছে—সে দিকটা তিনি যেন কণমাত্রও স্পষ্ট করিতে পারেন না। তাঁহার কবি-প্রকৃতির এই লক্ষণ আরও স্পষ্ট হইয়া উঠিয়াছে তাঁহার গাথা-কবিতাগুলিতে। এখানেও তাঁহার স্বভাবসিদ্ধ রূপস্বপ্নময় কল্পনা কোনও ঘটনা-কাহিনী বা চরিত্রকে আয়ত্ত করিতে পারে নাই। এ সকল কবিতায়—বিশেষতঃ ‘চণ্ডীদাস’, ‘জয়দেব’ ও ‘বাদশাজাদী’তে—কবি তাঁহার ভাষার বর্ণচ্ছটা ও ধ্বনিসম্পদ উজাড় করিয়া দিয়াছেন, এবং স্থানে স্থানে—“There are moments when the emotion seems to rise in a sudden fountain and change the thing he sees into a jewel”; কিন্তু তাহাতে গাথা-কবিতার উদ্দেশ্য সিদ্ধ হয় নাই। Keats-এর ‘St Agnes’ Eve’ অথবা ‘Isabella’-র মত কবিতায় কবির চিত্রাঙ্কনী শক্তি ও রূপপিপাসার আবেগ যেমন একটি সুন্দর ঘটনা বা কাহিনীকে ঘেরিয়া অথও রসরূপের প্রতিষ্ঠা করিয়াছে,

করুণানিধানের কবিতায় তাহা হয় নাই; তার কারণ, Keats-এর সৃষ্টিকল্পনায় যাহা ছিল, করুণানিধানের তাহা নাই—“endorsement from a centre of disciplined experience”। করুণানিধানের কল্পনায় ভাবানুভূতির মুহূর্তগুলি (moments of experience) রূপে ও রূপকে মূর্তি গ্রহণ করে; এই মুহূর্তগুলি, কার্যকারণ-সূত্রে, একটা অবশ্যজ্ঞাবী পরিণাম-পথে প্রবাহিত হয় না। এই জগুই তাঁহার গাথা-কবিতাগুলি গাথা-হিসাবে সার্থক হয় নাই। ‘চণ্ডীদাসে’ এইরূপ কতকগুলি মুহূর্ত মূর্ত হইয়া উঠিয়াছে; সে মুহূর্তগুলি এতই ভাবঘন, তাহার বাণীরূপ এতই অপূর্ব, যে মনে হয়, সেগুলিকে চণ্ডীদাসের কাহিনীর সঙ্গে যুক্ত না করিয়া ‘রজকিনী রামী’কে মাত্র কেন্দ্র করিয়া, চণ্ডীদাসের প্রেমারতির স্তোত্ররূপে গাঁথিয়া তুলিলে রসসৃষ্টি আরও সার্থক হইত; আমরা মুগ্ধ-বিশ্বয়ে চাহিয়া দেখিতাম—

ঘিরিল তাহার অলকপ্রান্ত
অপরূপতম জ্যোতি,
তারকা-খচিত আকাশের তলে
দাঁড়িয়ে রহিল সতী।

—ইহার পরের অংশ সম্পূর্ণ অনাবশ্যক। ‘জয়দেব’ কবিতায় কবি-শিল্পীর ভাষা ও চিত্র-রচনা অল্পদিক দিয়া সার্থক হইয়াছে। এ কবিতায় প্রথম হইতে শেষ পর্যন্ত একটা unity of atmosphere আছে, এবং সে atmosphere সৃষ্টি করিয়াছে—‘বিরাট মন্দিরচূড়া ছায়া যার পড়ে না ভুতলে’, ‘মরুৎ-ডম্বরু-মস্ত্রে উতরোল অশ্বধি-গর্জন’; সমস্ত কাহিনীকে আচ্ছন্ন অভিভূত করিয়া এক বিরাট গম্ভীর ভাব-দেবতার আরতি-শব্দ এই কবিতায় প্রথম হইতে শেষ পর্যন্ত ধ্বনিত হইয়াছে। কিন্তু ‘বাদশাজাদী’র কাহিনী রূপ-রসে টলমল করিলেও সুস্বাদু আকার লাভ করে নাই। তিনটি গাথার মধ্যে এইটির মধ্যেই নাটকীয় ঘটনা সন্নিবেশের অবকাশ ছিল। এ কাহিনীকে চিত্ররূপে আয়ত্ত করা যায় না। ইহার মধ্যে ঘটনা-পরম্পরার গতিবেগ কবির রূপসম্ভোগ-স্পৃহাকে যেন বারবার ব্যাহত করিয়া ছন্দকে আরও বেগবান করিয়াছে। বাদশাজাদীর এই ছন্দ খাঁটি ballad-এর উপযোগী; এই ছন্দের দ্বারাই প্রমাণ হয়, এই কাহিনীর মূল-প্রেরণা কবিচিন্তে ঠিকই ধরা দিয়াছে, তথাপি ইহার গঠনে কবির কল্পনাশৈথিল্য প্রকাশ পাইয়াছে।

এই গাথাগুলির মধ্যে একটি কবিতা আছে, তাহার নাম 'চিরকুমার'; এই কবিতাটি পড়িলে করুণানিধানের কবি-প্রতিভার বৈশিষ্ট্য আবার স্পষ্ট হইয়া উঠিবে,— গাথাই হোক আর যাহাই হোক, কবিতাটি প্রথম হইতে শেষ পর্যন্ত করুণানিধানী কাব্যরসের একটি উৎকৃষ্ট নিদর্শন।

করুণানিধানের কাব্যে এই যে অভাবের দিকটার আলোচনা করিলাম, ইহার জন্ত তাঁহার কাব্যলক্ষীকে দায়ী করি না; তাঁহার কবিপ্রতিভার বৈশিষ্ট্য যদি বুঝিয়া থাকি, তবে এ আলোচনায় কবির সেই পরিচয় আরও স্পষ্ট হইয়া উঠিবে। কিন্তু এই প্রসঙ্গে আর একটা কথা না বলিলে আলোচনা অসম্পূর্ণ থাকিবে বলিয়া মনে করি। ইতিপূর্বে তাঁহার কাব্যে যে একটা অস্পষ্ট প্রসঙ্গাতর উৎকণ্ঠার সুর আমরা লক্ষ্য করিয়াছি সে সম্বন্ধে কিছু বলিবার আছে। তাঁহার কাব্যের এই ভক্তি নিতান্ত হেঁয়ালি-রচনার খেয়াল নয়, এই সুর আর এক ভক্তিতে তাঁহার কাব্যে ক্রমশঃ স্পষ্ট হইয়া উঠিয়াছে, এবং তাঁহার কল্পনার স্বাস্থ্যহানি করিয়াছে। কারণ, আমরা ইহাও লক্ষ্য করিয়াছি যে, করুণানিধানের মত সৌন্দর্য-বিভোর রূপরস-পিপাসুর কাব্যবীণায় একটা তার বড় বেশুরা বাজিয়াছে—একটা কাতর ভীতি-বিহ্বল বৈরাগ্যের সুর অত্যন্ত অপ্রাসঙ্গিক ভাবে কতকগুলি কবিতায় বার বার দেখা দিয়াছে। অপ্রাসঙ্গিক বলিলাম এই জন্ত যে, যে-কবিতার মূল-প্রেরণাই বৈরাগ্য, সে কবিতার বিরুদ্ধে কিছু বলিবার নাই; কিন্তু যে সকল কবিতার মূল-প্রেরণাই সৌন্দর্য-বিভোরতা—সেখানে সেই অবস্থাতেই এই সৌন্দর্যের পরিবর্তে 'চিরন্তন ধ্রুবে'র নিকটে আত্ম-সমর্পণের ভাব, পৌরাণিক ভক্তিভাবের ঔদাসীন্য, বা আধ্যাত্মিক সত্যপিপাসার বেদনা—এই সকল কবিতার গৌরব ক্ষুণ্ণ করিয়াছে। 'হরিদ্বার' 'হিমাদ্রি' বা 'শ্রীক্ষেত্রে'র প্রাকৃতিক সৌন্দর্যের সঙ্গে ঘটটুকু তীর্থ-মাহাত্ম্য বা পৌরাণিক স্মৃতি জড়িত আছে, এই কবিতাগুলিতে সেই তীর্থ-মাহাত্ম্যই তাঁহার সৌন্দর্য্যাত্মকতাকে খর্ব করিয়াছে—প্রাকৃতিক শোভায় তন্ময় হইতে গিয়া কবিকে যেন আত্ম-সম্বরণ করিতে হইয়াছে। তাই, 'ওয়ালটেয়ারে'-শীর্ষক কবিতায় কবির যে আশ্চর্য্য প্রকৃতি-প্রেমের পরিচয় পাই, তাহাতেও এই পুরাণ-কথার আকস্মিক অবতারণায় রসভঙ্গ হইয়াছে। কেবল 'কাঞ্চনজঙ্ঘা' কবিতায় কবির রূপ-পিপাসা সকল রূপের সীমায় পৌঁছিতে চাহিয়াই কাঞ্চনজঙ্ঘার অলোক-সম্ভব রূপ-জ্যোতির সম্মান রক্ষা করিয়াছে। কেহ যেন মনে না করেন যে, আমি এইরূপ

ভক্তিতাব বা আধ্যাত্মিক পিপাসার বিরোধী ; রূপ হইতে অরূপে পৌঁছিবার একটা সহজ মানস-সেতু আছে তাহা আমি স্বীকার করি। কিন্তু এই সকল কবিতায় যে আধ্যাত্মিকতার প্রয়াস আছে তাহা করুণানিধানের কবি-প্রকৃতির পক্ষে একটা কৃচ্ছ্রসাধন—ইহা তাঁহার কাব্য-প্রেরণার পরিণতি নয়, বরং একরূপ বিপরীত গতি বলিয়াই মনে হয়। “সন্ধ্যালক্ষীর প্রতি” কবিতার কবি যাহার আবাহন করিয়াছিলেন, এই সকল কবিতার অংশবিশেষ পড়িবার পর, তাঁহার সেই কাব্যলক্ষীকে বলিতে ইচ্ছা হয়—‘বদ প্রদোষে ক্ষুটচন্দ্রতারকা বিভাবরী যতরুণায় কল্পতে !’

করুণানিধানের কবিজীবনে একটা অকাল-বিপ্লব ঘটিয়াছে, তাঁহার কবিমানস অতি দ্রুত অবসাদ-তিমিরে আচ্ছন্ন হইয়াছে। ইহার কারণ কবির ব্যক্তিগত জীবনযাত্রার ইতিহাসে বোধ হয় মিলিবে। তথাপি যে-কবি বিশেষ করিয়া সৌন্দর্যের মোহিনী মায়ার এমন বশীভূত—তাঁহার চিত্তেও এ বৈরাগ্য-পিপাসা কেন ? সকল সৌন্দর্যের সঙ্গে একটা নশ্বরতার ছায়া জড়িত আছে সত্য, এজন্য সৌন্দর্যের মধ্যে একটা গভীরতর বেদনার অনুভূতি আছে ; তথাপি, সৌন্দর্য সর্বজয়ী। পূর্বোক্ত ইংরাজ লেখক যথার্থই বলিয়াছেন—

“The faith in it endures : for the discernment of beauty is a mode of perception that is adequate to all the fates can bring. Disillusion has no power against it ; it cannot merely conquer, but make part of itself its regret for its own impotence ;...and the lovers of beauty are perhaps more fortunate than the lovers of justice, or love.”

কিন্তু সৌন্দর্যের এই impotence—এই নশ্বরতার ছায়াই করুণানিধানের সৌন্দর্য-মোহকে বিচলিত করিয়াছে ; তাহার কারণ পূর্বেই বলিয়াছি—করুণানিধান শাক্ত নহেন, বৈষ্ণব। সৌন্দর্য-পিপাসার সঙ্গে যে ভাবুকতা-শক্তি থাকিলে এই ক্ষণ-সুন্দরকেই চির-সুন্দরের রূপে বরণ করিয়া—

And some win peace who spend
The skill of words to sweeten despair
Of finding consolation where
Life has but one dark end ;
Who, in rapt solitude, tell o'er
A tale as lovely as forlore,
Into the midnight air.



—সেই শক্তি তাঁহার নাই ; তাই, বার বার এই কণ-স্বন্দরের মোহই তাঁহাকে চির-স্বন্দরের ছায়ায় হাহাকার করাইয়াছে । কিন্তু তাঁহার কবিপ্রাণ সে সাধনা আজিও পায় নাই—এ স্বন্দের অবসান ইহজীবনে হইবে না । তাই, মনে হয়, ‘উদ্দেশে’-শীর্ষক কবিতায় বিয়োগ-বিধুর কবির সাধনানাভের প্রাণপণ চেষ্টা দেখিয়া অতি নিষ্ঠুর অদৃষ্ট-দেবতাও হস্ত সঞ্চরণ করিবে ।*

* এই প্রবন্ধে উক্ত ইংরাজী উক্তিগুলি J. Middleton Murry-প্রণীত ‘Countries of the Mind’ নামক গ্রন্থ হইতে লইয়াছি—লেখক ।

রবীন্দ্র মৈত্র

রবীন্দ্রনাথ মৈত্রকে আমি দেখিয়াছিলাম ; যাহারা দেখে নাই তাহারা তাহাকে চিনিবে না। বাংলাদেশের আধুনিক 'সাহিত্যিক' সম্প্রদায়ের পরিচয় ছাপার হরফেই ভালো কারণ তাহারা মানুষ নয়, কেতাব। কিন্তু যে মানুষের জীবন-তথ্য তাহার আকৃতিতে, চলনে বলনে, চোখের দৃষ্টিতে, কণ্ঠস্বরে চাক্ষুষ হইয়া উঠে,— যাহার ব্যক্তিত্ব যেন সর্ব অঙ্গে মূর্ত হইয়া ওঠে, তাহার পরিচয় কেবল কথায় দেওয়া যায় না ; রবীন্দ্র মৈত্র নামক মানুষটি বাহিরে ধরা দিয়াছিল আর দুইটি রূপে—তাহার কর্মে ও তাহার সাহিত্য-সাধনায়। প্রথমটির সঙ্গে দ্বিতীয়টির মিল ঘটে নাই ; এই উভয়ের মধ্যে যেখানে সামঞ্জস্য ছিল সেখানটিতে দৃঢ় প্রতিষ্ঠিত হইবার পূর্বেই—অর্থাৎ নিজেকে সম্পূর্ণরূপে নিজেদের মধ্যে আয়ত্ত করিবার পূর্বেই সে চলিয়া গিয়াছে। এই সামঞ্জস্য-সাধনে সে প্রায় সিদ্ধিলাভ করিয়াছিল—দ্বিদল চণকের সন্ধিস্থলে অঙ্কুর-উদগম হইতেছিল ; আশা-বিস্ময়ে উন্মুখ হইয়াছিলাম, বাংলাসাহিত্যে এক প্রাণবান শক্তিমান রসিক লেখকের অভ্যুদয় স্থনিশ্চিত মনে করিয়া পুলকিত হইয়াছিলাম।

সে তাহার জীবনের প্রথম ভাগ নিয়োজিত করিয়াছিল কর্মে, সে কর্মের প্রেরণা ছিল তাহার হৃদয়ে। বর্তমান যুগের বাংলাদেশ তাহাকে 'নিশির ডাকে'র মত ডাক দিয়াছিল—তাহার প্রাণ স্বপ্নবিভোর, দেহ ছিল জাগ্রত ; কর্মের পশ্চাতে ছিল ছরস্তু হৃদয়াবেগ, বাস্তবের ভাবনা ছিল প্রেমের আশায় ও প্রেমের বিশ্বাসে প্রদীপ্ত। এই হৃদয়াবেগের সঙ্গে ছিল বলিষ্ঠ মনন-শক্তি,—সে একজন উৎকৃষ্ট বক্তা ছিল। তাহার চোখ দুইটি ছিল আশ্চর্য জ্যোতির্শয়, আবেগে বিস্ফারিত ও বুদ্ধিতে উজ্জ্বল। এই সব লইয়া সে ধর্ম, সমাজ ও রাষ্ট্র সেবায় ঝাঁপাইয়া পড়িয়াছিল। এত বড় অস্থির মানুষ আমি আর দেখি নাই, তাহার দেহ-মনে সর্বদা একটা বিদ্যুৎ খেলিয়া বেড়াইত। একই মানুষের মধ্যে, একই কালে, এমন ভাবগভীর আন্তরিকতা ও ব্যঙ্গকুশল রঙ্গরসিকতা আমি আর কোথায়ও দেখিয়াছি বলিয়া মনে হয় না। সময় নাই অসময় নাই, ঝড়ের মত সে আসিয়া পড়িত ;

হয় ত অনাহারেই আছে, জরুপ নাই; দুই তিন ঘণ্টা তর্ক করিয়া, যুক্তি ও আবেগের অদ্ভুত ঝড় বহাইয়া, নিজের রচনা শুনাইয়া সে আবার ঝড়ের মত নিরুদ্দেশ হইয়া গেল; কারণ, আর দাঁড়াইবার সময় নাই,—রাত্রি বারোটা পর্যন্ত তাহার কাজ আছে, ভূতের বেগার আছে, মুচি-মেথরের বস্তিতে পাঠশালার কাজ আছে, আরও কত কি আছে। তথাপি তাহার চোখ সর্বদা হাসিতেছে, ক্রান্তি বা অবসাদের লেশমাত্র তাহার দেহে মনে কোথাও নাই।

এই ব্যক্তি ছিল লেখক, বাংলার বাণী-মন্দিরে ভক্তসাধক! লেখাও কম নয়, একদিকে সমাজ, ধর্ম ও রাজনীতি; অপরদিকে ব্যঙ্গ-কৌতুক, কবিতা, গল্প, উপন্যাস, ও সর্বশেষে নাটক। এই অজস্রতা ও অবাধ প্রবাহের শক্তি দেখিয়া মনে মনে বিস্মিত হইতাম। তথাপি মাহুঘটার মধ্যে যে শক্তির আভাস পাইতাম, সাহিত্যরচনার তাহা অসম্পূর্ণ বলিয়া মনে হইত। অল্পকৃতিমূলক ব্যঙ্গ-রচনায় তাহার স্বজনীশক্তির পরিচয় পাইয়াছিলাম, কয়েকটি ছোটগল্পে তাহার কৃতিত্ব লক্ষ্য করিয়াছি; কিন্তু এ সকলের মধ্যে, কল্পনার মৌলিকতা, দৃষ্টিশক্তি, ও ভাবকের অল্পকম্পা থাকিলেও, ভাষায় ও রচনাভঙ্গিতে উৎকৃষ্ট শিল্পীমনের বিশিষ্ট ছাপ তখনও ফুটিয়া উঠে নাই। বুঝিতাম, এই শক্তিমান পুরুষ এখনও আত্মস্থ হয় নাই; নিজশক্তিকে ঠিক মত প্রয়োগ করিয়া আপনাকে আপনি চিনিয়া লইবার অবকাশ তখনও হয় নাই। সাহিত্যিক প্রতিভা তাঁহার জন্মগত সম্পদ হইলেও অনগ্রমণা হইয়া তার সাধনায় ত্রুতী হইতে সে এখনও পারে নাই—তাহার সাধন-মন্ত্র এখনও বিধায়ুক্ত হইয়া আছে। তাহার যে সকল রচনা তখন পর্যন্ত আমি দেখিয়াছি তাহার বৈচিত্র্যে ও বলিষ্ঠতায় একটি সদাজাগ্রত হৃদয়, সাহসী মন, ও তীক্ষ্ণ চকিত দৃষ্টির পরিচয় ছিল। যে ঝড়ের মত জীবন সে যাপন করিত, সেই ঝড়ের একটা লীলার দিক এই সকল রচনায় প্রকাশ পাইত—শক্তি আছে, বেগ আছে, যথেষ্ট বিচরণের যোগ্যতা আছে, কিন্তু সে কোথায়ও দাঁড়ায় না, বসে না; ফলটি ফলটি যাহা পথে পড়ে তাহাই কুড়াইয়া লইয়া আসে, ছড়াইয়া যায়; যাহা পার তাহাকে ধ্যানের বস্ত্র করিয়া, অখণ্ড মানস-স্বপ্নে গাঁথিয়া, শিল্পী মনের গভীরতর পিপাসা উল্লেখ ও নিবৃত্তি করিবার অবসর যেন তাহার নাই। তাই তাহার রচনা-শক্তির প্রাচুর্য্য সত্ত্বেও তাহাতে সেই স্বর লাগে নাই, যাহা শিল্পীর আত্ম-প্রত্যয় বা আত্মদর্শনের স্বর—যে স্বর রচনায় একবার বাজিয়া উঠিলে কাহারো

প্রতিভা সম্বন্ধে আর সংশয় থাকে না। তথাপি, রবির কর্মজীবন ও সাহিত্য-চর্চা—এই দুই দিকেই দৃষ্টি রাখায়, আমি আধুনিক সাহিত্যসম্বন্ধে একটা নূতন জিজ্ঞাসার উত্তর প্রতীক্ষা করিতেছিলাম।

সকল যুগ সাহিত্য-সৃষ্টির যুগ নয়, কবি-প্রতিভার অধিকারী হইয়াও যুগ-প্রভাবের বশে কত লেখক পথভ্রষ্ট হইয়াছেন—কাব্য লিখিতে গিয়া বকৃত্য লিখিয়াছেন, অথবা ভাবপ্রধান প্রবন্ধ রচনা করিয়াছেন। কোন যুগে হয়ত মানুষের মনের পিপাসা রসপিপাসাকে অতিক্রম না করিয়া পারে নাই—সে যুগের কাব্যে ছন্দ-সঙ্গীত আছে, লিপিচাতুর্য আছে, আশ্চর্য্য উপমা-সমুচ্চয় আছে, ভাবের মৌলিকতাও হয়ত আছে—কিন্তু কল্পনা বা সৃষ্টিশক্তি পাণ্ডিত্য-প্রয়াসের দ্বারা আচ্ছন্ন। আমাদের সাহিত্যে গত যুগের কবিদিগের মধ্যে এমনই একজনকে দেখিতে পাই, যাহার উপর সে যুগের একটি প্রধান প্রবৃত্তি বিশেষ করিয়া ভর করিয়াছিল—ইনি ‘মহিলা কাব্যে’র কবি সুরেন্দ্রনাথ মজুমদার। যাকে রবীন্দ্রনাথের যুগ গিয়াছে, সে যুগ সম্বন্ধে এখানে কিছু বলা অপ্ৰাসঙ্গিক। তারপর আজ আমরা যে যুগে বাস করিতেছি তাহাতে ভাব বা চিন্তার সমস্তা নয়—জীবনের সমস্তাই প্রবল হইয়া উঠিয়াছে; এখন পাণ্ডিত্যও নয়, নিরুৎসাহ সৌন্দর্য্যচর্চাও নয়—এ যুগের প্রধান প্রবৃত্তি কর্মপথে জীবন-জিজ্ঞাসা। আমাদের দেশের যে অবস্থা, তাহাতে এই কর্মও স্ফূর্তি পাইতেছে না; কর্ম অর্থে অতি সঙ্কীর্ণ স্বার্থ-সন্ধান, এবং জীবন-জিজ্ঞাসার নাম কাম-প্রবৃত্তির উদ্দাম অধ্যবসায়। অতএব এ যুগও সাহিত্যসৃষ্টির যুগ নয় বলিয়াই মনে হইতে পারে। একদিকে যেমন চিন্তা ও ভাবুকতার অবকাশ নাই, আর একদিকে তেমনই জীবনের সম্মুখীন হইবার সাহস নাই। কিন্তু ইতিমধ্যে এই অধঃপতিত সমাজে একাধিক মহাপুরুষের জীবন ও বাণী জাতির হৃদয়-গোচরে প্রকাশিত হইয়াছে। স্বামী বিবেকানন্দের বাণীমূর্তি—তার সেই তুর্নিরীক্ষ্য অ্যোতিশ্চর্য্যা,—আমরা চোখ মেলিয়া দেখিতে পারি নাই বটে, কিন্তু সে বাণী ব্যর্থ হয় নাই, হইবার নয়। মনুষ্য-দেহে দিব্য-আত্মার প্রকাশ কচিং হয়; যখন হয়, তখন জগতে মনুষ্যর আসন্ন হইয়াছে বুঝিতে হইবে। বিবেকানন্দকে আজও আমরা চিনি নাই, তার কারণ, আমরা যুক্তিবাদী ও ‘প্রগতি’-বাদীর আখড়ায় পরধর্মের উচ্ছিষ্টভোজে এখনও লালায়িত; প্রাণধর্মের দিব্যমন্ত্রে এখনও সাড়া দিতে পারি নাই; দেশ ও জাতির শত জ্বলের চেতনা-

গহনে যে বিরাট আত্মা পথ হারাইয়া পথ খুঁজিতেছিল, তাহার সেই আকস্মিক পথ-প্রাপ্তির দৈব-ঘটনাকে আমরা বিশ্বাস করিতে পারি নাই—এখনও সূর্য্যকে অস্বীকার করিয়া আলোয়ার অহুসরণ করিতেছি। কিন্তু বিবেকানন্দ আমাদের চিনিয়াছিলেন, তাই বিংশশতকের আরম্ভ হইতেই অচল-চক্র চলিতে শুরু করিয়াছে, সে চালনা উত্তরোত্তর প্রবল হইতেছে। দ্বিতীয় মহাপুরুষের বাণী শেষ হয় নাই, সে বাণীমূর্ত্তি আমরা এখনই প্রত্যক্ষ করিতেছি। বর্তমান যুগে এই দুই বীর-মানব মনুষ্যের মহাপ্রাবন রোধ করিয়া মৃত্যুশ্রোতের উপরে যে সেতু নির্মাণ করিয়াছেন, তাহাতে অনেকে আরোহণ করিতেছে, সেই জাঙ্গাল ধরিয়াই জয়যাত্রা শুরু হইয়াছে। বর্তমানে এ জাতির মধ্যে যেখানে যেটুকু জীবন-স্ফূর্ত্তি ঘটিয়াছে, তাহার মূলে আছে এই দুই মহাপুরুষের প্রেরণা—এ বিষয়ে এ যুগে ইহাদের পূর্ববর্ত্তী আর কেহই নাই; একথা অস্বীকার করিয়া—সাম্প্রদায়িকতার মোহে, কোনও মিথ্যাকে এখনও খাড়া করিয়া রাখিবার চেষ্টা শুধুই নিরর্থক নহে, তাহা নীচতা ও শঠতার পরিচায়ক।

অতএব আজিকার সমাজে জীবন যে কোথায়ও নাই এমন কথা আর বলা চলে না। কিন্তু এই জীবন-চর্য্যা কি সাহিত্যচর্চার অহুকূল? প্রকৃষ্ট কিছুকাল যাবৎ আমার মনে নূতন করিয়া জাগিয়াছে। জাতির মধ্যে যে চাঞ্চল্য দেখা গিয়াছে—একদিকে যে অতিরিক্ত ভাবাবেগ, আত্মলট্টতা ও অসংযম, এবং অপরদিকে যে ধরণের কস্মোয়াদ, আত্ম-উৎসর্জনের অধীরতা—তাহাতে সাহিত্যিক প্রেরণা বা কবিকার্যের অবকাশ কোথায়? বিংশশতাব্দীর এই মনুষ্যমুখে আমরা আজ পর্য্যন্ত সাহিত্যে বিশেষ বড় কিছু গড়িয়া তুলিতে পারিয়াছি? যাহা কিছু উৎপন্ন ও সূপীকৃত হইয়াছে, তাহা গত যুগের আদর্শ বা প্যাটার্নের উপর সূক্ষ্মতর সূচীকর্ষ মাত্র—শ্রোতোহীন বন্ধ জলরাশি যতই বিস্তৃতি লাভ করিয়াছে, ততই তাহা অগভীর হইয়াছে। ইহার কারণ, জীবনে যে বান ডাকিয়াছে তাহার গতি ভিন্নমুখী; সাহিত্যের যে আদর্শে আমরা দীক্ষিত হইয়াছিলাম তাহা ভাবাকুল আত্মপ্রসাদের আদর্শ; জীবনকে ফাঁকি দিয়া, মনুষ্যত্ব ও পৌরুষকে উপেক্ষা করিয়া, জীবিতের জীবনধর্ম্মকে অবজ্ঞা করিয়া, আমরা এক অতিসুন্দর মিথ্যার উপাসনা করিয়াছিলাম। এই মানস-আদর্শের দৃষ্টও কম ছিল না; ইহার পশ্চাতে ছিল উপনিষদের ব্রহ্মবাদ; কুসংস্কার ও পৌত্তলিকতার বিরুদ্ধে জ্ঞান-বিজ্ঞানের

আক্ষালন ; স্বকৃতি, সৃষ্টি ও বিবেকের নামে আত্মস্বত্বস্বাধীনতার অঙ্গসম্বোধনা ; কুৎসিত কুরূপ ও কর্দ্দমাক্ত বলিয়া জাতি সাধারণের স্পর্শ বাঁচাইয়া একটা নূতন ধরণের কাঞ্চন-কৌলীন্তের প্রতিষ্ঠা। সমগ্র শিক্ষিতসমাজে, প্রত্যক্ষ বা পরোক্ষভাবে এই মনোবৃত্তির প্রসার-কল্পে সাহিত্য কম সাহায্য করে নাই। এ আদর্শের প্রভাব এখনও সাহিত্যে প্রবল ; অথচ জীবনে যেটুকু সত্যের সাড়া জাগিয়াছে, তাহা এ আদর্শের প্রতিকূল। এ যুগে জীবনের গভীরতর প্রবৃত্তির সঙ্গে এই স্বসৃষ্টিত ও স্বপ্রতিষ্ঠিত সাহিত্যধর্মের বিরোধ আরও প্রাণহীন করিয়া তুলিয়াছে ; এককালে সাহিত্য যেমন জীবনের সত্যকে পরাভূত করিয়াছিল, এখন তেমনই, জীবনের সত্য সাহিত্যে প্রতিষ্ঠা-লাভের প্রয়াস পাইতেছে। কিন্তু জীবনে এখনও সে দৃষ্টি আসে নাই—জীবনের অন্তস্তল হইতে যে সত্যসুন্দরের অভ্যুদয় হইবে, তাহারই দিবা-প্রতিভায় অতঃপর সাহিত্যের নবকলেবর নির্মাণের সময় আসিতেছে।

সময় এখনও আসে নাই—আসিতেছে। অতি-আধুনিক সাহিত্যের যেরূপ দেখিয়া আমরা শিহরিয়া উঠিতেছি, উহাতে কোনও নূতন প্রবৃত্তির প্রেরণা নাই ; জীবনাবেগ-বর্জিত, পৌরুষ ও মনুষ্যত্বজোহী যে কুৎসিত মানস-ব্যভিচারকে আমরা উচ্চাঙ্গের সত্য বা স্বাতন্ত্র্যসাধনা বলিয়া আশ্বস্ত হইতে চাই—তাহা পূর্বতন সাহিত্য-ধর্মেরই অবশ্যস্তাবী স্বাভাবিক পরিণাম ; আধুনিক কালে জাতির যে জীবন-সমস্তা কাপুরুষ মানস-বিলাসীর আত্মপ্রসাদ বিম্বিত করিয়াছে, ইহা তাহাকেই অস্বীকার করিবার চেষ্টা। ইহা যে নূতন নয়, পুরাতনেরই অবশ্যস্তাবী পরিণাম, তাহার প্রমাণ—এই আধুনিক সাহিত্য-ব্যভিচারের প্রতি সে যুগের সাহিত্যনায়ক মহাকবির অদ্ভুত মনোভাব। রবীন্দ্রনাথ ইহাকে স্বীকার করিতেও কুণ্ঠিত, অস্বীকার করিতেও অসমর্থ—কোথায় যেন একটা মমতাবন্ধন আছে। ইহারা যে বাস্তব জীবন-নীতি, দেশ ও জাতিধর্মের প্রতি অন্ধাঙ্কিত নয়, ইহারা যে কোনও সংস্কারের দাসত্ব করে না—স্বল্প মানসিকতা বা ভাব-বিলাসের পক্ষপাতী ; ইহাদের কৃতি ও রসিকতা যে অতি-আধুনিক যুরোপ বা ‘বিশ্বের’ আদর্শে সঙ্গত, ইহাই বোধ হয় রবীন্দ্রনাথের আশ্বাসের কারণ ; কিন্তু সেই সঙ্গে কোভ ও লজ্জার কারণ এই যে, ইহাদের সৌন্দর্য্যজ্ঞান বা আর্টের আদর্শ খুব বিস্তৃত পরিচ্ছন্ন নহে, ইহাদের মানস-বিলাসে

একটা ক্রটির শৈথিল্য আছে, মনের সাজসজ্জায় ছুই রঙের তালি-দেওয়ার মত ইতরামি আছে; এইখানে বাধে, মানস-বিলাসের সত্য-শিব-সুন্দর এইখানে ক্ষুণ্ণ হয়। তাই দেখিতে পাই, গত যুগের সাহিত্যাবতার এ যুগে বড়ই অস্বস্তি ভোগ করিতেছেন, দিশাহারা হইয়া পড়িয়াছেন, কাব্য ছাড়িয়া চিত্রকলার আশ্রয় লইতেছেন, জাতি ও সমাজের পরিবর্তে 'বিশ্ব,' এবং সুন্দরের পরিবর্তে মহামানব-বিগ্রহের সেবায় রত হইয়াছেন।

যতই দিন বাইতেছে ততই স্পষ্ট প্রতীয়মান হইতেছে যে এযুগে সাহিত্যের সে আদর্শ অচল; কারণ, সত্য ও সুন্দরকে এখন আর মানস-বিলাসের সামগ্রী করা চলে না। জীবনের কর্মক্ষেত্রে মানুষের ডাক পড়িয়াছে; সেবায় ও ত্যাগে, মহুগ্ধ ও পৌরুষের মহিমায় সত্য-সুন্দরের অভিনব প্রকাশ মানুষের চোখ ধাঁধিয়া দিতেছে। অস্তরের গভীরতম আবেগ আজ ভিন্নমুখী; সেই মুখে সাহিত্য যদি আজ আপনাকে স্থাপিত করিতে পারে, তবেই এযুগে সাহিত্যসৃষ্টি সম্ভব। নতুবা সাহিত্যক্ষেত্রে বানরের ব্যভিচারই প্রশ্রয় পাইবে।

কিন্তু জীবন-বণ্ডার এই অতি বেগবান স্রোতে আত্মসমর্পণ করিয়া, তাহারই গতি নিয়ন্ত্রিত করিয়া, যাহারা সিন্ধুসন্ধানে চলিয়াছে—যাহারা বৃহৎ ও মহৎকে, সত্য ও সুন্দরকে, কর্মের মধ্যে উপলব্ধি করিবার বাসনায় অধীর হইয়াছে তাহারা কি সাহিত্যধর্মী? রস-চর্চা, আর্টের মর্যাদা-রক্ষা, খাটি কবিকল্পনার আবেগ কি তাহাদের পক্ষে সম্ভব?—সাক্ষাৎভাবে হয়ত নয়। কিন্তু যাহারা সাহিত্যিক প্রতিভা লইয়া জন্মিয়াছে, এ যুগের এই প্রবলতম প্রবৃত্তি তাহাদের সেই প্রতিভাকে প্রভাবিত করিবে না? যুরোপীয় বহু কবি-সাহিত্যিকের জীবনেতিহাস হইতে দৃষ্টান্ত দ্বারা এমন সিদ্ধান্তের সমর্থন করা বাইতে পারে যে, জীবনের সঙ্গে ঘনিষ্ঠতর পরিচয়, প্রত্যক্ষ-বাস্তবের ক্ষেত্রে প্রাণশক্তির সাধনা—সাহিত্যসৃষ্টির অন্তরায় নহে; বরং জীবনকে আরও গভীরভাবে উপলব্ধি করিয়াই কবিকল্পনা শক্তি ও সমৃদ্ধি লাভ করিয়াছে। প্রত্যক্ষভাবে এই ঘূর্ণাবর্তে ঝাঁপ না দিলেও, যাহাদের ভাবনা ও কল্পনাশক্তি সুন্দর ও সতেজ—জাতির জীবন-ধর্ম-সাধনা, যুগ বিশেষের সমষ্টিগত প্রেরণা, তাহাদের ব্যক্তি-চেতনায় সাড়া পাইয়াছে, রস-সঞ্চারের অক্ষুণ্ণ হইয়াছে। কিন্তু আমাদের কাব্য-সংস্কার ও কবি-প্রবৃত্তি রসের যে আদর্শকে চিরদিন বরণ করিয়া আসিয়াছে, তাহার মতে, কাব্য-জগৎ বাস্তব-জীবনের ক্ষেত্রে

হইতে এতই দূরে যে, এ দুইএর মধ্যে কোনরূপ সম্বন্ধ ঘটিলে কাব্যের রসহানি অনিবার্য। তার কারণ, আমরা কবিগণকে মনুষ্য হইতে পৃথকরূপে ধারণা করি, আমাদের কাব্যসাধনা একরূপ বানপ্রস্থ। জীবনের সঙ্গে সাহিত্যের যোগ আমরা কখনও স্বীকার করি নাই, আমাদের সাহিত্যিক আদর্শ চিরদিনই অসম্পূর্ণ। তাই আজ জীবন যখন এমন করিয়া আমাদের সর্ব-চেতনাকে গ্রাস করিয়াছে, তখন আমরা সাহিত্য-ধর্ম বজায় রাখিবার কোনও উপায় আর দেখিতেছি না। পুরাতন আদর্শবাদীরা আজ চমকিত, বিভ্রান্ত; নূতন আদর্শের নূতন প্রেরণা এখনও নূতন রস-রূপের সন্ধান পায় নাই।

একই কালে জীবনের প্রবল তরঙ্গাভিঘাত নিজ বক্ষপঞ্জরে ধারণ করা, এবং তাহারই মধ্যে ধ্যাননিবিষ্ট দৃষ্টিতে রস-রূপের সাক্ষাৎকার—আজিকার সাহিত্য-সাধনায় কবিপ্রতিভার এই দুর্লভ পরীক্ষা উপস্থিত। ভবিষ্যৎ কবি-শিল্পী হয় ত কল্পনার সাহায্যে তাহাকে আয়ত্ত করিবে; কারণ, তখন জীবনে ও সাহিত্যে বিরোধ ঘুচিয়া, উভয়ের মধ্যে রসের সংক্রমণ-সেতু নিশ্চিত হইয়া যাইবে। কিন্তু আজিকার সাহিত্যসেবী এই স্বপ্নের দ্বারা নিরতিশয় বিক্ষিপ্ত—আজ তাহাকে ভাব ও কর্মের বিরোধ নিজের জীবনেই মিটাইয়া, সাহিত্যে নূতন রসের আদর্শ প্রতিষ্ঠা করিতে হইবে।

রবীন্দ্র মৈত্রকে দেখিয়া ইহাই মনে হইয়াছিল। তাহার মত আরও অনেকে এই স্বপ্নে বিক্ষিপ্ত হইয়া স্বীয় প্রতিভার সম্যক অবকাশ পাইতেছে না। কেহ বা নষ্ট হইয়া গিয়াছে। এমন একজনকে অন্ততঃ জানি, তাহার শিল্পী-মনের পরিচয় বহুপূর্বেই পাইয়াছিলাম; তাহার রচনায় কবি-শক্তির নিশ্চিত নিদর্শন রহিয়াছে; চিত্রকলার সাধনাও সে করিয়াছে; কিন্তু যুগ-দেবতার আহ্বান সে অগ্রাহ করিতে পারে নাই—ধ্যানের আসন ত্যাগ করিয়া সে অবশেষে প্রাণের তাড়নায় গৃহত্যাগী হইয়াছে। রবি জীবনের ডাক শুনিয়াছিল আগে, কর্মোৎসাহই তাহার জীবনের আদি-প্রবৃত্তি। তাই, প্রায় ৬৭ বৎসর পূর্বে তাহার সঙ্গে যখন প্রথম পরিচয় হয় তখন তাহাকে চিনিতে পারি নাই, তাহার সাহিত্যিক প্রতিভার বিশেষ কোন উল্লেখ তখন লক্ষ্য করি নাই। পরে যখন তাহার রচনাশক্তির নিশ্চিত প্রমাণ পাইয়াছিলাম, তখনও তাহার শক্তির পরিচয়ে মুগ্ধ হইলেও, প্রতিভায় বিশ্বাস করি নাই। গত বৎসর সে যখন আমাকে তাহার কয়েকখানি পুস্তক দিয়া অভিযত

জানিতে চাহিল, তখন তাহার জীবন ও সাহিত্য-সাধনা সম্বন্ধে আমি অধিকতর সচেতন হইয়াছি—লেখাগুলি আবার পড়িলাম, কিন্তু কোনও মন্তব্য করিলাম না। এবার যখন তাহার সহিত সাক্ষাৎ হইল, তখন ভাবভঙ্গি দেখিয়া মনে হইল, সে নিজ শক্তির সন্ধান পাইয়াছে, আত্মপ্রত্যয়ের বিপুল সাহস তাহার চোখমুখে প্রতিফলিত হইতেছে। সে তখন ‘স্বতকুস্ত’ নামক উপন্যাস-রচনায় মগ্ন; পরে সহসা বিষম কৰ্মব্যস্ততার মধ্যেই ‘মানময়ী গার্লস্ স্কুল’ লিখিয়া ‘শনিবারের চিঠি’ ভরিয়া দিল। এই সময়েই আমি তাহাকে শেষ দেখি, এবং সেই দেখাতেই বুঝিয়াছিলাম, সাহিত্যে তাহার পথ সে খুঁজিয়া পাইয়াছে। লেখাও পড়ি, মানুষটিকেও দেখি—একই বস্তু চোখে ঠেকে,—সত্যকার শক্তিচেতনার একটি সপ্রতিভ দৃঢ়তা, ও পরিপূর্ণ স্বাচ্ছন্দ্যের ভাব উভয়ত্রই বিদ্যমান।

‘স্বতকুস্ত’ অসমাপ্ত রহিয়া গেল। এই উপন্যাসে সর্বপ্রথম তাহার রসদৃষ্টির নিঃসংশয় প্রমাণ পাইলাম। কেবল আবেগ বা অনুকম্পামূলক কাহিনী-রচনা নয়—এ রচনায় লেখক আত্মস্থ; জীবন ও চরিত্রের গভীরতর প্রদেশে দৃষ্টি প্রেরণ করিয়া অনাসক্তভাবে সেই রহস্য ধ্যান করিবার যে ভঙ্গি ইহাতে প্রকাশ পাইয়াছে, তাহাই ইহার গৌরব। ভাববাদ বা বাস্তববাদ,—সর্ব বাদ-বিসম্বাদের সংস্কার উত্তীর্ণ হইয়া, কেবল জীবনের আবরণ উন্মোচন করিবার যে স্পৃহা, তাহাই এই উপন্যাসে লেখকের কল্পনায় শক্তি সঞ্চার করিয়াছে। কথাবস্তু বা ঘটনাসংস্থানে যেমন কোনও সংস্কারবশ্ততা নাই—নায়ক ও নায়িকার সম্বন্ধ সম্পূর্ণ প্রথাবিরুদ্ধ, তেমনই চরিত্র-চিত্রণে, মানবীয় প্রকৃতি অথবা সামাজিক সংস্কার—কোনটাই লঙ্ঘন করিবার সজ্জান অধ্যবসায় নাই; মোটের উপর কোথাও কোনও অভিপ্রায় বা অভিসন্ধি নাই; আছে কেবল আধুনিক জীবন-যাত্রার রঙ্গমঞ্চে চিরন্তন মনুষ্য-হৃদয় লইয়া এক অভিনব রস-রহস্যের অভিনয়। এই উপন্যাসে নায়িকার যে চরিত্র কল্পিত হইয়াছে, তাহাতেই লেখকের মৌলিকতার পরিচয় আছে; এই চরিত্রের রহস্যই কাহিনীকে রহস্যময় করিয়া তুলিয়াছে। রবির প্রতিভার প্রথম প্রকৃষ্ট প্রমাণ পাই এই উপন্যাসে।

‘মানময়ী গার্লস্ স্কুল’-এর অভিনয় অনেকেই দেখিয়াছেন ও দেখিতেছেন—লেখক দেখেন নাই; দেখিলে নাটকখানির সম্বন্ধে আরও নিশ্চিতভাবে মত প্রকাশ করিতে পারিতাম। অভিনয় যাহারা দেখিয়াছেন, তাঁহাদিগকে বিশেষভাবে

আকৃষ্ট করিয়াছে—এই রচনার উৎকৃষ্ট হান্তরস। উপস্থানে ও গল্পে যেমন হউক, বাংলা নাটকে আমরা সাধারণতঃ যে হান্তরসে অভ্যস্ত—তাহা রসরস মাত্র। যে হামির অন্তরালে অতি গভীর criticism of life আছে, অর্থাৎ, যে হান্তরস উদ্বেকের সঙ্গে সঙ্গে জীবনের কোনও মর্মস্থল উদ্ঘাটিত হয়—তাহাই কাব্য, তাহাই উৎকৃষ্ট রস। ‘স্বতকুস্ত’ ও ‘মানময়ী’ এই দুইটি রচনায় লেখকের অকৃত্রিম জীবন-প্রীতি বা জীবন-রস-রসিকতার পরিচয় রহিয়াছে। এই মানস-ভঙ্গি অতিশয় দুর্লভ; যে দৃষ্টিতে জীবনকে দেখিতে জানিলে, একই কালে অধর হান্তরঞ্জিত ও নয়ন অশ্রুসজল হইয়া উঠে, তাহাই রসিকের দিব্যদৃষ্টি। রবি এ দৃষ্টি পাইল কোথায়? সে ত’ আজীবন ছরস্তু আবেগে ছুটাছুটি করিয়া বেড়াইয়াছে; কখন কেমন করিয়া সে এই স্থির রসদৃষ্টি লাভ করিল!

আজ যে তাহাকে স্মরণ করিয়া এত কথা বলিতেছি, তাহার মূলে আছে এই বিশ্বয়। রবি তাহার সাহিত্য-সাধনায় যে সিদ্ধির পথে পা দিয়াছিল, আর কিছুকাল বাঁচিয়া থাকিলে যে-সিদ্ধিলাভ সে নিশ্চয় করিত, তাহা হইতে একটা বিষয়ে আশঙ্ক হইয়াছি। আমি সাহিত্যের যে যুগোচিত আদর্শ ও সাধনার কথা ইতিপূর্বে বলিয়াছি, রবির সাহিত্য-সাধনায় তাহার একটা স্পষ্ট সঙ্কেত পাইতেছি। রবির জীবনে ছিল একটা প্রচণ্ড আবেগের তাড়না, তাহারই বশে সে তটভূমি ত্যাগ করিয়া তরঙ্গে ঝাঁপ দিয়া পড়িয়াছিল—এক মুহূর্ত্ত কক্ষের উত্তেজনা হইতে নিষ্কৃতি ছিল না; যুগধর্ম তাহাকে পাইয়া বসিয়াছিল। জাতির জীবন-সঙ্কট, ধর্ম ও সমাজ-রক্ষার দুর্লভ সমস্যা, বর্তমানের প্রচণ্ড ঘূর্ণাবর্ত্তে প্রাচীরের ভিত্তিমূল একেবারে ভাসিয়া যাওয়ার উপক্রম, ব্যক্তির আত্ম-সাধনায় সত্য-মিথ্যার অনিশ্চয়তা,—এ সকল তাহাকে অভিভূত করিয়াছিল; নূতন ও পুরাতন, ব্যক্তি ও সমাজ, রাষ্ট্র ও ধর্মনীতি, সাম্প্রদায়িকতা ও মানব-সেবা—সর্বপ্রকার ঘনঘন প্রতিঘাত তাহাকে অস্থির করিয়া তুলিয়াছিল। কিন্তু প্রত্যক্ষ-বাস্তবের প্রতি এই আসক্তি সত্ত্বেও তাহার সহজাত রস-পিপাসা সর্বদা জাগ্রত ছিল, ঘূর্ণাবর্ত্তের মধ্যেও স্থিরবিন্দুটিকে ধরিবার সাধ ও সাধনা সে কখনও ত্যাগ করে নাই। মনে হইয়াছিল, বুঝি এই ঘন ঘন সে উত্তীর্ণ হইতে পারিবে না, তাহার সাহিত্যিক প্রতিভা হার মানিবে—তাহার শক্তি, জীবনকে দেখা অপেক্ষা জীবনকে জয় করার দিকেই ব্যয়িত হইবে। কিন্তু শেষ দুইটি রচনা পড়িয়া সন্দেহ দূর হইল; বিশ্বাস হইল,

সে জীবন ও সাহিত্যের সুগভীর রস-সঙ্গতি প্রাপ্তির মধ্যে লাভ করিয়াছে—সহসা সে এমন একটি স্থানে উত্তীর্ণ হইয়াছে, যেখানে জীবনের খরস্রোত নিঃশব্দ-গভীর, অতিচঞ্চল জ্যোতিঃপ্রবাহ স্থিরশিখায় দীপ্যমান। জীবনকে এমন করিয়া জয় করিবার সাধনা যে না করিবে, এ যুগে তাহার দ্বারা উচ্চাঙ্গের কাব্যসৃষ্টি সম্ভব হইবে না। বাস্তব-বাধাহীন নিরঙ্কুশ করনার দিন গিয়াছে, সোনার স্বপন দেখিবার কাল আর নাই,—লোহাকেই বক্ষ-শোণিতের রসায়নে সোনা করিয়া তুলিতে হইবে, জীবনের বাস্তব সুখহুঃখের তরঙ্গঘাত সহ্য করিয়া এই দেহের শুষ্ক-গর্ভে মুক্তা ফলাইতে হইবে; ইহাই এ যুগের কাব্যসাধনা। রবির অসমাপ্ত সাহিত্য-সাধনা ইহারই ইঙ্গিত করিতেছে।

পূর্বে বলিয়াছি, সাহিত্যসৃষ্টির পক্ষে যুগ-প্রভাব প্রতিকূল হইতে পারে, যুগ-প্রভাবের প্রবল শাসনে কবিপ্রকৃতিও স্বধর্মভ্রষ্ট হইতে পারে; অথচ যুগকে সম্পূর্ণরূপে অতিক্রম করিয়া কবি-মানসের যে স্বাতন্ত্র্যনিষ্ঠা, তাহাও সত্য নহে—করনার সে স্বাতন্ত্র্য যতই ব্যক্তিত্ব-মহিমায় মণ্ডিত হোক, তাহাতে কাব্যের উৎকর্ষহানি হয়। কাব্য যতই সার্বজনীন বা সার্বভৌমিক হোক—যুগ, জাতি, ও দেশের ভাব-চৈতন্যের উপরেই তাহার প্রতিষ্ঠা হইয়া থাকে। এইজন্য, যদি সে সকলের প্রবৃত্তি কাব্যসৃষ্টির অধিকূল না হয়, তাহা হইলে রসিকচিত্তও নিগৃহীত হয়, সম্যক স্ফুর্জিলাভ করে না। আমাদের দেশে বর্তমান কালে যে যুগ-প্রবৃত্তি প্রবল হইয়াছে তাহা কাব্যসাধনার অধিকূল না হইলেও, তাহার মূলে ভাবাতিরেক আছে—অতিদৃঢ় কর্মব্রত-উদ্দ্যাপনের মধ্যেও প্রবল হৃদয়াবেগ আছে। জীবনের গুরুতর সমস্যা অধুধাবন করিয়াই বাহারা কর্মে আত্মনিয়োগ করিয়াছে, তাহারাও কর্মবুদ্ধি অপেক্ষা ভাবের আদর্শকেই আশ্রয় করিয়াছে; এই ভাবপ্রবণতা বাদ্যলীর চরিত্রে বন্ধমূল। কর্মের কামারশালে অতিতপ্ত লৌহপিণ্ড হাতুড়ির আঘাতে প্রয়োজনাতিরিক্ত স্ফুলিক বর্ষণ করে, তাহাতে শক্তিক্ষয় হয়। কিন্তু এই স্ফুলিক-রাশিই যে সাহিত্যের দীপপাত্রের আলোকশিখায় পরিণত হইতে পারে, রবির জীবনে তাহারই আভাস আছে; অর্থাৎ, 'through literature to life' একদিক দিয়া যেমন সম্ভব, তেমনই, 'through life to literature' আমাদের পক্ষে এযুগে শুধুই সম্ভব নয়, ইহা ভিন্ন সাহিত্যের গত্যন্তর নাই। যুগধর্মের যে প্রবৃত্তি লক্ষ্য করিতেছি, তাহাতে বর্তমানে সাহিত্যের সম্বন্ধে নিরাশাস হইয়াছিলাম; কিন্তু

এইরূপ দৃষ্টান্তে আবার আশার সঞ্চার হইতেছে, মনে হইতেছে—ভারতবর্ষের অন্যান্য প্রদেশে এষুগে সাহিত্য-সৃষ্টি সম্ভব কিনা জানি না, কিন্তু ভাবপ্রবণ রস-পিপাসু বাঙ্গালী, জীবনের বহ্যবেগ বন্ধে ধারণ করিয়াই সাহিত্যে নূতন রস-রূপের প্রতিষ্ঠা করিবে; ভাব-চৈতন্যের গহন-অতলে, জীবন ও মৃত্যুর প্রচণ্ড সংঘর্ষে যে ভীষণ আবর্তের সৃষ্টি হয়, তাহারই মধ্যস্থলে দাঁড়াইয়া সে আত্মার রস-রূপ প্রত্যক্ষ করিয়া অভয়প্রাপ্ত হইবে,—বাঙ্গালীর জীবনে শাক্ত ও বৈষ্ণবের চিরন্তন বন্দ এতদিনে এক অপূর্ব জীবন-সঙ্গীতে লয় পাইবে। রবির অসমাপ্ত সাহিত্য-সাধনায় যে সিদ্ধির আভাস পাইয়াছি, তাহাতেই এত কথা বলিতে সাহসী হইয়াছি।

রবির জীবনে এষুগের মূল প্রবৃত্তি—সর্বদ্বন্দ্ব-সম্বয়ের উৎকণ্ঠা—সর্বাকীর্ণ মূর্তিতে প্রকাশ পাইয়াছিল; তাহারই অন্তর্গত-রূপে সাহিত্যের সমস্তাও সমাধানের পথ খুঁজিতেছিল। আধুনিক জীবনযাত্রার যত কিছু বৈসাদৃশ্য, তাহার মধ্যেই ‘স্বতকুস্ত’ ও ‘মানময়ী’র লেখক একটা গভীরতর রস-সত্যের সন্ধানে উদগ্রীব ও আশাশ্রিত হইয়াছিল। ‘স্বতকুস্ত’ নামে যে উপন্যাস সে ফাঁদিয়াছিল, তাহাতে একটা উদ্ভট ঘটনা-সংস্থানে ট্রাজেডির ছায়াপাত হইয়াছে; নীতি ও দুর্নীতি উভয়কে সবলে পাশ কাটাইয়া তাহার কল্পনা যে পথে অগ্রসর হইতেছিল তাহার গন্তব্য ছিল মানুষের হৃদয়-রহস্যের শাস্ত তীর্থমন্দির। উপন্যাস অসমাপ্ত রহিয়া গেল, তথাপি তাহার কল্পনার যে ভঙ্গি ইহাতে পরিস্ফুট হইয়াছে, তাহার পূর্ণ পরিণতি এই প্রথম রচনাতেই দৃষ্টিগোচর না হইলেও, সে ভঙ্গি যে কালে অপরূপ সাফল্যে মণ্ডিত হইত, সে অসুমান মিথ্যা নহে। ‘মানময়ী গার্লস্ স্কুল’ রচনা হিসাবে সার্থক হইলেও, খুব বড় কিছু নয় সত্য; কিন্তু ইহার মধ্যেও জীবন-রস-রসিকতার যে ভঙ্গি চোখে পড়ে, তাহার ভবিষ্যৎ সম্ভাবনা অল্প ছিল না। ঘটনাবলি সামান্য হইলেও, এবং তাহাতে কল্পনার গভীরতা ও অবকাশ যথেষ্ট না থাকিলেও, লেখকের সৃষ্টিশক্তি ও রসদৃষ্টির প্রচুর প্রমাণ ইহাতে আছে। নবযুগের নূতন ভাবপ্রেরণাও ইহাতে লক্ষিত হইবে; অতিশয় বিরুদ্ধ সংস্কারসম্পন্ন নরনারীর একটি সহজ আত্মীয়তা—উদার প্রীতির সম্ভাব্যতা—যে রসের সৃষ্টি করিয়াছে, অতিশয় প্রাচীনভাবাপন্ন পাত্র-পাত্রীর মনে অতি আধুনিক আদর্শও অজ্ঞাতসারে যে সহায়ভূতির উদ্বেক করিয়াছে, তাহাই নাটকখানিকে এমন হান্ত-

মধুর করিয়া তুলিয়াছে ; কল্পনার এই প্রবৃত্তিই ঘটনা ও চরিত্রগুলির উদ্ভাবন করিয়াছে। সকল বন্দ ও বিরোধের উপরে মানুষের হৃদয় যে চিরজয়ী হইয়া আছে—সমাজ, ধর্ম ও জাতির সমস্তা যেমনই হোক, ধরণীর মহারাসে রসিক-শেখরের রাসলীলা কিছুতেই বাধা মানে না—এই দিব্য-উপলব্ধি রবীন্দ্র মৈত্রকে কর্মী হইতে করিপদবীতে তুলিয়া ধরিতেছিল। জীবনের আবর্তসম্মূল শ্রোতে যে নির্ভাবনায় ঝাঁপাইয়া পড়িয়াছিল, তাহার পক্ষেই এই রসদৃষ্টি সম্ভব হইয়াছিল ; কারণ, বাস্তবকে যে সত্য করিয়া দেখিতে পারে, সুন্দর তাহার কাছেই ধরা দেয়। রবির সাহিত্য-প্রতিভা যে শেষে নাটকের দিকেই ঝুঁকিয়াছিল এবং তাহাতেই স্ফুর্তি পাইত বলিয়া মনে হয়—ইহাও আশ্চর্য্য নহে। যে কল্পনা জীবনের গতিবেগ ও কক্ষোন্মাদনা হইতে আপন পৃষ্টি সংগ্রহ করে, তাহার প্রকাশ-ভঙ্গি নাটক হওয়াই স্বাভাবিক। এই নাটকের অভাব আমাদের সাহিত্যে এখনও ঘুচে নাই। খাঁটি নাটকীয় প্রতিভা এদেশে এত দুর্লভ কেন, এবং আগামী বাংলা-সাহিত্যে নাটক একটি বিশিষ্ট স্থান অধিকার করিবে কি না—সে প্রশ্নের উত্তর রবির জীবন ও তাহার সাহিত্য-সাধনার কাহিনী হইতে মিলিতে পারে।

রবির সম্বন্ধে আজ আমার যাহা মনে হইতেছে তাহার প্রায় সবটাই বলিয়া রাখিলাম। তাহার সম্বন্ধে কিছুই বলিবার সময় আসে নাই, তাই এতদিন কিছুই বলি নাই। কিন্তু তাহার বলা সে শেষ করিয়া গিয়াছে, সকল আশা, সকল কামনার অন্ত হইয়াছে ; তাই, একদিন যাহা সম্পূর্ণ প্রমাণসহকারে, অধিকতর দৃঢ়তার সহিত বলিবার আশা করিয়াছিলাম, আজ তাহাই দ্বিধাকম্পিত কণ্ঠে সসঙ্কোচে বলিলাম। একদিন সে বড় আব্দার করিয়া নিজের রচনাসম্বন্ধে আমার অভিমত চাহিয়াছিল, সেদিন তাহার সে আব্দার রক্ষা করিতে পারি নাই। আজ সে নাই, আমার অভিমতের মূল্যও আর নাই ; বাঁচিয়া থাকিলে কামনা করিতাম কাহারও অভিমতের প্রয়োজন যেন তাহার না থাকে। বাংলার সাহিত্যক্ষেত্রে নবযুগের কর্ষণ চলিতেছে ; যে দুই চারিটি বীজ ইতিমধ্যেই অঙ্কুরিত হইয়াছে, সে তাহাদের একটি ; প্রার্থনা করি, অপরগুলি শাখা-পল্লবে ফলে-ফুলে নিজ নিজ আকার ও আয়তন লাভ করুক, কিন্তু রবির সাধনার প্রায় সবটুকুই ভূমিতলে প্রচ্ছন্ন রহিয়া গেল। অকাল-মৃত্যু আরও অনেকের হইয়াছে, কিন্তু এমন করিয়া ফুটিবার মুহূর্তেই কেহ করিয়া

পড়ে না। মৃত্যুকে অনেকরূপেই দেখিলাম—মোহ আর নাই, শোক করিতেও
লজ্জা হয়। মহাকাল আপনার প্রয়োজন বোধে—নাভের অঙ্ক তাহারই,
ক্ষতির হিসাবও সেই পূরণ করিবে; আমরা দিন-মজুরীর মজুর মাত্র, নাশিশ
করিবার কে ?

অতি-আধুনিক বাংলা কবিতা

১

সম্প্রতি বাংলা কাব্যে একটি নূতন ছন্দের আমদানি হইয়াছে, এবং সাহিত্যের নূতন-বাজারে তাহার বিজ্ঞাপনের পটহ-নাদ শুনা যাইতেছে। এই ছন্দের নাম হইয়াছে 'গগ্গচ্ছন্দ'। নাম হইতেই বুঝা যায় ইহার জাতি-নির্ণয় এখনও ঠিক মত হয় নাই। কারণ 'গগ্গচ্ছন্দ' ও 'সোনার পাথর-বাটি' একই ধরণের কথা। ছন্দ শব্দটির শাস্ত্রসম্মত অর্থ—ইংরাজীতে যাহাকে বলে 'মেজার' (measure)। গগ্গের একটা 'রিদ্ম' (rhythm) থাকিতে পারে, কিন্তু 'মেজার' নাই। গগ্গের বাক্য-রচনায় অল্প-সল্পত ধ্বনিপ্রবাহ আছে, কিন্তু তাহা ছন্দ নয়; একজন সমালোচক তাহাকে 'দি আদার হার্মনি' বলিয়াছেন। এই 'হার্মনি' গগ্গের জন্মদিন হইতে ক্রম-পরিষ্কৃত হইয়াছে। কিন্তু 'গগ্গচ্ছন্দ' নামে আধুনিক কালে যাহা ঘোষিত হইতেছে তাহা ছন্দ তো নয়ই—অধিকাংশ ক্ষেত্রে 'রিদ্ম'ও নয়।

তবে উহা কি? এই প্রশ্নের উত্তর দিতে হইলে আধুনিক বিনি-ছন্দের কবিতার একেবারে গোড়া ধরিয়া টান দিতে হয়। এই সাহিত্যের প্রেরণা যে খাঁটি কাব্যরসের প্রেরণা নয়, একথা এই যুগেরই রসিকসমাজ বার বার বলিয়াছেন। কিন্তু শোনে কে? যাহারা আধুনিকত্বের দাবী করেন, তাহারা বলেন,—প্রাচীন কালে (অর্থাৎ, ত্রিশ-চল্লিশ বৎসর আগে) মানুষ যাহা ছিল আজ সে আর তাহা নয়। সে-যুগের সুখ-দুঃখ, আশা-বিশ্বাস এ-যুগের তুলনায় বালকোচিত ও হাস্যকর; তাহারা সারাজীবন—পাঠশালায় গুরুমহাশয়ের বেত্রাধীন পড়ুয়ার মত—ধর্ম, পরকাল ও ভগবানের ভয়ে সন্ত্রস্ত হইয়া থাকিত। আজ মানুষ সাবালক হইয়াছে, তাহার চোখ খুলিয়াছে—কাল্পনিক নরকের মত কাল্পনিক স্বর্গও আজ উবিয়া গিয়াছে। ভূত, ভগবান ও প্রেম—একই পর্যায়ের কুসংস্কার; ঋবহু বা পূর্ণতার কোনও মনঃকল্পিত আদর্শ তাহাকে আর প্রবঞ্চিত করিবে না। যাহা গোচর তাহার অন্তরালে কোনও অগোচর, যাহা বাস্তব তাহার অতিরিক্ত কোনও তদ্ব্যবহিত অবাস্তব, যাহা তথ্য তাহার ইঙ্গিতস্বরূপ

কোনও বৃহৎ সত্য, যাহা খণ্ড, বিচ্ছিন্ন ও বিল্লিষ্ট তাহারই আশ্রিত কোনও অখণ্ড-মণ্ডল—সে আর স্বীকার করিবে না। সৃষ্টির অন্তরালে কোনও রহস্য নাই; অর্থাৎ এমন কিছু নাই যাহা থাকিয়াও তুচ্ছের। যাহা আছে তাহা সম্মুখেই আছে, এবং তাহা মানুষের মনকে উত্তেজিত করে মাত্র (মন ছাড়া আর কিছু নাই); তাহাকে প্রশ্নকাতর ও সংশয়াকুল করিয়া তোলে; সে প্রশ্নের—সে সমস্যার সমাধান নাই,—কেবল আছে একটা আদি-অন্তহীন, অর্থহীন, জ্ঞানহীন ও আদর্শহীন মহাকোলাহল। মানুষ কেবল প্রশ্ন করিবে, জবাব প্রত্যাশা করিবে না—অসংলগ্ন তথ্যরাশি স্তূপাকার করিয়া প্রত্যেকটির উপরে একটি প্রশ্ন-চিহ্ন আঁকিয়া দিবে।

এই অতি-আধুনিক জীবন-চেতনাকে জীবন-রস-রসিকতা বলিলে ভুল করা হইবে; কারণ, রসিকতার লক্ষণ ইহা নহে। মানুষ বাস্তবকে কখনও অস্বীকার করে নাই। বস্তু-জিজ্ঞাসা ও বাস্তব-বাদ মানুষের রক্তমাংসেরই ধর্ম; অতএব এ ধর্ম পৃথিবীতে নূতন নয়,—বরং শাস্ত সনাতন। ইহাই জীবধর্মের নিদান। এই ধর্মেরই প্ররোচনায় মানুষের চরিত্রে ও জীবনযাত্রার আদর্শে মোটামুটি তিনটি রূপ ভেদ দেখা যায়—জ্ঞানশক্তির বৈরাগ্য, প্রেম-শক্তির রস-পিপাসা ও কর্মশক্তির ভোগ লিপ্সা, এই তিনের অবশ্যই নানা রূপ-স্বরূপ আছে, তাহারও অসংখ্য শ্রেণীবিভাগ হইতে পারে। কিন্তু শক্তি ও স্বাস্থ্য যেখানে অটুট, সেখানে এই তিনের রূপভেদ স্পষ্ট চোখে পড়ে, আধুনিক মানুষ শক্তি ও স্বাস্থ্য হারাইয়াছে, তাই শক্তিহীন জ্ঞান, শক্তিহীন প্রেম, ও শক্তিহীন কর্ম তাহাকে ধর্মভ্রষ্ট করিয়াছে। কোনও একটার প্রাবল্য না থাকায়, এই তিনেরই নিম্নভূমির সাম্যাবস্থা তাহার আত্মচেতনাকে দুর্বল করিয়া সংশয়-বিমূঢ় ও নাস্তিক করিয়া তুলিয়াছে। সে পৃথিবীকে—জীবনকে ভালবাসে; কিন্তু সে-ভালবাসায় রসিকের সংশয়মুক্তি নাই, কারণ তাহার প্রেম শক্তিহীন; তাহার জ্ঞানও মস্তিষ্কপীড়া মাত্র—আত্মচেতনার সহায় নয়, তাই তাহার প্রেমও ব্যাধি হইয়া দাঁড়ায়। আবার, ইহার সঙ্গে যদি ভোগস্পৃহার কর্মশক্তি দুর্বল কামনার মুচ্ছিত হইয়া থাকে—ভোগ্য বহির্বস্তুকে কর্মপ্রতিভা বা সর্বল অহংচেতনার দ্বারা স্ববশে আনিবার সামর্থ্য না থাকে, তবে অবিশ্বাসের আত্ম-ক্রোধ অনিবার্য হইয়া উঠে। আধুনিক কালে মানুষের এই অবস্থা—অর্থাৎ

ওই তিন শক্তির নিয়ন্ত্রণের তামসিক সাম্যাবস্থা ঘটিবার রহ কারণ আছে। এ-যুগে জীবনযুদ্ধে পরাস্ত নরনারীর সংখ্যাই অধিক, তাই এইরূপ মনোবৃত্তিই আধুনিকতার একটি লক্ষণ বলিয়া গণ্য হইয়াছে। কিন্তু ভাবিয়া দেখিলে, ইহা কেবল সংখ্যাগরিষ্ঠের প্রাধান্য মাত্র,—নতুবা, ইহা নূতনও নয়, অসাধারণও নয়। আজ ইহা যে-ভাবে ও যতদিকে আত্মপ্রকাশ করিতেছে, তাহাই নূতন, এবং তাহাতে ইহাই প্রমাণ হয় যে, সকল যুগের মত এ যুগেও প্রকৃত রসিকের সংখ্যা খুবই অল্প,—কিন্তু শ্রোতা বা পাঠকের সংখ্যা অত্যধিক হওয়ায় তাহাদের মনোমত লেখকের সংখ্যা অত্যধিক হইয়াছে।

সত্যকার রসপ্রেরণা জীবন-চেতনাকে আশ্রয় করিয়াও তাহাকে উত্তীর্ণ হইয়া বিরাজ করে। রস-পিপাসার যে প্রেম তাহা সকল বিরোধ, সকল স্বার্থ ও সকল সমস্তকে জয় করিতে পারে বলিয়াই—মানুষের সে একটি দিব্যশক্তি; তাহা বন্ধনমুক্তি নয়—বন্ধনের মধ্যেই মুক্তি। এইরূপ মুক্ত হইবার শক্তি যাহার নাই সে কবিই নয়। সকলের পক্ষে ইহা সম্ভব নয় বলিয়া—নরদ্বং দুর্লভং লোকে কবিত্বঞ্চ সুদুর্লভং। এ-যুগের কবিশংশঃপ্রার্থী যাহারা তাঁহারা কবিত্বের উপরে নরদ্বকে স্থান দিবার পক্ষপাতী; কিন্তু নরদ্বের মহিমা উপলব্ধি করা এবং নরমাত্রকেই দেবদ্বের আসনে স্থাপিত করা এক বস্তু নহে। জগতের যাহারা শ্রেষ্ঠকবি, তাঁহারা নরদ্বের অগাধ অসীম মহিমাগগরে স্নান করিয়া জ্যোতির্শয় হইয়াছেন; কিন্তু সে-সাগর বিচ্ছিন্ন কূপ-পবনের সমষ্টি নয়। তাহার উত্তুল তরঙ্গ-চূড়া হইতে নিম্নতম গহ্বর পর্যন্ত তাঁহাদের রসদৃষ্টি সমান সঞ্চরণ করিয়াছে—নরলীলার অনন্ত বিচিত্র রূপ তাঁহারা নিরীক্ষণ করিয়াছেন। তাঁহারা মানুষকে অবস্থার দাসরূপে দেখেন নাই—সর্ব অবস্থায় মানুষকেই দেখিয়াছেন। দেখিবার এই ভঙ্গিই কবিশক্তি, ইহাই কবি ও কাব্যকে একটি স্বতন্ত্র তত্ত্ববাদের অধীন করিয়াছে। এই তত্ত্বকে আদি যুগ হইতে আজ পর্যন্ত কেহ স্পষ্ট ভাষায় ব্যাখ্যা করিতে না পারিলেও অস্বীকার করিতে পারে নাই।

আজ সাহিত্যে যে নব-আদর্শের ঘোষণা হইতেছে তাহা এই তত্ত্বকেই স্বীকার করে না। অতি-আধুনিক সাহিত্যে যে-বস্তুর আত্যন্তিক অভাব লক্ষ্য করা যায়—তাহা মানুষের নিজেরই সৃষ্টি-শক্তির অভাব। সৃষ্টিকে সম্মুখে দাঁড় করাইয়া তাহাকে জেরা করা, তাহাকে অপরাধী সাব্যস্ত করিয়া আত্ম-অপরাধ-

কালম, অথবা, কাহারও অপরাধ নয় বলিয়া আত্ম-অপরাধও অস্বীকার করা—ইহাই যেন এ সাহিত্যের অন্তর্নিহিত প্রবৃত্তি। ইহাতে স্বীকার করা হয়, মানুষ প্রকৃতিরই অধীন, এবং যেহেতু জড়প্রকৃতির মুক ওঠে কোন কিছুর জবাব মেলে না—সেই হেতু মানুষেরও কোন প্রকার জবাবদিহি নাই। অতএব প্রকৃতি-শাসিত জীবনের অমীমাংসিত সমস্তাই সাহিত্যের উপজীব্য! এতকাল এই সৃষ্টির উপরেও মানুষ যে সৃষ্টি করিয়াছে—যে-সৃষ্টিতে জড়ের উপরে চিং জয়ী হইয়াছে, সে সৃষ্টি যে-শক্তির দ্বারা সম্ভব, তাহা ইহাদের অজ্ঞাত। ইহা কোনও মতবাদের কথা নয়, অপরোক্ষ উপলব্ধির বিষয়; ইহা ঘে-ধরণের কালচার বা চিন্তাশক্তির ফল, আজিকার দিনে তাহা যদি দুর্লভ বা অসম্ভব হয়, এবং সেই কারণে কাব্যরচনাও যদি ত্যাগ করিতে হয়, তাহাতে আপত্তি নাই। কিন্তু অশক্তিকে শক্তি বলিব কেন? যাহা কাব্য নয় তাহাকে জোর করিয়া কাব্য বলি কেন?

২

উপরে যাহা বলিয়াছি তাহার প্রমাণস্বরূপ আমি অতি-আধুনিক সাহিত্যের একজন বিশিষ্ট লেখকের লেখা কিঞ্চিৎ উদ্ধৃত করিব। সাহিত্যে এরূপ রচনারও স্থান আছে—মানুষের মনের ইতিহাসের উপকরণ-হিসাবে। মানব-মহানাটকের কোন বিশিষ্ট রসরূপ ইহাতে নাই, বরং সেই নাটকের অন্তর্গত পাত্রবিশেষের মুখনিঃসৃত খণ্ড, বিচ্ছিন্ন বাক্যহিসাবে এগুলির কিছু মূল্য থাকিতে পারে। কথাগুলি এই—

মানুষের মানে চাই—

গোটা মানুষের মানে !

মানুষ সব-কিছুর মানে খুঁজে হারান হ'ল—

এবার চাই মানুষের মানে,

নইলে সৃষ্টির যে ব্যাখ্যা হয় না !

* * *

মানুষের মানে চাই !

মানুষ কি তাঁর সৃষ্টির মাঝে বিধাতার নিজের জিজ্ঞাসা ?

তাই কি মহাকালের পাতায় তাঁর অর্ধ কেবলি লেখা আর মোহা চলেছে ?

লেখক মানে চান—সৃষ্টির মানে চাই, তাই মানুষের মানেটা আগে দরকার। কিন্তু মানুষ বিধাতার নিজেরই একটি জিজ্ঞাসা—মহাকালের পাতায় তার অর্থ লেখা আর যোছা হইতেছে, অর্থাৎ, সে অর্থ কখনও সম্পূর্ণ হয় না। কিন্তু এ ব্যাপার কাব্যের পক্ষে অব্যাপার; এ জিজ্ঞাসা দর্শনের, কাব্যের কোন জিজ্ঞাসা নাই; তাই কাব্যপ্রেরণা-হিসাবে ইহা মিথ্যা হইয়া দাঁড়ায়। আবার, লেখকের দার্শনিকতা কাব্যের ভঙ্গি করিতে গিয়া এক অদ্ভুত ব্যাপার হইয়া দাঁড়াইয়াছে। তিনি ‘গোটা মানুষ’র অর্থ চান—শুধুই ‘কাকী ক্রীতদাস’, ‘হারেমের খোজা’, ‘ল্যাংড়া তৈমুর’, ‘হুন আন্তিলা’, বা বুদ্ধ-খৃষ্টের মানে নয়,—চাই গোটা মানুষের মানে। এই ‘গোটা মানুষ’ কি?—যে-মানুষ একাধারে ব্যক্তি এবং ব্যক্তি নয়, তাহার ব্যক্তি-সত্তার তুচ্ছতাই সর্বব্যক্তি-মহিমায় উজ্জ্বল হওয়া চাই। ইহার অবশ্য কোনও অর্থ হয় না—তবু অর্থ চাই!

যে-‘মানে’ হয় না, সেই ‘মানে’-চাওয়ার অর্থ এই যে, কোনও ‘মানে’তেই তাঁহার কুচি নাই। কারণ, জীবনকে কোনও নীতি বা তত্ত্বের বাধনে বাধিয়া লইতে তিনি নারাজ। অতি-আধুনিক পথের পথিক যাহারা, তাহারা জীবনের কোনও অর্থ জানিতে চায় না; তাহাদের কোনও গুরুমশাই নাই, এবং অর্থহীন বলিয়া কোনও কিছুকে তাহারা অপকৃষ্ট মনে করে না। তাহারা মানে চায় না, কিন্তু তাই বলিয়া তাহারা যে কিছু বুঝে—এমন স্পর্ধাও তাহাদের নাই। লেখক বলেন—

“আমরা স্বীকার করব না কি যে, সে উপলব্ধি আমাদের কত ক্ষীণ! নিজেকে অপনকে আমরা কতটুকু বুঝি? তবে যেটুকু চিনি আমরা অকপটচিত্তে বলি।* * আর সমস্ত বলার আড়ালে থাকবে একটি প্রচ্ছন্ন বিরাট জিজ্ঞাসার চিহ্ন। এটুকু আমাদের দুর্বলতা, আমরা যে মানুষ!”

“আমরা নব-উন্মীলিত দৃষ্টি দিয়ে জীবনের যাত্রা দেখব, আর বলে’ যাব।”

সে দেখা আর বলা এই রকম—

জাঙা দেওয়ালের ফাটলে একটা ঘাসের গুঁহি অনেকদিন

জীবনের অন্ত যুঝেছিল—

প্রতিদিন দেখতাম কী তার প্রাণান্ত প্রয়াস একটা পুষ্পিত

প্রশাখা প্রসারিত করবার জন্তে!

একদিন বুঝি একটা কিকে বেগুনিরঙের ছোট বুল কুটেছিল,

কিন্তু বুল তখন দেউলে হয়ে গেছে;—সব শুকিয়ে হলুদ হয়ে গেল।

পথ দিয়ে আসতে আসতে দেখি নিঃসঙ্গ শিশুর দল
 ক'টা ইঁদুর ছানা ধরে'
 তাদের বলি দিয়ে উল্লাস করছে—কি সরল পৈশাচিকতা !
 সৃষ্টির মূলেই যে নির্বিকার নির্মমতা !
 দেখি, মৃত্যুর-শিয়রে-নেওরা চির-বিলাপের শপথ শাপ হয়ে ওঠে,
 শুনি, বৃদ্ধ তার যৌবনের প্রেম নিয়ে পরিহাস করছে !
 জীবনকে ঘিরে আছে একটি বিপুল প্রচ্ছন্ন বিদ্রূপ ।
 চীৎকার ক'রে বলি,
 ভগবান যদি না থাকে ত' সৃষ্টি হোক, আমি অভিসম্পাত দেব !"
 হার দুর্বল মানবক !

উপরের এই সকল বচন হইতেই আধুনিক মনের ভঙ্গি ও প্রকৃতি বুঝিতে পারা যাইবে । শ্রীযুক্ত প্রেমেন্দ্র মিত্র অতি-আধুনিক সাহিত্যের একজন মনস্বী লেখক ও সমর্থনকারী apologist, তাঁহার কথাগুলিই উদ্ধৃত করিয়াছি ; এগুলি ১৩৩৩ সালের 'কালিকলম'-পত্রিকায় প্রকাশিত হইয়াছিল । তিনি যেমন অর্থের উপর আস্থাহীন, তেমনই তাঁহার কথাগুলির অর্থও খুব স্পষ্ট নয় । এই যে মনোবৃত্তি, ইহা কবি-মনোবৃত্তি নহে ; কারণ, কোন-কিছুর মানে করিতে না চাহিলেও—জিজ্ঞাসা ইহাতে আছে ; নাস্তিক্য-বাদও একটা সিদ্ধান্ত—একটা বিচারবিতর্কমূলক তত্ত্ব । এই 'অর্থ চাইনা' যদি রসাবেশ-মূলক হইত, তবে ইহাকে কবিধর্ম বলা যাইত । কারণ, জিজ্ঞাসা যেখানে উন্মুখ নয়, একেবারে শুষ্কিত,—অর্থ-অনর্থের স্বন্দ যেখানে এক অপূর্ব চেতনায় লয় হইয়া যায়, সেইখানেই কাব্য-সৃষ্টি হয় ; এবং কাব্য অপরা সৃষ্টি, সে সৃষ্টির যিনি বিধাতা তাঁহার কোনও কৈফিয়ৎ থাকে না । অর্থ চাই না, অথচ মানস-বৃত্তি খুবই সজাগ—এ অবস্থা সূস্থ অবস্থা নয় । শেষের উদ্ধৃত পংক্তি-কয়টিতে লেখক উচ্চকণ্ঠে যাহা বলিয়াছেন—সে কথা গল্প-কবিতার আকারে নূতন বটে, কিন্তু কথাহিসাবে অতি পুরাতন । তথাপি, সৃষ্টির এই 'সরল পৈশাচিকতা' ও 'নির্বিকার নির্মমতা' মানুষকে অপদস্থ করিতে পারে নাই । পাশ্চাত্যের শ্রেষ্ঠ কবি এই নিদারুণ নির্মমতাকেই রসরূপে আত্মসাৎ করিয়াছেন—জীবনের সুখ-দুঃখের তিনিও কোন অর্থ করেন নাই । মানুষ যে কত দুর্বল, 'গোটা মানুষের' চেহারা যে কি, তাহা তিনি দুই চক্ষু পূর্ণ-উন্মীলিত করিয়াই

দেখিমাছেন ;—‘মানুষের মানে’ তিনি চান নাই, কারণ প্রয়োজন বোধ করেন নাই। কিন্তু প্রকৃতি-পীড়িত মানুষের এই অসহায়, নিরুপায় অবস্থা সত্ত্বেও তিনি মানুষের আত্মাকে অবিখ্যাস বা অসন্মান করেন নাই। ভগবানকেও দায়ী করেন নাই, ‘দুর্ভল মানবক’ বলিয়া মানুষকেও কৃপা করেন নাই, কারণ তিনি দ্রষ্টা ও স্রষ্টা,—ভগবানের দোসর এবং শয়তানেরও সখা। আমাদের দেশেও এই ‘সরল পৈশাচিকতা’ উচ্চ সাধন-মার্গের সহায় হইয়াছে ; মানুষ ইহার নিকট পরাজয় স্বীকার করে নাই।

কিন্তু অতি-আধুনিক সাহিত্যের মতবাদী লেখক এ কথায় সন্তুষ্ট হইবেন না ; কারণ—কবি, সাধক বা বীর হইলেই চলিবে না—তাঁহার ‘গোটা মানুষ’ চাই। এই ‘গোটা মানুষের’ অখণ্ড অধিকারে প্রত্যেক ব্যক্তি-মানুষকে বসাইতে হইবে ; অথচ, ‘এইরূপ ব্যক্তি-পরিচ্ছিন্ন মনুষ্য-জীবনে কেবল খণ্ডতাই আছে, অখণ্ডতা নাই—এবং তাহাই একমাত্র বাস্তব সত্য ; অতএব, জীবনের কোনও অর্থ হইতে পারে না, উহা একান্তই দুর্ভেদ্য এবং জটিল। এ অবস্থায় কবি-সাহিত্যিকেরা কি করিবেন ?—তাঁহারা কেবল দেখিবেন ও বলিয়া যাইবেন ; এবং সেই বলার আড়ালে একটি প্রকাণ্ড জিজ্ঞাসার চিহ্ন থাকিবে। একখানা খাতায় কেবল যাহা ঘটতেছে তাহাই নোট করিয়া লইবেন—তথ্যের সত্যনিষ্ঠা থাকিবে, এবং তাহা কেবল তথ্যসমষ্টি বলিয়াই তাহাতে একটা মহা-শূন্যবাদের হাহাকার ও নৈরাশ—উদ্ভ্রান্ত-প্রেম, উদ্ভ্রান্ত-জ্ঞান ও উদ্ভ্রান্ত-চরিত্র-নীতি প্রকট হইয়া উঠিবে। ইহাই অতি-আধুনিক কাব্য।

৩

স্পষ্টই দেখা যাইতেছে, ইহারা কি বাহিরে কি ভিতরে—কোথায়ও সৃষ্টির ভঙ্গকে স্বীকার করে না। মানুষের অন্তরে যে একটি আদর্শ আছে, যেখানে প্রতিফলিত হইয়া বাহিরের সব-কিছু অর্থবান বা মণ্ডলাকার হইয়া উঠে—আত্মার শক্তিতে বাহিরের অনাত্মা বশীভূত হইয়া একটি অখণ্ড চিন্ময় স্বরূপে আত্মপ্রকাশ করিতে বাধ্য হয়—সে বিষয়ে ইহারা নাস্তিক। “আমরা জীবনের যাত্রা দেখব আর বলে যাব”—অর্থাৎ, ইহাদের অন্তরে কোনও সৃষ্টিক্রিয়া থাকিবে না ; ইহারা কেবল দেখিবে, বাহির নিজেকে যেমন দেখাইবে তেমনই

দেখিবে, সে দেখায় কোন অন্তরের দৃষ্টি থাকিবে না। যে-দৃষ্টিতে সর্ব দৃশ্য দূর হয়—আত্ম ও অনাত্মের মহাবোগ-সাধন হওয়ার, বিশেষ (particular) বিশেষরূপে বর্তমান থাকিয়াই এক মহা নির্বিশেষের (Universal-এর) অপরোক্ষ উপলব্ধিতে সত্য-সুন্দর হইয়া উঠে—সেই কবিদৃষ্টির কোনও ধারণাই ইহাদের নাই। অতএব ইহারা কাব্য-বিষেবী, ইহারা রসের ব্যাপারী নহে।

এই দৃষ্টি ইহাদের নাই বলিয়াই ইহাদের ভাষাও যেমন বস্তুগত, তেমনই ইহাদের রচনায় কাব্যের সুবলয়িত ছন্দ-সুসমারও প্রয়োজন নাই। বরঞ্চ ইহাদের লেখায় ছন্দ থাকিলেই তাহা মিথ্যাচার হইত। “To see deep enough is to see musically”—সেই দৃষ্টি যেখানে নাই, সেখানে ছন্দ আসিবে কোথা হইতে? সুস্পষ্ট রূপসৃষ্টিতে ছন্দ কখনও অবাস্তর হইতে পারে না। গাছের যে-ফুলটির পাপড়ি-পরিবেশ নিখুঁত মণ্ডলাকারে সুসম্পূর্ণ, সেইটির মধ্যেই তাহার পুষ্প-প্রাণ যেমন পূর্ণ প্রকাশ পাইয়াছে বুঝিতে হইবে, তেমনই, কবির অন্তরে কোনও রসবস্তু যদি সম্যক ধরা দিয়া থাকে তবে তাহার বাণী-সুসমা ছন্দকে বর্জন করিয়া নিখুঁত হইতে পারে না। তাই বলিয়া এ কথাও সত্য নয় যে, ছন্দোবদ্ধ রচনামাত্রই কবিতা। ছন্দ শুধুই বাক্যের অলঙ্কার নহে, নির্ভুল মাত্রাবিশ্রাসের ধ্বনিসৌষ্ঠবই কাব্য নয়। রস যখন বাক্যে রূপ-পরিগ্রহ করে তখন সেই রূপের অন্তরঙ্গ উপাদানরূপেই ছন্দের আবির্ভাব হয়; কবির চিন্তে যাহা একবৃন্দধৃত শতদলের মত প্রকাশিত হইয়াছে, বাক্যেও তাহা বৃন্দধৃত, অর্থাৎ ছন্দোময় হইয়া উঠে। এই জন্ত গল্প যতই কাব্য-ঘেঁসা হউক, তাহার রস কাব্যরস হইতে স্বতন্ত্র। গল্প-কাব্য, কাব্য, ও সঙ্গীত, এই তিনের মধ্যে রসসৃষ্টির পার্থক্য আছে। গল্পে রস থাকিলেও তাহা বাক্য-প্রধান। ভাষা-মাত্রই বস্তুবিজ্ঞানমূলক শব্দসমষ্টি। গল্প যতই ভাবময় হউক, তাহাতে বস্তুর প্রতি পক্ষপাত আছে, তাই গল্পকাব্যে ভাবের সুর ছন্দ-সুসমায় সম্পূর্ণ হইতে পারে না। বস্তু ও ভাবের মধ্যে রসের একাত্মতাই কাব্যসৃষ্টির কারণ—ভাব ও রূপের ঐকান্তিক মিলনেই ছন্দের জন্ম হয়। আবার ভাব যখন একেবারে বস্তুবর্জিত হইয়া প্রাণের অতি-সূক্ষ্ম উৎকর্ষারূপে অবস্থান করে, তখন তাহা ভাষাকেও ত্যাগ করিয়া সঙ্গীত-রূপ ধারণ করে। ইহা হইতে বুঝা যাইবে, রসের রূপসৃষ্টিহিসাবে কাব্যের স্থান সকলের উপরে।

কিন্তু ভাবোদ্দীপনার স্বরময় গছও নয়—যেহেতু ইহাতে রস-দৃষ্টির বালাই নাই, এবং ভাষাও সর্বশ্রী-বর্জিত—‘রিদ্ম্’ও নয়, ছন্দও নয়,—অতএব এই সকল রচনা যে কি পদার্থ তাহা নির্ণয় করিবে কে ? আমি শ্রীবৃক্ক প্রেমেন্দ্রমিত্রের গছ-কবিতার কথাই বলিতেছি না, তাঁহার রচনা শক্তিহীনের রচনা নয়, যদিও তাহাকে কাব্য বলিব না ; আমি অতি-আধুনিক কবিদের কথাও বলিতেছি । তাঁহাদের কবিতার পরিচয় নিম্নয়োজন । এইরূপ কবিতাকে একজন বিলাতী সমালোচক ‘cup and saucer’-কবিতা বলিয়াছেন, বাংলায় আরও ভাল নাম দেওয়া যাইতে পারে, ইহাকে ‘বিড়ি ও দেশলাই’ কবিতা বলিলে ইহার স্বরূপ ও ভঙ্গি আরও স্পষ্ট হইয়া উঠে । ভাষার জাতি ও গোত্র, অভিধান, ব্যাকরণ, গছ ও পছ, ছন্দ ও মিল প্রভৃতি যত দুর্দেব ছিল—তাহা আর কাব্যরচনার বাধা হইতে পারিবে না । এ কবিতার ভাষাবস্তু অতিশয় সুলভ ও সার্বজনীন—একটা বিড়ি মাত্র ; উদ্দীপনাও অতি সহজে হইয়া থাকে—একটা দেশলাই-কাঠির ওয়াস্তা । আগে কাব্যরস সকলে উপভোগ করিতে পারিত না, এজগৎ রসিক ও বেরসিক—ভেদ ছিল । এখন, যেমন লেখকমাত্রেরই কবি, তেমনই পাঠকমাত্রেরই রসিক—রসের এক মহাযান-সম্প্রদায়ে সকলে আসিয়া মিলিত হইয়াছে । আধুনিক ইউনিভার্সিটির কল্যাণে এখন যেমন সকলেই গ্র্যাজুয়েট, কাহাকেও মুর্থ বলিবার জো নাই, তেমনই আজ দেশে রসিক নয় কে ? এ যুগে যে কারণে ‘মর্যালিটি’ একটা কুসংস্কার মাত্র, কাব্যরসও ঠিক সেই কারণে একটা সার্বজনীন সহজিয়া-সংস্কার ।

বাংলার প্রগতিবাদী সাহিত্যিক

আধুনিক যুগ সাহিত্য-রসের যুগ নহে ; কেন নহে, তাহা চিন্তাশীল ব্যক্তি-মাত্রেই জানেন। ইহা লইয়া দুঃখ করিবার কারণ থাকিলেও তাহাতে লাভ নাই। দেহের পক্ষে পথ্যাভাব, এবং মনের পক্ষেও নানা কুপথ্যের প্রাচুর্য্যে, এ যুগে যে-সকল ব্যাধির প্রাদুর্ভাব হইতেছে, তাহাতে সাহিত্য মাথায় উঠিয়াছে,—বুকের কাছে আর টিকিয়া থাকিবার জো নাই। যাহারা, 'Render unto Cæsar what is Cæsar's due'—এই আশ্বাস-বাক্যে বাস্তবের সহিত রক্ষা করিয়াই রসের স্বর্গরাজ্যে বাস করিবার আশা রাখেন, তাঁহারা হয়তো এখন সংখ্যায় আরও অল্প ; এবং বোধ হয় সেই কারণেই, যাহারা 'শিক্ষোদর' ছাড়া আর কিছুই মানিবে না, এবং যাহাদের সংখ্যা এ যুগে ক্রমেই বাড়িয়া চলিতেছে, তাহারা এই রসব্রহ্মের পূজারীদিগকে কেবলমাত্র ভোটের জোরে পিষিয়া শেষ করিতে চায়। সত্য কোন্ পক্ষে, গ্নায় কোন্ পক্ষে, ধর্ম্ম কোন্ পক্ষে—আজিকার রাষ্ট্রনীতিতেও সে-প্রশ্নের মীমাংসা যে-ভাবে হইয়া থাকে—অর্থাৎ, একমাত্র দেখিবার বিষয় কোন্ পক্ষ সংখ্যায় বা জড়শক্তিতে প্রবল, তেমনই, সাহিত্যের ক্ষেত্রেও রসিকের কথা গ্রাহ্য নয় ; যাহারা সংখ্যায় অধিক সেই শিক্ষোদরপরায়ণ জনমণ্ডলী রসের যে নূতন অর্থ করিবে, তাহাই পণ্ডিত-মূর্খ রসিক-বেরসিক-নির্কিংশেষে সকলকে মানিয়া লইতে হইবে, এবং ব্যাস-বাণ্মীকি হইতে বঙ্কিম-রবীন্দ্রনাথ—বেদ-উপনিষদের ঋষি হইতে আধুনিক মন্ত্রদ্রষ্টা পর্য্যন্ত—সকলকে বাতিল করিয়া দিয়া, 'প্রগতি' নামক একটি অনার্য্য শব্দকে বিশাল বংশদণ্ডে বাঁধিয়া, ভক্তবেশী বর্করগণের অগ্রণী হইয়া, আধুনিক নগর-চত্বরের পণ্যবীথি প্রকম্পিত করিতে হইবে।

যুগধর্ম্ম তাহাই বটে, এবং তজ্জন্ত দুঃখ করিয়া লাভ নাই। জীবনের সহিত রসের যে আত্মিক সম্বন্ধ, তাহা এ কালে রক্ষা করা বড়ই দুঃকর ; এমন কি, রসিকজনের পক্ষে যেখানে-সেখানে সেই রস নিবেদন করিতে যাওয়াও নিরাপদ নহে। কিন্তু একটা বিষয় ভাবিয়া আশ্চর্য্য হইতে হয় ; রসকে যাহারা

স্বীকার করে না, তাহার সেই ধ্বংসাবশেষের ক্ষেত্রটিকে সম্পূর্ণ ত্যাগ করিয়া স্থানান্তরে শিবির-সন্নিবেশ করিতে তাহারা এতই অনিচ্ছুক কেন? গত দুই হাজার বৎসর ধরিয়া পৃথিবীর রসিক-সমাজ যে-বস্তুকে যে-নামে ও যে-রূপে সাক্ষাৎ করিয়াছে, সৃষ্টি করিয়াছে, এবং উপভোগ করিয়াছে, তাহা যদি একালে একান্তই অচল হয়, তবে এই নূতন দেশ এবং কালের ক্ষেত্রে সম্পূর্ণ নূতন নামে একটা নূতন বস্তুর প্রতিষ্ঠা করিলে তো আর কোনও বাদ-বিসম্বাদের কারণ থাকে না। কিন্তু 'প্রগতি'র মতলব তাহা নয়,—সেই সাহিত্যেরই বুকের উপরে বসিয়া, সেই রসেরই জাত মারিয়া, আপন মাহাত্ম্য ঘোষণা করিতে হইবে, নতুবা ভূঁইফোড় হওয়ার একটা অস্ববিধা আছে। অতএব জোর গলায় ঘোষণা করা চাই যে, 'প্রগতি'ও রসের প্রগতি; রস এতদিন বদ্ধ অবস্থায় ছিল, আমরা তাহাকে 'every aspect of life' জুড়িয়া—অর্থাৎ নালা-নর্দমা পর্যন্ত—মুক্ত-ধারায় বহাইয়া দিয়াছি। যাহারা অতীতকালের অপ্রগতি-জনিত মধুহৃৎ-পিপাসাকেই রসপিপাসা বলিয়া মনে করে, তাহারা শৈশব অতিক্রম করিয়া যৌবনে পদার্পণ করে নাই—চা খাইতে শেখে নাই। আড়াই হাজার বৎসরেও মানুষের যে যৌবনলাভ ঘটে নাই, বিংশশতাব্দীর একপাদ পূর্ণ না হইতেই সেই যৌবন উপস্থিত হইয়াছে; এত যুগ, এত জাতি, ও এত বিভিন্ন ভঙ্গির কাব্যসাহিত্যে যে-রসের শাস্বত ভিত্তি টলে নাই, আজ সহসা তাহার আয়ু ফুরাইয়াছে। যদি ফুরাইয়াই থাকে, তবে তাহা লইয়া এত লাফালাফি কেন?

পৃথিবী যে ঘুরিতেছে, সৌরমণ্ডলের কেন্দ্রস্থলে স্থির হইয়া নাই, এই প্রগতিতত্ত্ব তো বহু পূর্বে আবিষ্কৃত ও ঘোষিত হইয়াছে। স্থির-পরিণাম অপেক্ষা গতিই যে শ্রেষ্ঠতর, রূপের জড়-সমাপ্তি অপেক্ষা ভাবের অনিয়ত চিৎ-প্রেরণাই যে মহত্তর,—এইরূপ চিন্তা, বা দার্শনিক মতবাদ তো বহুকাল প্রচলিত আছে। তথাপি এইরূপ মতবাদ সত্ত্বেও সেই প্রাচীন রসবাদ কাব্যে ও কলা-শিল্পে আপন স্বাতন্ত্র্য রক্ষা করিয়া চিরদিন সকল-নিয়মের উর্দ্ধে আপন অধিকার অক্ষুণ্ণ রাখিয়াছে। আধুনিক প্রগতিবাদীর দল এমন কি নূতন তত্ত্ব আবিষ্কার করিয়াছে, এমন কোন অজ্ঞাত সত্যের সন্ধান দিয়াছে, যাহার ফলে মানুষের আত্মা একেবারে বিপরীত দিকে মুখ ফিরাইতে বাধ্য হইবে?

আসল কথা, এই 'প্রগতি'র ধ্বংসধারিগণ এতদিন এই ভূমণ্ডলেই অস্ত্র নামে

পরিচিত ছিলেন; বিদগ্ধ রসিক-সমাজও যেমন সকল দেশে সকল কালেই ছিল ও আছে, এই পণ্ডিতসম্মত অসভ্য বর্করেরাও তেমনই সকল যুগে সকল সমাজে বিস্তৃত ছিল। আজ যুগধর্মের সুযোগে—মানব-সভ্যতার এই অতিশয় সঙ্কটময় দুর্দিনে, ইহারা, এই রস-অধিকার-বঞ্চিত হরিজনেরা, জাতে উঠিবার জন্য বিষম কোলাহল সুরু করিয়াছে। যাহাদের রসবোধের অভাব জন্মগত, রস কি বস্তু সেই চৈতন্যই যাহাদের নাই, তাহারা এই আজ রসের অধিকার দাবি করিয়া সাহিত্যিক হইতে চায়। ইহারা এই রস-ব্রহ্মের ব্রাহ্মণ্য-সংস্কারকে পদাঘাত করিয়া আপনাদের শূদ্রতারই জয় ঘোষণা করিতেছে। কাল তাহাদের অক্ষুণ্ণ; আজ দিকে দিকে মানবাত্মার দুর্গতি, মানবজাতির সুদীর্ঘ সাধনার পরম ধনের অপচয়, যাহা কিছু সুন্দর ও মহৎ তাহারই ধূলিধূসর পরিণাম—জ্ঞানী ভক্ত ও রসিকের হৃদয় বিদীর্ণ করিতেছে; এ হেন সময়ে, যাহারা পৃথিবীর ব্রাহ্মণ-সমাজে কখনও প্রবেশ করিতে পারে নাই, সেই ইতর মানুষেরা মহাসুযোগ লাভ করিবে, ইহাই তো স্বাভাবিক।

২

‘প্রগতি’ শব্দটির যাহা অর্থ, তাহা কাহারও অবিদিত নাই। ইংরাজিতে ‘progress’ বলিতে যাহা বুঝায়, তাহারই বিশেষ ও ব্যাপক অর্থ বাংলায় প্রকাশ করিবার জন্য রবীন্দ্রনাথ এই শব্দটি নির্মাণ করিয়াছিলেন। শব্দের মোহ ও মাহাত্ম্য কম নয়, তাই এই বিশেষ শব্দটিকেই আশ্রয় করিয়া ক্রমশ ইহার অর্থগত বিদেশী ভাব আমাদের ইঙ্গ-বঙ্গ-সমাজের বড় কাজে লাগিয়াছে। সম্প্রতি ইহারা নিখিল-ভারতীয় প্রগতি-কোম্পানির সহিত যুক্ত হইয়া তাঁহাদের এই উপবন্ধীয় প্রগতিবাদকে বঙ্গবাসীর চক্ষে—প্রীতিপ্রদ না হউক—ভীতিপ্রদ করিবার চেষ্টা করিতেছেন, তাঁহারা সাহিত্যে প্রগতিবাদ প্রচার করিয়াছেন। রাষ্ট্রে, সমাজে এবং জাতির জীবনঘটিত নানা সমস্যায় প্রগতিতত্ত্বের অবকাশ আছে; এবং সেই সকল ব্যাপারে তাহার আলোচনা ও প্রচারমূলক গ্রন্থরাজিকে প্রগতিবাদী সাহিত্য বলিতে কাহারও আপত্তি নাই; কারণ, ইংরাজিতেও ‘literature’ শব্দটি অতিশয় ব্যাপক অর্থে ব্যবহৃত হয়,—ব্যবসায়-বাণিজ্য সংক্রান্ত বিবরণও ‘literature’ আখ্যা পাইয়া থাকে। কিন্তু সাহিত্যের নামেই এই যে প্রগতির

দাবী, ইহা সত্যকার সাহিত্যকেই অস্বীকার করা—ইহার মূলে আছে রসের বিরুদ্ধে বেরসিকের আক্রোশ। এই প্রগতিবাদ হইতে সাহিত্যের আদর্শকে সম্পূর্ণ স্বতন্ত্র রাখিবার জন্য, ইদানীন্তন কালে যুরোপীয় সাহিত্যাচার্যগণ কাব্যরসের ব্যাখ্যা ও বিশ্লেষণে বিশেষ যত্নবান হইয়াছেন। যাহারা এইরূপ প্রগতিবাদী তাহাদের সহিত সাহিত্যের কোনও সম্পর্কই নাই, বরং সম্পর্ক অস্বীকার করাই উভয় পক্ষে মঙ্গলকর। ওদেশে সে চেষ্টা যথেষ্টই হইতেছে; আমাদের দেশে এ কাজ করিবার কেহ নাই, তাই অপর পক্ষের অনাচার এত বৃদ্ধি পাইতেছে।

আমি পূর্বে বলিয়াছি, এই প্রগতিবাদীর দল সাহিত্যের অর্থাস্তর করিতে চায়, কিন্তু নামাস্তর করিতে রাজি নহে। জীবনকে ইহারা যন্ত্ররূপেই ভাবনা করে; যন্ত্রের কালোপযোগী পরিবর্তন আছে,—নূতন অংশের যোজনা ও পুরাতন অঙ্গসংস্কার অবশ্যস্বাভাবী। এবং যেহেতু যন্ত্রের ক্রিয়াও তদনুরূপ হইতে বাধ্য, অতএব সে বিষয়ে আপত্তির কোনও কারণ থাকিতে পারে না,—সাহিত্যও যে সেই জীবন-যন্ত্রেরই একটা অঙ্গ! মানব-সমাজের গতি-বৃদ্ধির সঙ্গে সঙ্গে এই জীবন-যন্ত্রও অটলতর হইতেছে, সেই অটলতাই তাহার গৌরব। অভাব যতই বাড়িতেছে, ততই যন্ত্রও চক্রবহুল হইয়া উঠিতেছে; এই সকল চক্রের মিলিত ঘর্ষরন্ধনি চক্রবৃদ্ধির হারে কালক্রমে বিশালতর হইতেছে; সাহিত্যও তাই চক্রমুখরতায় পূর্বাপেক্ষা উত্তরোত্তর ঘোরনাদী হইয়া উঠিতেছে। ইহাই সাহিত্যের প্রগতি, এই নাদের উগ্রতাই সাহিত্যের শ্রেষ্ঠতার প্রমাণ! সাহিত্যও সৃষ্টিধর্মী নয়, যন্ত্রধর্মী; ইহাতে কেবল যুগের গতিধর্মই আছে, কোনও শাখত আদি-অস্তের স্থিতিধর্ম নাই। আমাদের দেশের প্রগতিবাদী যাহারা, তাহাদের মত এতখানি বিশ্লেষণ করিবার প্রয়োজনও নাই, কারণ, সেই মত কোন মূলতত্ত্বের অপেক্ষা রাখে না। তথাপি যে-তত্ত্বকে তাহারা অতিশয় সুলভ বিদ্যায় কতকগুলি বাক্যের সাহায্যে আয়ত্ত করিয়া, আপনাদের রিপুবিশেষকে চরিতার্থ করিতেছে, তাহার মূলে এইরূপ ধারণাই আছে। সাহিত্য সৃষ্টিধর্মী অর্থাৎ প্রাণধর্মী,—তাহা যে যন্ত্রধর্মী নয়, তাহার প্রমাণ, কোনও উৎকৃষ্ট কবিকীর্তি এ পর্যন্ত বাতিল হইয়া যায় নাই; বাতিল হওয়া দূরের কথা, সেই কাব্যের অন্তর্নিহিত রসরূপ কালে কালে নবনবোন্মেষিত হইয়া উঠে, সে রসের বিকাশধারার শেষ নাই। এই বিকাশ আর ঐ যান্ত্রিক বিবর্তন এক নয়; যাহা একবার সত্যকার সৃষ্টিগদবী লাভ করিয়াছে,

রসের অগতে তাহার আর যত্ন নাই, যত্ননির্মিত মাল্লবও তাহার প্রসাদে অমর হইয়া উঠে। অতএব সাহিত্যের প্রগতি বলিতে যদি ইহাই বুঝিতে হয় যে, এককালের সাহিত্য অন্তকালে অচল,—যাহা অগ্রবর্তী তাহাই পশ্চাদ্বর্তী অপেক্ষা শ্রেষ্ঠতর, তবে তাহা প্রগতি হইতে পারে, কিন্তু কদাপি সাহিত্য নহে। যতই প্রাচীন হউক, কোন কাব্য যদি উৎকৃষ্ট হয়, তবে তাহার প্রকৃতি কিরূপ, সে সম্বন্ধে একজন শ্রেষ্ঠ কবি-রসিকের এই উক্তি রসিকসমাজকে আশ্বস্ত করিবে—

All high poetry is infinite, it is as the first acorn, which contained all oaks potentially. Veil after veil may be withdrawn, and the inmost naked beauty of the meaning never exposed. A great poem is a fountain for ever overflowing with the waters of wisdom and delight; and after one person and one age has exhausted its divine effluence which their peculiar relations enable them to share, another and yet another succeeds and new relations are ever developed, the source of an unforeseen and an unconceived delight.

—কিন্তু প্রগতিবাদীরা, বিশেষত আমাদের দেশের ইহারা একথা স্বীকার করিবেন না; তাহার কারণ, তাঁহাদের যে সাহিত্য তাহাতে poetry-র বালাই নাই—‘high poetry’ আবার কি? ওদেশের নব্যসম্প্রদায় এ সকল কথা নিত্য শুনিতেছে, এবং শুনিয়া তাহার পাল্টা জবাব দিতে নিশ্চয়ই কিঞ্চিৎ অন্বস্তি বোধ করিতেছে; কারণ, তাহারা আমাদের এই ধমুর্করদের যত এতটা নিরঙ্কুশ নহে। তাই যখন তাহারা শোনে—

I quite freely admit, that to a man hesitating between socialism and anarchy, or between polygamy and eugenics, or between overhead and underground connexions for tramways, *The Tempest* or *Macbeth* would have very little to say of any profit.

—তখন তাহারা বোধ হয় কিছুক্ষণের জন্মও চূপ করিয়া থাকে।

৩

আমাদের প্রগতিওয়ালারা সেদিন সভা করিয়া, যে ভাষায় ও যে অর্থে, সাহিত্যের সঙ্গতি নির্দেশ করিয়াছেন, তাহা শুনিলে ওদেশের গুরুতাইয়েরা লজ্জা পাইত, সন্দেহ নাই। রবীন্দ্রনাথের দিন যে গত হইয়াছে এবং এক্ষণে তাঁহাদের দিন আসিয়াছে, ইহা কি আর কাহাকেও ডাকিয়া বলিবার প্রয়োজন আছে? সেই জন্মই তো দেশে যে কয়জন ভদ্র সাধু সজ্জন অবশিষ্ট আছে, তাহারা ঘটি-বাটি

সামলাইতে অস্থির হইয়া পড়িয়াছে। রাষ্ট্রীয় পরিষদে যেমন ক্রমাগতই মন্ত্রিমণ্ডলের পদত্যাগ এবং অধিকতর দুঃসাহসী বিপ্লববাদী ব্যক্তিসংঘের মন্ত্রিপদলাভ রাজ-নৈতিক প্রগতির লক্ষণ, তেমনই, রবীন্দ্রনাথপ্রমুখ সাহিত্যনায়কগণের পরাজয়, ও এইরূপ ব্যক্তিধারীদের অকৃত্রিম সাহিত্যিক প্রগতির অকাট্য প্রমাণ। তুলনাটা আদৌ অসঙ্গত নয়; এই সকল বাহ্যফোটসম্বল বীরগণ, আর কোনও ক্ষেত্রে তাদৃশ প্রতিষ্ঠা লাভের সম্ভাবনা নাই দেখিয়া, অগত্যা বাংলাদেশের নির্বিকার ও নিষ্কর্ষ সাহিত্যসমাজে প্রতিপত্তি লাভের জন্ত হাঁকডাক করিতেছেন। উপরে উদ্ধৃত উক্তির সেই 'profit'ই ইহাদের একমাত্র লক্ষ্য, সাহিত্যের দোহাই দিয়া কিছু profit করিয়া লইবার জন্তই ইহারা এই অপেক্ষাকৃত নরম মাটিতে কুস্তির আখড়া স্থাপন করিয়াছেন। সাহিত্যহিসাবেই সাহিত্যের ভাবনা করিতে ইহারা অক্ষম; কিন্তু সাহিত্য ইহাদের ধর্ম ও সাধনার ধন, তাহাদের একজন এই স্নেহের সম্বন্ধে বড় দুঃখে বলিয়াছেন—

It is an awful truth, that there neither is, nor can be, any genuine enjoyment of poetry among nineteen out of twenty of those persons who live or wish to live, in the broad light of the world—among those who either are, or are striving to make themselves, people of consideration in society. This is a truth and an awful one, because to be incapable of a feeling of poetry, in my sense of the word, is to be without love of human nature and reverence of God.

—ইহাই উদ্ধৃত করিয়া অপর এক মনীষী বলিতেছেন—“That is an emphatic answer”।

কিন্তু শুনিবে কে? 'Love of human nature' এবং 'reverence of God'—মানবপ্রীতি ও ভগবন্তুষ্টি—যে কাব্যরস-রসিকতার ভিত্তি বলিয়া একজন ঋষিকবি নির্দেশ করিয়াছেন, আধুনিক প্রগতির ধাক্কাবাজি ইহাদের রসিকতার চরম পরিণাম, তাহাদের অভিধানে সেই প্রেম-ভক্তির বিন্দুবিসর্গও নাই। Human nature বা humanity বলিতে ইহারা প্রত্যেকেই স্ব স্ব চরিত্র, আত্মগত অভিমান, বা অহংচর্চা, এবং শিল্পোদরসাধন বুদ্ধিবৃত্তিই বোঝে। যত বড় বড় কথা তাহারা বলুক, এবং যত বড় পাণ্ডিত্য ও শৌর্যই তাহাতে থাকুক, মূল বক্তব্য সেই একই; অর্থাৎ, আমরা যাহা-খুশি বলিব, যাহা খুশি করিব, এবং যাহা খুশি খাইব; এই যাহা খুশিকে 'আহা-মরি' করাইতে না পারিয়াই তাহারা রাগিয়া

কামিলা অনর্থ করিতেছে। নিজের বিদারণ অক্ষমতা ও অসমর্থতা তাহাদের গৌরবাহিত করিতে হইবে ; তাই, তাহাদের মত যুগ আর নাই—ইহাই চীৎকার করিয়া বলিবার সঙ্গে সঙ্গেই ক্রোধবিহীন ক্রীটের মত আক্ষেপ করিতেছে, আমাদের লেখা কেহ পড়িতেছে না! ইহাতে যেমন অকাঙ্ক্ষকের মত আক্ষেপ, তেমনই একপ্রকার করুণরসের নাকি-কায়াও আছে। কিন্তু বিকাল-পক্ষ প্রবীণ যিনি, তাহার পাণ্ডিত্য-মস্তের সীমা নাই, তাহার আক্ষয়ক কৃতিত্বসীমা অজ্ঞান-রায়দরবারকেও লজ্জা দিয়াছে, তাহার বাণীতে সত্যকার বীরত্ব আছে—

Croakers are not wanting to tell you—with sighing glances fixed on the past these men would tell you...

—এই 'tell you' যে কি, তাহা আর উদ্ধৃত করিলাম না, কারণ এই প্রবন্ধই তো তাহাই—কত বড় croakers আমরা! কিন্তু—

To these gloomy judgments I take the liberty respectfully to demur, and I claim that despite the wailings of these defeatists...the literature produced by lesser personalities today, is neither lacking in art, nor in any of the qualities that make high class literature. This literature, I claim, can, as pure works of art, hold its own against any literature in the rest of India, and perhaps of the world outside.

সেই দামু আর চামু! বাংলা-সাহিত্যে ইহারা আর মরিল না, অমর হইয়াই রহিল! কি ওজস্বিনী ভাষা, রসনার কি দিগন্তবিসর্পী লেনিহতা! "I claim"—অবশ্যই! সেইটাই যে আসল কথা; কারণ, বাংলার এই প্রগতি-সাহিত্যের অনেকখানিই তিনি যে নিজের অংশে দাবি করেন! "High class literature" "pure works of art"—এ সব যে তাহার নিজেরই কীর্তির জয়গান! এইরূপ মনোবৃত্তি যাহাদের তাহাদেরই সম্বন্ধে ঋষি-কবির সেই উক্তি স্মরণ করিতে হইবে— "those who either are, or are striving to make themselves, people of consideration in society"। ইহারা যে কল্পিনকালে কোন জন্মে সাহিত্যরসের ধার ধারে না, ইহাদের রচিত সাহিত্য পড়িলে সে বিষয়ে কাহারও সন্দেহ থাকিতে পারে? পণ্ডিত হইয়াও এমন অপণ্ডিতের মত কথা বলে, ইহার কারণ কি? কারণ—যে দেশ ও যে সমাজ হইতে ইহারা সাহিত্যিক অভিব্যক্তিতে নিষ্কাশিত হইয়াছে, সে সমাজে রসবোধের বালাই বা উৎকৃষ্ট সাহিত্যসৃষ্টির প্রেরণা কোনকালেই ছিল না; কবি সত্যোক্তনাথ মস্তের সেই উক্তি যে বিবেচনামূলক

নয়, তাহা যে অতিশয় সত্য, আজ এই প্রগতি-সম্প্রদায়ের মনোভাব ও সাম্প্রদায়িক বৈশিষ্ট্য লক্ষ্য করিলে, সে বিষয়ে সন্দেহমাত্র থাকে না।

বাংলাদেশের প্রগতি-সাহিত্যের এই নেতা সাহিত্যের উপরে প্রগতির শাসন প্রচার করিয়াছেন এই বলিয়া যে—

No writing deserves the name of literature unless it marks some progress beyond the literature of the past.

The name of literature ! ইংরেজীর জোর কম নয় ! Name of literature-এর সংজ্ঞা দিন দিন বেরূপ ব্যাপক হইয়া উঠিতেছে, তাহাতে আমরা তো ইহাই বুঝি যে, যে-কোনও writing—এমন কি কবিরাজী মোদকগুলির বিজ্ঞাপনও—literature-নামের দাবি করিতে পারে। তাহাই যদি না হইবে, তবে এই সিনিয়র প্রগতি-মহাশয় সাহিত্যের বিধানদাতা হইলেন কি করিয়া ? সে কোন্ সাহিত্য ? সেকালের কথা ছাড়িয়া দিই,—একালে পৃথিবীর সাহিত্যিক সমাজে যাহারা সাহিত্যরস ও তাহার তত্ত্ব-আলোচনায় নিখিল রসিকসমাজকে বিম্বিত ও পুলকিত করিতেছেন, তাঁহাদেরও কেহ সাহিত্যের এমন সংজ্ঞা নির্দেশ করিতে সাহসী হন নাই ; সেই জন্যই কি ব্যথিত, ক্ষুব্ধ, মর্মান্বিত, ও পরিশেষে ক্ষিপ্ত হইয়া আমাদের এই বাঙালী সাহিত্য-বীর সাহিত্য সম্বন্ধে এত বড় একটা সত্য ‘একাং লজ্জাং পরিত্যজ্য’ এমনভাবে ঘোষণা করিয়া ফেলিলেন ? রসজ্ঞান না হয় নাই থাকিল—সকলের তাহা থাকে না ; কিন্তু এমন বুদ্ধিনাশ হইবার কারণ কি ? সাহিত্য পড়িতে পড়িতে বুড়া হইয়া গেলাম ; এত কবি, এত ক্রিটিক, এত মনীষী—প্রাচীন ও আধুনিক এত পণ্ডিতের এত কথাই শুনিলাম, কিন্তু এমন মগজভেদী উক্তি আর কোথায়ও শুনি নাই ! হোমার-শেক্সপীয়রকে লইয়া এখনও যাহারা খাঁটি সাহিত্যসৃষ্টির গবেষণা করে, ব্যাস-বাল্মীকির মধ্যে এখনও যাহারা কাব্যরসের অন্ত পাইল না—তাহারা তো এই “some progress beyond the literature of the past”-এর কথা কখনও ভাবিল না ! সাহিত্যের রসটাই বড় কথা নয়, বড় কথা ওই ‘progress’ ? প্রগতি—প্রগতি—প্রগতি ! Progressive literature-বাক্যটিও একটি tautology ! কোন সাহিত্যই সাহিত্যপদবাচ্য নয়, যাহা পূর্ববর্তী সাহিত্যকে ছাড়িয়া যাইতে পারে নাই ; অন্তর্গত—সাহিত্য ক্রমাগতই সাবালক হইতেছে ; তারিখ যতই আগাইয়া যাইতেছে, ততই তাহা

সেয়ানা হইয়া উঠিতেছে; অতএব যতই আধুনিক হইতেছে, ততই তাহার দাবি বাড়িতেছে,—পূর্বের বইগুলিকে শিল্পরাশোলে অর্থাৎ মিউজিয়মে রাখিয়া দিতে হইবে! এই নব-অভিনবগুণের মাগকাঠিতে আভিকার সাহিত্য আগামী-কল্যের সাহিত্যের কাছে হাত-পা ভাঙ্গিয়া পড়িয়া থাকিবে,—কেন না progress চাই; সাহিত্যরস, ও রামা-শ্রামার দল-বাধিয়া 'হাম-বড়ামি'র হুকুমোড়—এই ছইই যে এক পদার্থ! প্রগতি অর্থাৎ আপনাদের কীর্তির কৃতিত্ব ঘোষণার জন্য পূর্বযুগের সকল কবি-মহাকবিকে হটাইয়া দিতে হইবে,—যাহারা কবিকুলপুত্রব তাহারা এই মুষিকের দলকে প্রণাম করিবে! তার কারণ—

By a long course of evolution we have reached an ampler synthesis which embraces equal freedom for all and freedom in every aspect of life; and social organisations till yesterday were striving to achieve this freedom in as full measure as possible.

—অতএব পূর্ববর্তী সাহিত্য অপেক্ষা আধুনিক সাহিত্য শ্রেষ্ঠ না হইবে কেন? এ যে কোন্ রসের সাহিত্য তাহা ওই 'every aspect of life' এবং 'social organisations' প্রভৃতি বাক্যের দ্বারাই স্পষ্ট হইয়া উঠিয়াছে। এ আর কিছুই নয়—সেই শিল্পোদরসমস্তারই কথা; সেই জন্য আর সকল সাহিত্য বাতিল হইয়া গিয়াছে। Freedom in every aspect of life—ইহাই যে আধুনিক সাহিত্যের মূলমন্ত্র! আমরাও তাহা হাড়ে হাড়ে বুঝিতেছি, কেবল ইহাই বুঝিতে পারিতেছি না যে, এই মন্ত্রটির সাধনার জন্য একটা নূতন পঞ্চবটীর প্রতিষ্ঠা করিলেই তো ভাল হইত—পূর্ববর্তীদের সেই আসনটির উপরেই এত লোভ কেন? এই সাহিত্য-নামটাকেও বর্জন করিয়া একটা নূতন নামে এই 'brave new world'-এর পস্তন করিলে তো আর কোনও হান্ধামা হইত না। কিন্তু তাহা যে ইহাদের মনঃপুত নয়—তার কারণ—সাহিত্য-নামটার একটা বনিয়াদী প্রতিপত্তি আছে, অসাহিত্যিক হইয়াও সেই প্রতিপত্তিটুকু চাই। শূত্রের ব্রাহ্মণ-বিষেযের কারণও তাহাই—যাহাকে বলে দারুণ inferiority complex; ব্রাহ্মণত্বের প্রতি সত্তর প্রহা আছে, লোভও কম নয়; কিন্তু তাহা যে হইবার উপায় নাই, অন্যকণ্ঠেই বিধাতা বাদ সাধিয়াছেন—তাই এত আকোশ, এত চীৎকার।

এই আকোশের বশেই ছোট প্রগতি-মহাশয় এই ভাবিয়া আশ্রয় হইতে চান যে, রবীন্দ্রনাথের দিন গিয়াছে এবং রবীন্দ্রোত্তর কবি-সাহিত্যিকগণ গজলিকাবৃত্তি

করিয়া সেই যুগের দ্বতভার বহন করিতেছেন। এ আশাস যে চাই-ই, নতুবা বাঁচে কেমন করিয়া? কিন্তু ইহাতেও একটু গোল রহিয়াছে, তাহা বোধ হয় ভাবিয়া দেখিবার অবকাশ হয় নাই। রবীন্দ্রনাথকে যাহারা কেবলমাত্র অনুকরণ করিয়াই বাঁচিতে চায়, তাহাদের কথা বলি না, কিন্তু রবীন্দ্রসাহিত্যে রসের যে আদর্শ রহিয়াছে, তাহা যে সর্বযুগের আদর্শ—রবীন্দ্রনাথও যে গডলিকাবৃত্তি করিয়াছেন! তাহা হইলে রবীন্দ্রনাথও কখনও বাঁচিয়া থাকেন নাই! খাটি প্রগতিতত্ত্ব অনুসারে রবীন্দ্রযুগও একটা পৃথক যুগ নয়, যেহেতু তাহাও পূর্বতন যুগের মূলপ্রেরণাকে বাতিল করিয়া দিতে পারে নাই, সেও যুগ-যুগের ভার বহন করিয়াছিল। শেষ পর্যন্ত এই দাঁড়ায় যে, ইহারা সাহিত্যকেই চায় না, চায়—যাহা খুশি বলিব, যাহা খুশি করিব, এবং যাহা খুশি খাইব; এবং যে-সমাজ তাহাতে আপত্তি করিবে, তাহাকে decadent, vicious ও putrescent বলিয়া গালি দিব।

৪

বাংলার প্রগতিবাদী সাহিত্যিকদের মতি-গতি ও অভিপ্রায় সম্বন্ধেই আলোচনা করিলাম; ইহাদের কথার জবাব দিবার চেষ্টা অনর্থক। তার কারণ,—প্রথমত, যাহারা সাহিত্য বোঝে না, এবং বিশ্বাসও করে না; আত্মপ্রতিষ্ঠাই যাহাদের একমাত্র অভিপ্রায়, তাহারা কোনও জবাব মানিবে না; দ্বিতীয়ত, যে দেশ হইতে এইরূপ সাহিত্যতত্ত্বের আমদানী হইয়াছে এবং এখানকার জলমাটির গুণে তাহার এমন বৈজ্ঞানিক ভাষা প্রস্তুত হইয়াছে—সেই দেশে বিবলতাও যেমন জন্মিয়াছে, তেমনই বিষয় ভেষজের অভাব ঘটে নাই। সেখানে আচার্য্যকুল সাহিত্যিকের মুখে সাহিত্যবস্তুর যে অপূর্ব ব্যাখ্যা ও বিশ্লেষণ শোনা যাইতেছে, ইংরাজী-অভিজ্ঞ বাঙালী পাঠকের পক্ষে সে বিষয়ে বিস্তারিত আলোচনার প্রয়োজন নাই। আমি পূর্বে যে কয়টি বাক্য উদ্ধৃত করিয়াছি, তাহার প্রত্যেকটি বিভিন্ন ব্যক্তির; পরে আরও কিছু উদ্ধৃত করিব, তাহা হইতে অন্তত এইটুকু সপ্রমাণ হইবে যে, প্রকৃত সাহিত্য-জ্ঞান এখনও পৃথিবী হইতে লুপ্ত হয় নাই। একালেও সত্যতম সমাজের শিক্ষিততম ব্যক্তিরা সাহিত্যের প্রসঙ্গে অসাহিত্যিক মনোভাবকে প্রদ্রব দিতেছেন না। সমাজে চোর যেমন আশ্রয় নাই তাহা হইতেই চোরের দলে আকৃষ্ট হয়—সাবু সাধুর দলে, তেমনই, সাহিত্যের ক্ষেত্রেও রসিক রসিকের

দলে, এবং বৈরসিক বৈরসিকের সঙ্গে মিশিয়া থাকে। অতএব কল গড়িয়েই কোন-কিছুর প্রাধান্য প্রমাণিত হয় না; বরং, সাহিত্যের ক্ষেত্রেও নানান স্থানে শূন্য স্থাপন করিয়া একটা নিখিল রকমের বড় বড় গড়িয়া তুলিয়েই বৃত্তিতে হইবে, উদ্দেশ্যটা সাহিত্যের দিক দিয়া সং বা সত্য নহে। এই সকল প্রগতিপন্থী সাহিত্যিক বীরকে আকাশে তুলিয়া সংবাদপত্রে পত্রপত্রকদিগের যে হুড়াহুড়ি লাগিয়া গিয়াছে, তাহাতে ইহাই প্রমাণিত হয় যে, আমাদের দেশে শিক্ষাবিস্তারের অল্পপাতে কালচার বড়ই কমিয়া গিয়াছে—সাহিত্যরসবোধ দুর্লভ হইয়াছে বলিয়াই যশ এত দুর্লভ হইয়াছে।

বাংলার প্রগতি-সাহিত্য যে-প্রগতির পরিচয় কিছুকাল যাবৎ দিয়া আনিতেছে, এতদিনে তাহা কোনও সূহ ও সহৃদয় ব্যক্তির অবিদিত নাই। এই সাহিত্য অতিশয় আধুনিক হইলেও ইহার লক্ষণ নূতন নহে, এবং ইহার সম্ভাবনা কোনও কালেরই অগোচর ছিল না; তাহার প্রমাণ—১৩১৩ সালে, প্রায় ৩৩ বৎসর পূর্বে, রবীন্দ্রনাথ তাঁহার এক প্রবন্ধে লিখিয়াছিলেন—

“আমাদের প্রবৃত্তি উগ্র হইয়া উঠিলে বিধাতার জগতের বিরুদ্ধে নিজে যেন সৃষ্টি করিতে থাকে। তখন চারিদিকের সঙ্গে তাহার আর মিল থাকে না। আমাদের ক্রোধ আমাদের লোভ নিজের চারিদিকে এমন সকল বিকার উৎপাদন করে, বাহাতে ছোটই বড় হইয়া উঠে, বড়ই ছোট হইয়া যায়; বাহাই ক্ষণকালের তাহাই চিরকালের বলিয়া মনে হয়, বাহা চিরকালের তাহা চোখেই পড়ে না। বাহার প্রতি আমাদের লোভ জন্মে, তাহাকে আমরা এমনই অসত্য করিয়া গড়িয়া তুলি যে, জগতের বড় বড় সত্যকে সে আচ্ছন্ন করিয়া দাঁড়ায়, চন্দ্র সূর্য্য তারাকে সে ম্লান করিয়া দেয়। ইহাতে আমাদের সৃষ্টি বিধাতার সঙ্গে বিরোধ করিতে থাকে।”

—পড়িয়া মনে হয় নাকি যে, এ যেন এই প্রগতি-সাহিত্যের সম্বন্ধেই রবীন্দ্রনাথের একটি অতি আধুনিক উক্তি? এই যে freedom-এর অভিধান—সাহিত্যে এই মূলবাক্য আক্ষাণনই বিধাতার সৃষ্টির বিরুদ্ধে আধুনিক মানবের চীৎকার। আমি এই সাহিত্যকে শিল্পোদরসর্ব্বম্ব বলিয়াছি—বাক্যটি অশ্লীল হইলেও, অর্থটি সত্য অতএব সার্থক। সেকালের সত্যবর্ণী ঋষিগণ আধুনিক প্রগতিবাদের অর্থ বুঝিতেন—পৃথিবীর আঙ্গ যে মানুষের মল “freedom in every aspect of life” বলিয়া মহাকলরব আরম্ভ করিয়াছে, তাহাদের সেই ব্যাধির নিদান এক কথায় নির্দেশ করিবার জন্য তাঁহারা ঐ অতিশয় সার্বকায়িক

স্বষ্টি করিয়াছিলেন ; অতএব আমাদেরও লজ্জিত হইবার কারণ নাই । রবীন্দ্রনাথ ঋষি নহেন, তিনি কবি ; তাই তিনি অতখানি নগ্নতার পক্ষপাতী হইতে পারেন না । কিন্তু তাহারও বক্তব্য সেই একই,—অতিশয় উদ্ভ্রভাবে তিনি বলিয়াছেন, “বাহার প্রতি আমাদের লোভ জন্মে তাহাকে এমনি অসত্য করিয়া গড়িয়া তুলি যে, জগতের বড় বড় সত্যকে সে আচ্ছন্ন করিয়া দাঁড়ায় ।” প্রগতি-সাহিত্য হইতেই ইহার উদাহরণ দিব । বাংলা কাব্যে প্রেমের কবিতা প্রায় নাই বলিলেই হয়—অত বড় ইংরেজী সাহিত্যেও তেমন প্রেমের কবিতা ঝুড়ি ঝুড়ি নাই—ইহাই বুঝাইবার জন্য মহাপণ্ডিত ও মহাসাহিত্যিক ছোট প্রগতি-মহাশয় একস্থানে লিখিয়াছেন—

“যৌন-অভিজ্ঞতা জীবনে বেশির ভাগ মানুষেরই হয়, কিন্তু সেই অভিজ্ঞতা কবিদের মধ্যেই বা ক’জন বর্ণনা করতে পেরেছেন ?...ব্যাপারটা যদি এতই সহজ হ’ত তাহলে যে-কোনো মানুষই কি অল্প নৈপুণ্যের দ্বারা তার অভিজ্ঞতা লিপিবদ্ধ করতে পারতো না ?”

এই জন্যই প্রেমের কবিতা বাংলায়, এমন কি ইংরেজীতেও—এত দুর্লভ ! যৌন অভিজ্ঞতাই প্রেমের যে গভীরতম উপলব্ধির মূল, এবং তাহার যে শারীরিক ও মানসিক প্রতিক্রিয়া উৎকৃষ্ট প্রেমের কবিতায় নিখুঁতভাবে অঙ্কিত হওয়া চাই,—তাহা পশুর মতই মানুষের পক্ষেও অতিশয় সহজ ও স্বাভাবিক বলিয়া, তেমন কবিতা লেখা বড়ই দুর্লভ । সে যে কত দুর্লভ, তাহা বুঝে না বলিয়াই সাধারণ মানুষেরা এইরূপ কবিতার কবিকে শ্রাব্য সম্মান দান করিতে চাহে না । এইরূপ সার্থক রচনার দৃষ্টান্তস্বরূপ লেখক এই লাইন কয়টি উদ্ধৃত করিয়া বলিতেছেন, “এ রকম পংক্তি জগতে খুব বেশি লেখা হয় না”—

The moment of desire ! the moment of desire !—the virgin that pines for the man who shall awaken her womb to enormous joys in the secret shadows of her chamber.

হায় বাম্বীকি, হায় কালিদাস ! হায় শেক্সপীয়ার, হায় রবীন্দ্রনাথ ! বাংলার বৈষ্ণবপদাবলী তো গোলায় গিয়াছে । কারণ, এমন রজকিনী পাইয়াও স্বিঙ্গ-কবি শারীরিক ও মানসিক প্রতিক্রিয়ার মশলাগুলি কবিতার রসে মিশাইতে পারেন নাই ! আমার ‘শিল্পোদরপরাষণ’ কথাটা কি মিথ্যা ? না, রবীন্দ্রনাথ ভুল বুঝিয়াছেন ?—“বাহার প্রতি আমাদের লোভ তাহাকে এমনি অসত্য করিয়া

গড়িয়া তুলি যে, জগতের বড় বড় সত্যকে সে আচ্ছন্ন করিয়া দাঁড়ায়, চন্দ্র সূর্য্য তারাকেও সে স্নান করিয়া দেয়।”

এইরূপ মনোবৃত্তি যাহাদের, তাহারা ইহা যদি সাহিত্যিক হয়, তাহা হইলে সাহিত্যের আদর্শ কি হইবে, তাহা তো জানাই আছে। একজন ইংরেজ সমালোচক আধুনিক সাহিত্যিকদিগকে একটি নাম দিয়াই ছাড়িয়া দিয়াছেন, সে নাম অবশ্য তাহারা গৌরবের সহিত বহন করিবে; কারণ, কিছুতেই তাহাদের গৌরবহানি হয় না। এই লেখক বলিতেছেন—

If we fasten then, one label on these books, on which is one word 'materialists,' we mean by it that they write of unimportant things; that they spend immense skill and immense industry making the trivial and the transitory appear the true and the enduring.

শেষের বাক্যটি যেন ছব্ব রবীন্দ্রনাথেরই অমুবাদ! লেখক ইহাদিগকে নাম দিয়াছেন—materialists, অর্থাৎ জড়বাদী; এবং কি অর্থে, তাহাও বুঝাইয়া বলিয়াছেন। সে দেশের আধুনিকদের সম্বন্ধে ইহাই হয়তো যথার্থ; কিন্তু আমাদের এই প্রগতির দল জড়বাদীও নহে—জড়েরও যে ধর্ম আছে, ইহাদের তাহাও নাই; কারণ, জড়েরও প্রকৃতি-গুণ আছে, ইহারা সম্পূর্ণ অপ্রকৃতিহ। ইহাদের এই যে অনাচার, এই যে অসত্যের আরাধনা, ইহাতে 'immense skill and immense industry'-র প্রয়োজন হয় না; কারণ, তাহার সাড়ে-পনেরো আনাই অমুকরণ; ইহাদের জীবধর্মই স্তিমিত, জড়ধর্ম বরং ভাল ছিল।

উপরি-উক্ত সমালোচকের আর একটি উক্তি এখানে উদ্ধৃত করা যাইতে পারে। আমাদের এই 'শিষ্য-বিজ্ঞা—গরিয়সী' প্রগতি-প্রতিভার যাহারা গুরু সেই ইংরেজ ঔপন্যাসিকদের বিখ্যাত কয়েকজনের নাম করিয়া, তাহাদের তথাকথিত বাস্তবতার অমুহাত সম্বন্ধে, এই লেখকই বলিতেছেন—

Let us hazard the opinion that for us at the moment the form of fiction most in vogue more often misses than secures the thing we seek. Whether we call it life or spirit, truth or reality, this, the essential thing has moved off...we suspect a momentary doubt, a spasm of rebellion, as the pages fill themselves in the customary way. Is life like this? Must novels be like this?

পরিশেষে আর এক আধুনিক মনীষীর একটিমাত্র উক্তি উদ্ধৃত করিয়া এই প্রসঙ্গ শেষ করিব। যাহারা অন্তরে ধর্মহীন, আধুনিক যুগের অহংমদমত্ততায়

সাহারা প্রাণের সৈন্য হারাইয়াছে, সাহারা সূর্যকেই স্নেহ জানিয়া চিরকালের উপর কপকালকে আসন দিয়াছে, এবং সর্বশেষে, সাহারা বিকৃত দেহ-মনের মানুষ-দৌর্ভাগ্যকেই প্রাণ ও প্রতিভার নিদান বলিয়া স্থির করিয়াছে, তাহারাই প্রগতির ধূলা তুলিয়া সাহিত্যকে বিকারগ্রস্ত করিতেছে। বে-খরপের প্রগতিবাদের দস্ত ইহারা করিয়া থাকে তাহাতে তৎসত্ত্বে প্রগতিও নাই—কারণ, কালের প্রবাহ-মানতাকেই ইহারা কার্যত অস্বীকার করে। নিজের আত্মাভিমানের অমূলক করিয়া ইহারা কালকে বিচ্ছিন্ন বর্ষসমষ্টিরূপে ধারণা করে,—এক একটি বর্ষসমষ্টি আপনাতেই সমাপ্ত; যেন কালের কোন স্থনিয়ত প্রবাহ নাই, তাহার প্রত্যেক অংশই এক একটি স্বতন্ত্র ঘূর্ণি। অতীত নাই, ভবিষ্যৎও ভাবনার বহির্ভূত; প্রেম নাই, বিশ্বাস নাই—আছে কেবল স্বাধিকার, স্বাতন্ত্র্য ও পাশব-স্বার্থের অসং উত্তেজনা। ইহাদের মনস্তত্ত্বে রসতত্ত্বের স্থান নাই—থাকিতে পারে না; তাই ইহারা কাব্যরম্যের চিরনির্ঝরকে বিক্রম করে, মানুষের জীবনে যে বস্তুর প্রয়োজন সবচেয়ে বেশি, সাহার অভাবে মানুষ পূর্ণ মনুষ্যত্ব লাভ করিতে পারে না, তাহাকে ইহারা মিথ্যা প্রতিপন্ন করিতে চেষ্টা পায়। তাই, সাহারা যুগে যুগে মানুষের অধ্যাত্ম-জীবন পুট করিয়া, সার্বজনীন মনুষ্যত্বের গৌরব বৃদ্ধি করিয়া, মানুষকে অশেষ ঋণে ঋণী করিয়াছেন, সেই অমৃত-সমাজ কবিগণের চিরনবীনতাময়ী বাণীকে ইহারা অতীতের আবর্জনারূপ বলিয়া মনে করে। তাহার কারণ, ইহারা জড়বাদী নাস্তিক, প্রেমহীন ও ধর্মহীন। কিন্তু সাহাদের আত্মা এখনও স্ফূর্ত আছে, সাহারা জানে ও প্রেমে সমান বলীয়ান,—কবিত্বের অমৃত-রূদে অবগাহন করিয়া সাহাদের কান্তি উজ্জ্বল ও শান্তি স্নিগ্ধ হইয়া উঠে, তাহাদের কথা স্বতন্ত্র। এমনই একজন জগতের মহাকবিদিগের সম্বন্ধে বলিতেছেন—

To men such as these the debt of humanity is inestimable. They, above all others, keep the souls of men alive; they do not tell us of spiritual felicity; they create it in us from the substance of our coarser elements...Not that Shakespeare was a Christian, any more than the poet is a mystic—but he was religious, as all great poets must be. For high poetry and high religion are at one in the essential that they demand that a man shall not merely think thoughts, but feel them—that this highest mental act be done with all his heart and with all his mind and with all his soul.

সাহাদের যুগের সাহিত্যিকদিগের যে সকল উক্তি ইতিপূর্বে উদ্ধৃত করিয়াছি,

তাহার সহিত এই উক্তি তুলনা করিলে, বাহারি মাহুয, পণ্ড নয়—তাহারা কি
বুঝিতে পারে না, কোন্ উক্তিটির মধ্যে, কাহার কঠিনের, মাহুযের সার্বজনীন
মহুযত্ব বৃহত্তর ছন্দে স্পন্দিত হইতেছে? মনে হয়, জাতিতে জাতিতে
যেমন, মাহুযে মাহুযেও তেমনই কত তফাৎ! নহিলে আমাদের দেশে, এই
অতি-আধুনিক সাহিত্যিক-সমাজে, এমন কথা এ পর্যন্ত কাহারও মুখে শুনিতে
পাইলাম না কেন? প্রগতি তো সে দেশেও আছে।

দুঃখের স্বরূপ

সমাজে দুর্বল দুঃস্থ অসহায়ের সংখ্যা কোনকালেই কম নয়। কিন্তু কোন-কালেই এইরূপ দারিদ্র্য বা দৈহিক দুঃখের ঐকান্তিক নিবৃত্তি কাহারও দ্বারা সম্ভব হয় নাই। প্রেমিক যথাসাধ্য পরোপকার করেন, কিন্তু 'কর্মদোষাৎ দারিদ্র্যতা' বা 'স্বকর্মকলতুক পুমান্'—বলিয়া জানী সে আশা ছাড়িয়া দেন। এইরূপ দুঃখকে মানুষ কুপার চক্ষেই দেখে, ইহাকেই সত্য বা মহান্ বলিয়া মনে করিতে পারে না। এইরূপ দুর্বল দুঃস্থ জনগণের সেবা করিয়া সক্ষম সুস্থ ব্যক্তির মনুষ্যত্ব-বিকাশের সুবিধা হয়—সমাজের দিক্ দিয়া ইহাই এইরূপ দুঃখের একমাত্র সার্থকতা।

যাহারা ভাবুক ও চিন্তাশীল, মনুষ্য-চরিত্র এবং মনুষ্য-ভাগ্যের সত্যনির্ণয় করিতে যাহারা উৎসুক—তাহারা সর্ববিধ দুঃখের নিদান অন্বেষণ করেন। তাহারা জানেন, কেহ কাহারও সত্যকার দুঃখের মূলোৎপাটন করিতে পারে না। মানুষের দুঃখের মূল বহুদূর-প্রসারী, তাহার প্রত্যক্ষ কারণ মানুষের চরিত্রের মধ্যেই নিহিত আছে। হিন্দু তাহাকে অতি সংক্ষেপে 'কর্মফল' বলে, পাশ্চাত্য পণ্ডিতও বলিয়াছেন—'Character is Fate'। কথাটা গভীর ভাবে অন্বেষণ করিলে প্রতীতি হইবে যে, ব্যাধি বা সমষ্টি—যে ভাবেই ধরা হউক, দুঃখের জন্ম দুঃখী নিজেই দায়ী, দুঃখ মানুষের গৌরবের নয়—কলঙ্কের কথা। যে শক্তিহীন সেই দুঃখী। ধর্মশাস্ত্র যাহাকে পাপ বলে তাহার মূলেও এই শক্তিহীনতা। পথিপার্শ্বে কোন কুষ্ঠরোগীকে দেখিলে সুস্থ মানুষের মনে যেমন বিভীষিকা উপস্থিত হয়—কুপার উদ্বেক যতই হউক, তেমনই, নিরতিশয় দারিদ্র্য দেখিলে মানুষের মনে একটা প্রবল কুষ্ঠার উদ্বেক হওয়াই স্বাভাবিক। যে-প্রেমিক এই দুঃখ দূর করিতে অগ্রসর হ'ন, তাহার অন্তরে একটা কঠিন বীর্ঘ্য ও পৌকবের প্রয়োজন আছে; দয়ার অভিজুত হইয়া কেবল ক্রন্দন করিলেই হয় না, তাহাতে নিজেও দয়ার পাত্র হইতে হয়। যেখানে এই দুঃখ দূর করিবার চেষ্টায় পৌকব ও বীর্ঘ্যের পরিচয় পাই সেইখানেই আমরা প্রকা প্রকাশ করি, দুঃস্থের দুঃখকে প্রণাম করি না।

এই দারিদ্র্য-হুঃখকে হুঃখহিসাবেই মহিমাম্বিত করিবার যে চেষ্টা দেখা যায়, তাহাতে চিন্তাশক্তির দারিদ্র্যই প্রকাশ পায়। সকল মানবীর হুঃখের কারণই অভাব—কামনার অপরিভূষ্টি। এই কামনার জন্ত মানুষ দারী নয়, কারণ কামনা স্বভাবজ। কিন্তু কামনার পরিভূষ্টির অভাবে, অর্থাৎ হুঃখের গালগায়, মানুষ যে পাপ করে—সে-পাপ সমর্থন-যোগ্য, তাহা ভগবানের পাপ—‘বিকৃত ক্ষুধার ফাদে বন্দী ভগবান কাঁদিতেন’—ইত্যাকার উক্তি মিথ্যা বলিয়াই কুৎসিত। মানুষের মধ্যে যেখানে শক্তি দেখি সেখানেই ভগবানকে দেখি। আত্মসম্বন্ধে চিন্তা-রূপী ভগবান হয়ত আছেন, কিন্তু তাহা ব্যবহারিক সত্য নয়—সে জ্ঞানের তুরীয় অবস্থার কথা। যে শক্তিকে ভগবানের বিভূতি বলিয়া মনে করিতে পারি—সে শক্তি ক্ষুধার শক্তি নয়, সেই ক্ষুধাকে জয় করিবার জন্ত মানুষ যখন অসাধ্য-সাধন করে, তখনই বুঝি তাহার মধ্যে ভগবান রহিয়াছেন। মানুষ-ভগবান সন্নিবিষ্ট করে, দুই উপায়ে—হয় ক্ষুধাকে নষ্ট করিয়া, নয় মৃত্যুকেও তুচ্ছ করিয়া ক্ষুধার খাণ্ড আহরণ করিয়া। এই ক্ষুধার তাড়নায় অক্ষম অসহায় জীব যখন শৃগাল কুকুরের মত অমেধ্য-ভোজন করে—উগুড় হইয়া নর্দমার পঙ্ক-জল পান করে, তখন সেই ক্ষুধার মাহাত্ম্যকীৰ্ত্তনে মানুষের যে কতবড় অপমান হয়, তাহা মানুষ মাঝেই বুঝিতে পারে।

হুঃখ যে মানুষের পরাজয়ের প্রমাণ, মানুষ তাহা অন্তরের অন্তরেই জানে। যে-কামনা পূর্ণ করিবার ক্ষমতা নাই সেই কামনার ব্যথায় আকুল হওয়া পুরুষের ধর্ম নয়। কামনা যখন মানুষকে অভিভূত করে তখন সে পশু। অতি সহজ-লভ্য কদম্ব্যবস্তু যখন তাহার প্রেয় হয়, এবং তাহাকেই উপায়ে বলিয়া যখন সে শ্রেয়ঃ-বস্তুর বিরুদ্ধে আফালন করে তখন ইহাই বুঝিতে হইবে যে, সে ব্যক্তি নিজেই মেরুদণ্ডহীন। সে যখন বিঠাকে চন্দন বলিয়া তাহাকে ভোগ করিতে চায়, তখন বুঝিতে হইবে যে, চন্দন আহরণ করিবার শক্তি তাহার নাই এবং বিঠা তাহার বমনোদ্বেক করে না। বিঠা ও চন্দন দুইটাকেই সমজ্ঞানে পরিত্যাগ করা, এবং চন্দনের পরিবর্তে বিঠাতেই তৃপ্ত থাকা—এ দুইটি প্রবৃত্তি এক নয়, সম্পূর্ণ পৃথক।

‘নায়মাখ্যা বলহীনেন লভ্যঃ’ এই শ্রুতিবাক্য অতিশয় সত্য, কারণ যে দিক দিয়াই দেখি ওই বাক্যই চূড়ান্ত বলিয়া মনে হয়। মানুষের সকল ক্ষুধার অন্তরালে

একটা গভীরতর কুখা আছে—সেইখানেই আসল অভাব, আসল দুঃখ। এই দুঃখ মানুষের মনুষ্যত্বের নিদান। এই জন্যই আর সকল দুঃখের নিবৃত্তি হইলেও কোথায় যেন একটা অভাব থাকিয়া যায়। অল্প মানুষ প্রথমে অন্যান্য দুঃখের নিবৃত্তির চেষ্টাই করিবে, সেই চেষ্টার ভিতর দিয়াই মানুষ এই পরম দুঃখের সন্ধান পায়—এই এক কারণেই আর সকল দুঃখ সত্য ও সার্থক। যাহা পাইলে এই শ্রেষ্ঠ দুঃখের নিবৃত্তি হয় তাহাকেই এইখানে ‘আত্মা’ বলা হইয়াছে। নামে কিছুই যায় আসে না। কুখা সত্য হইলে মানুষ সত্যকার বস্তুকেই চায়, যাহা-তাহা যারা সে-অভাব পূরণ করিতে পারে না। কিন্তু, সেই বস্তুর পরিবর্তে আর কিছুকে গ্রহণ করিবে না—এরূপ প্রতিজ্ঞা করা বলহীনের কাজ নয়, এবং তাহা লাভ করিতে হইলে যে-তপস্কার প্রয়োজন তাহা ‘বন্দী ভগবান’কে আর্জনাৎ করাইলেই সম্পন্ন হয় না। এই কুখা কামনারই পরিণাম—দেহের কেজ্জেই ইহার অকুরোদগম হয়, এজন্য কাম বা দেহ বলিতে যাহা বুঝি তাহা ঘৃণার বস্তু নয়। কিন্তু সে কামনার সঙ্গে যদি শক্তি না থাকে তবে কুখার চরম রূপটি ধরা পড়ে না। কামনাকে সত্যের পথে জয়যুক্ত করিবার মত হৃদয়বল যদি না থাকে, তবে সে কামনা প্রাণের কামনা নয়, দেহের ব্যাধি মাত্র।

যে-দুঃখ দেহগত তাহা সার্বজনীন, অতএব তাহাই পরম ও চরম দুঃখ,—এ যুক্তি অগ্রাহ্য। দুঃখ যেমন আছে, তেমনই, দুঃখকে স্বীকার করিবার শক্তিও আছে, এই শক্তি সত্য-হিসাবে আরও অনেক বড়। সত্যকে যে আমরা হৃদয় বলিয়া জানি, শিব ও শান্ত বলিয়াই বুঝি—এই শক্তিই তাহার মূল। যাহা ব্যবহারিক সত্য অতএব অতিশয় প্রকট—সে দুঃখ পশুও পায়, কিন্তু জানে না। পশুর দুঃখ আছে, কিন্তু দুঃখ-পাওয়ার দুঃখ নাই—দুঃখকে তাহার স্বীকার করিতেই হয়। মানুষ স্বীকার করে না বলিয়াই দুঃখ তাহাকে বড় করে। এই দুঃখ তাহার নিকট বড় হইয়া উঠে যে কারণে, ঠিক সেই কারণেই দুঃখকে সে মানিয়া লইতে পারে না। সে কারণ আর কিছুই নয়—মানুষ আনন্দ চায়, আত্মাকে ভালবাসে। দুঃখ যদি সার্বজনীন হয়, তবে এই আনন্দও সার্বজনীন। দুঃখের ব্যবহারিক প্রকট মূর্তি দেখিয়া তাহাকেই চরম ও পরম সত্য মনে করা একটি মহৎ জয়। এই আনন্দ প্রমাণ করিবার ছলে একজন মসিক মনোবী একটি বড় হৃদয় দৃষ্টান্ত দিয়াছেন—“সেখ নাই কি যে, যাহা মাসের শীতে বৃষ্টিতে ভিজিয়া

কল্পমান, দ্বিগুণ গরুর গাড়ীর গাড়োয়ান 'কতা দে নথী কোন গলি গিয়া ঘেরে শ্রাম' গীত গাহিয়া থাকে, 'মনে কর শেষের সে দিন ভয়ঙ্কর' গীত ত সে গাহে না।"

ছঃখের সঙ্গে সুখের বিরোধ আছে বটে, কিন্তু আনন্দের বিরোধ নাই। ছঃখ সঙ্গেও মানুষ আনন্দ পায়, ইহাই মানুষের প্রাণের পরম রহস্য। মানুষের ছঃখ অ-সুখ নয়, সুখ ছঃখ উভয়ের মধ্যেই এক অপূর্ব ছঃখ—যে ছঃখের দ্বািতাই আনন্দ—সেই ছঃখই মানুষের নিজস্ব। এই আনন্দের অধিকার মানুষেরই আছে, পশুর নাই। তাই, দেহই এই ছঃখের বেদী হইলেও এই বেদীর উপরে যে আশ্রয় জলে—সে হতবহ মাত্র, সকল আছতি সে দেবতার মুখেই পৌছাইয়া দেয়।

এই আনন্দের প্রমাণ মানুষের যাবতীয় কারুশৃষ্টিতে। সাহিত্য-কলায় তাহা আরও পরিষ্কৃত। মানুষের গূঢ়তম অশুভূতির যত-কিছু ভাবচিত্র যখন সাহিত্যে প্রতিফলিত হয়, তখন তাহার মধ্যে নিছক দৈহিকতা বা দেহ-দুর্দশার ষথাযথ কাহিনীই রসোদ্ভেক করে না। যদি কোথাও তাহা করে, তবে সে কারুশৃষ্টির উপাদান-হিসাবে। কবিচিত্তের একটু রং, কল্পনার একটু মায়া তাহাকে রূপান্তরিত করে বলিয়াই আমরা তাহাকে বরণ করিয়া লই। কল্পনার সেই রংটুকু আর কিছু নয়—কবির নিজেরই আনন্দ-চেতনার পরিচয়। ছঃখকে তিনি দেখিয়াছেন—হয়ত তিনি গভীর করিয়া তাহার চরম রূপটাই দেখিয়াছেন, তথাপি বেশ বোঝা যায়, তিনি তাহাকে একান্ত করিয়া দেখেন নাই। তাঁহার ভাবদৃষ্টিতে তাহাই একমাত্র সত্য বলিয়া বোধ হয় নাই—একটা বৃহত্তর চেতনা বা অখণ্ড অশুভূতির সঙ্গে ছন্দে ও লয়ে সুসমাহিত হইয়া তাঁহার চিত্ত স্পর্শ করিয়াছে, তাই তিনি তাহা হইতে রসশৃষ্টি করিতে পারিয়াছেন। নতুবা তাহা জড়, অচেতন ও কুৎসিত হইত। কোন বস্তুই ষথাযথ বর্ণনা সাহিত্যের প্রয়োজন নয়—বাহিরের বস্তু যখন অন্তরের মধ্যে একটি ভাবের উদ্ভেক করে, এবং সেই ভাবকে কেন্দ্র করিয়া একটি বিশিষ্ট অখচ সুসম্পূর্ণরূপে ফুটিয়া ওঠে, তখনই সাহিত্যের জন্ম হয়। যাহা বস্তুগত বিচ্ছিন্ন তথ্য তাহাকে ভাবের পরিমণ্ডলে সম্পূর্ণ করিয়া ধরিবার শক্তিই ষথার্থ শৃষ্টিশক্তি। ভাবের এই অখণ্ডতাই সাহিত্যের স্বনীতি, সাহিত্যের আর কোন সত্য বা নীতি নাই। যেখানে ভাবের এই পরিমণ্ডলটি পূর্ণ নয়—যে রচনার রচয়িতার ভাব এই সার্বভূমির কামিনা করে না—বস্তুকে খণ্ড ভণ্ডের

আকারে নকল করিয়া সত্যবাদ বা বৈজ্ঞানিক সংসাহসের বড়াই করে, সে রচনা সাহিত্যহিন্দাবে ব্যর্থ, সাহিত্যহিন্দাবে দুর্নীতিপূর্ণ।

যে-মানুষ দুঃখেই একান্ত করিয়া দেখিয়াছে, জীব-জীবনের একমাত্র সত্য-বস্তু বলিয়া বুঝিয়াছে—সে দুঃখেও বিশ্বাস করে না। যে দুঃখ চায় বলিয়া দুঃখে কাঁদে, এবং যে দুঃখ চায় না বলিয়া দুঃখেও কাঁদে না—এই উভয়ের প্রকৃতিতে আকাশ-পাতাল প্রভেদ। একটু ভাবিয়া দেখিলেই বুঝা যায়, মানুষ যাহা চায়—সেই চাওয়ার মধ্যে শক্তি নাই বলিয়াই তাহা পায় না; তারপর যদি না-পাওয়ার জন্য সে কাঁদে, তবে সে লজ্জাহীন, তাহার আত্ম-সম্মানবোধও নাই। যে এইরূপ কাঙাল-পনা করিয়া কাঁদে সে যদি সমাজ বা ভগবানের বিরুদ্ধে বিদ্রোহ প্রচার করে, তবে তাহা নিতান্তই হাস্যকর। ক্ষুধা স্বাস্থ্যের লক্ষণ, পীড়ার লক্ষণও বটে। হজম করিবার শক্তি নাই, খাইবার ইচ্ছা আছে—কিন্তু, যখন ক্ষুধার তাড়নায় খাণ্ডাখাণ্ড বিচারও নাই,—তখন সেই ক্ষুধার্ত্ত ব্যক্তিকে দেখিলে ভীত ও সঙ্কচিত হইতে হয়, শ্রদ্ধাশ্রিত হইবার কোনও কারণ নাই। শক্তির অভাব দেখিলে শক্তিমানের দয়া হওয়া স্বাভাবিক, কিন্তু অশক্তির আশ্রয় দেখিলে মহাপুরুষেরা ক্রমা করিতে পারেন, কোনও পুরুষ পারে না।

শক্তির কথাই বলিব। জ্ঞান ও প্রেম, এই দুয়ের যে পথেই হউক—মানুষ বহুদিন দুঃখের সঙ্গে লড়াই করিয়া আসিতেছে। কোন্ পথ উৎকৃষ্ট সে কথা বলিবার অধিকার আমার নাই, কেবল ইহাই বিশ্বাস করি, এই দুই পথ ছাড়া তৃতীয় পথ নাই। কিন্তু এই দুঃখের মূলে আছে কাম। দুর্বল বা বিকৃত কামনাই জড়ত্বের লক্ষণ, ইহাই শাস্ত্রবর্ণিত তমোগুণ। যাহাদের কামনা দুর্বল সেই মানুষের সংখ্যাই বেশী, তাহাদের অত্যন্ত নিবারণের জন্যই সমাজ-বিধির প্রয়োজন। কামনার প্রসারেই চিন্তার প্রসার; মানুষ জানী হইয়াছে কামেরই কল্যাণে। নাধারণ মানুষ কামনার স্বচ্ছন্দ স্পন্দনে ভয় পায় বলিয়াই সমাজ-বিধিকে ধর্ম বলিয়া স্বীকার করে—মিথ্যা গৌরব দাবী না করিয়া, অন্ততঃ নিজের সম্বন্ধে যাহা সত্য তাহাকে স্বীকার করে। যেখানে এই কামনার শক্তি অজ্ঞান বা অন্ধ, সেখানে তাহা জড়শক্তির মতই—হিংসা, হানাহানি, ও আত্ম-প্রতিষ্ঠায়—আপনাকে নিঃশেষ করিতে চায়। কিন্তু যাহার কামনা-শক্তির সঙ্গে সঙ্গে উচ্চতর চিন্তাশক্তিরও বকাশ হইয়াছে, সে-মানুষ কামনার নিজের বৃহৎ কামনা চরিতার্থ করে। জ্ঞানের

কল্পলোকে সে নিঃসঙ্গ সন্ন্যাসী, কৰ্মের কল্পলোকে সে মহা-যাত্ৰিক—পরহিতব্রতী, কামের কল্পলোকে সে কবি। কামনার চরম প্রবৃত্তিতেই কামনার পরম নিবৃত্তি—বিষই অমৃতের নিদান!—ইহাই আদি রহস্য। যে-কামনার শক্তির পরিচয় নাই তাহা কামনাই নয়—রক্ত ও পুষ এক পদার্থ নয়।

এখন উঠিবে, কামনাই যদি প্রকৃত শক্তি হয়, তবে সমাজ তাহাকে শাসন করিবে কেন? অবশ্যই করিবে। ব্যক্তিবিশেষের অহংকে সমাজ শাসন করিতে বাধ্য,—সমাজ সাধারণের জন্ত, ব্যক্তিবিশেষের জন্ত নয়। ব্যক্তির প্রতিভা সমাজকে সংস্কৃত বা নিরস্কৃত করিতে পারে, নষ্ট করিতে পারে না। সে ব্যাপারে যেটুকু আপাত-সংঘর্ষ ঘটে, তাহা সমাজদ্রোহ নয়। সেটুকু সংঘর্ষ ঘটবেই, তাহাতে কোন পক্ষেরই অপরাধ নাই। ব্যক্তি যেখানে সত্যই সমাজদ্রোহী, সেখানে তাহার সমাজ ত্যাগ করাই উচিত। যেটা ব্যক্তিবিশেষের স্বতন্ত্র-কামনা—যাহা মূল সমাজনীতিরই বিরোধী, তাহা সকলের পক্ষেই গ্রাহ্যসঙ্গত বলিয়া প্রচার করিয়া, সে যখন আপনার দুর্ভিসন্ধি সকলের উপর চাপাইয়া ব্যক্তি-স্বাতন্ত্র্যকেই সমাজতন্ত্র করিয়া তুলিতে চায়, তখন সে দুর্বৃত্ত ঠগ মাত্র। ইহারা নিজের স্বতন্ত্র বাসের উপায় করিতে পারে না, পরের বাড়ীর ভিত জখম করিতে চায়। বৃহত্তর সমাজের চিরন্তন কল্যাণের ভাবনা তাহাদের নাই; তাহারা অতীতের হিসাব রাখে না, বরং তাহাকে অতিশয় অশ্রদ্ধা করে; ভবিষ্যতের জন্তও চিন্তিত নয়—সে দৃষ্টিশক্তি নাই। লালসা চরিতার্থ করিবার জন্ত তাহারা যে-স্বাধীনতা চায় তাহাই নিরুপদ্রবে ভোগ করিবার জন্ত তাহারা যে ব্যবস্থার দাবী করে, তাহা অসম্ভব বলিয়াই সমাজে উপদ্রবের অন্ত থাকে না। যদি সত্যকার পিপাসা থাকে, অর্থাৎ চাওয়ার সঙ্গে যদি পাইবার ক্ষমতাও থাকে, তবে আপনার বাসনা আপনিই পূর্ণ কর, আপনাকেই বলি দাও—তাহারও মহিমা আছে। দুর্বল জনসাধারণের পরিমিত কল্যাণকে এমন করিয়া বিঘ্নিত কর কেন? এ অভিসন্ধি কখনও সিদ্ধ হইবার নয়। সমাজ এত বোকা নয়, সমাজের একটা সামাজিক চেতনা বা সামাজিক আত্মা আছে, আত্মরক্ষার ধর্মও আছে,—তাহার বিরুদ্ধে এইরূপ মিথ্যাচারী কাপুরুষ ব্যক্তি কখনও জয়ী হয় নাই।

আজকালকার সাহিত্যে যাহারা সমাজের বিরুদ্ধে বিদ্রোহ ঘোষণা করিতেছে তাহারাও এইরূপ স্বাতন্ত্র্যবাদী। বিদ্রোহটা মূলে কাম-বিদ্রোহ, কিন্তু ধমক দিলেই

করণ কার্য শোনা যায়—“বড় ব্যথা, বড় দুঃখ—দারিদ্র্য-দুঃখ—অর্থ-সমস্যা।” এই দুঃখের জন্ত সমাজ আর থাকিবে না, ইহকাল পরকালও গেল। ইহকাল, পরকাল, সমাজ প্রভৃতি না হয় গেলই, কিন্তু তাহাতে দুঃখ-নিবৃত্তি হইল কেমন করিয়া? খেঁচাচারে যেটুকু সুখ পাওয়া যায় তাহারই চাটনীর সাহায্যে এই দুঃখকে কটিকর করিতে হইবে। একটা অকাল পড়িয়াছে বলিয়া অনাচারের অঙ্কুহাত পাওয়া গেল, একটু সুখলাভের উপায় হইল। একটা গুরুতর সমাজ-বিপ্লবের সূচনা হইলে কোন নীতি বা নিয়ম টিকে না,—এক শ্রেণীর ক্ষুধার্ত জীবের সেইটাই সুসময়; কারণ, তখন সম্পত্তি বলিয়া কিছুই আর থাকে না, চক্ষুলাজ্জা করিবার প্রয়োজন হয় না, চুরি করিয়া চোর হইতে হয় না, কামনার বস্তু—উপার্জন করিয়া—ভোগ করিতে হয় না, ধর্মের ভানও করিতে হয় না। সকলেই তখন দুঃখ-নিবৃত্তির সহজ উপায় খুঁজিয়া পায়, হাত বাড়াইলেই দু’ দশটা দুঃখনাশক বস্তু বুকের উপর আপনিই আসিয়া পড়ে। তখন দুঃখটাই একটা বড় বিলাস হইয়া দাঁড়ায়, তাহাকে আরও উজ্জ্বল করিয়া তুলিবার জন্ত বরং কিঞ্চিৎ আয়োজন করিতে হয়। দুঃখের নেশাখোর, কল্পনায় আপনাকে ক্রুশবিক ভাবিয়া অশ্রু-বিসর্জন ও মহিমা অর্জন করিতে চায়। যশ্মা হয় তাহাদের ক্রুশকাঠ, এবং নারী ও মগ্নই হয় দেহটাকে কত বিকৃত করিবার যন্ত্র। শেষের দুইটা জিনিষ বাহাতে দুঃখপ্রাপ্য না হয়, এবং সুখপ্রাপ্য হইলেও নিন্দনীয় না হয়—তার জন্ত তারদ্বরে দুঃখের জয়গান ও সমাজবিদ্রোহ করিতে হইবে।

এই যে দুঃখ-প্রীতি ও দুঃখের আক্ষালন ইহাতে সত্যকার দুঃখ নাই। ইঞ্জিয়-পিপাসা-নিবৃত্তির জন্ত যে দুঃখের দোহাই দিতে হয় তাহা কখনই সত্যকার দুঃখ হইতে পারে না। যে-দুঃখে মানুষ অসহায় জীবের মত রোদন করে—সেই দুঃখকে যখন সে মহিমাষিত করিতে চায়, তখনই তাহার মিথ্যা ধরা পড়ে। যদি কেহ রোকুস্তমান অবস্থাতেই বলিতে থাকে, আমার মধ্যে ভগবান বসিয়া বসিয়া কাঁদিতেছে,—ভবে তাহার কি রোগ হইয়াছে আমরা বুঝিতে পারি। যে এই দুঃখকে সাক্ষাৎ সঙ্কে জানে না, অথচ ইহাকেই idealise করিয়া বাস্তবতার নামে পূজা করিবার ভান করে, সে এইরূপ বাস্তব দুঃখসঙ্কে যেমন অজ্ঞান, তেমনই, দুঃখের যে বিরাট মূর্তি জোগেশ্বরের মধ্যেও রাজপুত্রকে উদাসীন করিয়াছিল, সে মূর্তি কল্পনা করিবার শক্তিও তাহার নাই। যে সত্যকার দুঃখ পাইয়াছে, বা দেখার

মত করিয়া তাহাকে দেখিয়াছে, সে দুঃখকে লইয়া এরূপ ভাষাসা করিবে না। নিজের জীবনেই হউক, বা মহাত্মভূতি-মূলক করনাতেই হউক—দুঃখের সত্য-স্বরূপ যে একবার প্রত্যক্ষ করিয়াছে, তাহার চক্ষু অস্বাভাবিক জ্যোতির্ময়! তাহার কণ্ঠস্বরে আমরা চমকিত হই না, নিস্পন্দ হইয়া যাই।

দুঃখকে যাহারা বড় করিয়া দেখে নাই, কেবল 'বাস্তব অভাব সত্য' বলিয়াই দুঃখের মহিমা গান করে, তাহারা দুঃখেরই অজুহাতে সুখের দাবী করে,—সুখের জগতই লালায়িত। সুখ ভোগ করিবার ইচ্ছা আছে কিন্তু শক্তি নাই বলিয়া সক্ষম সুখীকে তাহারা ঈর্ষা করে। সুখ তাহাদের চাইই—সে যেমনই হউক। সেই সুন্দর সুখসন্ধানের লক্ষ্য দূর করিবার জগত, তাহারা নীতি, সমাজ ও ধর্মের বিরুদ্ধে বিদ্রোহ করিয়া বীর সাজিতে চায়। দুঃখীর দুঃখকে আমি পরিহাস করি না; এরূপ দুঃখের কারণ কি, তাহার কতটুকু প্রতিকার সম্ভব, এবং কি হিসাবে তাহা মহুশ্যোচিত, তাহা পূর্বে বলিয়াছি; কিন্তু এই সকল তথাকথিত দুঃখবাদীর মনস্তত্ত্ব যে সম্পূর্ণ পৃথক ইহাই আমি যথাসাধ্য বুঝিতে ও বুঝাইতে চেষ্টা করিলাম।

হাস্যরস ও হিউমার

ইংরেজি 'হিউমার' শব্দটির একটা অতি স্থূল সাধারণ প্রয়োগ আছে, তাহার বাংলা প্রতিশব্দ 'হাস্যরস' হইলে আপত্তি নাই, অবশ্য যদি তাহাতে নির্দোষ রস-উপভোগের হাস্যই বুঝায়। বাংলায় হাসি বলিতে যেমন—হাসি, তামাসা, মস্করা, ব্যঙ্গ, বিক্রম, কৌতুক, রসিকতা, ভাঁড়ামি, রঙ্গরস প্রভৃতি নানা ধরণের হাসি বুঝায়, ইংরেজিতেও তেমনই—Fun, Pleasantry, Jest, Buffoonery, Ridicule, Wit, Irony, Satire—প্রভৃতি শব্দ আছে। ইহাদের মধ্যে, Wit, Satire, Irony—সাহিত্যিক পরিভাষার অন্তর্গত, ইহারা শুধু হাসি নহে—হাস্যরসের গুচতর ভঙ্গীর বৈশিষ্ট্যবোধক। আমাদের ভাষাতেও হাসি-তামাসার কয়েকটি বিশেষ ভঙ্গির চলতি নাম আছে, কিন্তু সাহিত্যিক পরিভাষায় তাহাদের কোন শ্রেণীবিভাগ নাই। রবীন্দ্রনাথ 'হাস্যকৌতুক' নাম দিয়া একদা যে-রসের সম্বন্ধে কিঞ্চিৎ আলোচনা করিয়াছিলেন, তাহাও একটা স্থূল বস্তু—Sublime-এর বিপরীত Ridiculous বলিতে যাহা বুঝায়—সে তাহাই, সংস্কৃত 'হাস্যরসের' ব্যাপক অর্থের অন্তর্গত। কিন্তু Fun, Pleasantry, Jest, Buffoonery, এবং আমাদের হাসি-তামাসা, রঙ্গরস, ভাঁড়ামি—এ সকলের একটা সাধারণ গুণ এই যে, ইহাদের মধ্যে যে-হাসির উত্তেজনা আছে তাহা সম্পূর্ণ বাহিরের ব্যাপার; কাজ বা কথার কায়দাই ইহার প্রাণ। Wit-এর মধ্যে মার্জিত বুদ্ধির বাক্‌চাতুর্য্যই তাহার প্রধান রস—সংস্কৃত 'বৈদম্ব্য' বা বাংলায় সোজাসৃজি 'রসিকতা' তাহার প্রতিশব্দ হইতে পারে,—যদিও রসিকতা শব্দটির আরও ব্যাপক অর্থ হয়। কিন্তু Satire ও Irony এই ধরণের আমোদের ব্যাপার নয়, ইহার উদ্দেশ্য ভিন্ন—এই হাসিতে শুধুই দস্ত নয়, দংড়া-বিকাশ থাকে। উভয়েরই অভিপ্রায়—বিক্রম; কিন্তু তফাৎ এই যে—Satire খোলাখুলি বিক্রম, Irony চাপা বিক্রম; ইহাতে একটি বক্র-ভঙ্গি বা গ্লেশ থাকে; আবার, গ্লেশের কারণ অল্পসারে Irony-র প্রকার ও যাত্রাভেদ ঘটে। Satire স্পষ্ট ও খোলাখুলি বিক্রম হইলেও, ইহা যখন একটু বক্রভঙ্গীযুক্ত হয়, তখন ইহাকে Sarcasm বা টিটকারী বলা যাইতে পারে;

তখনও কিন্তু ইহা Irony নয়,—যদিও সাধারণ ভিন্নতারিতে Irony-র প্রতিশব্দ Satire-ও লেখে। ব্যাপক অর্থে Irony শুধু কথা নয়, কাজেও হইতে পারে, যথা—‘ironical cheers’; এবং সংস্কৃত ‘সোৎপ্রাস উক্তি’ও Irony-র প্রতিশব্দ হইতে পারে; এই সঙ্গে ‘Dramatic Irony’ ও ‘Irony of Fate’ বাক্য দুইটিও স্বরণযোগ্য। কিন্তু Irony শুধু চাপা-বিজ্ঞপ নয়,—বিজ্ঞপের বক্রভঙ্গিতে ব্যথা ও মর্ষপীড়াও ফুটিতে পারে। Lear-এর Fool-এর হাস্য এই জাতীয়; আমাদের বিজুরায়ের Satire-ও এইরূপ Irony-র সীমায় আসিয়া ঠেকিয়াছে। শরৎচন্দ্রের হাস্যরস অধিকাংশস্থলে এইরূপ মর্ষপীড়াজনিত Irony; রবীন্দ্রনাথের ‘চিরকুমার-সভা’র প্রধান রস যেমন Wit, শরৎচন্দ্রের উপস্থাসগুলিতে বে-ধরণের হাস্যরস আছে তাহা প্রধানতঃ—Irony। তথাপি রবীন্দ্রনাথের রচনায় যে পরিমাণ হিউমার আছে, শরৎচন্দ্রের তাহা নাই; একেবারে নাই বলি না, কিন্তু শরৎচন্দ্র যে একজন ‘হিউমার’-রসদক্ষ লেখক, একথা সর্বের অবধার্ত; কারণ, শরৎচন্দ্র যে-মাত্রায় sentimental, তাহাতে খাঁটি হিউমার তাঁহার পক্ষে অসম্ভব।

এখন কথা হইতেছে, তবে ‘Humour’ পদার্থটি কি? পূর্বেই বলিয়াছি স্থূল অর্থে ‘হিউমার’ হাস্যরসই; তবে সে-রস আমোদ বা কৌতুক-প্রধান—মর্ষদাহ, আক্রোশ, তাহাতে নাই। আবার তাহা নিকট Farce-ও নয়। এই অর্থে, American বা English Humour বলিতে আমরা এক এক জাতীয় হাস্যরস-রসিকতার নমুনা বুঝি। সবদেশের সব মানুষই হাসে; একটা প্রাকৃত হাস্যরস (ঠাট্টা, মস্করা, ভাঁড়ামি) সকল দেশের লোকেই অল্প-বিস্তর চর্চা করে। কিন্তু ‘হিউমার’ বলিতে এই অর্থে যে হাস্যরস-রসিকতা বুঝায়, হয়ত কোন জাতির মধ্যে তাহার তেমন প্রাচুর্য্য নাই, তাহার। এ রসের তেমন পক্ষপাতী নয়,—Scotch জাতির এ দুর্গম আছে। আমাদের পূর্ববঙ্গীয় ভ্রাতারাও এ বিষয়ে তেমন সুনাম অর্জন করিতে পারেন নাই। ইহাই হিউমার-শব্দের প্রচলিত অর্থের মোটামুটি সঙ্কেত। কিন্তু সাহিত্য-সমালোচনায় ‘হিউমার’ শব্দটির আর একটি গভীরতর ও মহত্তর আলংকারিক অর্থ আছে। এই সূক্ষ্মতর অর্থে ‘হিউমার’ বলিতে যাহা বুঝায়, তাহাতে দেখা যাইবে, লেখকের রচনার ‘হিউমার’-এর রূপ যেমনই হোক, তাহার অন্তরালে লেখকের একটি মানস-ধর্ম (an attitude of the mind) পরিস্ফুট হইয়া উঠে। জগৎ ও জীবনের প্রতি একটা নির্দিষ্ট অধঃ

সঙ্গত মনোভাবই 'হিউমার'-এর মূল উৎস। জালা, মর্গপীড়া বা গার-অস্ত্র-বোধের আক্রোশ ত নহেই—কোন উচ্ছ্বাস বা অবসাদের অভিব্যক্তিও খাটি 'হিউমার'-এর লক্ষণ নয়। মানুষের সর্ববিধ নিরুদ্ভিতা,—তাহার অহঙ্কার, স্বার্থপরতা, এবং বিশেষ করিয়া, ভাগ্যের পরিহাস-নিষ্ঠুর পীড়নে মানুষের যে চিরন্তন অসহায় অবস্থা—তাহার সম্বন্ধে অতিশয় ধীরবুদ্ধি ও আক্ষেপহীন মনোভাব রক্ষা করিয়া, সেই সকলের উপরে একটি লঘু-হাস্তের আলোকপাত করার যে প্রতিভা বা রসবোধ, তাহা হইতেই খাটি 'হিউমার'-এর উৎপত্তি হয়। একরূপ রস-রচনার পক্ষে লেখককে সাধারণ মানবীয় সংস্কারের কিছু উর্দ্ধে উঠিতে হয়। এ রস-রসিকতার ক্ষমতা যেমন সকলের থাকে না, তেমনই, সকল শ্রেষ্ঠ সাহিত্যিক প্রতিভার মধ্যে অল্পবিস্তর এ রসের সন্ধান মিলিবে। এ রস অতি স্থূল হাস্তরস নয় বলিয়াই, এ রস উপভোগ করিতে হইলেও পাঠকের বিশিষ্ট রসবোধ বা taste থাকা চাই। আমার মনে হয়, যাহাদের এই 'sense of humour' আছে তাঁহারাি খাটি রসিক; এবং সাহিত্য-রসবোধের যে অভাব অনেকের মধ্যেই লক্ষ্য করা যায়—যে 'সঙ্গততা'র অভাবই 'অরসিকতা'র কারণ—তাহার মূলে এই 'sense of humour'-এর অনটন লক্ষ্য করা যাইবে। সাধারণ কথাবার্তার ভাষায় 'sense of humour' বলিতে যাহা বুঝায়, তাহাকেই আর একটু সূক্ষ্ম ও গভীর করিয়া লইলে এই রসিকতার লক্ষণ মিলিবে। স্থানকাল-পাত্ৰোচিত সামঞ্জস্যবোধ, বা sense of proportion না থাকিলে, আমরা যেমন মানুষকে হীনবুদ্ধি বলিয়া নিন্দা করি, তেমনই, মানুষের জীবন, তাহার চরিত্র ও ভাগ্য-সম্বন্ধে যাহার মনের মধ্যে একটি ভাব-সাম্য বা স্থিরবুদ্ধির প্রসন্নতা জন্মে নাই—তাঁহাকেই আমরা এই অর্থে বেরসিক বলিতে পারি। মানুষের সমগ্র জীবন বা জগতের সব-কিছু সম্বন্ধে এই যে মনোভাব, ইহাতে কোন তদ্বসন্ধান বা সত্য-জিজ্ঞাসার প্রবৃত্তি নাই, একটা সামঞ্জস্য-বোধের রস-কল্পনামাত্র আছে—এইজন্য ইহাকে আমরা রসিক-বুদ্ধি (Poetic Reason) বলিতে পারি। সুখ-দুঃখ, হাসি-কায়া, পাপ-পুণ্য—মানুষের শক্তির অহঙ্কার ও অশক্তির দৈন্ত—এই রস-কল্পনার একটি সমান ভাবরসে অভিবিক্ত হইয়া যে রূপ ধারণ করে তাহাতে হাস্তরসের কোন জালা বা আক্রোশ থাকে না; ইহাতে, করুণরসের মধ্যেও একটি উদাসীন নির্লিপ্ত হাসির ব্যঞ্জনা নিহিত থাকে। এইজন্যই এইরূপ হাস্তরসে যেমন জালা বা

আক্রোশ থাকে না, তেমনই ইহা করুণ-রসেরও বিরোধী নয় ; Harce-এর মধ্যেও খাটি 'হিউমার'-কে প্রায়ই উকি দিতে দেখা যায়, সেই সকল স্থানে অভিনয় লঘু হাস্যরসও উৎকৃষ্ট কাব্যরসে পরিণত হয়। 'হিউমার'-এর মধ্যে যে সহায়তা আছে তাহা ঠিক কারণ্য বা করুণরস নয়, তথাপি অনেক উৎকৃষ্ট হিউমার-রস-রচনায় করুণরসের রেশ থাকে। Lamb-এর 'Essays of Elia' এবং Mark Twain-এর রচনার হিউমার প্রায়ই একরূপ করুণরসের স্রোতনা করে ; কিন্তু সেখানেও সেই করুণরসের মধ্যে লেখকের মনোভাবের যে বৈশিষ্ট্য ফুটিয়া ওঠে—পাঠক যদি নিজে না sentimental হন, তবে তাহা খাটি হিউমার বলিয়াই বুঝিতে পারিবেন। ডিকেন্সের লেখায় এই হিউমার বড় সহজেই করুণ-রসের প্রায়ে সংঘম হারাইয়াছে ; এইজন্যই বোধ হয়, ডিকেন্সকে সুইনবার্ণ 'master in the conterminous provinces of laughter and of tears'—বলিয়া অভিহিত করিয়াছেন। তথাপি, হাস্যরসের মধ্যেই করুণরস, এবং করুণরসের মধ্যেই হাস্যরসের সৃষ্টি—উৎকৃষ্ট হিউমারের লক্ষণ ; কারণ, হিউমার-রস-রসিকের রচনায় হাসি ও কান্না তুল্যমূল্য, একথা পূর্বে বলিয়াছি। আমাদের দীনবন্ধু মিত্রের প্রহসনগুলিতে হাস্যের অন্তরালে এই গুণ আছে বলিয়াই অমৃত বহুর প্রহসন অপেক্ষা সেগুলি অধিকতর সাহিত্যগুণোপেত। উদাহরণ স্বরূপ বলা যাইতে পারে, 'লীলাবতী'র হেমচাঁদ-চরিত্রে অতি সূক্ষ্মভাবে এই রস সঞ্চারিত হইয়াছে। 'বিয়ে-পাগলা বুড়ো' আত্মীয়-স্বজনের সঙ্গে বিবাদ করিয়া, ঘুবা সাজিয়া, নকল বাসর-ঘরে নকল শালী-শালাজদের কানমলা সহ করিবার প্রাণপণ চেষ্টা করিয়াও যখন সহসা—'মরে গেছি ! মরে গেছি ! ও রামমণি !' বলিয়া তাহার বৃদ্ধবয়সের একমাত্র পালয়িত্রী ও রক্ষয়িত্রী বর্ষীয়লী বিধবা কন্তার নাম করিয়া চীৎকার করিয়া ওঠে—তখন এই হাস্যরসে আর এক রসের সঞ্চার হয় ; নিজ বার্বক্য অস্বীকার করিয়া যে-বৃদ্ধ বিগত-বৌবনের অভিনয় করিতেছে, সে যে কিছুতেই জরাকে ফাঁকি দিতে পারিতেছে না, নিমেষের মোহও টিকিতেছে না—নিয়তির সহিত কঠিন সংগ্রামে বিমূঢ় মানবের এই অবস্থা যেমন হাস্যোদ্দীপক, তেমনই তাহার অন্তরালে গভীর সহায়ত্বের কারণ রহিয়াছে। কিন্তু সে সহায়ত্ব-কালে অদৃষ্ট ও বিধাতার বিরুদ্ধে কোনও আক্রোশের ভাব নাই—ইহাই উৎকৃষ্ট হিউমারের নিদর্শন। এই pathos রচনা-

বিশেষের হিউমারের মধ্যে ফুট বা অফুট হইয়া থাকে ; তাই বলিয়া সেই পরিফুট pathos-কেই উৎকৃষ্ট হিউমারের অপরিহার্য অঙ্গ বলিয়া নির্দেশ করিলে, লেখকের যে মনোভাব হইতে হিউমারের উদ্ভব হয়, সেই মনোভাব-সম্বন্ধে যথার্থ ধারণা হইবে না। এইরূপ ক্ষুদ্র ধারণার বশে, pathos-মাত্রকেই উৎকৃষ্ট হিউমার মনে করিয়া একজন লেখক শরৎচন্দ্রের রচনার যে সকল অংশে খাটি করণরস ফুটিয়া উঠিয়াছে, সেখানেও খাটি হিউমারের ভঙ্গী খুঁজিয়া বাহির করিয়াছেন, এবং হিউমার ও Irony-তে গোল পাকাইয়াছেন। ইহারই প্রতিবাদে আর এক ব্যক্তি অভিধান হইতে ‘হিউমার’-এর যে অর্থ উদ্ধৃত করিয়াছেন, তাহাতেও এমন একটি কথা আছে যাহা না থাকিলে, ‘হিউমার’ কথাটির বিশেষ কোন অর্থই পাওয়া যাইত না, সেটি হইতেছে—‘depending for its effect on kindly human feeling’। একটু ভাবিয়া দেখিলেই তিনি বুঝিতে পারিতেন, এই ‘kindly human feeling’-এর সঙ্গে করণরসের বিশেষ বিরোধ নাই ; অবশ্য এ করণরসের মাত্রা ও ভঙ্গি যে একটু বিশেষ রকমের, তাহা আমি যতদূর সাধ্য বুঝাইতে চেষ্টা করিয়াছি। তথাপি অশ্রমাত্রকেই ‘হিউমার’-এর চতুঃসীমানা হইতে নির্বাসিত করিলে আর একদিকে বাড়াবাড়ি করা হয়। শরৎচন্দ্রের রচনায় যে grim humour আছে, তাহা অতি তীব্র তীক্ষ্ণ Irony-রই উদাহরণ। তথাপি শরৎচন্দ্রের ‘শ্রীকান্ত’ হইতেই ‘হিউমার’-এর একটি অতি উৎকৃষ্ট উদাহরণ দেখা যাইতে পারে। বর্মার কাহিনীতে সেই যে দুইটি প্রেগভয়ভীত মাত্রাজী (?) ক্রিশ্চিয়ানের মৃত্যুশয্যার বর্ণনা আছে, তাহা মুখ্যত pathos বলিয়াই উপভোগ্য নয় ; নির্বোধ দুর্বল অসহায় মানবের দুর্দশাদর্শনে যে একটি সহৃদয় অথচ নির্লিপ্ত হান্তভঙ্গী এই করণ দৃশ্যের বর্ণনাতেও ফুটিয়া উঠিয়াছে, তাহাকেই উচ্চাঙ্গের ‘হিউমার’ বলা যায়।

‘হিউমার’-সম্বন্ধে এ পর্য্যন্ত যে আলোচনা করিয়াছি তাহাতে দেখা যাইবে, Ludicrous হইতে Pathetic পর্য্যন্ত সকল পর্দায় ‘হিউমার’-এর গতিবিধি আছে ; কেবল, সেই সকলের মধ্যে যেখানে ঐ বিশিষ্ট মনোভাব (attitude of the mind)-এর পরিচয় নাই, তাহা ‘হিউমার’-পদবাচ্য নয়। বস্তুতঃ, ‘হিউমার’ বলিতে যে রস বুঝায় তাহার সত্ত্বা কেবল সেই লেখকের রচনাতেই সম্ভব—যিনি সত্যিকার সাহিত্যিক প্রতিভার অধিকারী। এমন কি, মাত্র এই রসসৃষ্টির ক্ষমতা

যাহাদের আছে, তাহাদের সাহিত্যিক প্রতিভা খুব বিশাল না হইলেও, তাহারা যে প্রতিভাশালী, তাহা স্বীকার করিতে হইবে। আবার ইহাও লক্ষ্য করা যায়, যাহারা 'হিউমার'-সৃষ্টিতে নিপুণ, তাহারা উৎকৃষ্ট pathos-সৃষ্টিও করিতে পারেন। আধুনিক বাংলা-সাহিত্যে যে একটি মাত্র লেখক, বিশেষ করিয়া, এই 'হিউমার'-গুণের অধিকারী, সেই প্রভাতকুমার মুখোপাধ্যায়ও 'কাশীবাসিনী'র মত গল্প লিখিয়াছেন; আবার, 'হিউমার'-এর প্রধান উপাদান যে 'kindly feeling' তাহাও যে কত সহজে অশ্রুজলের সৃষ্টি করে, তাহা তাহার 'ভুলশিক্ষার বিপদ' গল্পটি পড়িলে পাঠকমাজেই বুঝিতে পারিবেন। এই গল্পের নামক-চরিত্রটি উৎকৃষ্ট 'হিউমার'-এর নিদর্শন; কিন্তু সেই চিত্রেও যে অশ্রুপ্লাবন আছে, তাহা যে 'হিউমার'-রসের বিরোধী নয়—তার প্রমাণ, ঐ গল্পটিতে শেষ পর্যন্ত রস-বিপর্যয় ঘটে নাই।

প্রসঙ্গক্রমে এখানে আর একজন অধুনা লক্ষ্যপ্রতিষ্ঠ শক্তিশালী লেখকের নাম করা যাইতে পারে—ইনি 'গড্ডলিকা'-প্রণেতা পরশুরাম। ইহার রচনায় যে হাস্যরস আছে, তাহাতে প্রচুর পরিমাণে Wit এবং Fun থাকিলেও তাহা অতি স্নিগ্ধ সংঘত Satire; তাহার সেই Fun-এর অন্তরালে একটা অতিশয় প্রচ্ছন্ন cynical laughter আছে। দৃষ্টান্তস্বরূপ তাহার দুইটি উৎকৃষ্ট গল্পের নাম করা যাইতে পারে—'শ্রীশ্রীসিন্ধেশ্বরী লিমিটেড' ও 'ভূষণীর মাঠ'। ঠিক এই ধরনের হাস্যরস বাংলা-সাহিত্যে নূতন; তথাপি এই সকল রচনায় লেখকের attitude খাঁটি 'হিউমার'-এর attitude নয়—কারণ, এই হাস্যরসের অন্তরালে, মানুষের সমগ্র জীবন সম্বন্ধে একটি সহৃদয় রসকল্পনার যে নির্লিপ্ত প্রসন্নতা, তাহা অপেক্ষা বিক্রপের ভঙ্গীই প্রবল,—যদিও সেই বিক্রপ এমন স্নিগ্ধ ও সংঘত যে, বাংলা-সাহিত্যে তাহা একটি বিশিষ্ট হাস্যরসের আদানি করিয়াছে। পরশুরামের রচনায় প্রভাতকুমারের রচনাভঙ্গির যে প্রভাব লক্ষ্য করা যায়, তাহা হইতেই উভয় লেখকের রচনা তুলনার দ্বারা বিচার করিবার সুবিধা আছে, এইরূপ তুলনায় উভয়ের হাস্যরস-ভঙ্গির বৈশিষ্ট্য আরও স্পষ্ট হইয়া উঠে। প্রভাতকুমারের হাস্যরসে যে উচ্চাঙ্গের 'হিউমার' আছে, তাহার প্রমাণ এই যে, তাহার হাস্যরসের মূলে এক ধরনের poetic reason বা কবি-বুদ্ধি আছে, পরশুরামের হাস্যরসে তাহা নাই।

এই প্রসঙ্গে আর একটি কথা বলিব। 'হিউমার' শব্দের ঠিক বাংলা প্রতিশব্দ

যখন নাই, তখন কি ইংরেজি শব্দটাই লইতে হইবে? এ সম্বন্ধে আমাদের প্রথম আপত্তি এই যে, বাংলায় যখন আধুনিক সকল শাস্ত্রের পরিভাষা-সৃষ্টির প্রয়োজন আছে, তখন সাহিত্য-সংস্কৃত্যেও পরিভাষা চাই। সকল শব্দই যদি ইংরেজি হইতে গ্রহণ করিতে হয়, তবে আলস্তেরই প্রশ্রয় দেওয়া হইবে। সংস্কৃতভাষা যখন বাংলা শব্দের আকর-স্বরূপ রহিয়াছে এবং চিরদিন থাকিবে, তখন এইরূপ শব্দচয়ন বা শব্দ-নির্মাণে অসুবিধা নাই। কাজটি অবশ্য পণ্ডিতের কাজ; কিন্তু পাণ্ডিত্যের অভাবে আমরা যদি এইরূপ বিদেশী শব্দ এত অধিক গ্রহণ করি, তবে ভাষার নিজস্ব শ্রী ক্ষয় হইবে, এবং অ-পণ্ডিতেরা প্রশ্রয় পাইবে। 'হিউমার'-শব্দটির সম্বন্ধে বিশেষ আপত্তি এই যে, এই ইংরেজি শব্দটির সঠিক তাৎপর্য এখনও যখন অনেকেরই হৃদয়ঙ্গম হয় নাই, তখন সমান অপরিচিত একটা নূতন দেশী শব্দ ঠিক করিয়া লওয়াই কি অধিকতর সঙ্গত নয়? অতএব, 'হিউমার'-শব্দের বাংলা প্রতিশব্দ কি হইতে পারে, সাহিত্যরসিক পণ্ডিতগণ তাহা নির্ণয় করুন; বর্তমান লেখকের সে সাহসও নাই, সে পাণ্ডিত্যও নাই—এই আলোচনার আশি যে বহু ইংরাজী শব্দ ব্যবহার করিয়াছি তাহাতে ইহার প্রমাণ রহিয়াছে।

‘রডোডেন্ড্রন-গুচ্ছ’

১

সাহিত্যের আদর্শ লইয়া নানা দলের বচসা কিছুকাল হইতে কবির মনে অশান্তির সৃষ্টি করিতেছিল; চারিদিক হইতে ভক্ত ও অভক্তের উৎপীড়নে তিনি কখনও বামে কখনও দক্ষিণে হেলিতেছিলেন। আসনখানিতে অটল হইয়া থাকিলেও এই ভূত-প্রেত-প্রমথগণের দৌরাখ্যা তাঁহাকে যে একটুও চঞ্চল করে নাই, এমন কথা বলিলে কবিকে অসম্মান করাই হইবে। কারণ, বাংলা-সাহিত্যের অতি-আধুনিক গতি-প্রকৃতির দিকে একবার যখন তাঁহার, দৃষ্টি পড়িয়াছে, তখন—ব্যাপারটা যে অতিশয় তুচ্ছ—এমন কথা ভাবিতে তিনি পারেন নাই, বরং তাহাকে বুঝিবার ও তাহার সম্বন্ধে নিজের ধারণা স্পষ্ট করিয়া বুঝাইবার চেষ্টা তিনি এই স্বল্পকালের মধ্যে নানা উপলক্ষে ও নানা প্রবন্ধে বহুবার করিয়াছেন। যাহারা এই সাহিত্য রচনা করে ও তাহার গুণগানে পঞ্চমুখ, এবং যাহারা তাহা রচনা করে না ও তাহার নিন্দায় দশমুখ, এই উভয়দলের কাহারও সহিত তাঁহার বনিম না, কারণ তিনি আজীবন সরস্বতীরই সেবা করিয়াছেন। সে-সরস্বতী মল্লভূমির অধিষ্ঠাত্রী নন; তাঁহার পূজায় যে অভ্র-আবীর লাগে তাহার একটি বর্ণের, অপরটি আলোকের প্রতীক। তাই সরস্বতীর নামে যখন দুই-সরস্বতীর পূজা চলিতেছে, এবং যখন সেই পূজায় এক-পক্ষ পাক, গোবর ও ঘেঁটুকুল সাজাইতেছে, ও অপর-পক্ষ আসন-দেবতার নাম না লইয়া অপদেবতা-দমনের জন্য ক্রমাগত মারণ-মন্ত্র উচ্চারণ করিতেছে, তখন দেবীর একনিষ্ঠ পূজারী হির থাকিতে পারেন নাই। আজ দেখা যাইতেছে, কবি আত্মস্থ হইয়াছেন, যে আনন্দে কবির মুক্তি—সেই রস-সৃষ্টির আনন্দে কবি বাস্তবের সমস্তা উত্তীর্ণ হইয়াছেন।

‘শেষের কবিতা’র ঘেঁটুকু পড়িলাম তাহাতেই বুঝিতেছি, এই আঘাত ও বৃথা-বিতর্কের ক্ষোভ তাঁহার চিত্তভরে কোন্ রসের সঞ্চার করিতেছিল। সকল রূঢ়তা নিলঞ্জিতা ও নির্দয়তার উপরে তিনি একটি তীক্ষ্ণ বিক্রমগুষ্ঠিত করণ

হাত বিকীর্ণ করিয়াছেন, রসে ও রূপে, ছন্দে ও দীপ্তিতে এ রচনা কলমল করিতেছে। বিতর্ক ও বচসার ক্ষেত্রে যে বস্তু অতিশয় কঠিন ও কর্কশ হইয়া উঠিয়াছে, কবি-কল্পনা তাহারই একটি রস-রূপ আবিষ্কার করিয়াছে। সহসা একটি বিদ্যুৎশিখা ভাবঘন পুঞ্জমেঘ বিদীর্ণ করিল,—অমনি মন্ত্রধ্বনির সঙ্গে সঙ্গে ধারাবর্ষণ শুরু হইয়াছে, গুমট ভাঙ্গিয়াছে, ধূলি-ঝঞ্ঝার ঘূর্ণানৃত্য আর আমোল পাইয়ে না। কবি এখন মুক্ত, তৃপ্ত; যাহারা রসিক তাঁহারাও কৃতার্থ হইলেন।

আমাদের সৌভাগ্য যে কবি এখনও বাঁচিয়া আছেন,—এখনও এমন করিয়া আমাদের ছঃস্বপ্ন দূর করিতেছেন। “শেষের কবিতা” পড়িতে পড়িতে মনে হয়—

বিপাকের বিত্তীমিকা রজনীর 'পরে

করধৃত-শুকতার গুত্র উধাসন

কে তুমি উদিলে আসি—?

কবির সঙ্গে আমরাও কবিস্বর্গে উত্তীর্ণ হই,—কল্পনার যাত্ৰাবলে, রসের অতর্কিত সংক্রমণে, ভাষার মণিশিলাবিচ্ছুরিত বিদ্রুপচ্ছটায় যেন নিমেষে লোকান্তরে উত্তীর্ণ হইয়া যাই—বাস্তবের তুচ্ছতা, মলিনতা ও সংকীর্ণতার হাত হইতে নিষ্কৃতি পাইয়াছি বলিয়া মনে হয়। ইহাই কাব্য, এই কাব্য আছে বলিয়াই আমরা জীবনযুদ্ধে ক্রণেক বিশ্রামস্থল উপভোগ করি। দিবাবসানে রণশ্রান্ত সৈনিক যখন ধূলিশয্যায় নিষপ্ত হয়, তখন নক্ষত্রখচিত নৈশাকাশ তাহার চক্ষে যে পরিপূর্ণ শান্তি উন্মীলিত করে, যে স্বপ্নাঙ্কন পরাইয়া দেয়—এ সেই বেদনা-হরণ সূধা। তর্কে যাহার যীমাংসা হয় না, শাস্ত্র যাহাকে শাসন করিতে পারে না, সুবুদ্ধি যেখানে সংশয়যুক্ত—যেখানে জিজ্ঞাসার তৃপ্তি নাই, সেখানে রসই মুহূর্ত্তে নিশ্চিন্ত করিয়া দেয়। অস্তরের অন্তস্তলে যে আনন্দ আগে তাহাতে সকল স্বপ্ন উবিয়া যায়, সমাধানের অপেক্ষাও রাখে না। যেখানে এই অবস্থা হয়, সেখানে বাক্য অস্তর্জ্ঞান করে এবং বাণীর অধিষ্ঠান হয়,—যাহা অনির্কচনীয় তাহাই অস্তরকে নির্ঝাক করিয়া দেয়। আমাদের কাব্য-কলমে কবি এতদিন কূল পাইতেছিলেন না, আজ সেই কলহকেই তিনি রূপান্তরিত করিয়াছেন,—কাগজের মসীচিহ্নগুলিই হঠাৎ তাহার চক্ষে

সঙ্গীতের স্বরলিপি হইয়া উঠিয়াছে ; বাস বিসম্বাদের উত্তম ও উৎকৃষ্ট যুক্তি এবং কুশলিতা, যুগলশোভী কণ্ঠকের মত বলতলে নির্বাসিত হইয়াছে !

এমনই হয়, কাব্যের এই যাদুশক্তির কথা কে না জানে ? কবিরই কি এ কাজ নূতন ? সারাজীবন তিনি কি এই কাজই করিয়া আসিতেছেন না ? বাস্তবের এই বাধা, এই ক্ষুদ্রতা ও তুচ্ছতার মানি যখনই তাঁহাকে পীড়িত করিয়াছে, তিনি ক্ষণমাত্র বিধাগ্রস্ত হইয়াছেন—কিন্তু তখনই তাঁহার কল্পনা-বিহঙ্গী সবলে পক্ষজড়িমা দূর করিয়া উর্দ্ধাকাশে বিচরণ করিয়াছে । যখনই মনে হইয়াছে—

লাভ ক্ষতি টানাটানি, অতি ক্ষুদ্র ভগ্ন-অংশ ভাগ,

কলহ সংশয়—

সহে না সহে না আর ;—জীবনেরে খণ্ড খণ্ড করি

দণ্ডে দণ্ডে কর ।

—তখনই সেই আর্ন্তস্বরের মধ্যেই সুধানিশুন্দিনী বাণীর আবির্ভাব হইয়াছে, বেদনার তীর্থজলে আনন্দের অভিষেক হইয়াছে । তথাপি, আজিকার এই অভিনব স্বপ্ন-প্রয়াণের মধ্যে কবি-মানসের এমন একটি পরিচয় আছে, রস-সৃষ্টিতে এমন একটি যন্তুগত ও ব্যক্তিগত বৈশিষ্ট্য আছে যে, মনে হয় কবির প্রাণটিকে আমরা আরও স্পষ্ট করিয়া দেখিতে পাইতেছি । বাহিরের আঘাত চিরদিনই কবিকে আরও বেশী করিয়া অন্তরের দিকে ঠেলিয়া দিয়াছে ; ‘প্রত্যাহের কুশাহুর’ তাঁহার চরণে যখনই বিঁধিয়াছে, তখনই তিনি দেশ ও কাল অতিক্রম করিয়া শাপ্ত-সুন্দরের আরাতি করিয়াছেন । তাঁহার অসংখ্য রচনায় সেই কুশাহুরের কতচিহ্ন আমরা খুঁজিয়া পাই না । সে ব্যথা এতই বৃহৎ হইয়া উঠিয়াছে, তাহার স্পন্দন-পরিধি এতদূর বিস্তৃত হইয়াছে যে, তাহার উৎপত্তি বা কেন্দ্রবিন্দু আর লক্ষ্য করা যায় না । ‘শেষের কবিতা’র সে ব্যথার চিহ্ন আছে । সেই ব্যথাকে কবি কেমন করিয়া আশ্বস্ত করিতেছেন—তাঁহার হৃদয়ের রসায়নাগারে তাহার সেই রসপরিণতির প্রক্রিয়াটিকে আমরা যেন প্রত্যক্ষ করিতেছি । এই কারণেই এ রচনায় রসের একটি নূতনতর স্বাদ আছে ।

গল্পটির ঘটটুকু আমরা এ পর্যন্ত পড়িয়াছি তাহাতে একটা বিষয়ে আমাদের কাহারও সন্দেহ থাকিতে পারে না। অতি-আধুনিক বাংলা-সাহিত্যে যে অক্ষমতার-দস্ত ও নবত্বের প্রমত্ততা আছে তাহার অন্তর্গত ভঙ্গীটিকে কবি এই গল্পে একটি বিশেষ রূপ দিয়াছেন—একটি অভিনব চরিত্ররূপে উপস্থাপিত করিয়াছেন। এই চরিত্রের পরিকল্পনায় কবি শ্রীহীন বাস্তবকে একটি শ্রী ও স্বভাব মণ্ডিত করিয়াছেন। যে বাস্তবের সঙ্গে আমরা পরিচিত, কবির রস-কল্পনা তাহাকেই রূপান্তরিত করিয়াছে—তাহার মধ্যে যে হৃদয়-দৌর্বল্য, মনের অপরিচ্ছন্নতা ও চিন্তার দৈন্ত আছে, তাহাই তাঁহাকে পীড়িত করিয়াছিল। তাই কবি তাঁহার ভাবদৃষ্টি প্রসারিত করিয়া ইহার অন্তরালে, সকল অক্ষমতার মধ্যে, একটি প্রাণের আকৃতি আবিষ্কার করিলেন। না করিয়া উপায় নাই,—যাহা ভয়, অসম্পূর্ণ, তাহাকে সম্পূর্ণ করিয়া না লইলে কবির শাস্তি বা সান্ত্বনা নাই। বাংলার সাহিত্য-পল্লীতে শীত-সন্ধ্যায় যে ধূমবাম্প উথিত হইতেছে তাহার মধ্যস্থলে বাস করিলে শ্বাসরোধ হয় বটে, কিন্তু একটু দূর হইতে চাহিয়া দেখিলে দেখা যায়, সেই ধূম একটি নীল-মণ্ডলরেখায় গ্রামখানিকে বলয়িত করিয়াছে। অন্তমিত সূর্যের শেষ আভায় সে দৃশ্য ষথার্থই সুন্দর। যাহা ইতস্তত-বিক্ষিপ্ত কুণ্ডলায়িত অবস্থায় অসম্পূর্ণ ও নিরর্থক, তাহাই দূর হইতে দেখিলে সুনীল ও মণ্ডলাকার। বিক্রপের মধ্যেও এমনই একটি রূপের লীলা রহিয়াছে,—জগতের কোন কিছুই সুবাহীন নয়। তাই অসংখ্য বিকট ও বিক্রপের একাকার হইতে কয়েকটি ভাঙ্গা ও টুকরা উপাদান সংগ্রহ করিয়া, কবি একটি রস-রূপের প্রতিষ্ঠা করিলেন—তাহার নাম 'অমিত রায়'।

যে পরম আদর্শের সাধনা কবি আজীবন করিয়াছেন, যাহাকে নিজের দেবচূর্ণভ প্রতিভায় তিনি বঙ্গবাণীর রূপে প্রতিষ্ঠা করিয়াছেন, তাহার প্রতি নব-নবীনের এই শ্রদ্ধাহীনতার কবি কতখানি ব্যথা পাইয়াছেন, তাহা আমরা জানি। তাঁহার মনের এই অভাবাত্মক গ্লানি আবার সেই নিয়ত উৎসারিত ভাবধারায় ধুইয়া-মুছিয়া গেল। বাহিরের এই বাস্তব 'experience'-টিকে তিনি তাঁহার দিব্যাত্মভূতির দ্বারা 'perfect' করিয়া লইলেন, এই 'slying vapours'-কে একটি 'art pattern'-এ বাধিয়া ফেলিলেন। কুশালুর পুষ্পকেশরে পরিণত হইল।

যৌবনের দৃষ্টিকে সংসার-পণ্ডিত সঙ্ক করিতে পারে না—কাণ মলিয়া দিতে অগ্রসর হয়। দার্শনিক তাহাকে একেবারেই উপেক্ষা করে; দার্শনিক যে সত্যের সন্ধানে নিযুক্ত সে দেশকাল-নিরপেক্ষ একটা অমোঘ অব্যর্থ তত্ত্ব; তাই সকল বৈচিত্র্যই তাহার চিত্তবিক্ষেপের কারণ। কিন্তু কবির ধর্ম যুক্তি নয়, অহুঙ্কতি। যে নিয়ম বা তত্ত্বকে বুঝিতে হইলে সকল বৈচিত্র্যকে একাকার করিয়া দেখিতে হয়, কবির দৃষ্টি তাহাতে নিবদ্ধ নয়। তিনি সেই নিয়মকে উপলব্ধি করেন আর এক রূপে। তাঁহার কাছে সে বস্তু পরমাশ্চর্য্য, তাহা দেশে ও কালে পরিব্যাপ্ত—সর্ব বিরোধের মধ্যে একটি সঙ্গতি রক্ষা করিতেছে। বিচিত্রকে একাকার করিয়া যে-ঐক্য তাহা সে-ঐক্য নয়—তাহা একই কালে এক ও বিচিত্র। তাহার প্রবাহ নতোন্নত—তরঙ্গধারার মত; তাহার যে অংশই পৃথক করিয়া দেখি, তাহারই মধ্যে সেই সমগ্রতার ছন্দ রহিয়াছে। এই অদ্ভুত বস্তুর নাম প্রাণধারা। ইহাকে ব্যাকরণশাসিত বাক্যের দ্বারা প্রকাশ করা অসম্ভব, যুক্তির দ্বারা প্রতিষ্ঠিত করিবে কে? বিশ্বের এই প্রাণম্পন্দকে প্রাণের মধ্যেই অহুভব করা সম্ভব। কবিই ইহাকে অহুভব করেন, ও প্রকাশ করেন ছন্দে। যাহা তোমার আমার কাছে অসঙ্গত, প্রাণমন্ত্রে দীক্ষিত কবির চক্ষে তাহার মধ্যেই সঙ্গতি ধরা পড়ে।

সাধারণ মানুষের মধ্যে এই বিশ্বায়ত প্রাণধারার প্রবল পরিচয় পাওয়া যায় তাহার যৌবনে। যৌবন সর্বপাবন, তাহার অগ্নিতাপে নিকৃষ্ট ধাতুও আলোক বিকিরণ করে। তাই এই যৌবনের প্রতি কবির একটি বিশেষ মমতা আছে; কারণ, তাহার দৃষ্টের মধ্যেও একটা প্রবল প্রাণের বেগ আছে। যখন শাস্ত্রকে অস্বীকার করিয়া সে ক্ষণিকের জয়গান করে, তখন কবির প্রাণে রস উছলিয়া উঠে, কবি তাহার মধ্যে একটি অপূর্ব সঙ্গতি লক্ষ্য করেন। যৌবন যাহাকে অস্বীকার করে—অস্বীকার করে বলিয়াই তাহার সম্মান বৃদ্ধি হয়! বিরোধের দ্বারা সে যাহাকে উৎক্লিষ্ট করে, তাহাকেই সে উজ্জ্বল করিয়া তোলে। যৌবনের এই বিমূঢ়তা, এই আত্মবিশ্বাসই পরম কৌতুককর। বিশ্বব্যাপ্ত বৈচিত্র্য, বৈষম্য ও বহুরতাই যে প্রাণের ছন্দ—বা ছন্দেরই প্রাণ! যৌবনের বিদ্রোহের মধ্যে এই সত্যের প্রতিই loyalty আছে,—ছন্দকে ভাঙ্গিয়াই এই যে ছন্দাহুসরণ, বিদ্রোহ-চরণের দ্বারা এই যে বস্তুতা—ইহাই ত' লীলা! যাহাকে প্রতি মুহূর্তে মানিতেছি, যাহাকে না মানিয়া উপায় নাই—যিনি পরমপ্রিয় প্রাণেশ্বর, তাঁহারই গোপন

ইঙ্গিতে তাঁহাকে অগ্রাহ্য করিয়া এই যে নৃত্য, এ যে তাঁহাকেই যেড়িয়া যেড়িয়া করিতেছি,—এ আনন্দ যে তাঁহাতেই সমর্পিত হইতেছে !

৩

‘অমিত রায়ের’ মধ্যে এই আত্মবিরোধের লীলা কবি পরম কৌতুকসহকারে উপভোগ করিতেছেন। যৌবনের অবিমুক্তকারিতার মধ্যে যে রস আছে, শুধু তাহাই নয়—একটা সজ্ঞান বিরোধ, আত্মপ্রবন্ধনার জিদ, জাগিয়া ঘুমাইবার চেষ্টাও কবি তাহাতে যোগ করিয়া দিয়াছেন। বাংলাদেশের বর্তমান সাহিত্যিক আবহাওয়ার, স্বন্দরের প্রতি যে একটা আক্রোশের ভাব আছে, তাহার মূলে আছে অশিক্ষার বর্ধরতা। ইহাকে ভংগনা করা চলে, মাষ্টারী করা ছাড়া ইহার সম্বন্ধে আর কোনও ব্যবস্থা নাই। ইহাকে লইয়া যে-রসের সৃষ্টি হইতে পারে তাহাও অতিশয় প্রাকৃত-জনস্বলভ বিক্রম-রস, কবির পক্ষে তাহা উপাদেয় নয়। তাই কবি এই বাস্তবকে একটা সুদৃশ্য pattern-এ বুনিয়া তুলিলেন। অমিত রায়—আর যাই হোক, বর্ধর নয়। স্বন্দর কি, সে তাহা জানে। সেও স্বপ্ন দেখে—

“কিন্তু, লিলি, কোটি কোটি যুগের পর যদি দৈবাৎ তোমাতে আমাতে মঙ্গলগ্রহের লাল অরণ্যের ছায়ায় তার কোন-একটা হাজার-ক্রোশী খালের ধারে মুখোমুখি দেখা হয়, আর যদি শকুন্তলার সেই জেলেটা বোয়াল মাছের পেট চিরে আজকের এই অপরাধ সোণার মুহূর্তটিকে সামনে এনে ধরে, চমকে উঠে মুখ-চাওয়া-চাউয়ি করব, তারপরে কি হবে ভেবে দেখ !”

—কাব্য ইহার চেয়ে বেশী স্বন্দর আর কি হইবে? যে রবিঠাকুরের বিরুদ্ধে সে কোমর বাঁধিয়া তর্ক করে, তাঁর কাব্য-কল্পনার অপরাধ কি ইহার চেয়েও গুরুতর? বরং, ইহাই মনে হয় যে, রবিঠাকুরের কাব্যরসে তাহার চিত্ত স্তরপুর। রবিঠাকুর তাহার মনোহরণ করিয়াছেন বলিয়াই তাঁহার প্রতি এত আক্রোশ। সে যখন বলে—“ফজলি আম ফুরোলে বলব না, আনো ফজলিতর আম, বলব, নতুন বাজার থেকে বড় দেখে আতা নিয়ে এস ত হে।” তখন সে নিশ্চয় জানে, ফজলি আমের সময় ফজলি আম প্রতি বৎসরই নতুন হইয়া দেখা দিবে; সে বুদ্ধিমান—ফজলিতর কিছু সে চায় না, সে চায় স্বাদ বদলাইতে। সে ভোগরাস্ত—Blase’ নয়, রসনাকে একটু চান্কাইয়া লইতে চায় বাস্তব। এই spirit of contradiction তাহার যৌবন-

ধর্ম,—সে রবিঠাকুরকে, অর্থাৎ আপনাকেই *contradict* করিয়া স্থখ পায়, তাই রবি ঠাকুরের বিরুদ্ধে তাহার যুক্তিগুলি এমন তীক্ষ্ণ, অথচ *absurd*। মনে হয় ‘অমিত রায়’ কবির নিজেরই একটি *complex*। যৌবন-ধর্মের প্রতি তাহার নিজের যে একটু নিগূঢ় সহানুভূতি আছে, আবার জীবনের *eternal truth* তাহার একরূপ ব্যাধির প্রতিও তাহার যে কুণ্ঠার ভাব আছে,—এই উভয়ের রাসায়নিক সংযোগে তিনি নিজেরই একটি মানস-আত্মীয়কে মূর্তি ধারণ করাইয়া রস-শিলাসা মিটাইতেছেন।

কারণ, বাহিরে কোন বাস্তব ‘অমিত রায়’ নাই। বাহিরে যে যৌবন নবত্বের দস্ত করিতেছে, তাহার মধ্যে ব্যাধি আছে, বোধশক্তি নাই। সে কখনও ফজলি আম খায় নাই—যাহার স্বাদ সে জানেনা, তাহার বদলে আতাই বা চাহিবে কেন? সে ফজলিও বোঝে না, আতাও বোঝে না—স্বাদ বদলাইবার জন্ত সে বড় জোর নোনার বদলে আঁশ-কল চাহিবে। এ কথা বলিবার তাৎপর্য এই যে, ‘অমিত রায়’ নামক ব্যক্তিটির মধ্যে একটু বাস্তবের ছায়া আছে, অথচ কায়ার সঙ্গে ছায়া যেন একটুও মেলে না। ইহাই রসস্থষ্টির রহস্য। “A poem is a very image of life.”—বলিলে কথাটা হঠাৎ স্বীকার করিতে বাধে, কিন্তু তার সঙ্গে যদি যোগ করা যায়—‘expressed in its eternal truth’, তবে আর বাধে না। নবত্বের দস্তের উপর কবি যে একটি কঠোর অথচ সহানুভূতি-কাতর হস্ত বিকীর্ণ করিয়াছেন, তাহার দ্বারাই তিনি উহার *eternal truth*-টিকে ধরিয়া দিয়াছেন। ‘অমিত রায়’কে একটু দূরে ধরিয়া—তাহাকে যেমন একদিকে একটি স্মৃতিস্তম্ভ পরিহাসের অস্ত্র করিয়া তুলিয়াছেন, তেমনই, আর একদিকে তাহাকে অতিশয় অন্তরঙ্গ আত্মীয়রূপে বুকের কাছে টানিয়া লইয়াছেন; এজন্ত তাহার পরিণামও যে পরম রমণীয় হইবে, এমন আশা করা যায়। এই বিরোধাত্মক গল্পটির প্রাণ। ইহার মধ্যে যে সত্যটি কোতুক-কটাক্কে উকি মারিতেছে, তাহাই কবিকল্পনার আবিষ্কার। সকল বাস্তবের এই রূপান্তরই তাহার সত্যকার রূপ, এই জন্তই সকল কাব্যই—*is a very image of life expressed in its eternal truth.*

‘অমিত রায়’র আত্মবিরোধের মধ্যে যে কোতুকরস ঘনাইয়া উঠিয়াছে তাহা কি অনেকটা সজ্ঞান নহে? ইহার কারণ, কবি তাহাকে আপনারই সম্ভার

সম্ভাবন করিয়াছে। কবি যেন 'অমিত রায়' হইয়া এই নবশ্বের উৎসাহে নিজের মাতিয়া উঠিয়াছেন। ইহার মধ্যে যে হাস্যকর absurdity আছে—রবিঠাকুরের বিরুদ্ধে যে প্রকাণ্ড স্পর্ধার বিলাস আছে, সেটা কবিরও আত্ম-দ্রোহ বটে। কবি যেন বিপক্ষের বিরুদ্ধে বিক্রমের ধরশাগ শর যোজনা করিয়া আপনিই আপনাকে বিদ্ধ করিতেছেন, নবশ্বের উন্মাদনাকে উপহাস করিতে করিতে আপনিও সেই উন্মাদনার আত্মসমর্পণ করিয়াছেন। সমগ্র রচনাটির রসকল্পনাই তাহার প্রমাণ বটে, কিন্তু তাহার চেয়ে প্রত্যক্ষ প্রমাণ আছে। যে দুইটি কবিতায় তিনি এই নবশ্বের ঘোষণা করিয়াছেন, তাহার প্রথমটিতে বিরোধের আভাস আছে, নিজেকে বাচাইবার চেষ্টা আছে। কিন্তু দ্বিতীয় কবিতাটির মধ্যে যে পরিপূর্ণ স্বরের আবেগ আছে—যে আশ্চর্য্য ছন্দের নৃত্য উদ্দাম হইয়া উঠিয়াছে, তাহা খাঁটি subjective, অতিশয় personal ও sincere। 'অমিত রায়ের' গান তিনি নিজের কণ্ঠে লইয়াছেন, এখানে আর এতটুকুও বিক্রমের আক্রমণ নাই।—

নাই আমাদের কনকচাঁপার কুঞ্জ ;
 বন-বীথিকায় কীর্ণ বকুলপুঞ্জ ।
 হঠাৎ কখন সন্ধ্যাবেলায়
 নামহারা ফুল গন্ধ এলায়,
 প্রভাতবেলায় হেলা ভরে করে
 অরণ্য মেঘেরে তুচ্ছ,
 উদ্ধত বত শাখার শিথরে
 রডোডেন্ড্রন-গুচ্ছ ।

তাঁহার অন্তরের কবি-বাউলটি আর আপনাকে সামলাইতে পারিল না, যৌবনের নবত্ব-লালসায় কবির প্রাণ অসংবৃত হইয়া পড়িল। এই কবিতাটির মধ্যে তাঁহার নিজেরই সেই মর-ছল্লভ যৌবন অতীত-জীবনের প্রাস্ত হইতে প্রতিধ্বনি তুলিয়াছে। পশ্চিমের অন্তরাগ যেমন পূর্বাকাশে প্রতিফলিত হইয়া উষার স্মৃতি আগাইয়া তোলে, এই কবিতাটিতে আমরা তেমনই করিয়া কবির সেই যৌবন-উষার আভাস পাইতেছি। পশ্চিম-আকাশে অন্তমিত-প্রায় রবি পূর্বাকাশের স্বপ্ন দেখিতে ন। কিন্তু উষার আর সেরূপ নাই। এ উষার কনক-চাঁপার কুঞ্জ' অথবা 'বনবীথিকায় কীর্ণ বকুল-পুঞ্জ' একটি অতি কোমল

‘রডোডেন্ড্রন-গুচ্ছ’

শুভ্র রূপপ্রভায় চিরস্তনী কাব্যসুন্দরীকে বরণ করিতেছে না,—অতি স্নিগ্ধ বৃহৎ সৌরভে মুগ্ধ-হৃদয়ের প্রীতি জ্ঞাপন করিতেছে না। আজিকার উষায় ‘উদ্ভূত যত শাখার শিখরে রডোডেন্ড্রন-গুচ্ছ’ ‘অরুণ মেঘেরে তুচ্ছ’ করিয়া রাগরক্ত নবস্ত্রের জয়ধ্বজা তুলিয়াছে। ক্ষতি কি? কাব্যশ্রীর বধুজনোচিত ব্রীড়াকে যাহারা উপহাস করিতেছে, তাহারা যে যৌবনের আবেগেই আত্মহারা—মনের ঐশ্বর্য নয়, প্রাণের প্রাচুর্য্যই তাহাদের যৌবনধর্ম্ম। এই আবেগ কবিতাটির ছন্দে ছন্দে যে ছন্দে উৎসারিত হইয়াছে, তাহা অর্থকে ছাপাইয়া উঠিয়াছে,—পড়িবার সময়ে ছন্দের উন্মাদনাই যেন পাঠককে পাইয়া বসে, আর কোনদিকে মনঃসংযোগ করিতে ইচ্ছাই হয় না। এই একটি পদের ধ্বনি—‘রডোডেন্ড্রন-গুচ্ছ’—শিরায় শিরায় স্পন্দিত হইয়া উঠে, ফিরিয়া ফিরিয়া কাণে বাজিতে থাকে—

‘আমরা চকিত অভাবনীয়ের
কচিং কিরণে দীপ্ত।’

একদিন এমনি করিয়া কবির কাব্য পাঠ করিতাম। তখন অর্থ বুঝিতাম না, বুঝিতে চাহিতাম না—ছন্দের অপরূপ লীলাই প্রাণের মধ্যে উৎসব করিত, যৌবনের মোহ-মদিরায় হৃদিপাত্র উচ্ছল হইয়া উঠিত। সে কি কুহক, কি অভাবনীয় স্বপ্নসম্ভার! সে-ভাষা কি অর্থের অপেক্ষা রাখিত! সে যেন রূপময়! বাংলা কবিতার সেই প্রথম অঙ্গুরী-বেশ দেখিলাম—ছন্দ তাহার চরণে নূপুর হইয়া বাজিতেছে! রূপময় বলিতেছি এই জন্ত যে, সে-ভাষা যেন নৃত্যপরা অঙ্গুরার মতই ছন্দের উপর ভর করিয়া স্বপ্ন-সৌন্দর্য্যের হিলোল তুলিত, যেখানে যেটুকু অর্থের আভাস দিত সে যেন সেই ছন্দেরই রূপাত্মবাদ। আজ প্রতি কবিতার মূল প্রেরণা বুঝি, স্বপ্ন ও সঙ্গীতের অন্তরালে কবি-হৃদয়ের যে রহস্যময় অনুভূতি রহিয়াছে তাহার অর্থ বুঝি; কিন্তু ভাষা ও ছন্দের যে কুহকে সন্ত-বিকশিত প্রাণপদ্ম থর থর করিয়া কাঁপিয়া উঠিত—আজ বিশ বৎসরের উজান ঠেলিয়া সেই যাদুস্পর্শটি একবার ফিরিয়া পাইতে ইচ্ছা হয়, কিন্তু সে আর পাই না। সেই ‘কনকচাঁপার কুঞ্জ’ এবং ‘বন-বীথিকায় কীর্ণ বকুলপুঞ্জ’ একটি

ঘনঘোর অশ্রু-কুয়াসার মধ্য হইতে অভিসার-সঙ্কেত করিতেছে, কিন্তু সে পথ আর খুঁজিয়া পাই না। আজিকার দিনে সেই নবম্বের উন্মাদনা জাগাইবে 'রডোডেন্ড্রন্-গুচ্ছ' ! অদৃষ্টের পরম পরিহাসই বটে। তথাপি এই 'রডোডেন্ড্রন্-গুচ্ছ'ই মূর্খের জন্ম সেই ছন্দটিকে ফিরাইয়া আনিয়াছে, মূর্খের জন্ম প্রাণের ভিতরে সেই সেকালের পুলক-নৃত্য জাগিয়াছে। তাই সব ভুলিয়াছি। সাহিত্যের বিচার-বচসা ভুলিয়াছি। 'তুই এক জন কলেজের অধ্যাপক' যাহা বলিতেছেন তাহা ভুলিয়াছি। এমন কি, নিবারণ চক্রবর্তী ও অমিত রায়ের আসল কথাটিও ভুলিয়াছি। আজ আবার সেই সেকালের মতই কবিতা পড়িবার সময়—

হঠাৎ-আলোর ঝলকানি লেগে

ঝলমল করে চিত্ত।

সাহিত্য-সেবা ও সাহিত্যের ব্যবসায়

১

সাহিত্য এককালে সবদেশেই 'labour of love' ছিল ; আমাদের দেশে এখনও কার্যতঃ তাহাই আছে । কিন্তু আজিকার দিনে এ ধরণের labour of love, বা প্রেমের দায়, সাহিত্যের ক্ষেত্রেও দুর্বল হইয়া উঠিয়াছে, অথচ সাহিত্য-শ্রমীকে জীয়াইয়া রাখিবার পক্ষে এই প্রেম ছাড়া আর কিছুই উপস্থিত কোথাও দেখা যাইতেছে না । এই অস্বাভাবিক অবস্থার জন্য সাহিত্য-ধর্মের মানি বড়ই বাড়িয়া উঠিতেছে ।

যাঁহারা সাহিত্যিক তাঁহারা ব্যবসায়ী নহেন, সাহিত্যিক প্রতিভা ও ব্যবসায়-বুদ্ধি প্রায় এক সঙ্গে থাকে না । এজন্য বৈষয়িক ব্যাপারে সাহিত্যিক চিরদিনই পরমুখাপেক্ষী । অতএব, যেকালে অর্থনীতিই সকল নীতির উপরে, সেকালে সাহিত্য-ব্যবসায়ীরা কতকটা গায়বুদ্ধি, ধর্মবুদ্ধি ও সাহিত্যিক হিতাহিত-বুদ্ধি-সম্পন্ন না হইলে, সাহিত্যের অধঃপতন অনিবার্য । কিন্তু জাতির চরিত্রগত ব্যাধির ফলে, ব্যবসায়ের ক্ষেত্রে সেরূপ উন্নত হিসাব-বুদ্ধি বা দূরদৃষ্টির আশা এখনও ছুরাশা মাত্র ।

বিশ বৎসর পূর্বেও যাঁহারা সাহিত্যচর্চা করিতেন তাঁহাদের সঙ্গে ব্যবসায়ীদের সম্পর্ক এমন অনিবার্য হইয়া উঠে নাই । সাহিত্যের তখন মর্যাদা ছিল—বাজার ছিল না ; সাহিত্যপ্রীতিই তখন সাহিত্যের একমাত্র মূল্য ছিল, অণুবিধ মূল্যের প্রত্যাশা বড় ছিল না । এখন সমাজে literacy অনেক বাড়িয়াছে, বটতলাই এখন সাহিত্যের ভদ্রপল্লী—এমন কি ভট্টপল্লীকেও জুড়িয়া বসিয়াছে ; সঙ্গে সঙ্গে রুচি ও আদর্শ অনেক নামিয়াছে, সব একাকার হইয়া গিয়াছে । ফলে, সাহিত্যের একটি বড়বাজার গড়িয়া উঠিয়াছে—রীতিমত চাহিদা ও যোগানের পাল্লা চলিতেছে । ব্যবসায় জমিয়া উঠিয়াছে—উদরভরণের একটা নূতন উপায় মিলিয়াছে ।

কিন্তু সাহিত্যের কামধেনুকে যে ভাবে দোহন করা হইতেছে, তাহাতে সে আর বাঁচে না ; ইতিমধ্যেই ফুঁকা-দেওয়া শুরু হইয়াছে । সে দিকে ব্যবসায়ীদের

দূকপাত নাই। চাহিদার অল্পপাতে যোগান এত কম যে, খাঁটির কথা ভাবিলে চলে না; দুধের ব্লংটা থাকিলেই হইল—শিশুদের দুধ চাই-ই; সাহিত্য-দুগ্ধ-লোলুপ শিশুর সংখ্যা অসম্ভব রকম বাড়িয়া চলিয়াছে, কাজেই কামধেনুও শীর্ণ হইয়া পড়িয়াছে। এখন যে-কোনও দেখু দিয়া কাজ চালাইতে হয়—যাহাকেই মাঠে পাওয়া যায় তাহাকেই দোহন করিতে হয়; খাইতে দেওয়ারও প্রয়োজন হয় না, হইলে বোধ হয় ব্যবসায় চলিত না। বৃড়াগরুকে ফুঁকা দিয়া এবং অপরগুলির দুধে জল মিশাইয়া কারবার চলিতেছে।

উপমা না হয় থাক। কিন্তু সাহিত্যিকদের অবস্থা যেরূপ দাঁড়াইয়াছে তাহাতে খাঁটি সাহিত্যের ভরসা বড় কম। জীবিকার অভাবে ব্যবসায়ীদের হাতে পড়িয়া, তাঁহাদের ধর্ম রক্ষা করা দুষ্কর; কাগজের অপেক্ষাও কম দামে রচনা বিক্রয় করিতে হয়—প্রচুর পরিমাণে উৎপাদন করিতে না পারিলে আধ-পেটাও মেলে না, স্ত্রী বেচিয়া অর্থোপার্জনের মত কলালস্রীকে বেচিয়া জীবিকা সংগ্রহ করিতে হয়। আজ তাঁহারা পণ্য-বিক্রেতার প্রসাদজীবী, তাহাতেও পেট ভরে না; পেট যদি ভরিত তাহাতে কতকটা সান্ত্বনা, এমন কি স্বাধীনতার সম্ভাবনা থাকিত।

যেদিন হইতে সাহিত্য জীবিকার বস্তু হইয়াছে, সেই দিন হইতেই সাহিত্যিকের স্বাধীনতা খর্ব হইয়াছে। যাহাদের ধর্ম ও কর্ম ছিল—সরস্বতীর সুন্দরী ও সতী মূর্তিকে রসপিপাসু পাঠকের সমক্ষে স্থাপন করা, উৎকৃষ্ট ভাব-চিন্তার জগতে স্বাধীনভাবে বিচরণ করাই যাহাদের বিধিদ্ভুত অধিকার, তাঁহারা আজ জনমনের পরিচর্যায় আত্মবিক্রয় করিতেছেন। গতযুগের সাহিত্যিকদের জীবনকাহিনী হইতে জানা যায় যে, সেকালে plain livingও যেমন সম্ভব ছিল, তেমনই, ভালো চাকুরীর উপর নির্ভর করিতে পারিয়াছিলেন বলিয়া বড় বড় সাহিত্যিকগণ ধর্ম-সম্বন্ধে সাহিত্যসেবার অবসর পাইয়াছিলেন। এই তথ্য প্রণিধানযোগ্য; অবস্থা সেইরূপ না হইলে আধুনিক বাংলা-সাহিত্য এত শীঘ্র এমন ভাবে গড়িয়া উঠিত না। সত্য বটে, সাহিত্যের সঙ্গে জীবন-সংগ্রামের সাক্ষাৎ যোগ ছিল না বলিয়া, সাহিত্যের আদর্শ কল্পনাপ্রধান হইতে পারিয়াছিল—অর্থাৎ তাহাতে বস্তুজগৎ অপেক্ষা ভাব-জগতের প্রসার অধিক ছিল; কিন্তু এরূপ না হইলে গল্পে ও পद्यে ভাষার এমন শ্রীবৃদ্ধিসাধন হইত না; কারণ, রসপ্রেরণাই সেই ষাটশক্তি—যাহার

বলে রসনায় বাকব্রহ্মের অধিষ্ঠান হয়, এবং মানুষী ভাষা দৈববাণীর মত বিদ্যমান হইয়া উঠে। সাহিত্যকলার আদি এবং শেষ—একাধারে সাহিত্যের দেহ, প্রাণ ও আত্মা যাহাকে আশ্রয় করিয়া অব্যক্ত হইতে ব্যক্ত হইয়া থাকে—সেই বাণীকে মূর্ত্তিমতী করিবার সাধনাই মুখ্যতঃ সে যুগের সাধনা ছিল। সে সাহিত্যকে অভিজাত-সম্প্রদায়ের সাহিত্য, অথবা জীবন-সত্যহীন কাব্যবিনাস বলিয়া যাহারা কলরব করিয়া থাকেন তাঁহারা ভ্রান্ত, তাঁহাদের সাহিত্য-জ্ঞান প্রশংসনীয় নহে।

২

সাহিত্যের আদর্শ এক এক যুগে, জাতি ও সমাজের অবস্থা-অনুসারে, এক এক রূপ হইয়া থাকে। ইহাই স্বাভাবিক; কিন্তু তাই বলিয়াই কোনও সাহিত্য মূল্য-হীন নহে। বরং, জাতি ও সমাজের অবস্থা অগ্রাহ করিয়া যদি এমন কোনও আদর্শের প্রতিষ্ঠা করা যায়, যাহা জাতির স্বধর্মের প্রতিকূল—তবেই সাহিত্য পীড়িত হয়, সৃষ্টির পরিবর্তে অনাসৃষ্টিই বাড়ে। বর্তমান বাংলা-সাহিত্যের দুর্দশা, ও সেই সঙ্গে সাহিত্যিকের জাতিনাশ—এই দুয়েরই কারণ কতকটা ইহাই। আজকাল সাহিত্যের আদর্শ লইয়া যে কোলাহল উঠিয়াছে—অভিজাত ও সৌখীন বলিয়া এক আদর্শকে অশ্রদ্ধা করিয়া, সত্য ও বাস্তব-জীবনের দোহাই দিয়া যে অপর আদর্শ খাড়া করা হইয়াছে—তাহার মূলে আছে সাধারণের মনোরঞ্জন, যাহারা সিনেমা-গৃহের জনতা বৃদ্ধি করে তাহাদেরই দুষ্ট-ক্ষুধার তৃপ্তিসাধন। শিক্ষিত, এমন কি উচ্চশিক্ষিত বলিয়া যাহারা পরিচিত, তাঁহাদের রুচিও এতদপেক্ষা উন্নত নয়; তাঁর কারণ, পাণ্ডিত্য ও রসবোধ এক পদার্থ নহে। জীবন-সত্য বা বাস্তব-রসতত্ত্বের দোহাই যাহারা দেয় তাহারা এই নিকৃষ্ট গণ-মনোবৃত্তির পরিচর্যা করে। ইহারই ফলে, আজ বাংলা-সাহিত্যের প্রাক্ষণে, সাহিত্য ও সাহিত্যসেবী উভয়কেই গ্রাস করিবার জন্ত এক বিকট Frankenstein মুখ-ব্যাদান করিয়া দাঁড়াইয়াছে।

যে কল্পনা বা রসিকতা জনমনস্থলভ তাহাই সাহিত্যের উপাদান নয়। যাহা সাহিত্যের পক্ষে জীবনীয়—সেই রসবস্ত্ত আপামর সাধারণের গ্রাহ হইতে পারে না। যে-রস কেবলমাত্র শিক্ষিত ও স্বচ্ছল অবস্থাপন্ন সমাজের উপাদেয়, তাহাই একমাত্র রস না হইলেও—উৎকৃষ্ট হইতে পারে। কিন্তু, যাহা অশিক্ষিত ও দুঃস্থ জনগণের

পক্ষে সহজসেব্য তাহাই উৎকৃষ্ট না হইতে পারে, এমন কি, তাহা কোনও প্রকার রস না হওয়াও অসম্ভব নয়। অতএব, সাহিত্যে বাস্তব বা জীবন-সত্যের আদর্শই যে সত্য তাহার প্রমাণ এই নয় যে, তাহা অধিকাংশ পাঠকের ক্ষুণ্ণবৃত্তি করে,— দুর্বল অসহায় দেহ-মনের যত কিছু দুঃখ, গ্লানি ও লজ্জার জয়গান করে। আধুনিক সাহিত্যে ইহারই নাম জীবন-সত্যের আদর্শ; অতিশয় ক্ষুদ্র যাহা তাহাকেই একটা বৃহৎ নাম দিয়া সাহিত্য-সমালোচনায় যে ধাপ্লাবাজী চলিতেছে, তাহার ফল সবদিকেই ভয়াবহ হইয়া উঠিয়াছে।

যে-দেশের জনগণ এখনও আটের পাঠশালায় ভক্তি হয় নাই, যাহাদের রুচি ও রসবোধ তাহাদের জীবনেরই মত হীন, দুর্বল ও পঙ্গু—বিদেশ হইতে আদর্শ ধার করিয়া এবং তাহার কদর্থ করিয়া, তাহাদের সেই মূর্থতা ও মূঢ়তাকেই প্রশ্রয় দেওয়া যে কতখানি বিপজ্জনক, তাহা এখনও ভাবিয়া দেখিবার সময় যদি না আসিয়া থাকে, তবে সে সময় আর আসিবে বলিয়া মনে হয় না। রাষ্ট্রীয় সাধনার ক্ষেত্রে এ জাতির পক্ষে যেমন এখনও Dictator-এর প্রয়োজন আছে, তেমনই সাহিত্যের ক্ষেত্রেও রুচি ও রসবোধকে শোধন ও সংযমন করিবার জন্ত, জন-মনোবৃত্তির উপরে অভিজ্ঞত-চিত্তের শাসন এখনও অত্যাবশ্যক। বঙ্কিম-রবীন্দ্র-নাথের যুগ এখনও শেষ হয় নাই—হইবার নহে। বিদেশ হইতে ধার-করা আধুনিকতার আদর্শ খাড়া করিয়া—বাস্তবতা বা জীবন-সত্যের দোহাই দিয়া, যাহারা জন-মনের পরিচর্যা-কেই সাহিত্যের ব্রত করিয়া তুলিয়াছেন, তাঁহারা সাহিত্যকে হত্যা করিয়া আত্মহত্যার পথ প্রশস্ত করিতেছেন।

অরসিককে রসিক বলিয়া সম্মান করার ফলে যাহা হইয়াছে তাহা এই। এক-কালে সাহিত্যপল্লীর একটি সংকীর্ণ গলির নাম ছিল বটতলা; এখন পল্লী বাড়িয়া সহর হইয়াছে, সঙ্গে সঙ্গে গলিটিও সাহিত্যের সেন্ট্রাল এভিনিউ হইয়াছে; এখন আর তাহা মাত্র বটতলা নয়—মাহেশের রথতলা হইয়া দাঁড়াইয়াছে। এখানে আর ইতর-ভদ্র নাই, শিক্ষিত-অশিক্ষিত নাই,—একবেলা আমোদ উপভোগের জন্ত সকলেই একদলভুক্ত হইয়াছে। দোকানীরা নগদ বিক্রয় করিয়া খুচরা লাভকে যথালভ মনে করিতেছে। মাল দুই ঘণ্টা পরেই বাসি হইয়া যাইবে তাহা জানে, তাই ক্রমাগত চুল্লীর উপর নূতন কড়াই চাপাইতেছে; যাহা বাসি হইতেছে তাহাতে কুকুরেও আর মুখ দেয় না। পাঁচ বৎসর আগে ছাপা বহি এ বৎসরে আর কাটে

না। এই রথতলার মাল-সরবরাহের ভার লইয়াছেন আধুনিক 'ভূখা' লেখকগণ। কিন্তু তাহাতে পেট ভরে না। পুস্তকবিক্রেতাদের সঙ্গে গ্রন্থলেখকদের যে সম্বন্ধ দাঁড়াইয়াছে তাহা অনেকটা বাড়ীউলী আর রূপজীবিনীর মত! বহি যেমন হোক, তাহার ভিতরে যাহাই থাক, বাহিরের চেহারাটা চটকদার হইলেই হইল; খরচ যা-কিছু ঐ জন্মই, অন্য খরচ বিশেষ কিছুই নাই। তার উপর যদি খানকতক বেশ একটু suggestive রকমের রঙীন ছবি—বারান্দা-বাসিনী উর্ধ্বশীর 'অকুণ্ঠিতা অনবগুণ্ঠিতা' মূর্তি জুড়িয়া দেওয়া যায়, তবে ত' সোনার সোহাগা! এইরূপ ছবি-দেওয়া কবিতার বই—নারীদেহের কোন একটি অঙ্গের অনাবৃত শোভায় আগা-গোড়া চিত্রিত অনুবাদ-কাব্য—প্রকাশ করা খ্যাতনামা প্রকাশকদিগের একটা কীর্তি স্বরূপ হইয়া দাঁড়াইয়াছে, পরম্পরে পাল্লা দেওয়া চলিতেছে। কিন্তু যাহাদের ধর্মনাশের উপরে এই ব্যবসায় নির্ভর করিয়া আছে, তাহারা ভাল করিয়া খাইতেও পায় না; তাহাদের কালিমা-বেষ্টিত চক্ষে অস্বাভাবিক জ্বালা, গণ্ডে ও গণ্ডে জ্বর-জনিত রক্তিমামাভা!

পুস্তকপ্রকাশক ও পুস্তকপ্রণেতার সম্বন্ধ যেমন ধর্মসঙ্গত বা সাহিত্যের পক্ষে স্বাস্থ্যকর, পত্রিকা-ব্যবসায়ীদের ধর্মজ্ঞান তদপেক্ষা উন্নত নয়। এই ব্যবসায় এখনও তেমন লাভজনক হইয়া উঠে নাই—অধিকাংশই নিজের পায়ে দাঁড়াইতে পারিতেছে না। যে কয়খানি পত্রিকা সচল তাহাদের পশ্চাতে অন্তর্বিধ ব্যবসায়ের পৃষ্ঠবল আছে। এরূপ পত্রিকার সংখ্যা খুব বেশী নয়; তথাপি সাহিত্য-প্রচারের শক্তি ইহাদেরই আছে। বিজ্ঞাপন যোগাড় করিয়া তাহারই আয়ে সপ্তাহান্তে বা মাসান্তে কোনও প্রকারে খানকয়েক ছোট অথবা বড় পৃষ্ঠা ভর্তি করিয়া বেকার অবস্থা দূর করিবার চেষ্টা আজকাল সংক্রামক হইয়া উঠিয়াছে—এইরূপ পত্রিকার সংখ্যা নিতান্ত অল্প নহে। বড় কাগজগুলি প্রায় সম্পাদকবিহীন—স্বত্বাধিকারী, অর্থাৎ ব্যবসায়ী দোকানদারই ইহাদের কর্ণধার। সাহিত্যকে ইহারা খোলাখুলি অবজ্ঞার চক্ষে দেখে; ইহারা সাহিত্যের জমীদার—লেখকগণ ইহাদের প্রজা, নিতান্তই কুপার পাত্র। পত্রিকার অধিকাংশ সেই সকল লেখকের রচনা দ্বারা পূর্ণ করা হইয়া থাকে, যাহারা লেখা ছাপা হইলেই কৃতার্থ বোধ করে। গরম চানাচুরের মত গল্প যাহারা লেখে তাহারা কিছু কিছু বকশিস পায়। দুই চারিটা খুব ভারি প্রবন্ধ ওইরূপ গল্পের সঙ্গে হজমী-গুলির মত বাঁধিয়া দেওয়া হয়।

ইহাতেই সম্পাদনার চূড়ান্ত হইয়া যায়। ইহাই এই সকল পত্রিকা-পরিচালনার সাধারণ-পলিসি—ব্যতিক্রম যে নাই তাহা বলিতেছি না।

কিন্তু ঋণজীবী পত্রিকার সংখ্যাই বেশী। ইহাতে ছাপাখানা কাগজব্যবসায়ী ও দপ্তরী কিছু পাইয়া থাকে—লেখক ত' নহেই; যাহারা প্রকাশক তাহারা তাহাদের সখ বা দুর্ভুঙ্কির দণ্ড দিয়া শেষে সরিয়া পড়ে। অর্ধ-শিক্ষিত সাহিত্য-ব্যাধি-গ্রস্ত ছোকরার দলই এই সকল পত্রিকার জন্ম দায়ী। এই ব্যাধির বিস্তার যেমন হইতেছে, তেমনই পত্রিকা-সংখ্যা বাড়িতেছে—এরূপ পত্রিকা-প্রকাশ বন্ধ হইবে না দেখা যাইতেছে। এক দলের পর আর একদল ক্রমাগত স্থান পূরণ ও জঞ্জাল বৃদ্ধি করিতেছে। সাহিত্যিক হওয়া এতই সহজ, এবং ছাপাখানা এত বাড়িয়াছে—যে, এই ধরণের প্রলোভন অনেকটা বাঙ্গালীর ছেলের বিবাহ-করার প্রলোভনের মতই দুর্দমনীয় হইয়া উঠিয়াছে। এই সকল ঋণজীবী পত্রিকা দ্বারা পত্রিকা-ব্যবসায়ীদের কিছু উপকার হইবার সম্ভাবনা, এবং হইতেছেও,—এই রূপ সাহিত্যচর্চার ফলে, আজিকার বাজারের উপযুক্ত চলনসই লেখা অনেকের অভ্যস্ত হইতেছে; ইহারাই কিছুদিন পরে স্থায়ী পত্রিকাগুলির বিনামূল্যে লেখক হইবার যোগ্যতা অর্জন করিতে পারে।

পুস্তক-প্রকাশকের কথা বলিয়াছি—পত্রিকা-ব্যবসায়ীর কথাও সংক্ষেপে বলিলাম। এই দ্বিতীয় শ্রেণীর ব্যবসায়ীগণ সাময়িক সাহিত্যের অধোগতির জন্ম অধিকতর দায়ী। নিকট লেখকদের প্রশ্রয় দিয়া সাহিত্যের আবহাওয়া দূষিত করিবার শক্তি যেমন ইহাদের আছে, তেমনই, স্থলেখক ও প্রতিভাবান নবীন সাহিত্যিকদিগকে আদর করিয়া এবং তাঁহাদের রচনার যথাযোগ্য মূল্য দিয়া, সাহিত্যসাধনায় সাহায্য করিবার—এবং সেই সঙ্গে জাতির মনোজীবন উন্নত করিবার ক্ষমতাও তাহাদের আছে। কিন্তু ধান চাল পাটের ব্যবসাতেও ঘেটুকু দেণাপাওনার ধর্মবুদ্ধি আবশ্যিক, এই ব্যবসাতে সেটুকুরও প্রয়োজন নাই। কারণ, যাহারা সাহিত্যের ক্রেতা তাহাদের মাপিয়া লইবার মাপকাঠি, অথবা ওজন করিয়া দেখিবার বাটখারা নাই। 'এ ব্যবসায় শৌণ্ডিকের ব্যবসায় অপেক্ষাও নিরাপদ; কারণ, সেখানে খরিদদার মাতাল হইবার পূর্বে অন্ততঃ প্রথম বোতলের হিসাব রাখে। এখানে গোড়া হইতেই রসোন্মাদ! পাঠক-পাঠিকার বয়স, বিজ্ঞাবুদ্ধি ও রসজ্ঞান, এই তিনের অন্ততঃ একটাও ঠকাইবার পক্ষে যথেষ্ট। ছই চারি-

খানি ছবি, কিছু ছড়া, ও গোটা কয়েক রসালো গল্প হইলেই হইল ; তার উপর কাগজখানা যদি একটু মোটা, এবং নিয়মমত প্রকাশিত হয়, তবে আর কোনও বালাই নাই। পত্রিকা-সম্পাদনের ইহাই বাহাদুরী—ইহার অধিক বিত্তাবুদ্ধি থাকিলেই মাটা। ব্যবসায় বেশ চলিতেছে ; মাছের তেলে মাছ ভাজা হইতেছে—সিদ্ধির কুল্পী, অথচ আবগারী আইনের ভয় নাই।

৩

সাহিত্যের ব্যবসায় সম্বন্ধে যাহা লিখিলাম, তাহার উত্তরে বলা যায়, ইহার জন্ম ব্যবসায়ীরা দায়ী নহে, দায়ী শিক্ষিত সমাজ ও লেখকেরা। সাহিত্যের ব্যবসাতে যদি সাহিত্য বাদ পড়িয়া কেবল ব্যবসায়টাই লক্ষ্য হয়, তবে তাহার কারণ—ব্যবসায় ও সাহিত্য এই দুইটা পরস্পরের দাবী রক্ষা করিয়া চলিবার মত সময় আমাদের দেশে এখনও আসে নাই ; তাই বলিয়া ব্যবসায়ের পথ বন্ধ থাকিতে পারে না—সেজন্ম অভিযোগ করা নিষ্ফল। লেখকদের আদর্শ ও সাধারণের রুচি যদি এমনই অধঃপতিত হয়, তবে সাহিত্যের ব্যবসাতে ধর্মজ্ঞানের প্রয়োজন হইবে কেন ? সাহিত্যের ব্যবসায় যদি বন্ধ করা সম্ভব হইত, তাহা হইলেই কি রুচি ও রসবোধ উন্নত হইত ? প্রকাশ ও প্রচার অনিবার্য, বিশেষত আজিকার এই সস্তা ছাপাখানার যুগে। বটতলা চিরদিন আছে ও থাকিবে ; আজ যে বটতলাই সাহিত্যের বাজার ছাইয়া ফেলিয়াছে, তার জন্ম দায়ী কাহারো ? তা'ছাড়া, যাহা কিছু পণ্য হইবার উপযোগী তাহার ব্যবসায়ী জুটিবেই। ব্যবসাতে নিকৃষ্ট উৎকৃষ্ট বলিয়া পণ্যের কোনও জাতি নাই—সকল বস্তুরই চাহিদা আছে ; অতএব ব্যবসায়ের ক্ষেত্রে কিছুই অগ্রাহ হইতে পারে না। সাহিত্যও পণ্য হিসাবে নিকৃষ্ট বা উৎকৃষ্ট হইতে পারে না—অর্থাৎ নিকৃষ্ট বলিয়া পণ্যতালিকার বহির্ভূত হইতে পারে না। যাহাকে নিকৃষ্ট সাহিত্য বলা যায় তাহার ব্যবসায় কোন্ দেশে নাই ? ব্যবসায়ীর দোষ কি ?

আমিও সে কথা মানি। তথাপি, মনে হয়, সাহিত্যের ব্যবসাতে শিক্ষিত ধর্মবুদ্ধির প্রয়োজন আছে ; এ ব্যবসায় একটু স্বতন্ত্র। কবিরাজী ঔষধের দোকান খুলিয়া যে কেবল মোদক বিক্রয় করে সে যেমন কবিরাজী ব্যবসায়কেই লোকের চক্ষে হীন করিয়া তোলে—ঔষধের পরিবর্তে নেশার সামগ্রী বিক্রয় করিয়া

মানুষের স্বাস্থ্য নষ্ট করে ; তেমনই, সাহিত্যের ব্যবসায় করিতে বসিয়া যাহারা সস্তা দামে, হৃদয় মলাটে মুড়িয়া, বটতলারও অপাংক্তেয় উচ্চ সামগ্রী বিক্রয় করে, তাহার ব্যবসায়ের নীতিকেও লঙ্ঘন করে। ইহারা যে সাধু ও শিক্ষিত, এক কথায় respectable, এবং যাহা উৎকৃষ্ট তাহাই যে ইহারা সরবরাহ করে,— এমন একটা প্রতিপত্তি বজায় রাখিবার জন্য যাহা-কিছু দরকার, তাহার আয়োজন ইহারা করিয়া থাকে ; একই মার্কা দিয়া খাঁটির সঙ্গে বহুল পরিমাণে ভেজাল চালাইয়া থাকে। আমাদের সাহিত্য আছে, সমালোচনা নাই—দর ঠিক করিয়া দিবার জন্য কোনও ব্যবস্থাপক মণ্ডলী নাই ; বরং, সমালোচনার মালিকও ইহারা—সমালোচনী-পত্রিকাও এই সব ব্যবসাদারের করতলগত। সুবিধা ও সুযোগ থাকিলে, ইহাও বোধ হয় সাংসারিক রীতি বা ব্যবসায়-নীতির বিরোধী নয়। যেখানে বাধ্যতা নাই, সেখানে ধর্মবুদ্ধি থাকিবে কেন ? জনমত যেখানে উদাসীন, সেখানে সর্ববিধ দুর্নীতির উদ্ভব হইয়া থাকে। কিন্তু সুস্থ জনমতও সৃষ্টি করা যায়—সাহিত্যের ব্যবসায়ী যাহারা তাহারাও একাজ করিতে পারে ; তাহাদেরও দায়িত্ব আছে। কাজেই শেষ পর্যন্ত জাতীয়-চরিত্রের কথাই ভাবিতে হয়, দেশের শিক্ষিত সমাজকে স্বীকার করিতেই হয়—“দোষ কারও নয় মা শ্রামা, আমি স্বথাত সলিলে ডুবে মরি।”

এখন উপায় কি ? সাহিত্যের ব্যবসায় চলিবেই ; ছোট ছোট দোকান-গুলিতে সাহিত্যের বাজার ভরিয়া যাইবে ; ক্রেতার অভাব হইবে না। আর কেহ লাভবান না হইলেও কাগজওয়াল, ছাপাখানা ও দপ্তরী—আধুনিক সাহিত্যের এই তিন প্রধান স্রষ্টা—কিছু করিয়া লইবেই। কিন্তু সাহিত্যসেবার কি হইবে ? যাহারা সরস্বতীর আহ্বান সত্যই হৃদয়ের মধ্যে পাইয়াছেন—তঁাহারা কেমন করিয়া তঁাহাদের সাধনাকে জীয়াইয়া রাখিবেন ? আমাদের দেশে যে-সাহিত্যকে লইয়া ব্যবসায় চলিতেছে তাহা সাহিত্য-নামের যোগ্য নয় ; তার কারণ, পয়সা খরচ করিয়া সাহিত্য পড়িবার মত ব্যক্তি আমাদের দেশে খুব বেশী নাই। কবিতার লেখক আছে—পাঠক নাই ; গল্প ও উপন্যাস ছাড়া অন্য কোনও উচ্চাঙ্গের রচনা পছন্দ করিবার মত রুচি, কিম্বা হৃদয় করিবার মত বোধশক্তি যাহাদের আছে তঁাহারা বাংলা-সাহিত্যের মুখাপেক্ষা করেন না। আসল কথা, লিখিতে পড়িতে পারে এমন লোকের সংখ্যা বাড়িয়াছে মাত্র,

এবং তাহাতে সংবাদপত্র-জাতীয় সাহিত্যের এতটা কাঁটতি হইয়াছে যে, ব্যবসায় চলিতে পারে। কিন্তু সাহিত্যের ব্যবসায় চলিবার মত অবস্থা এখনও হয় নাই—যদি হইত, তবে পুস্তকবিক্রেতা ও পত্রিকা-ব্যবসায়ীরা ব্যবসায়-বুদ্ধিকে আরও উদার, এবং ধর্মবুদ্ধিকে আরও সজাগ রাখিতে প্রবৃত্ত হইতেন।

৪

এ অবস্থায়, সাহিত্যের আদর্শ রক্ষা করিতে হইলে, সাহিত্যসেবীকে আত্মোৎসর্গ করিতে হইবে। যাহারা সত্যকার সাহিত্যিক, যাহাদের শক্তি ও সাধনা আছে, তাঁহাদিগকে এখনও কিছুকাল একক অসহায়ভাবে তপস্বী করিতে হইবে। এখনও প্রতিদান বা পুরস্কার আশা করিবার সময় আসে নাই—সাহিত্যজীবী না হইয়া সাহিত্য-সেবী হইতে হইবে। বিদেশের ভদ্র ও উন্নত সাহিত্যিক জীবন দেখিয়া লোভ করিলে কি হইবে? তাহাদের মত সাহিত্য-সেবার মূল্য দাবী করিতে যাওয়াই বিড়ম্বনা। এদেশে এক্ষণে সাহিত্য ও জীবিকা দুইই একসঙ্গে চলিবে না—ইহা নিশ্চিত। যাহারা দাম দিবে তাহারা সাহিত্য চায় না; কাজেই দাম চাহিলে তাহাদের ফরমায়েস মত, ‘রস’-নামে যে আর এক বস্তু আছে তাহাই প্রস্তুত করিতে হইবে। ‘ভুখা-ভগবান’কেই সাহিত্য-দেবতা বলিয়া প্রচার করিতে হইবে—মাসুখের মধ্যে যে নারায়ণ আছেন তাঁহাকে অপদস্থ করিয়া সকলকে স্বদলে আনিবার চেষ্টা করিতে হইবে; নহিলে, সাহিত্য না বাঁচুক, জীবিকার উপায় হইবে না।

কিন্তু বিপদ এই যে, তাহাতেও পেট ভরে না। ধর্ম ত নহেই, অর্থও তাহাতে নাই—আছে কেবল কাম; এবং তাহাতেই শেষে মৃত্যুরূপ মোক্ষ লাভ করা যাইতে পারে। প্রতি মাসে দশটা গল্প ও দুইখানি উপন্যাস লিখিতে পারিলেও সিগারেট-খরচা জুটিবে কিনা সন্দেহ। তাই মাসের পর মাস যেন উর্দ্ধ্বাসে রক্তমুখে সাহিত্যের সঙ্গে জীবিকার পাল্লা চলিয়াছে! স্কুল কলেজে পড়িবার সময় যেটা ছিল সখ, এখন তাহাই প্রাণের দায় হইয়া উঠিয়াছে। যেটুকু শক্তি বা প্রতিভার আভাস এককালে ছিল, খেয়াল-খুসীর অনাচারে ও মিথ্যা-অভিমানের স্বেচ্ছাচারে তাহাকে নষ্ট করিয়া, আলোকের পরিবর্তে আগুনের ফুল্কি ছিটাইয়া, এখন যাহারা চিতাগ্নির বেড়াঙ্গলে বেষ্টিত হইয়াছে

তাহারা আর কি করিবে? সাহিত্যধর্মকে বাহারা হত্যা করিয়াছে, তাহাদের জাতিও গিয়াছে, অন্নও জোটে না। আত্ম-প্রবঞ্চনার চেয়ে বড় প্রবঞ্চনা নাই; সারস্বত সাধনায় সে প্রবঞ্চনার ফল আরও ভীষণ। যদি এতটুকুও সাহিত্যিক বিবেক এত অনাচারের মধ্যে এখনও বাঁচিয়া থাকে, তবে তাহার দংশন-জ্বালা আরও অসহ্য। এই দস্তচক্রময় জীবিকাযন্ত্রের পেষণে মহাপ্রাণী আর্জুনাদ করে, নিজের কাছে কঁাকি চলে না। মূর্খ জনসাধারণকে দুই দণ্ডের আমোদ যোগাইবার জন্ত ব্যবসায়ের যুপকাঠে জানিয়া শুনিয়া আত্মবলিদান করিতে হয়; অতি তুচ্ছ ও ক্ষণজীবী সাহিত্য-জঞ্জাল বৃদ্ধি করিয়া মুখে যতই আত্মগৌরব প্রকাশ করুক না কেন, অন্তর নিশ্চয়ই কাঁদে। বাহারা এককালে ভাল গল্প লিখিতেন, তাঁহাদের সে শক্তি আর নাই; বাহারা হয়ত ভাল কবিতা লিখিতে পারিতেন তাঁহারা তৃতীয় শ্রেণীর গল্প-উপন্যাস লিখিতে শুরু করিয়াছেন। শক্তির এই অপব্যবহার এবং প্রতিভার এই স্বধর্মত্যাগে কার না দুঃখ হয়? আত্মপ্রসাদ বা আত্মতৃপ্তির উপায়ও আর থাকে না; জিজ্ঞাসা করিলে সেই এক কথা—“কি করি, জীবিকাসংগ্রহের জন্ত আত্মবিক্রয় করিতে হয়।”

বাহারা এখনও আধুনিক সাহিত্য-জীবিকার এই কুস্তীপাকে পড়েন নাই, তাঁহাদিগকে সর্বশেষে দুই চারি কথা বলিয়া আমি এ প্রসঙ্গের উপসংহার করিব। আমাদের জাতীয় দুর্বস্থা ক্রমেই বাড়িয়া চলিয়াছে, জীবিকা আরও দুর্লভ হইয়া উঠিতেছে। কিন্তু জীবিকার অনেক পথ এখনও পড়িয়া আছে— দুইটি অন্ন খুঁটিয়া লইবার জন্ত শক্তি ও বুদ্ধিকে হয়ত আরও বেশি পরিমাণে প্রয়োগ করিতে হইবে, অনেক রকমের অভিমান ত্যাগ করিতে হইবে, জীবিকার সন্ধানে জীবনের সঙ্গে আরও ঘনিষ্ঠভাবে পরিচয় করিতে হইবে। কিন্তু সে-পথ সাহিত্য-সেবার পথ নয়; অন্ততঃ এদেশে এখনও সে পথ প্রস্তুত হয় নাই। বাহারা নিতান্তই সাহিত্যের সেবা ত্যাগ করিতে অসমর্থ, তাঁহারা যেন—জীবিকার জন্ত সাহিত্য নয়—সাহিত্যের জন্ত জীবিকা নির্বাচন করেন; যদি দুইই এক সঙ্গে না চলে, এবং নিজেকে বলি দিয়া সাহিত্যকে বাঁচাইবার শক্তি না থাকে, তবে সাহিত্যকেই বিসর্জন দিয়া তাঁহারা যেন জীবিকার উপায় করেন। দুঃখ করিয়া ফল নাই—ইহাই পুরুষোচিত কাজ। যদি সাহিত্যসেবা হইতে বঞ্চিত হইতে হয়—সেও ভাল, তথাপি একরূপ অবস্থায় সাহিত্যকে জীবিকা

করিলে সাহিত্যের কি সেবা করা হইবে ? বরং এমন সেবা না করিলেই সাহিত্যের কল্যাণ হইবে, সৃষ্টি করিতে না পারিলেও—সাহিত্যের আদর্শ-রক্ষায় গৌণভাবেও সাহায্য করা সম্ভব হইবে। আজিকার দুর্দিনে ইহাও একরূপ সাহিত্যধর্মপালন ; কীর্তির গৌরবই একমাত্র গৌরব নয়—অপকীর্তি হইতে আত্মদমন করাও কম কীর্তিকর নহে। অতএব যদি দুঃখ, দুর্গতি ও দারিদ্র্য, উপেক্ষা ও অনাদর সহ করিয়া সাহিত্যের উদ্বোধন করা সকলের সাধ্যায়ত্ত না হয়, সরস্বতীর সেই অভিশাপ-বর বহন করিবার সামর্থ্য সকলের না থাকে—দেবী যদি সেবা চান, অথচ জীবনযাত্রা তাহার অনুকূল না হয়—তবে, মহাকবির সেই অতি-সত্য বাক্য স্মরণ করিয়া সাধনা লাভ করিতে হইবে—“Those also serve who only stand and wait”।

সাহিত্য ও যুগধর্ম

১

জগতে একটা যুগান্তর চলিয়াছে, একথা আমরা সকলে জানি। আমাদের দেশেও সেই যুগান্তরের হাওয়া ক্রমেই প্রবল হইয়া উঠিতেছে, এই তথ্য আমরা প্রতিদিনের জীবন-যাত্রায় মজ্জায় মজ্জায় অনুভব করিতেছি। ব্যাপারটা কিছু আকস্মিক বলিয়া মনে হইলেও, ইহার সূচনা হইয়াছে অনেক আগে,—যেদিন রাজশক্তির মারফতে যুরোপের সঙ্গে আমাদের সম্বন্ধটা পাকা হইয়া গেল। সেই প্রথম ধাক্কাটা আমরা অনেক দিক দিয়া সহিয়া লইতে পারিয়াছিলাম; উনবিংশ শতকের শেষ পর্য্যন্ত আমরা আমাদের ধর্ম, সমাজ ও নানা সংস্কারের সঙ্গে যুরোপীয় ভাব ও চিন্তাধারার একটা আপোস করিয়া মনের ও প্রাণের উপর-তলাটায় নির্বিঘ্নে আত্মপ্রসাদ উপভোগের বন্দোবস্ত করিয়া লইয়াছিলাম। সব জায়গায় কিঞ্চিৎ সংস্কার করিয়া লইয়া—কোথাও দাগরাজী কোথাও বা চুণকাম, কোথাও বড়জোর এক-আধটা খিলান বদলাইয়া—প্রায় নিশ্চিন্ত হইয়া বসিয়াছিলাম। কিন্তু বিংশশতাব্দীর প্রারম্ভ হইতে ভিত নড়িতে আরম্ভ হইল; তারপর গত দশ-পনের বৎসর যাবৎ ব্যাপারটা এমন বেমানান হইয়া উঠিয়াছে যে, হালে আর পানি পাওয়া যায় না; এখন এমন অবস্থা হইয়াছে যে, ভয় ভাবনা করিয়া আর ফল নাই, ‘যাহা হইবার—হইবে’ মনে করিয়া প্রবল শ্রোতের মুখে গা ভাসাইয়া চলিয়াছি। রাষ্ট্র বা সমাজের কথা বলিবার অধিকারী আমি নহি, কিন্তু সাহিত্যে এই যুগধর্ম যে ভাবে আত্ম-প্রকাশ করিবার চেষ্টা করিতেছে তাহার সম্বন্ধে, আমি যাহা চিন্তা করিয়াছি, তাহাই বলিব।

কোন সাহিত্যই দেশকালের প্রভাববর্জিত নয়। সাহিত্যের জন্ম হয় দেশ-কালের গণ্ডির মধ্যে, সেইখান হইতেই তাহার শিকড়গুলি রস সঞ্চয় করে; ফুল মাটির উপরে, এমন কি বহু উচ্চে পৃথক বৃক্ষে ফুটিয়া ওঠে বটে, কিন্তু সকল জাগতিক সৃষ্টির মত তাহার বিকাশ হয় পাঞ্চভৌতিক নিয়মে। তারপর সেই

বিকাশের চরম ভঙ্গীটি দেখিয়া তাহার মূল্য-নিরূপণ হয়। তখন রসিক ব্যক্তির তাহার সৌন্দর্য্য-রসটুকুরই বিচার করেন, এবং সেই রস-রূপটিই তাহার একমাত্র সার্থক লক্ষণ বলিয়া স্বীকার করেন। এই বিচার যথার্থ, ইহার বিরুদ্ধে বলিবার কিছু নাই। কিন্তু তথাপি, দেশকাল এবং জাতি বা সমাজবিশেষের সম্পর্ক তাহার ক্ষয়-বৃদ্ধির মূলে—প্রচ্ছন্ন থাকিলেও বেশ ঘনিষ্ঠ হইয়াই আছে; নির্বিশেষ রসের বিচারে তাহাকে বাদ দিলেও, তাহার উৎপত্তি ও বিকাশধর্মের সঙ্গে এই সকলের একটি নিবিড় যোগ আছে; রসিক-সমাজের রত্নাগারে স্থান পাইবার পূর্বে সাহিত্যকে তাহার কারখানা বা রসশালায় একটা প্রক্রিয়ার ভিতর দিয়া গড়িয়া উঠিতে হয়। এই কার্যকারণতত্ত্ব সাহিত্যের পক্ষেও সমান বলবৎ—জগতের কোন কিছুই স্বয়ম্ভু বা ভূঁইফোড় নহে।

এই কথাটি মনে রাখিয়া আমি বর্তমান যুগের বাংলাসাহিত্য সম্বন্ধে যৎকিঞ্চিৎ আলোচনা করিয়া দেখিতে চাই। এই আলোচনার একদিকে সাহিত্যের শাস্ত্র ও সার্বজনীন আদর্শকেও স্বীকার করিব, আবার তাহার সৃষ্টি ও বিকাশের অন্তরালে যে যুগধর্মের অমোঘ নিয়ম বর্তমান, তাহাকেও অস্বীকার করিব না। বরং, যে-সাহিত্য প্রত্যক্ষ যুগসাহিত্য, যাহার বর্তমানটাই প্রকট—ভবিষ্যৎ পরিণতি এখনও দৃষ্টিগোচর হয় নাই, তাহার বিচারে ওই শেষ দিকের আলোচনাই বিশেষ আবশ্যিক। এ কথা কেহই অস্বীকার করিবে না যে, বর্তমান যুগে আমরা যে-সাহিত্যসৃষ্টির প্রয়াস চারিদিকে লক্ষ্য করিতেছি, তাহা এখনও খুবই কাঁচা; তাহাতে যেটুকু রং ধরিয়াছে, তাহা রৌদ্রপকের রং। এ সাহিত্য এখনও সাহিত্যহিসাবে আলোচনার যোগ্য হয় নাই বটে, তথাপি ইহার মধ্যে এমন একটি প্রবৃত্তি স্পষ্ট হইয়া উঠিয়াছে, যাহাকে, আর কিছু না হোক, একটা নূতনতর কালের ঈঙ্গিত বলিয়া মনে করা অগ্রায় নয়। এই সকল লক্ষণ হয়ত খুব বাহ্যিক ও ক্ষণিক, হয়ত অল্পকালের মধ্যেই গভীর-তর স্থায়ী লক্ষণ প্রকাশ হইয়া পড়িবে—তথাপি, ইহাকে আর উপেক্ষা করা যায় না। ইতিমধ্যেই এইগুলিকে লক্ষ্য করিয়া সাহিত্য-সমাজের নানা পাড়ায় নানা রকমের দুর্দান্ত আলোচনা আরম্ভ হইয়াছে, এবং সেই আলোচনায় সাহিত্যের নিত্যস্বরূপ সম্বন্ধে নিদাক্ষণ সংশয়ের সৃষ্টি হইতেছে। একটি ঘূর্ণী-পাকের মধ্যে হাবুডুবু খাইতে থাকিলে কোন কল্যাণই হইবে না; সৃষ্টির চেয়ে

অন্যসৃষ্টিই বাড়িয়া যাইবে, এবং যে যুগান্তর অনিবার্য তাহাকে ঠেকাইয়া রাখিতে গিয়া মিছামিছি শক্তিকর করা হইবে।

কিছুকাল পূর্বে আমি 'নব্যভারত'-পত্রিকায় 'আধুনিক-সাহিত্য' নাম দিয়া কয়েকটি প্রবন্ধ লিখিয়াছিলাম। সেগুলিতে একটি কথা আমি খুব স্পষ্ট করিয়া বলিতে চাহিয়াছিলাম, তাহা এই যে, বাংলাসাহিত্যে একটা যুগের অবসান হইয়াছে, ইংরাজী আমলের প্রথম যুগের যে সাহিত্য তাহার প্রবৃত্তি রবীন্দ্রনাথ পর্যন্ত পৌঁছিয়া নিঃশেষ হইয়া গিয়াছে; সে ছিল চিত্ত-চমৎকার ও কল্পনা-বিলাসের যুগ। সে যুগে আমরা লাভ করিয়াছি—এক অভিনব সাহিত্যকলা, কাব্যসৃষ্টির উন্নত আদর্শ, ও তাহার উপযোগী ভাষা। সে যুগের যাহা সত্যকার প্রেরণা ছিল তাহার ফসলও পর্যাপ্ত পরিমাণে ফলিয়াছে। বর্তমানে সে প্রবৃত্তি ক্রান্ত অবসন্ন হইয়া একটা নূতনতর চেতনার সংঘর্ষে প্রায় লুপ্ত হইয়া আসিয়াছে; এবং একটা নূতন ভাব-সত্যকে আশ্রয় করিবার জন্ম আজিকার সাহিত্যবুদ্ধি অধীর হইয়া উঠিয়াছে। এই নূতন ভাব-সত্য যে কি তাহা আমি 'নব্যভারতের' প্রবন্ধে বিশদভাবে বলিবার চেষ্টা করিয়াছিলাম, এইখানে তাহার পুনরাবৃত্তি করিব না; আশা করি, বর্তমান আলোচনায় তাহা স্বতঃই স্পষ্ট হইয়া উঠিবে।

সেকালে, ইংরাজী শিক্ষার প্রথম আক্রমণে সমাজ ও ব্যক্তি-জীবনে যে সংঘর্ষ উপস্থিত হইয়াছিল তাহা মুখ্যতঃ ভাবপ্রধান। সর্বত্র একটা আদর্শ-নির্গয়ের ব্যাকুলতা, নূতনের সঙ্গে পুরাতনের সামঞ্জস্য-চেষ্টা, এবং নৈতিক ও রাষ্ট্রীয় আত্মসম্মান পুনঃপ্রতিষ্ঠার অসীম আগ্রহ—ইহাই ছিল সে যুগের প্রধান প্রবৃত্তি। সে যুগে বাস্তব জীবন অনেকটা স্বচ্ছন্দ ও নিশ্চিন্ত ছিল—জীব-জীবনের গভীরতম চেতনা, নিপীড়িত প্রাণধর্মের আর্তনাদ, দেহ-দুঃখ,—এ সকল সেদিন এমন জাগিয়া উঠে নাই। তাই সে-যুগের প্রতিভা ও মনীষা শাশ্বত সত্য-সুন্দরের মন্দির গড়িতেই ব্যস্ত ছিল, পদ-নিয়ের যুক্তিকা এবং নিতাস্ত প্রত্যক্ষ ও বাস্তব দেহটিকে ভাল করিয়া বুঝিয়া দেখিবার প্রয়োজন সেদিন হয় নাই। কিন্তু সহসা যুগান্তর উপস্থিত হইল, নানা প্রত্যাশিত ও অপ্রত্যাশিত ঘটনা-পরস্পরায় জগতের সঙ্গে সঙ্গে আমাদের দেশও শুকাইয়া কাঠ হইয়া উঠিল; রস আর বাহিরে কোথাও রহিল না, নিজের বাস্তব দেহমনকে নিংড়াইয়া যতটুকু পাওয়া যায় তাহাও তিক্ত ও বিষাদ হইয়া উঠিয়াছে,—দেহ সাদা দিয়াছে, কিন্তু সে

দেহ অতিশয় দুর্বল ও রুগ্ন। তাহার ফলে আজিকার সাহিত্যের যে রূপ দাঁড়াইয়াছে, তাহা সকলেই প্রত্যক্ষ করিতেছেন।

২

যুগান্তরের সঙ্গে সঙ্গে আদর্শের পরিবর্তন হইবে—ইহা স্বাভাবিক। বাস্তব জীবনের ক্ষেত্রে যাহা সত্য, তাহাকে অবহেলা করিলে সাহিত্য-প্রেরণা মিথ্যা হইয়া যায়। যিনি সাহিত্য সৃষ্টি করিবেন, তিনি দেশকালকে উপেক্ষা করিয়া যত বড় কল্পনাকেই আশ্রয় করুন না কেন, তাহা জীবন্ত বা প্রাণময় হইবে না। সত্যকে আমরা দেশকালের প্রত্যক্ষ রূপের মধ্যেই উপলব্ধি করি—সেই প্রত্যক্ষ অনুভূতিই প্রতিভার শক্তি-বলে শাস্বত ও সার্বজনীন হইয়া উঠে। আমাদের দেশেও যুগান্তরের সঙ্গে সঙ্গে সত্যের রূপটি পরিবর্তিত হইয়াছে। গত-যুগে তাহাকে যে-ভাবে এবং যে-রূপে ধারণা করিতে চাহিয়াছিলাম, আজ আর তাহাকে ঠিক তেমন ভাবে সন্ধান করিতে গেলে তাহার নাগাল পাইব না, সে যুগের আশা-আকাঙ্ক্ষার সঙ্গে এযুগের আশা-আকাঙ্ক্ষার মিল নাই—তাই সে যুগের সাধনমন্ত্র এ যুগে অচল। যাহারা সাহিত্যের সম্পর্কে এই যুগধর্মকে স্বীকার করেন না, তাঁহারা একালের এই আদর্শ-বিপর্যয়, চিত্ত-বিক্ষেপ ও দ্বন্দ্ব-সংশয়ের মধ্যে দিশাহারা হইবেন—যাহারা রসিক তাঁহারাও নূতন পানপাত্রকে সন্দেহের চক্ষে দেখিবেন, কারণ, অভ্যাস জিনিষটি রসিকের পক্ষেও সমান অন্তরায়—রসিকও যে মানুষ।

আমি এই যুগধর্ম মানি। কিন্তু এই নব্যযুগের প্রারম্ভেই সাহিত্যের অঙ্ক-হাতে যাহা সৃষ্টি হইতেছে তাহাতে আশান্বিত হইতে পারি নাই, বরং যথেষ্ট শঙ্কিত হইতেছি। একথা আমিও বুঝি যে, এই নব্য-সাহিত্য সবেমাত্র জন্ম লাভ করিয়াছে, ইহা সাবালক হইতে এখনও অনেক দেরী। এ যাবৎ এই সাহিত্য-রচনায় যে প্রবৃত্তি প্রকট হইয়াছে, তাহাতে কোন ধর্মেরই লক্ষণ নাই; এখনও তাহা সজ্ঞান সপ্রতিভ নয়; এখনও তাহার ভাষা ও প্রকাশভঙ্গী, form বা রূপ, নির্দিষ্ট হইয়া উঠে নাই। কেবল একটা বালমূলভ উত্তেজনা ও অক্ষুট ভাব-বিদ্রোহ ক্রমেই প্রসার লাভ করিতেছে। তাহাতেও বালকোচিত স্ফুর্তি ও স্বাস্থ্যের একান্ত অভাব। এই আধুনিক সাহিত্য-কর্মীগণ ‘তরুণ’, ‘সবুজ’

বলিয়া আপনাদিগের নামকরণ করিয়াছেন। কিন্তু তারুণ্য ও চির-হরিতের যে গুণ ও সত্য অর্থ আছে সে অর্থে তাঁহারা এই পদবীর উপযুক্ত নহেন; বরং তাঁহাদের কীর্তির তুলনায়, ওই শব্দদুইটির অর্থ একটু হাস্যকর হইয়া পড়ে। যদি বয়সের নবীনত্ব বা দেহের যৌবনই একমাত্র দাবী হয়, তবে সেই দাবী পশু-পক্ষীরও আছে, এবং সর্বকালে সর্বজীবেরই একটা কচি ও কাঁচা অবস্থা থাকে। যদি ওই তারুণ্যটুকুই একমাত্র সম্বল হয়, তবে তাহা হইতে অন্ততঃ সাহিত্যের সৃষ্টিশালায় তাঁহাদের নিকট হইতে বেশী কিছু আশা করা যায় না। যৌবনই বিধাতার শ্রেষ্ঠ আশীর্বাদ, জীবনের শ্রেষ্ঠ কীর্তির অন্তকূল; কিন্তু যে যৌবন বিশ্বগ্রাস করিবার জন্ত শক্তি সঞ্চয় করে না, যাহার সাধনা বা তপস্যা নাই, যে-যৌবন সত্যের জন্ত কঠোর কৃচ্ছসাধন করে না—দুঃখ যাহার বিলাসমাত্র, স্থলভ-মতবাদ ও সহজপাঠ্য নিকৃষ্ট সাহিত্য যাহার কৃত্রিম কল্পনার আশ্রয়, অতিশয় অলস ও দুর্বল মস্তিষ্কের ভাবোন্মাদ এবং কালি-কলমই যাহার সাহিত্য-রচনার একমাত্র উপকরণ—সেই যৌবন সাহিত্যের কোন্ কাজে লাগিবে? সবুজ রংটি খুব সুন্দর, তাহার সঙ্গে যে সকল ভাব মনে আসে তাহাও উপাদেয়; কিন্তু পুকুরের পানাও ত সবুজ, কোন কোন সাপের রং সবুজ—সবুজ বলিয়া গর্ব করিবার সময়ে এই কথাটিও মনে রাখিতে হইবে। বস্তুতঃ তারুণ বলিয়া বা সবুজ বলিয়া প্রবীণদের সঙ্গে ঝগড়া করিলেই সাহিত্যের উপকার হইবে না। তারুণ্য বা adolescence জীবধর্ম বটে, তাহার সঙ্গে সাহিত্য-প্রতিভার কোন স্থনিশ্চিত কার্য-কারণ সম্বন্ধ নাই।

আমি প্রথমেই বলিয়াছি যে, নূতনকে বরণ করিয়া লইতে আমার কিছুমাত্র দ্বিধা নাই; বরং পুরাতনের আসন টলিয়াছে, এবং সেই আসনে নূতনের আবির্ভাব যে আসন্ন হইয়া উঠিয়াছে—এ বিশ্বাস আমি করি। যাহার প্রতিষ্ঠার লক্ষণ এখনও দেখিতে পাইতেছি না, তাহার সূচনা লক্ষ্য করিয়াছি বলিয়াই আজ এই আলোচনায় প্রবৃত্ত হইয়াছি। আমি সাহিত্য-কর্পোরেশনের স্বাস্থ্যরক্ষক ডাক্তার নই, টিলা পায়াজামাধারী সিগারদংশী অভিজাত-সাহিত্যের dilettante-ও আমি নহি। সাহিত্য-বৃক্ষের মূল হইতে তাহার শাখার ফুলটি পর্যন্ত সমস্ত বিকাশধারাকে আমি সমান শ্রদ্ধার চক্ষে দেখি; বরং ওই শিকড়গুলিকেই খুব ভাল করিয়া বুঝিয়া দেখিবার আগ্রহ আমার আছে—কেবলমাত্র ফুলের

জ্ঞান লইয়া গাছটাকে অবহেলা করিবার প্রবৃত্তি আমার নাই। তাই রসবিচারে Aesthetics-এর বা রসশাস্ত্রের দাবীও যেমন মানি, তেমনই সেই রসসৃষ্টির গভীর রসাতলের সন্ধানও রাখিতে চাই। আমি বিশ্বাস করি, এই ভবিষ্যৎ সাহিত্য একটু স্বতন্ত্র হইবে, সেই সাহিত্য পুষ্টি লাভ করিবে জীবনের আর এক ক্ষেত্র হইতে। যেমন প্রত্যেক কবির কল্পনায় একটা স্বাতন্ত্র্য আছে,—এই স্বাতন্ত্র্য যাহার যত বেশী তাহার প্রতিভাও তত মৌলিক, এবং এই স্বাতন্ত্র্য নির্বিশেষ রসসৃষ্টির পক্ষে বাধা না হইয়া, তাহার প্রকৃত সহায়—তেমনই, প্রত্যেক যুগের একটা বিশিষ্ট প্রেরণা আছে; যদি সে প্রেরণা সাহিত্যসৃষ্টির প্রতিকূল না হয়, তবে তাহা হইতে যে সাহিত্যের জন্ম হয়, যুগবৈশিষ্ট্যসঙ্গেও তাহা সর্বকালের সাহিত্য হইয়া উঠে। মানুষের প্রাণের মধ্যে সত্যকার সাড়া না জাগিলে কোন সত্যবস্তুর জন্ম হয় না, এই সাড়া জাগে বাস্তবজীবন ও পারিপার্শ্বিক অবস্থার তাড়নায়। সাহিত্যও শুধু রস-রূপের ধ্যান নয়—তাহা দেহচেতনাহীন আত্মার আনন্দ-গান নয়; অতি নিবিড় ও গভীর দেহ-চেতনাই সাহিত্যের জন্মহেতু। সেই চেতনা দেহকে অতিক্রম করে বটে, তথাপি দেহের ভিতর দিয়াই তাহার জন্ম হয়। নিছক মনঃকল্পিত কোন বস্তুই মানুষের জীবনের সত্য হইতে পারে না; তাই যেখানেই সেই রকম কিছু দেখি তাহাকেই কৃত্রিম বলিয়া মনের মধ্যে একটা অশ্রদ্ধা জাগে। এই বাস্তব-ভিত্তি যতই প্রচ্ছন্ন হোক—যাহা প্রকৃত সাহিত্য তাহার মূলে ইহা থাকিবেই; না থাকিলে সাহিত্য যে কি করিয়া সম্ভব হয়, তাহা বোঝা কঠিন।

এখন প্রশ্ন এই—এ যুগের সেই বাস্তব-প্রেরণা কি? তাহা এখনও খুব প্রত্যক্ষ হইয়া উঠে নাই সত্য, তথাপি তাহা আমরা নানা দিক দিয়া অনুভব করিতেছি। রাষ্ট্রে ও সমাজ-জীবনে তাহার আভাস যতটুকু স্পষ্ট, এ যুগের সাহিত্য-সাধনায় তাহা এখনও তত স্পর্শিত হইয়া উঠে নাই। এ কথাও মনে রাখিতে হইবে যে, যুগ-ধর্মের সঙ্গে সাহিত্য-ধর্মের বিরোধ ঘটিতেও পারে—যে যুগে এইরূপ বিরোধ ঘটে, সে যুগে সাহিত্য ভাল করিয়া গড়িয়া উঠিতে পারে না। যে অবস্থার গুণে বাংলা-সাহিত্য এতদিন এমন অবাধে পরিপুষ্ট হইয়া উঠিয়াছিল, আদর্শবাদ ও ভাবুকতার এমন আশ্চর্য ফসল ফলিয়াছিল—সে অবস্থা আর নাই; তথাপি অল্প কারণে আমরা আর একটা সাহিত্যের পত্তন এই যুগেও আশা করিতে

পারি। বর্তমানে অনেক দিকে আমাদের স্বপ্ন-ভঙ্গ হইয়াছে, আমরা এখন এমন এক প্রকার বাস্তবের সম্মুখীন হইয়াছি, যাহা আমাদের দেহ-চেতনাকে অতি-মাত্রায় প্রবুদ্ধ করিয়াছে—সত্যের আরেক রূপ অদ্ভুত অপ্ৰত্যাশিত মূর্তিতে প্রকাশিত হইয়া আমাদেরকে যেমন ভয়ব্যাকুল, তেমনই বিস্ময়-বিহ্বল করিয়া তুলিয়াছে। নিছক আদর্শবাদ মনকে এখনও মুগ্ধ করিয়া থাকে, কিন্তু প্রাণে তেমন সাড়া জাগায় না। একটা নূতন ক্ষুধা, নূতন বেদনারসের আনন্দ আমাদের চিত্তকে অধিকার করিয়াছে। কিন্তু সেই অনুভূতি এখনও সাহিত্যের প্রেরণা হইয়া উঠে নাই। তার কারণ, কেবলমাত্র অনুভূতি হইলেই হইবে না—সাহিত্যসৃষ্টির জ্ঞান প্রতিভার প্রয়োজন। মানুষ যে শক্তিবলে বন্ধনের মধ্যেই মুক্তির আনন্দ আনন্দন করে—সেই শক্তি বাণীর প্রসাদযুক্ত হইলে কবি-প্রতিভায় পরিণত হয়। আমি রসতত্ত্বের আলোচনা এখানে করিব না, করিয়া কোন লাভ নাই। ‘রস’কে ইচ্ছিতে আভাসে নির্দেশ করা যায়—উহা অনির্বাচনীয়। আমার বক্তব্য এই যে, যুগধর্ম-বশে সাহিত্যের উপাদান, বা প্রাণস্পন্দনের রীতি যেমনই হোক—কোন যুগের বস্তুসম্পদকে রসসম্পদে পরিণত করিতে হইলে কেবল দরদী হইলেই চলিবে না, চাই সেই প্রতিভা—যাহা যুগ বিশেষের সম্পত্তি নহে, সকল যুগের পক্ষেই এক, চাই সেই প্রাণশক্তি, প্রজ্ঞা ও কল্পনা। কতকগুলি মত বা যুক্তির দোহাই দিলে হইবে না, কোনও নজীরের জোরেই যাহা কাব্য নহে তাহাকে কাব্য বলিয়া প্রমাণ করা যায় না। প্রত্যেক সাহিত্য-কীর্তি ভাবে ও প্রকাশরীতিতে স্বতন্ত্র, তাহার প্রমাণ তাহাতেই মিলিবে; অলঙ্কারশাস্ত্রও তাহার প্রমাণ নহে, ইতিহাসও তাহার প্রমাণ নয়; কারণ, সাহিত্যের মূলপ্রবৃত্তি ‘নিয়তিকৃতনিয়ম-রহিত’; তাহার বহিরঙ্গে যে কালের যে চিহ্নই থাকুক, তাহার মর্ম-কোরকের রূপটি স্বয়ম্ভ্রভ ও স্বয়ংপ্রকাশ। আমাদের জীবনে যে নূতন দেহ-চেতনার সাড়া জাগিয়াছে, যে আদর্শ-পরিবর্তনের লক্ষণ বাহিরে প্রত্যক্ষ করিতেছি, তাহার সাড়া সাহিত্যের মধ্যে এখনও সত্যকার সৃষ্টিশক্তি হইয়া দাঁড়ায় নাই।

তরুণের দল যাহাকে সাহিত্য বলিয়া প্রচার করিতেছেন, তাহার ভাবে ও ভাষায়, এই প্রতিভার কোন লক্ষণ নাই—আছে কেবল দুর্বলের চিত্তদাহ, অজ্ঞানের দুঃসাহস—কিছু-না-মানার বাহাদুরী। তাহার কল্লোল যতখানি, ততখানি সে গভীর নয়। তাহাতে আশ্চর্য্য হইবার কোন কারণ নাই; সে সাহিত্য যদি

তরুণের সাহিত্য হয়, তবে তাহার নিকট ইহার অধিক কি আশা করিবার আছে? পূর্বে অভিভাবকের শাসন প্রবল ছিল, এখন তাহা নাই বলিলেই চলে; বরং অভিভাবক-বয়সীরা হঠাৎ কি ভাবিয়া ইহাদের সঙ্গে যোগদান করিয়া নিজেদের বিগত ও বিশ্বৃত যৌবনের রোমন্থন আরম্ভ করিয়াছেন। সস্তা ছাপাখানা, পাঠক-পাঠিকার অত্যধিক সংখ্যা বৃদ্ধি, এবং ব্যবসাদারী পত্রিকা—একদিকে এই তিন যুগ-মহিমা, অপর দিকে—অনাহার ও অস্বাস্থ্য, সামাজিক ও রাষ্ট্রীয় দুর্দশা, এবং গত ১৫।২০ বৎসর যাবৎ বাংলা দেশের স্কুল কলেজে শিক্ষাদানের অবনতি, এই সকল কারণে বাঙালীর মনঃপ্রকৃতি দুর্বল হইয়া পড়িয়াছে—সাধারণ শিক্ষার বিস্তার হইলেও ‘কাল্চার’ অতিশয় ক্ষুণ্ণ হইয়াছে। তাই সাহিত্যের আসরে যুবক বৃদ্ধ সকলে মিলিয়া একটা ‘বোল্ হরিবোল্’ আরম্ভ করিয়াছে। একদল বলিতেছেন, লেখাতে অধিকার সকলের আছে, বিশেষতঃ যুবকদিগের তাহা ত’ জন্মগত সংস্কার—লেখার মধ্যে অজস্রতা ও অবাধ অসংশয় স্বেচ্ছাচার-ই প্রাণের লক্ষণ। অতএব মার্ভে! কাহারও কথায় কর্ণপাত করিও না, আমরা আছি; আমাদের বয়স বিদ্যাবুদ্ধি অনেকের চেয়ে বেশী, অথচ প্রাণ তোমাদেরই মত ‘সবুজ’—‘সবুজ’ কথাটি ত আমাদেরই আবিষ্কার, যৌবনের জয়যাত্রার বাজনা ত আমরাই প্রথমে আরম্ভ করিয়াছিলাম। আরেক পক্ষ সাহিত্য-সৃষ্টির কোনও ধারই ধারেন না—কেবল শাসনটাই জানেন; ও জিনিষটা তাঁহাদের নিকট শুকনা হরীতকী—আহারান্তে চর্কণীয়; মাত্রা বেশী হইলেও বিপদ আছে। একদিকে ড্রয়িংরুমবিহারী dilettante, অপরদিকে অশ্বখবৃক্ষবাসী জরদগব—এই দুয়ের মধ্য পড়িয়া সাহিত্য খাবি খাইতেছে।

৩

এই গণ্ডগোল কাণে উঠায় স্বয়ং রবীন্দ্রনাথ এইবার শাস্তিমন্ত্র উচ্চারণ করিয়াছেন। তিনি, সাহিত্য-ধর্ম কি, সাহিত্যের শাস্ত আদর্শ কি, তাহারই আলোচনা করিয়াছেন। সেই আলোচনা তিনি বহুবার বহু প্রবন্ধে করিয়াছেন—যাঁহারা সাহিত্যরসিক ও পণ্ডিত তাঁহাদিগকে সে কথা না বলিলেও চলে। কিন্তু শিক্ষা ও সাধনা-বিমুখ, প্রাণধর্মের নামে রিপূর উপাসক, অতি দুর্বল ও বিকৃত-মস্তিষ্ক তরুণ ও প্রবীণের দল, অর্ধশিক্ষিত ও অশিক্ষিত পাঠক-

সমাজের উৎসাহে যে শিবের গাজন আরম্ভ করিয়াছে, তাহাতে গুরুমন্ত্রের প্রয়োজন নাই—সকলেই গলায় 'পাটা' পরিয়া মহা মহা সাধক হইয়া উঠিয়াছে। রবীন্দ্রনাথের উপদেশে বা কশাঘাতে যে কোন ফল হইবে না, তাহার অন্য কারণ আছে। রবীন্দ্রনাথ সাহিত্য-ধর্মেরই ব্যাখ্যা করিয়াছেন, সাহিত্য-প্রকৃতির আলোচনা করেন নাই। কিন্তু কেবলমাত্র Aesthetics বা রসতত্ত্বের মূল সূত্রটির আলোচনা করিলে সাহিত্যের বহিরঙ্গটি মূল্যহীন হইয়া পড়ে। যে বাস্তব উপাদানকে আমি সকল সাহিত্য-কীর্তির মূলভিত্তি বলিয়াছি, যাহার সঙ্গে দেহ-মনের ঘনিষ্ঠ পরিচয় না হইলে, পূর্ণপ্রেরণা-সঞ্চার হয় না, তাহাকে উপেক্ষা করিয়া একেবারে রসতত্ত্বে আরোহণ করিলে দেহধর্মী মন নিরাশ্রয় হইয়া পড়ে। রবীন্দ্রনাথ যে শাসন জারী করিয়াছেন, তাহা অবশ্য তাঁহার উপযুক্ত হইয়াছে— তিনি ব্যতীত সত্য কথা তেমন করিয়া বলিবার শক্তি আর কাহারও নাই। সে আদর্শ হইতে কোন যুগের সাহিত্যই এতটুকু বিচলিত হইতে পারে না, এ কথা মানি। কিন্তু কথাটা আধুনিক সাহিত্যের পন্থানির্দেশের পক্ষে আর একটু বিশদ ও সবিশেষ হইলে ভাল হইত। বোধ হয়, তাহা রবীন্দ্রনাথের নিকটে আশা করাও যায় না। তিনি তত্ত্ব বা শাস্ত্রহিসাবে কিছু বলেন নাই, নিজেরই অলোকসামান্য কবিধর্মের মর্মকথাটি খুব স্পষ্ট করিয়া সংক্ষেপে জানাইয়াছেন। ইহা লইয়া তর্ক চলে না। একদিকে কথাটি খুবই সত্য, তদুপরি তাহা আবার অত-বড় কবির জীবনব্যাপী সাধনার উপলক্ষি। ওকালতি-বুদ্ধি বা নৈয়ায়িক বিচার সাহায্যে তাঁহার কথার ছল ধরিয়া—ভ্রম প্রতিপাদন করিতে যাওয়া—শুধু যে পণ্ড্রম তাহা নয়, নিতান্তই হানুসকর। তাঁহার বক্তব্যের মূল মর্ম, যে-কোন রসিক ব্যক্তি বিনা প্রমাণে হৃদয়ঙ্গম করিবেন।

কিন্তু একটু গোল হইয়াছে। তিনি উপাদানের কথাটি অনেকখানি করিয়া বলিয়াছেন এবং তাহার নির্বাচন-নীতিরও উল্লেখ করিয়াছেন। নিম্নতর জীব-ধর্মের প্রয়োজন রসবোধের অল্পকূল নহে, এ কথা সত্য; কিন্তু মানুষের অল্পভূতি-মার্গে বিশ্বের প্রবেশাধিকার আছে, কোন বস্তুই সেখানে অগ্রাহ্য নয়। সেই অল্পভূতিই—রসবোধের না হোক—রসকল্পনার মূল-প্রেরণা, একথা বলিলে রসতত্ত্বের হানি হয় না। গাছের মাথায় উঠিয়া শিকড়কে অস্বীকার করিলে চলে কি? তাহার দোষ হয় এই যে—মাটির কথাটা মনেই থাকে না। ফুল ফুটিল না,

গাছ কাটিয়া দাও,—আপত্তি নাই ; তাহা মালীর দোষ হইতে পারে, গাছেরও দোষ হইতে পারে ; কিন্তু সেজন্য মাটির সীমানা নির্দিষ্ট করিয়া দিলে চলিবে না, সকল জায়গার মাটিই চাষ করিয়া দেখিতে হইবে। রবীন্দ্রনাথের মতে, এক রকমের বাছাই-করা সাহিত্যের একটি বিশেষ ধর্ম ; এই বাছাই-করায় কোনও 'বস্তু'র খোঁচা নাই, অর্থাৎ প্রয়োজনের তাড়না নাই—ইহা আমার আত্মার অতি সহজ স্বাধীন আনন্দ-বোধের পছন্দ। কিন্তু সেজন্য নির্বাচনের প্রয়োজন কি ? সে ধর্ম ত বস্তুগত নহে, তাহা রসিকের আত্মগত। প্রয়োজন-বোধও আত্মগত, বস্তুগত নয় ; সাধারণ জীবধর্মে যে বস্তুটির অতিশয় প্রয়োজন—ব্যক্তিবিশেষের রস-কল্পনায় সেই বস্তুই প্রয়োজনাতীত—অতএব সুন্দর হইয়া উঠিতে পারে। 'আত্মকল্পনায়' যদি 'সং' হয়, তাহা হইলে আত্মার আনন্দবোধের কোথাও বাধা থাকিতে পারে না,—যদি আমার সেই আত্মীয়তা-শক্তি থাকে। কিন্তু আরও একটু মুঞ্চিল হইয়াছে। জীবধর্ম ও প্রয়োজনের কথা তিনি যে ভাবে বলিয়াছেন, তাহাতে প্রশ্ন উঠে—আত্মার আনন্দবোধ কি দেহ-তাড়নাকে একেবারে বাদ দিয়া ? না, দেহ-চেতনার ভিতর দিয়াই,—তাহাকে অতিক্রম করিয়া ? এই কথাটি স্পষ্ট হওয়া দরকার। কারণ, রবীন্দ্রনাথের কাব্য-প্রকৃতির যে পরিচয় আমরা পাই, তাহাতে দেহঘটিত কোন ব্যাপারই তাঁহার কল্পনায় এক মুহূর্তের জন্য আত্মার সঙ্গে বিরোধ করিয়া থাকিতে পারে না, তাঁহার অপূর্ব প্রতিভায় সে তন্মুহূর্তেই আত্মার দ্বারা পরাজিত হইয়া শাস্বত সৌন্দর্যলোকে দীপ্তি লাভ করে। তিনি ভারতীয় ঋষির আনন্দবাদকে বাংলাকাব্যে পূর্ণ প্রতিষ্ঠিত করিয়াছেন। কিন্তু এই অদ্বৈতবাদ যত সত্য হোক, সাধারণ মানুষ কখনও ইহাকে প্রাণের মধ্যে স্বীকার করিবে না ; কারণ, এত বড় প্রজ্ঞা ও কল্পনাশক্তি মানবসাধারণের—তত্ত্বগত অধিকার হইলেও—বস্তুগত অধিকার নহে। সাহিত্য এই আনন্দবাদে পৌঁছিতে না পারিলেও তাহা উপাদেয় হইতে পারে, জগৎ-সাহিত্যের অনেক উৎকৃষ্ট কাব্য তাহার প্রমাণ। অনেক উৎকৃষ্ট ট্রাজেডি, এই বাস্তব-দুঃখ ও দেহ-চেতনার উপরেই প্রতিষ্ঠিত। কবির নির্লিপ্ত চিত্তের কল্পনাশক্তিই তাহা হইতে রস সৃষ্টি করিয়াছে বটে, কিন্তু তাহার উপাদান হইয়াছে অতি তীক্ষ্ণ দেহ-চেতনা, বহিঃপ্রকৃতির সঙ্গে মানবাত্মার নানাধরণের বিরোধ—সে যুদ্ধক্ষেত্র যত বড়ই হউক, এবং সে যুদ্ধ-ঘোষণা যত উচ্চভাবেরই হউক। প্রয়োজন অপ্রয়োজনের কথা স্রষ্টার মনের

কথা—বাহিরের কথা নহে ; শেক্সপীয়ার তাঁহার নাটকের Villain-গুলিকে চাবুক মারিবার তাড়নায় সৃষ্টি করেন নাই, একথা সত্য ; তাঁহার মনে সেই গায়-অগায় প্রভৃতি সামাজিক নীতির তাড়না নিশ্চয় ছিল না,—ছিল কেবল সেগুলিকে সৃষ্টি করার আনন্দ । কিন্তু এমন কথা যদি কেহ গোড়াতেই বলিয়া বসেন যে, ওই রকম চরিত্র আমাদের বাস্তবজীবনের উপদ্রব, আমাদের জীব-ধর্মের স্বাচ্ছন্দ্যবোধের সঙ্গে তাহার একটা বিরোধ রহিয়াছে, অতএব উহা রস-সৃষ্টির অনুকূল নহে—তবে কথাটা বড় অস্পষ্ট হইয়া পড়ে । অতএব দেখা যাইতেছে—রসসৃষ্টির উপাদান ও রসবোধের নিয়ম, এই দুয়ের সামঞ্জস্য হয় কবির প্রতিভায় । কবির চারিদিক হইতে খোঁচা দেয় বলিয়া, আর পদ্য সেই প্রত্যক্ষ দেহানুভূতির অনেক বাহিরে বলিয়াই যে, এই দুইয়ের মধ্যে সাহিত্যিক উপাদান-হিসাবে একটা স্পষ্ট প্রভেদ আছে—এমন কথা বলিলে, রসতত্ত্বের হানি হয় না বটে, কিন্তু রসসৃষ্টির গোড়ার কথায় একটু গোল বাধে । এই রসসৃষ্টির প্রসঙ্গে আমাদের দেশে একটি প্রাচীন উপমা চলিয়া আসিতেছে । একখানা শুষ্ক অস্থি-খণ্ড চর্ষণ করিয়া আপনারই মুখনিঃসৃত রক্তে যখন সেইখানি বেশ সিক্ত হইয়া উঠে, তখন কুকুর সেইটিকে সেই অস্থির রস মনে করিয়া পরমানন্দে উপভোগ করে । এই শুষ্ক হাড়ের সঙ্গে তাহার জিহ্বা ও মুখগহ্বরের ঘনিষ্ঠ পরিচয়—সেই কঠিন ঘর্ষণই—এখানে রসসৃষ্টির কারণ । উপমাটি সার্থক উপমা বটে । বাহিরের ওই হাড়খানার মধ্যে রস নাই, রসটা আসিতেছে কুকুরের নিজের মুখ হইতেই—কিন্তু ওই হাড়খানাও দরকার,—এমন কি, তাহার দ্বারা মুখটি ক্ষত হওয়ারও প্রয়োজন আছে !

মূল রসতত্ত্বের আলোচনায় Realism বা Idealism প্রভৃতি নামকরণের কোনও সার্থকতা নাই—কোনও কাব্যই একেবারে Real বা একেবারে Ideal হইতে পারে না । তবে যদি স্থূলভাবে কবি-কর্মের বিশিষ্ট লক্ষণ বুঝিয়া লইবার বা বুঝাইয়া দিবার জন্য একটা ভেদ নির্দেশ করা আবশ্যিক হয়, তবে একথা বলিলে দোষ হয় না যে, আমাদের সাহিত্যে এ-যাবৎ কাল Idealism-ই প্রবল হইয়া আসিয়াছে ; তন্মধ্যে আবার রবীন্দ্রনাথের Idealism যে কত বড়, কত গূঢ় ও গভীর—তাহা বিশেষ করিয়া ধারণা করা চাই । এত বড় সজ্ঞান ও শক্তিশালী Idealist কোন যুগের কোন সাহিত্যে আছে কিনা সন্দেহ । তাঁহার সেই অতি-

প্রবল ও একান্ত বস্তুভেদী কল্পনায়, বাস্তব তাহার যতকিছু বাস্তবতা লইয়াই রূপান্তরিত হইয়া গেছে। প্রয়োজন বা দেহ-তাড়নাকে তিনি কখনও তাঁহার কল্পনায় ভাল করিয়া আমল দেন নাই; এদিক দিয়া মানুষের জীবনে যে সকল জটিল ও দুর্ব্বার সমস্যা আছে, তাহার বাহ্য উগ্র রূপকে, এক উৎকৃষ্ট প্রজ্ঞার দ্বারা তিনি আবৃত ও অপসারিত করিয়াছেন। তাই যাহা দেহঘটিত চিত্তবিক্ষোভ, যাহা নানা যুগে, নানা ঘটপ্রতিঘাতে জীব-জীবনের সমস্যা হইয়া দাঁড়ায়, তাহা সাহিত্যের নিত্য-বিষয় হইতে পারে না—ইহা রসতত্ত্বের উচ্চ কথা হইলেও রবীন্দ্রনাথের মুখে এই কথার তাৎপর্য আরও গভীর। রবীন্দ্রনাথ নিজের কবি-ধর্মের কথা অনেকবার অনেক কবিতায় স্পষ্ট করিয়া ঘোষণা করিয়াছেন। যাহাদের সে সম্বন্ধে এখনও কোন সন্দেহ আছে, তাঁহাদিগকে রবীন্দ্রনাথের ‘ভাষা ও ছন্দ’ নামক কবিতাটি পড়িতে বলি। আমার মনে হয়, রবীন্দ্রনাথ নিজের কাব্য-সাধনার মূলমন্ত্রটি আর কোথাও এমন যথার্থ ও সুন্দরভাবে নির্দেশ করেন নাই। সেই সঙ্কে আর একটি বিখ্যাত কবিতার (‘পুরস্কার’—সোনার তরী) এই পংক্তিগুলিও স্মরণীয়,—

শুধু বাঁশিখানি হাতে দাও তুলি’

বাজাই বসিয়া শ্রাণ মন খুলি’;

পুষ্পের মত সঙ্গীতগুলি

ফুটাই আকাশ ভালে।

অস্তুর হ’তে আহরি’ বচন

অনন্দলোক করি বিরচন,

গীতরসধারা করি সিঞ্চন

সংসার-ধূলি জালে।

অতি দুর্গম সৃষ্টি-শিখরে

অসীম কালের মহা কন্দরে

সতত বিশ্ব-নির্ঝর ঝরে

ঝঝর-সঙ্গীতে,

স্বর-তরঙ্গে যত গ্রহ তারা

ছুটিছে শূন্যে উদ্দেশহারা,—

সেথা হ’তে টানি’ ল’ব গীতধারা

ছোট এই বাঁশরীতে।

আমরা এযুগের মানুষ, কিছু বেশী বাস্তব-পীড়িত ও দুর্বল ; কাজেই এতবড় আদর্শকে সাহিত্যে প্রতিষ্ঠিত করিবার আগ্রহ বা শক্তি, কিছুই আমাদের নাই। অসীম-কালের মহাকন্দর হইতে বিশ্ব-নির্ঝরের সঙ্গীতধারাকে টানিয়া আনিবার ভান আমরা করিতে পারি, কিন্তু তাহা এ যুগের সত্যকার প্রবৃত্তি নহে। ইহাতে যদি সাহিত্য-সৃষ্টি সম্ভব না হয়, তবে সে সম্বন্ধে এখন হইতেই নিরাশ হওয়া ব্যতীত উপায় নাই। আমাদের একমাত্র আশা এই যে—কোন সমস্তাই রসের আধার হইতে পারে না বটে, তথাপি মানুষের সমগ্র দেহ-মন-প্রাণকে সে নাড়া দিতে পারে। মানুষ যখন সেই সমস্তাকেই বড় করিয়া তাহাকে নিত্য-সত্যের পূজা দেয়, তখন সে সাহিত্য-সৃষ্টি করে না, আপনার জীবধর্মেরই একটা নূতন পরিচয় সে ইতিহাসে রাখিয়া যায়। কিন্তু ওই সমস্তার তাড়নায় সে যখন নিজের মধ্যেই ডুব দেয়, নিজের গভীরতম অনুভূতিক্ষেত্রে নিজের সঙ্গেই তাহার একটা নূতন করিয়া পরিচয় হয়। সে পরিচয়ের রহস্য-বিশ্বয় যখন তাহার বহুদিনের অভ্যস্ত সংস্কারকে নাড়া দিয়া প্রাণের জড়তা দূর করে, তখন কি সেই বাহিরের প্রভাব, সেই অনিত্য যুগধর্মের তাড়না তাহাকে সঞ্জীবিত করে না? রবীন্দ্রনাথ যে-যুগের মানুষ সে যুগও একটা বড় সমস্তার যুগ ছিল ; সে সমস্তা বাহিরের দিকে খুব প্রবল না হইলেও অন্তরের ভাবনায় খুব বড় হইয়া উঠিয়াছিল। সেই যুগ-মহনের ধনস্বরী তিনি—সর্বশেষে অমৃত-পাত্র হাতে করিয়া উঠিয়া আসিয়াছিলেন। তেমনই, আজ যে-সমস্তা আমাদের দেহমনকে আক্রমণ করিয়াছে, তাহাতে বাহিরের তাড়নাটাই বেশী বলিয়া হতাশ হইবার কারণ দেখি না। বরং মনের অত্যধিক প্রভু হইতে মুক্ত হইয়া, কিছুদিন দেহের অধীন হইয়া, নিত্য-সত্য-স্বরূপকে আর এক পাত্রে ঢালিয়া পান করিতে ইচ্ছা হয়। যাহা মিথ্যা, যাহা অনিত্য তাহাকেই নিঃশেষ করিতে চাই—যাহা জীবধর্মের স্থূল দুঃখ, অতএব হয়, তাহারই মশাল জ্বালাইয়া একটু নৃত্য করিলে ক্ষতি কি? নিত্য ত চিরদিনই আছেন, কিন্তু এই অনিত্য যদি যুগধর্মের বশে একবার দেখা দিয়া থাকেন, তাঁহাকে প্রাণের সিংহাসনে বসাইয়া একবার প্রাণ ভরিয়া তাঁহার সেই বিচিত্র রস আশ্বাদন করিতে দোষ কি? রবীন্দ্রনাথ সার্থক সত্যের দৃষ্টান্ত দিয়া বলিয়াছেন, সত্যকার মানুষ 'লাখে না মিলিল এক' ! একথা চিরযুগের বটে, কিন্তু আপাততঃ এই যুগে আমরা রসানুভূতিকে এত সূক্ষ্ম করিয়া সত্যের অন্ত বড়

সাধনা করিব না। তিনি যাহাকে সাধারণ সত্য বলিয়াছেন সেই সাধারণ সত্যের মানুষকে তাহার জীবধর্মের শাসনের মধ্যেই নির্বিচারে বরণ করিব; অন্যায়ের দ্বারা আচ্ছন্ন আত্মার নিদারুণ দৈন্ত, তার যতকিছু অগৌরব, দেহ-হুঃখের দুর্গতি ও কুশ্রী আকার, এই সকলই—স্বল্প রসবিলাস নয়—প্রত্যক্ষ দেহ-চেতনার দ্বারাই আত্মসাৎ করিব; ইহাই হইবে এ যুগের সাহিত্যের উপাদান। তারপর যদি সেই চেতনার পরিপূর্ণ আবেগে কাহারও ‘চোখের জল ফেলতে হাসি পায়’, এবং তাহার সেই প্রতিভা থাকে, তবে তাহা হইতে অভিনব রসসৃষ্টি হইবে। এ কথা বলিলে ত রসতত্ত্বের কোন বিঘ্ন হয় না, শেষ পর্যন্ত রবীন্দ্রনাথের কথাই ত বজায় থাকে। ইহাতে আপত্তি করিতে পারেন দুই শ্রেণীর লোক—এক, যাহারা রবীন্দ্র-সাহিত্যের আভিজাত্যে মুগ্ধ, যাহাদের নিকট জগৎ ও জীবন “শূন্যায়মান ডিক্যাণ্টারের” মত বৈঠকী রসালাপের উপকরণ; আর, যাহারা আধুনিক যুরোপীয় সাহিত্য ও বিজ্ঞান-চিন্তার অগ্নাধিক অনুসরণ করিয়া বাংলাদেশের Don Quixote হইয়াছেন, চারিদিকে নানা সমস্তার বিভীষিকা দেখিয়া বুটা মনস্তত্ত্ব, সমাজতত্ত্ব ও যৌনতত্ত্বের তালপাতার তলোয়ার হাতে দেশের নানা দৈত্য ও ভূত ঝাড়াইতে বাহির হইয়াছেন। ইহারা দুই দলই বর্তমান যুগের উপসর্গ-মাত্র, ইহাদের দ্বারা যুগপ্রতিষ্ঠা ত পরের কথা—নবযুগের উদ্বোধনও হইবে না।

অথচ দেশে যুগান্তর আসিয়াছে। এ জাতি যদি এই মনস্তত্ত্ব উত্তীর্ণ হইয়া বাঁচিয়া উঠে,—যদি দেহে মনে প্রাণে সূস্থ হইবার অবকাশ পায়, তবে—আমি যে সাহিত্যের আভাস দিয়াছি, তাহা ভাষায় মূর্ত্তিমান হইয়া উঠিবে। এখনই যে তাহা একেবারে একটুও হয় নাই তাহা নহে। যুগসন্ধিস্থলে আমরা শরৎচন্দ্রকে পাইয়াছি। তাঁহার রচনায় পূর্বযুগের Idealism পূর্ণ মাত্রায় বর্তমান, অথচ অনাগত ভবিষ্যতের ইঙ্গিতও সূক্ষ্মপষ্ট হইয়া উঠিয়াছে। তাঁহার আকস্মিক উদয়ে বাংলার পাঠকসমাজ যে নাড়া পাইয়াছিল তাহা এখন অভ্যস্ত হইয়া গেছে; তাঁহার রচনাসম্বন্ধে প্রশংসা ও নিন্দা দুই-ই সমান হইয়া একটা স্তম্ভিত ভাব ধারণ করিয়াছে—ইহাও স্বাভাবিক নিয়মের প্রতিক্রিয়া। অতি সঙ্কীর্ণ বাঙালী-সমাজের যেখানে যেটুকু বাঁধন খোলা ছিল, সেইখান দিয়া তিনি কতকটা প্রত্যক্ষ পরিচয়, কতকটা তীক্ষ্ণ সহানুভূতি ও কল্পনার সাহায্যে, নরনারীর হৃদয়-দ্বার অসীম প্রদ্বায় ও সমবেদনায় উদঘাটন করিতে চাহিয়াছেন। গতযুগের আদর্শসূত্র তাঁহার মধ্যে

ছিন্ন হয় নাই, কারণ, রবীন্দ্রনাথের গল্পগুচ্ছ ও উপন্যাস তাঁহাকে সঞ্জীবিত করিয়াছে, সন্দেহ নাই; কিন্তু তাঁহার হৃদয়-রাধিকা প্রেমকেই একমাত্র পাথেয় করিয়া অন্ধকারে দুর্গম-গহনে দুঃসাহসিক অভিসারে যাত্রা করিয়াছে—কোন সুম্পষ্ট সমস্তার তাড়নায় নয়, নৈরাশ্র-কাতর বিরহীর বংশীরব শুনিয়া। কাব্য-সাহিত্যের কথা আমি বলিব না, সত্যকথা বলিলে তাহা আমার পক্ষে শোভন হইবে না। কিন্তু কথা-সাহিত্যের অকথ্য উপদ্রবের মধ্যেও একটু ক্ষীণ আশার রেখা আমি যেন দেখিতে পাইতেছি। সে কথা এখনও উল্লেখ করিবার সময় হয় নাই; হয়ত সে সম্ভাবনা অন্ধপথেই নির্মূল হইবে—কে বলিতে পারে?*

সাহিত্যের আসর : কবি ও কাব্য

সাহিত্য মুখ্যভাবে আলোচনার জিনিস নয়, উপভোগের জিনিস—এ কথা মনে রাখিলে সাহিত্যকে লইয়া দল বাঁধা, অথবা বারোয়ারী-যাত্রার মত যখন তখন যেখানে সেখানে আসর বসাইবার জন্ত মগুপ তুলিবার উৎসাহ হইবে না। কারণ, সাহিত্য উপভোগ করিবার মত সংস্কার ও সংস্কৃতি সকলের নাই—সামাজিক ও রাজনৈতিক বচসা যেমন সকলেই করিতে পারে, সাহিত্যকে লইয়া তাহা করিতে পারিলে সাহিত্যই উবিয়া যায়। অতএব, সাহিত্যের আসরে বসিয়া সর্বাগ্রে এই কথাটি বলিতে হইল বলিয়া কেহ যেন ক্ষুধ না হন। এই সঙ্গে ইহাও স্মরণ করিয়া সকলকে আশ্বস্ত হইতে বলি যে, সাহিত্যরসিক হইতে না পারাটা যতই লজ্জার বিষয় হউক, মানুষের আত্মগৌরব বৃদ্ধি করার জন্ত আরও কত বস্তু রহিয়াছে—সেখানে সিদ্ধিলাভ যে-শক্তির দ্বারা সম্ভব, তাহা মাত্রাভেদে অনেকেরই আছে। সাহিত্যরসবোধের যে সাক্ষাৎ জ্ঞাতি-শত্রু, তাহার নাম পাণ্ডিত্য;—আপনারা এ রসে বঞ্চিত হইলে, তাহার প্রতিশোধ লইবার জন্ত পাণ্ডিত্য-চর্চা করিতে পারেন। এ ছাড়া আরও কত পথ রহিয়াছে। প্রভুত্ব ও ধনশক্তি আরও বড় পুরুষার্থ, তাহার সাধনা করিলে গরিব কবি বা সাহিত্যিককে অনুগ্রহ-ভাজন করিয়া তাহার দ্বারাই স্বমহিমা কীর্তন করানো যায়। সমাজে সাহিত্য-রসিক বা কবির সম্মান কতটুকু? কবি হইয়া সংসারে কেহ সত্যকার প্রতিপত্তি লাভ করিয়াছেন, এমন দৃষ্টান্ত অতিশয় বিরল; কবির শক্তি, বা তাঁহার ব্যক্তি-চরিত্রকে সমাজ কোন কালেই শ্রদ্ধা করে না; গানের ওস্তাদ বা নটনটীকে এক হিসাবে আদর করিলেও, তাহাদিগকে যেমন কেহ সত্যকার শ্রদ্ধা করে না, তেমনই কবির প্রতিভায় মুগ্ধ হইলেও সমাজ তাহার সহিত একটা নিরাপদ ব্যবধান রক্ষা করিয়া চলে—সে যে একটা অস্বাভাবিক চরিত্র, এবং সেরূপ শক্তি যে কোন কাজের নয়, ইহাই মনে করে। অতএব, সাহিত্যের পক্ষ হইতে যদি বলা যায়, এটা ভিড় করিবার স্থান নয়,—রস উপভোগ করিবার শক্তি সকলের নাই, তাহা

হইলে সংসার ও সমাজের তাহাতে রুট হইবার কারণ নাই, বরং পাগলের দলে ভিড়িবার সখ না হওয়াই শ্রেয় ।

কাব্য যে লক্ষীছাড়ার কীর্তি, অর্থাৎ যাহারা ও রস সৃষ্টি করে, তাহারা যে সাক্ষাৎ সংসার-যুদ্ধে অপারগ হইয়া দূরে সরিয়া থাকে, অতএব কিছুই লাভ করিতে পারে না—ইহা সত্য । কিন্তু তাই বলিয়া তাহারা যে সংসারবিরাগী—এ কথা সত্য নহে ; বরং যাহা ‘রাগের’ আতিশয্যের ফল, তাহাকেই আমাদের ‘বৈরাগ্য’ বলিয়া ভ্রম হয় । জগৎ ও জীবনের প্রতি তাহাদের সেই প্রেম খাঁটি বলিয়াই স্বার্থসাধনের প্রবৃত্তি লোপ পায়,—যে ‘অহং’ জগতের সঙ্গে সংগ্রাম করিয়া আত্ম-প্রতিষ্ঠায় উত্তোগী হয়, সে অহং তেমন জাগ্রত হইতে পারে না বলিয়া, কবিরা সংসারে নির্বোধ ও দুর্বল রূপার পাত্র হইয়া থাকেন । তাই বলিয়া, কবিরা শক্তিহীন নহেন—কেবল ইহাই সত্য যে, সংসার যে-শক্তির ভজনা করে, সে শক্তি কবিদের নাই । সেরূপ শক্তিমান হইতে হইলে ছোট-বড় নানা আকারের স্বার্থকে পরম-পুরুষার্থ করিতে হয়, এবং যাহার ‘অহং’ যত বেশি, সেই তত শক্তিমান হইয়া থাকে । কবিরা এইরূপ শক্তিমান নয় কেন, তাহা বলিয়াছি । কিন্তু জীবনকে আরও পূর্ণ, আরও গভীর ভাবে ভোগ করিবার শক্তি তাঁহাদেরই আছে—বাহিরের ঐ যুদ্ধ একরূপ জয় করিয়াছেন বলিয়াই তাঁহাদের অন্তরের সুখ আরও সত্য, আরও গভীর । তাই কবির মুখেই আমরা শুনি—

এ ধরার মাঝে তুলিয়া নিনাদ
চাহি নে করিতে বাদ প্রতিবাদ,
যে ক’দিন আছি মানসের সাধ
মিটাব আপন মনে ;
যার যাহা আছে তার থাক্ তাই,
কারো অধিকারে যেতে নাহি চাই,
শান্তিতে যদি থাকিবারে পাই
একটি নিভৃত কোণে ।

ফার্সী কবি হাফেজের সঙ্গে তৈমুরলঙ্গের সাক্ষাৎ ও কথোপকথনের যে একটি গল্প প্রচলিত আছে, তাহাও এই প্রসঙ্গে মনে পড়িতেছে । কবি হাফেজ যে সৌন্দর্য্যধ্যানে মগ্ন, যাহাকে হৃদয়ে ধারণ করিয়া তিনি ধরণীর আধিপত্যও তুচ্ছ করিয়াছেন, শতরাজ্যবিজয়ী তৈমুর—সংসারের চক্রে সর্ব্বাপেক্ষা ভীতি ও ভক্তি-

ভাজন সেই শক্তিমান পুরুষ—তাহা বুঝিতে পারেন নাই, তাই হাফেজকে ভৎসনা করিয়া বলিয়াছিলেন, “মুখ তুমি ! তাই তোমার প্রেমসীর গালের একটি তিলের বদলে তুমি আমার বোখারা সমরথদের অতুল বৈভব বিলাইয়া দিবার কল্পনা করিয়াছ—সে বৈভব কখন চোখে দেখিয়াছ ? দেখিলে এত বড় স্পর্কার কথা বলিতে না।” কিন্তু হাফেজ যে-রূপে মুগ্ধ, সে যে মানুষের হৃদয়-মন-আত্মার কত বড় আরাম, তাহা তৈমুর ও তৈমুর-উপাসক সাধারণ নরনারী কি বুঝিবে ? আমিও বুঝাইতে পারিব না, কেবল কবিদের সাক্ষ্যমাত্র উদ্ধৃত করিতে পারি। আমাদেরই একজন কবি সেই আনন্দে, সেই অতুল সৌভাগ্যগর্ভে বলিতে পারিয়াছেন—

তুমি লক্ষ্মী সরস্বতী,

আমি ব্রহ্মাণ্ডের পতি,

হোক গে এ বহুমতী যার খুসী তার !

আর একজন এই সৌন্দর্য্য-বিহ্বল অবস্থার আভাস দিয়াছেন এই কয়টি কথায়—

ভাবিলাম মনে, ধরণী দেখায়ে দিল

ঐশ্বর্য্য আপন। কামনার সম্পূর্ণতা

ক্ষণতরে দেখা দিয়ে গেল।—ভাবিলাম

কত যুদ্ধ, কত হিংসা, কত আড়ম্বর,

পুরুষের পৌরুষ-গৌরব, বীরত্বের

নিত্য কীর্ত্তিত্বা, শান্ত হ'য়ে লুটাইয়া

পড়ে ভূমে, ওই পূর্ণ সৌন্দর্য্যের কাছে ;

পশুরাজ সিংহ যথা সিংহবাহিনীর

ভুবনবাহিত অরুণ-চরণতলে।

এইজন্যই কবিদের মনে কোন দৈন্ত্য নাই—সংসারের উপেক্ষাও তাঁহারা উপেক্ষা করিয়া থাকেন। সত্য বটে, অতিশয় আত্মসচেতন নিরীক কবিদের কেহ কেহ যেন নিজেদের কাছেই নিজেদের মহিমাবোধ অটুট রাখিবার জন্ত সংসারকে লক্ষ্য করিয়া সগর্ভে আত্মঘোষণা করেন—কবির আসন যে কত উচ্চে, তাহা অকৃতজ্ঞ ও অবোধ সমাজকে স্মরণ করাইয়া দেন। ইংরেজ কবি শেলির সেই বিখ্যাত উক্তি স্মরণ করুন—

“Poets are the trumpets which sing to battle, poets are the unacknowledged legislators of the world.”

—এই কথাই একজন সামান্য কবিও আরও উচ্চ-স্বরে, আবেগকম্পিত বাক্য-
ঝঙ্কারে ঘোষণা করিয়াছেন—তাহাতে মনে হয়, সংসারকর্তৃক উপেক্ষিত অভিমাত্রী
কবি যেন আশ্বাস ও আশ্বপ্রসাদের শেষ অবলম্বন খুঁজিতেছেন ; কথাগুলি
সত্যই বড় চটকদার—

We are the music-makers
And we are the dreamers of dreams,
Wandering by lone sea-breakers,
And sitting by desolate streams ;—
World-losers and world-forsakers,
On whom the pale moon gleams :
Yet we are the movers and shakers
Of the world for ever, it seems.

With wonderful deathless ditties
We build up the world's great cities ;
And out of a fabulous story
We fashion an empire's glory :
One man with a dream, at pleasure,
Shall go forth and conquer a crown,
And three with a new song's measure
Can trample a kingdom down.

আমাদের দেশে আধুনিক কালের যিনি শ্রেষ্ঠ কবি, তিনিও অন্তরে এই
উপেক্ষার জ্বালা হইতে নিষ্কৃতি পান নাই—বরং আরও স্পষ্টভাষায় সে কথা
বলিয়াছেন, এবং আপনার মত করিয়া তাহার সাহসনামস্টিও করিয়াছেন।
রবীন্দ্রনাথের সেই কবিতার কিয়দংশ উদ্ধৃত করিতেছি,—

তুমি মোরে করেছ সম্রাট । তুমি মোরে
পরায়েছ গৌরব-মুকুট ।

হৃদি-শয্যাতল

শুভ্রদুর্গফেননিভ, কোমল শীতল,
তারি মাঝে বসিয়েছ ; সমস্ত জগৎ
বাহিরে দাঁড়িয়ে আছে, নাহি পায় পথ
সে অন্তর-অন্তঃপুরে ।

মেধা আমি জ্যোতিমান

অক্ষয় যৌবনময় দেবতাসনান,
মেধা মোর লাভ্যের নাহি পরিসীমা

সাহিত্যের আসর : কবি ও কাব্য

হেথা আমি কেহ নহি,

সহস্রের মাঝে একজন ; সদা বহি

সংসারের কুত্র ভার—কত অনুগ্রহ

কত অবহেলা সহিতেছি অহরহ ;

অগ্নি মহীয়সী মহারাগী,

তুমি মোরে করিয়াছ মহীরান্ ! আজি

এই যে আমারে ঠেলি' চলে জনরাজি

না তাকারে মোর মুখে, তাহারা কি জানে

নিশিদিন তোমার সোহাগ-স্থাপানে

অঙ্গ মোর হয়েছে অমর ?

—এখানে সমাজ ও সংসারকে কবি কোন জবাব দেন নাই,—নিজেরই অন্তরকে
• আশ্বস্ত করিয়াছেন, নিজেরই মহিমাবোধ জাগ্রত করিয়াছেন ।

সংসারের অবহেলায় কবিগণের এই যে অভিমান, ইহা কবির নয়—কবি-
মানুষটির দুর্বল মুহূর্তের আত্মসচেতন মনোভাব । কবিদের ইষ্টদেবতা পরম-সুন্দর,
তাঁহার উপাসনায় সকল অসৎ সৌন্দর্য্যধাতুতে পরিণত হইয়া সৎ হইয়া যায় ।
সেজন্য কবিহৃদয়ের আশ্বাস এত দৃঢ়, কবির প্রেম এমন সর্ব্বজয়ী ও শক্তিশালী যে,
কবিচরিত্রে বা কবিরচিত কাব্যে কোথাও অহঙ্কার বা দম্ভ অভিমান থাকিতে পারে
না ; সে শক্তি পূর্ণশক্তি বলিয়াই তাহাকে আত্মঘোষণা করিতে হয় না, কাব্যও
বিনাযুদ্ধে আমাদের কাছে জয় করিয়া লয় । কেবল বাক্যের উদ্দীপনা, ছন্দের ঝঙ্কনা,
• অথবা কোন আইডিয়া বা আবেগের উত্তেজনা—কবিশক্তির লক্ষণ নয় । জগতের
এক শ্রেষ্ঠ কবি সেই শক্তিকে এই কয়টি কথায়—ব্যাখ্যা নয়—একেবারে রূপ
দিয়াছেন—

'Tis the supreme of power :

'Tis might slumbering on its own right arm.

—অর্থাৎ, সে শক্তি সকল শক্তির উপরে—সে যেন আপনারই দক্ষিণ
বাহুর উপরে মাথাটি রাখিয়া আধ-নিদ্রায় মগ্ন হইয়া আছে । (তাহার হৃদয়
নাই, আক্ষালন নাই, আপন পূর্ণভাবে সে আপনার মধ্যে স্থির হইয়া
আছে ।)

সভা-সমিতির বক্তৃতায়, বা পত্রিকাদির প্রবন্ধশালায়—যথার্থ সাহিত্যরসান্বাদন যে কেন হইতে পারে না, সেই কথা লইয়া আরম্ভ করিয়াছিলাম, এবং কথা হইতে কথান্তরে গিয়া অনেক অবাস্তব কথাও হয়তো বলিয়াছি। সাহিত্যের রসলাপ করিতে হইলে উপযুক্ত আসর চাই, এবং সে আসরে জনতা কম হইবারই কথা। তথাপি এমন কথা বলি না যে, গুহ্যসাধনার ভৈরবীচক্রের মত, সেখানে কেবল কয়েকটি দীক্ষিত সাধকেরই মাত্র আসন থাকিবে। তেমন আসরও হইতে পারে না এমন নয়, কিন্তু তাহার সঙ্গে সমাজ-জীবনের সঘর্ষ নাই—তাহাকে আদর্শ করিলে আপনাদের মত সাধুসঙ্ঘের সঙ্গলাভ আর ঘটিবে না। যাহারা সেই রসিক-শ্রেণীতে উত্তীর্ণ হইয়াছেন, তাঁহাদের কোনরূপ আলাপ-আলোচনার প্রয়োজন হয় না, কোন জিজ্ঞাসা আর তাঁহাদের নাই; তাঁহারা কেবল চক্রে বসিয়া একত্রে ঢালেন ও পান করেন—একেবারে বৃন্দ হইয়া থাকেন, কথা কহিয়া নেশাটিকে তরল করিতে চান না। এ অবস্থা খুবই কাম্য বটে, কিন্তু আমরা অনেকে এখনও কথা কহিতে চাই—জানিতে চাই, বুঝিতে চাই; এবং হয়তো বুঝি না বলিয়াই বুঝাইবার জন্ত আরও অধীর হই। এজগৎ সেরূপ আসরে আমাদের চলিবে না। একজন সুফী কবি এইরূপ রসপানের আসরকে ‘শরাবখানা’র সহিত উপমিত করিয়া যে চিত্র আঁকিয়াছেন, তাহা লোভনীয় সন্দেহ নাই, যথা—

একটু তফাতে বাঁসে আছে দেখি ইয়ারের দল

একদম মাতোয়ারা—

উদ্গাদ যত, নেশায় বেহঁশ—প্রাণ ভ'রে পিয়ে

দীর্ঘতির রসধারা।

নাই করতাল, বেহালা, সারং—মজলিসে তবু

কুর্তির কমি নাই;

বোতল, গেলাস, মদ দেখি না যে—তবু ঢালে আর

পান করে একজাই!

এই শরাবখানার যিনি অধিষ্ঠাত্রী, সেই রূপসী তরুণী সাধক-কবিকে সেখানে প্রবেশ করিতে দেখিয়া আগেভাগেই বলিয়া দিলেন—

অধিকাংশ আসর এটা বে—হুঁরা দিয়ে হুঁ
 অতিথির সংস্কার,
 গুরু হ'তে সেই আখের অবধি হেথার কেবলই
 অবাক-চমৎকার !
 পূজা-নমাজের ঘর ছেড়ে দিয়ে ব'সে পড় এই
 শরাব-খানার মাঝে,
 খুলে কেলে ওই দরবেশ-বেশ সাজিতে হবে যে
 কুর্স্তিবাজের সাজে ।
 কাঁধে পর' দেখি কাকেরের সূতা, কেলে দাঁও ওই
 পুঁথি আর জপমালা ;
 গেয়ালায় মদ ভরপুর পিও, চলে এস ভেঙে
 ধর্মের আটচালা ।
 চুর হয়ে শেষে চুমাটি বাড়াও, গালে গাল দিয়ে
 কথা কব কানে-কানে,—
 একটি সে কথা !—জান্ তর্ হয়ে ত'রে যাবে তায়,
 যদি বোঝ তার মানে ।

ভাগ্যবান পুণ্যবান কবির আর উপায় কি ? তাই তিনিও বলিতেছেন—

করিলান তাই ! চাও যদি তাই, আমারি মতন
 দিলখানা লালে-লাল,
 এক ফোঁটা এই খাঁটির লাগিয়া খোয়াও সকলে
 ইহকাল পরকাল ।

এমন করিয়া ইহকাল পরকাল খোয়াইতে আমরা নিশ্চয় রাজি হইব না, ততখানি রসাবস্কার অধিকারী আমরা এখনও হই নাই ; অতএব একটু নিম্নাধিকারে থাকিয়া এখনও পুঁথি ও জপমালার দাসত্ব করিব । আমাদের আসরে কেবল এমন ব্যক্তিকে চাই, যিনি ততখানি রসপিপাসু না হইলেও এই রসের প্রতি অক্ষায়ুক্ত হইবেন ; রসালাপের মধ্যে তাঁহার যেন আর কোন অভিপ্রায় না থাকে—অন্তত এই সময়টুকুর জগৎ ও তাঁহার চিন্ত যেন সকল স্বার্থবুদ্ধি ও বৈষয়িক সংস্কার হইতে মুক্ত থাকে, ব্যক্তিগত মতামতের অভিমান বা কোনরূপ লাভের লোভ কেহ যেন এখানেও সঙ্গে করিয়া না আনেন । ব্যবসায়ের সুবিধা, বড়লোকের দৃষ্টি-আকর্ষণ, দলবিশেষের দলপতি হইবার জগৎ নিজেই খ্যাতি ও

প্রতিপত্তি বৃদ্ধি-করা, করি, ভাবুক বা চিন্তাশীল লেখক বলিয়া শীঘ্র একটা নাম করিবার আকাঙ্ক্ষা, পত্রিকা-সম্পাদকদিগের কঠিন হৃদয় দ্রবীভূত করিবার, অথবা ততোধিক কঠিনহৃদয়া আধুনিক মালবিকা-চতুরিকাদিগের অন্তরে একটু প্রবেশ-পথের আশা,—এ সকলই ত্যাগ করিতে হইবে। সাহিত্য যদি কেবল জ্ঞানের বিষয় হইত, তবে এতখানি চিত্তশুদ্ধির প্রয়োজন হইত না। কিন্তু এখানে কেবল তীক্ষ্ণধার বুদ্ধি হইলেই চলিবে না, অন্তরের আর্দ্রতা ও ঋজুতা চাই, সত্যকার পিপাসা চাই,—সে পিপাসা কেবল সাগর-শোষণের দণ্ডেই চরিতার্থ হইবার নয়; বরং যে বিন্দু-মাত্র আস্থাদান করিতে পারিলে প্রাণ পরিতৃপ্ত হয়, সেই বিন্দুটিকে রসনায় ধরিবার জগ্ন ব্যাকুল হওয়া চাই। ইহাকে পাইয়াছে এমন লোক খুব কম হইবারই কথা; কিন্তু পায় নাই—পাইতে চায়, এমন লোকের সংখ্যা অপেক্ষাকৃত বেশি হওয়া আশ্চর্য্য নয়। অতএব সাহিত্যিক আলাপের আসর খুব ছোট হইবার প্রয়োজন নাই, কিন্তু তাই বলিয়া তাহা জনসভার মত বৃহৎ হইতে পারে না।

সাহিত্যের রসচর্চা করিবার জগ্ন এইরূপ আসরের প্রয়োজন আছে, তাহা মানি; কাব্যায়ত-রসাস্বাদ ও সজ্জন-সঙ্গ, এই দুইটিই সংসারবিষবৃক্ষের অমৃতময় ফল, আর সকলই বিষ—এ কথা আজিকার দিনে সকলে স্বীকার না করিলেও, আপনারা যে কয়জন আজ এখানে, ফুটবল-ম্যাচ ও অগ্ন্য নানা লোভনীয় বা লাভজনক দেখা-সাক্ষাৎ ত্যাগ করিয়া উপস্থিত হইয়াছেন,—তঁাহারা নিশ্চয়ই ইহার কিছুও স্বীকার করিবেন। এখন কথা হইতেছে এই যে, এমন আসরে আপনারা কেমন আলাপ আশা করেন? আমি জানি, অনেক—অনেক কেন, প্রায় সকল—সাহিত্যিক অধিবেশনেই অভিভাষণ ও বক্তৃতাগুলি নিতান্ত আনুষ্ঠানিক বলিয়াই শ্রোতৃবর্গ তাহা কোনমতে সহ্য করিয়া থাকেন। বড় বড় সাহিত্যিকেরা যখন তঁাহাদের বক্তৃতায় ও প্রবন্ধে, ভাব, ভাষা, তথ্য ও তত্ত্বের চরকিবাজি করিতে থাকেন, এবং আপন আপন কৃতিত্বের ক্রমিক উন্মাদনায় দেশ কাল পাত্র বিশ্বত হইয়া শেষে ঘর্মানুকলেবরে আত্মসংবরণ করেন, তখন শ্রোতৃবর্গ এই ভাবিয়া রোমাঞ্চ-কলেবর হন যে, এই মরুভূমিতেও শীতল উৎসের দর্শন মিলিবে—এখানেও নৃত্য ও গীতের প্রচুর ব্যবস্থা আছে। হয়তো সেই নৃত্যকলা ও অন্যান্য কলা দিগ্ভ্রাস্তকারিণী মরীচিকার মতই বারিহীন, তথাপি ওই বক্তৃতার মত তাহা সন্ত-প্রাণঘাতী নয়। ইহাও জানি যে, আপনাদের এই বৈঠক তেমন

বৃহৎ ব্যাপার নয়; ইহা শাখা ও প্রশাখায়, কলার প্রদর্শনী ও কলাবিদগণের বিশেষত্ব-বাহুল্যে, পুষ্পোত্তানকে ফলবান বৃক্ষবাটিকায় পরিণত করে নাই; আপনারা সত্যই একটু রসপান-অভিলাষে আসিয়াছেন। সে পক্ষে আমার পরামর্শ এই যে, এ আসরে কথার কচকচিকে গোণ করিয়া কবিতাপাঠ ও আবৃত্তি প্রভৃতিকেই মুখ্য করা হউক। নবীন সাহিত্যিকদিগের উৎসাহবৃদ্ধির জন্ত তাহাদের রচনাও শুনিতো হইবে, কারণ যেখানে অজস্র মুকুলোদগম,— সেখানে শেষ পর্যন্ত তাহাদের কয়টি দৃঢ় বৃন্তে প্রস্ফুট কুসুমাকার ধারণ করিবে—সে সংবাদ লইবার জন্ত সাহিত্যমোদী-মাত্রেয়ই উৎসুক হওয়া উচিত। কিন্তু যে সকল কাব্য-কুসুম পূর্ণস্ফুট ও অগ্নান হইয়া আমাদের সাহিত্য-নন্দনে বিরাজ করিতেছে, তাহাদের গন্ধ-মধু পাঁচজনে মিলিয়া উপভোগ করাই একরূপ বৈঠকের প্রধান উদ্দেশ্য হওয়া উচিত। সুফী কবির শরাব-খানায় যে কাজ হইয়া থাকে, তাহার অন্তত কিছুও আমাদের অসাধ্য নয়; প্রত্যেকে প্রত্যেকের পায়ে এক একটু কাব্যের রস ঢালিয়া দিবেন—পান করিবার সময়ে কোন কথার প্রয়োজন নাই বটে, কিন্তু পূর্বে বা পরে সেই সুধার কিঞ্চিৎ গুণকীর্তন করিলে স্বাদের মাধুর্য বৃদ্ধি হয়। সাহিত্যরস এমন করিয়া উপভোগ করিবার প্রয়োজন আছে। ইদানীং এইরূপ রস-চর্চা বিরল হইয়া উঠিতেছে বলিয়াই, কাব্যের সহিত মানুষের হৃদয়ের যোগ সুস্থ ও সবল থাকিতেছে না। এক্ষণে কাব্যরস আফিম বা চণুর সামিল হইয়া উঠিতেছে; ঘরে বসিয়া একাকী, নিতান্ত অসামাজিকভাবে—যাহার যেমন রুচি—কাব্যরস-সেবন হইয়া থাকে। কিন্তু তাহাতে মনের তৃপ্তি হইলেও প্রাণের স্ফুতি হয় না; এবং কাব্য-সাহিত্যের রসসম্ভোগে একটা বড় ত্রুটি থাকিয়া যায়—রস-সংবেদনা একটা সঙ্কীর্ণ ক্ষেত্রে আবদ্ধ থাকে বলিয়া, বিভিন্ন হৃদয়ে আবেদন-বৈচিত্র্যের মধ্যেই তাহার যে একটা সম্পূর্ণতর রস-প্রমাণ আছে, তাহা আর ঘটিতে পারে না। কবিতাকে এইরূপ ঘাচাইয়া লওয়ার প্রয়োজন অল্প নহে। অতএব এইরূপ সাহিত্যিক আসরের আমি যে একান্ত পক্ষপাতী, তাহা বলাই রাখল্য।

৩

এখন আমি এ আসরে কি বলিব? আমাকে যখন আপনারা এ সভার মঞ্চাসনে বসাইয়াছেন, তখন বুঝিতেছি যে, কচকচির ভারটা আমাকেই বহিতে

হইবে। আমি পণ্ডিত নই, পাণ্ডিত্যের ব্যবসাদারী আমার সাধ্য নয়; আমি যাহা বলিব, তাহা আপনাদিগকে বুঝাইবার চলে, নিজে কতটা বুঝিয়াছি তাহাই নিজের কাছে যাচাই করিয়া লইব। যদি আপনাদের কাছে তাহা পরিষ্কার হইয়া না উঠে, তবে বুঝিব, আমার নিজের কাছেও তাহা পরিষ্কার হইয়া উঠে নাই। আমি আপনাদের সমক্ষে কাব্যপরিচয়ের দুই চারিটি সাধারণ সূত্রের অবতারণা করিব; মনে হয়, আপনাদের রসপিপাসু মন সেটুকু বরদাস্ত করিতে পারিবে।

প্রথমেই কবির 'কল্পনা' সম্বন্ধে কিছু বলিব। কাব্যরস আন্বাদনের সঙ্গে চিন্তাবৃত্তির যেমন কোন সম্বন্ধ নাই—ও রস আমরা যে রসনার দ্বারা আন্বাদন করি, সে রসনা যেমন মস্তিষ্কের সমদেশবর্তী নয়, তেমনই, কবিরা যে দৃষ্টি দ্বারা জীবনের রস-রূপ আবিষ্কার করেন, তাহাও সাধারণ মনস্তত্ত্বের অধিকারভুক্ত নয়; এই দৃষ্টিকেই আমরা কল্পনা বলি। কিন্তু কল্পনা কথাটার একটা দুর্নাম আছে, এজন্য ইহার অর্থ একটু শোধন করিয়া লইলে ভাল হয়। কবিদের দেখা—একরূপ অল্পভূতি; সে অল্পভূতি শুধুই দেহের অল্পভূতি বা মনের অল্পভূতি নয়—আরও ভিতরের, সে যেন একটা পূর্ণতর চৈতন্যের অল্পভূতি। ইহাতে সাধারণ জ্ঞানবৃত্তির ক্রিয়া নাই বলিয়া ভাষায় তাহার পরিচয় ঠিকমত দেওয়া দুর্বল। আমাদের বাক্য ও বাক্যপদ্ধতি যে ক্রিয়ার প্রয়োজনে জন্মলাভ করিয়াছে, তাহা হইতে ইহা ভিন্ন, তাই কবির এই দেখার প্রকারটিকে কবিও বাক্যের দ্বারা বুঝাইতে পারিবেন না; বুঝাইবার প্রয়োজনও হয় না, কারণ, কবিরা যাহা দেখেন, তাহা ঠিক তেমনই করিয়া আমাদের কাছেও দেখাইয়া থাকেন—সেই দেখা আমাদেরও দেখা হইয়া উঠে। তথাপি চিন্তার সাহায্যে, সেই দেখার বিশেষত্ব আমরা কিঞ্চিৎ অনুধাবন করিতে পারি—তাহা হইতেই এই কল্পনা বা কবিদৃষ্টির লক্ষণ নির্দেশ করা যায়। কবির সেই দেখার প্রধান বিশেষত্ব এই যে, তাহাতে জগৎ ও জীবনের সব কিছু রূপান্তরিত হইয়া আমাদের প্রাণের গভীরতম আকাঙ্ক্ষা চরিতার্থ করে। ইহাও আপনারা লক্ষ্য করিয়া থাকিবেন যে, সে সময়ে আমরা চিন্তা করি'না, বিশ্লেষণ করি না; কেমন করিয়া এমনটি ঘটিল, তাহার ভাবনাও থাকে না। অথচ তখন আমাদের চৈতন্য যে নিদ্রিত বা দুর্বল হইয়া থাকে তাহা নয়, বরং তাহা অতিমাত্রায় উজ্জ্বল হয় বলিয়াই আমরা কাব্যরস-আন্বাদনে এত আনন্দ পাই। যদি বলি যে, দৈনন্দিন জীবনের যে জাগ্রত অভিজ্ঞতা, তাহাই

আমাদের গভীরতর চৈতন্যকে আবৃত করে ; বাহাকে আমরা সজ্ঞান অবস্থা বলি, তাহাই আমাদের অন্তর্ভুক্তকে অন্ধ করিয়া রাখে ; যদি বলি, জগৎ ও জীবন সম্বন্ধে আমাদের যে ধারণা, তাহা আমাদের বহির্নির্মিত। মনেরই একটা বড়বড়ের ফল—সেইজন্মই আমরা জীবনের স্বরূপ উপলব্ধি করিতে পারি না ; সে কেবল আমাদের আঘাত করে মাত্র, সুখ-দুঃখের স্বন্দ-কোলাহল তুলিয়া আমাদের বিভ্রান্ত করে, নানা সমস্তার সৃষ্টি করিয়া আমাদের মনকে মুক্ত হইতে দেয় না, এবং জন্মাবধি মৃত্যু পর্যন্ত আমাদের জীবনের বহির্ভাগেই বসাইয়া রাখে ;—তাহা হইলে আপনারা চমকিত হইবেন না, কারণ, ইহা যে সত্য, তাহা কাব্যরস-আনন্দকালে আপনারা ক্রমকালের জন্মও উপলব্ধি করেন। তথাপি আপনারা অনেকেই হয়তো বলিবেন, জগৎ ও জীবনের সেই রূপান্তর—যাহা কাব্যে আমরা অনুভব করি—তাহা আনন্দদায়ক বটে, কিন্তু পরে ইহাই বোধ হয় যে, তাহা সুখস্বপ্নের মত মিথ্যা ; কবির সেই দেখা ও দেখানো যাহার দ্বারা সম্ভব হয়, তাহা কল্পনা মাত্র,—সত্যের উপরে সুমোহন মিথ্যার জাল বিস্তার করিবার সে এক আশ্চর্য্য যাদুশক্তি। এ কথা উত্তরে আমি কেবল একটা প্রশ্নই করিব, তাহা এই যে, আপনারা কাব্যরস-আনন্দকালে স্বপ্নে-লাথ-টাকা-পাওয়া ভিখারীর মত পুলকবিহ্বল হন—না, সুখ-দুঃখের অতীত, দেশকালহারা সর্বসংশয়-মুক্তির একটা অপূর্ব চেতনার অধিকারী হন ? মূর্ত্তের জন্মও হন কি না ? এইরূপ অনুভূতি হইতে কোন রসিক ব্যক্তি বঞ্চিত হইতে পারেন না ; যাহারা হইয়া থাকেন, তাঁহারা পুণ্যবান—অর্থাৎ রসিক—নহেন, তাঁহারা জগন্নাথ দেখিবার সময়েও লাউ-মাচা দেখিয়া থাকেন। যদি কোন প্রকৃত রসিক এমন কথা বলেন, তবে তাঁহাকে আমি বলিব—“হয়, Zাস্তি পার না।” ইহারই নাম আনন্দ ; আর, আগে যে অবস্থার উল্লেখ করিয়াছি, তাহা সুখানুভূতি মাত্র—সেখানে বাস্তবের রূপান্তর ঘটে নাই, জাগ্রত চেতনার সেই অতিস্থূল সংস্কারই একটা ভিন্ন দেশকালের আশ্রয়ে একই মোহের সৃষ্টি করিয়া থাকে। কবির এই যে দেখা ও দেখাইবার শক্তি, তাহাকেই আমরা নূতন অর্থে কল্পনা নাম দিয়াছি। এই দিব্যদৃষ্টির ফলে খণ্ডের মিথ্যা পূর্ণের সত্যে পরিণত হয়,—জীবনের সমগ্র রূপ সেই অনুভূতিকেন্দ্রে মণ্ডলায়িত হইয়া দেখা দেয় ; ইহাকেই আমি ‘রূপান্তর’ বলিয়াছি, এবং এই রূপান্তর যে মিথ্যা নয়, তাহার প্রমাণ এই আনন্দ। ভাল করিয়া স্মৃতি

করিয়া বলিতে না পারিলেও,—সকল যুগের সকল দেশের রসিক ইহা অন্তরে উপলব্ধি করিয়াছেন। আমাদের দেশের—এই বাংলা দেশেরই—এক পুরাণকার তাঁহার গ্রন্থে (বৃহৎসং-পুরাণ) প্রসঙ্গক্রমে লিখিয়াছেন—

ন কবেৰ্ণনং মিথ্যা কবিঃ সৃষ্টিকরঃ পরঃ ।

সৰ্বোপৰ্য্যেব পশুস্তি কবয়োহস্তে ন চৈব হি ॥

—অর্থাৎ, ‘কবির বর্ণনা মিথ্যা নয়, কবিই শ্রেষ্ঠ সৃষ্টিকর । কবিগণের দৃষ্টি সকলের দৃষ্টির উপরে, আর কেহ তেমন দেখে না’ । বেশ মনে হয়, আমরা এখানে যাহা বলিতেছি, ত্রয়োদশ শতাব্দীর এই লেখক ঠিক সেই কথাই বলিতেছেন। কবির বর্ণনা মিথ্যা হইতে পারে না—এই কথা খুব বড় কথা, আধুনিক কবিও এক স্থানে ঠিক সেই কথা বলিয়া সকলকে চমকিত করিয়াছেন—

সেই সত্য যা’ রচিবে তুমি,

যটে যা তা সব সত্য নহে । কবি, তব মনোভূমি

রামের জনমস্থান, অযোধ্যার চেয়ে সত্য জেনো ।

তাহা ছাড়া, উপরি-উদ্ধৃত সংস্কৃত শ্লোকটিতে আরও দুইটি এমন শব্দ আছে, যাহার ব্যবহার আধুনিকতম কাব্যবিচারে অপরিহার্য হইয়া উঠিয়াছে। আমি ‘সৃষ্টিকর’ ও ‘পশুস্তি’ এই দুইটি শব্দের কথা বলিতেছি, আপনারাও কাব্যবিচারে এই দুইটি শব্দের বিশেষ অর্থ ভাল করিয়া বুঝিয়া লইবেন। ‘পশুস্তি’র অর্থ যে-‘দেখা’ এবং কবির কাজ যে ‘সৃষ্টি করা’—‘কল্পনা’ বলিতে তাহার অধিক বুঝিতে হইবে না; অথচ ইহা যে কতখানি, তাহা আপনারা ভাবিয়া দেখিবেন। আমাদের অলঙ্কার-শাস্ত্রে কাব্য-রসের অতি সূক্ষ্ম বিচার ও কাব্যরচনা-কৌশলের পুঙ্খানুপুঙ্খ বিশ্লেষণ আছে, কিন্তু এ জিজ্ঞাসা নাই। ইহা হইতেই বুঝিতে পারিবেন, শাস্ত্র এক জিনিস, আর রসিক-হৃদয়ের সাক্ষ্য আর এক বস্তু। কাব্যবিচার যিনি করিবেন, তাঁহার এই দৃষ্টি থাকা আবশ্যিক, তাঁহাকেও এক হিসাবে কবি হইতে হইবে। বৃহৎসং-পুরাণের লেখক পুরাণকার হইলেও তাঁহার সে উপলব্ধি হইয়াছিল, যাহারা পাণ্ডিত্যব্যবসায়ী কাব্যসমালোচক, তাঁহাদের তাহা হয় নাই। অতএব কাব্য-আলোচনায় এই কল্পনা-শক্তিকেই সর্বোপরে প্রণতি নিবেদন করিতে হইবে; ইহার প্রতি যাহার শ্রদ্ধা নাই, কাব্য-সমালোচনাতেও তাহার অধিকার নাই—এ কথা বলিলে অজ্ঞায় হইবে না। জ্ঞান নয়, পাণ্ডিত্য নয়, ত্রয়োদর্শন নয়, বয়সের গৌরবও নয়—শ্রুতির

ভাষায়, বহুশ্রুত বা মেধাও নয়—এ অধিকার কেহ চেষ্টা করিয়া লাভ করিতে পারে না, ‘যমেবৈষ বৃগুতে তেন লভ্যঃ’,—ইনি যাহাকে আপনি বরণ করেন, সেই তাঁহাকে লাভ করিতে পারে, অর্থাৎ ইহা সহজাত বা প্রাক্তন; ইহা সেই শ্রদ্ধা, যাহার অভাবে ব্রহ্মজিজ্ঞাসাও নিফল। এজন্য, যাহার ইহা নাই সে যেন—যাহার আছে তাহাকে ঈর্ষা, নিন্দা বা বিজ্ঞপ না করে; সে ধর্ম, অর্থ, কাম প্রভৃতির সাধনায় রত থাকিয়া আপনার ইষ্ট লাভ করুক; কিন্তু, সেই সকলের কোন একটিকে উদ্দেশ্য করিয়া এ রাজ্য জয় করিবার চেষ্টা—যাহা আজকাল অনেকেই করিতেছেন—তাহার মত অধর্মাচরণ আর নাই।

৪

কাব্যের আকৃতি, অর্থাৎ তাহার বাস্তবী মূর্তির সম্বন্ধে আমাদের একটা ভুল ধারণা আছে। পশ্চিমে রচিত না হইলে আমরা কোন রচনাকে কাব্য বলি না; গল্প-কবি হইতে হইলেও (আজকালকার ফ্যাশন অনুসারে) বাক্যগুলিকে পশ্চিম মত চরণযুক্ত করিতে হয়। এ বিষয়ে সংস্কৃত আলঙ্কারিকের বচনই যথার্থ—রসাত্মক বাক্যই কাব্য। পশ্চিম ও গল্প—কাব্যের দুই রীতি মাত্র, কাজে দুইই এক। কবি হইবার জন্ত জোর জবরদস্তি করিয়া অতিশয় রসহীন বাক্যকেও পশ্চিম আকৃতি দিবার চেষ্টা হানুসার। ভাব-কল্পনার প্রকৃতি ও ক্ষেত্র অনুসারে কাব্য পশ্চিম বা গল্প-রীতি আশ্রয় করে। মহাকাব্য, নাটক, উপন্যাস প্রভৃতির বিষয় একই—কাব্যের সেই চিরন্তন বিষয়, কিন্তু ইহাদের রচনায় যে রীতিভেদ বা আকৃতির পার্থক্য আছে, তাহার কারণ, বিষয় এক হইলেও কবি-কল্পনার প্রকৃতি এক নয়। মহাকাব্য ও উপন্যাস তুলনা করিলে দেখা যাইবে, উহাদের ধরণ প্রায় এক, কেবল জীবনের যে দিক বা স্তর কবির কল্পনাকে অধিকার করিয়াছে, তাহারই প্রয়োজনে একটি সহজে পশ্চিম হইয়া উঠিয়াছে, অপরটি গল্পকেই বাহন করিতে বাধ্য হইয়াছে। এই দুইয়ের দ্বিবিধ প্রেরণা লক্ষ্য করিলেই গল্প ও পশ্চিম পৃথক উপযোগিতা সহজেই প্রতীয়মান হইবে। নাটকেও গল্প ও পশ্চিম স্বতন্ত্র উপযোগিতা আছে; আজকাল নাটক হইতে গল্প বহিষ্কৃত হইয়াছে বলিয়া ইহাই প্রমাণ হয় না যে, পশ্চিম-নাটক খাঁটি নাটক নয়; যাহারা এমন কথা বলে, রসিক-সমাজে তাহারা কৃপার পাত্র বটে। তথাপি এ কথা সর্বদা মনে রাখিতে হইবে যে,

গণ্ডেই হউক আর পণ্ডেই হউক, কাব্যের কাব্যস্থ নির্ভর করে কবির সেই দৃষ্টির উপরে—সেই দেখাইবার শক্তির উপরে। যখন কোন কাব্য পাঠ করি, তখন এ বিচার করিবার অবকাশ থাকে না যে—ইহা পণ্ড না গণ্ড। কোন্ কাব্যের পক্ষে কোনটা উপযোগী সে বিচার করেন কবি—কিংবা কবিও নয়, কাব্যের কল্পনা-বীজ বা মূল-প্রেরণায় তাহা নির্দ্ধারিত হইয়া থাকে। কবির দৃষ্টিতে যাহা প্রকাশ পায়, তাহা যদি সত্যকার প্রকাশ হয়, তবে, তাহার সেই রস-রূপ আপনার বাণীদেহের আকৃতি আপনি নির্দ্ধাচন করিয়া লয়, কবিকেও ভাবিতে হয় না। কথাটা আর একটু স্থূলভাবে—হিসাব করিয়া বলি। কবির অন্তরে কাব্যের যে বীজ অঙ্কুরিত হয়, ধরা থাক তাহার উপাদান দুইটি—ভাব ও বস্তু; ভাব, অর্থাৎ কবির নিজস্ব অনুভূতি, এবং বস্তু, অর্থাৎ জীবন ও জগৎ-ঘটিত ব্যাপার। কাব্যের সেই বীজের মধ্যেই এই দুই উপাদানের পরিমাণ বা মাত্রাভেদ গোড়া হইতে থাকে। বস্তুর মাত্রা যদি বেশি হয়, তবে সে কাব্য গণ্ডে রচিত হওয়াই স্বাভাবিক; যদি ভাবের মাত্রা বেশি হয়, তবে তাহা পণ্ডচ্ছন্দে কবিতার আকারে প্রকাশ পায়। আবার যদি তাহা একেবারে ভাবসর্বস্ব হয়, অর্থাৎ বস্তুর সম্পর্ক যদি প্রায় শূন্য হয়, তবে তাহা শব্দের স্মর-রচনা বা গীত হইয়া উঠে। এ হিসাব কিন্তু একটা মোটা হিসাব—ব্যাপারটা বুদ্ধিগম্য করিবার উপায় মাত্র, যদিও বুদ্ধির প্রবেশ এখানে নাই। উৎকৃষ্ট কাব্যের পক্ষে, ভাব ও বস্তুকে এইরূপ হিসাব করিয়া ভাগ করিয়া দেখানো সম্ভব নয়, সেখানে ভাব ও বস্তুর অচিন্ত্য-ভেদাভেদ তত্ত্ব আসিয়া পড়ে। যাহাকে আমরা এখানে ‘ভাব’ বলিতেছি, তাহা ‘বস্তু’ হইতে পৃথক একটা কিছু নয়; কবির হৃদয়ে বস্তু যে ‘বিশেষ’-রূপে প্রকাশ পায়, তাহাই ভাব; অতএব ভাবই হইতেছে সেই ছাঁচ, যাহা কবিতার বস্তুকেও তাহার বিশিষ্ট রূপটি দিয়াছে; এবং যেহেতু এই বিশিষ্ট রূপই কবিতার সর্বস্ব—বস্তু এখানে ঐ রূপ ধরিয়াই কাব্য হইয়া উঠিয়াছে—অতএব, কাব্যবিচারে ভাব ও বস্তুর পার্থক্যবিধান তত্ত্বসঙ্গত নয়। কিন্তু এখানে একরূপ তত্ত্ববিচারে আমাদের প্রয়োজন নাই—একটা মোটামুটি ধারণা থাকিলেই যথেষ্ট; আমাদের ঐ হিসাবটাই আর একটু টানিয়া চলিব। নাটকের কথা বলিতেছিলাম। নাটক ও উপন্যাস এক নয়; তথাপি শেক্সপীয়ারের পণ্ড-নাটকের সঙ্গে বঙ্কিমচন্দ্রের গণ্ডকাব্যের—তাঁহার উপন্যাসগুলির—তুলনা করা যাক। বঙ্কিমচন্দ্রের গণ্ড-ট্র্যাগেডিজগুলি যেমন নাটকও নয়, তেমনই পণ্ড-কাব্যও

নয়; অথচ শেক্সপীয়ারের নাটকীয় ট্রাজেডির অনেক লক্ষণ তাহাদের প্রেরণার মূলে রাখিয়াছে; এবং গল্পে হইলেও সেই কবিগণ তাহাতে প্রচুর। কিন্তু তথাপি সেগুলি নাটকের আকার পায় নাই এইজন্য যে, তাহারা কেবল দৃশ্য নহে, পাঠ্যও বটে—ঘটনাবস্ত হইতে কবি আপনাকে একেবারে সরাইয়া লইতে রাজি নহেন,—কেবল দেখিলেই চলিবে না, তাহার কথাও শুনিতে হইবে; এইজন্য নির্মাণকৌশলেও ইহা গল্প-কাব্য, নাটক নহে। ইহারও কারণ, কবির দৃষ্টি এখানে কেবল রসদৃষ্টিই নহে, সেই রসদৃষ্টির সঙ্গে একটা সচেতন ব্যাখ্যা-প্রবৃত্তি আছে। অতএব, যেজন্য তাহা নাটক হইতে পারে নাই, সেইজন্য তাহা গল্পও হইয়াছে। নাটকও গল্প হইতে পারে, বঙ্কিমচন্দ্রের কাব্য নাটকীয় গুণসম্পন্ন হইয়াও নাটক হয় নাই কেন, তাহা বলিয়াছি; আবার, ভাব-প্রধান হইয়াও তাহারা গল্পচন্দ্র আশ্রয় করিয়াছে কেন, তাহাও বলিতেছি। এই কাব্যগুলিতে কবির রসদৃষ্টি বস্তুর ভাবরূপকে যেমন প্রত্যক্ষ করিয়াছে, তেমনই, সেই ভাবরূপের উপরে আপনার অতিজাগ্রত মানসচেতনার শাসন কখনও ত্যাগ করে নাই। যে আধ্যাত্মিক বৃত্তিবিশেষকে আমাদের শাস্ত্রে বিবেক বলে, বঙ্কিমচন্দ্রের কবিপ্রবৃত্তিকে সেই বিবেক ভিতর হইতে বলাবল্য় করিয়া রাখিয়াছে, এ যেন প্রকৃতির সঙ্গে রস-সঙ্গ করিয়াও পুরুষ আপনাকে অসঙ্গ রাখিতে চায়; সেই সঙ্গ-স্থলের মধ্যেই যে মুক্তি, তাহাকে বিশ্বাস করিতে পারে না। কবি-মানসের এই অতিজাগ্রত চেতনা জগৎ ও জীবনের রসরূপকেই একান্ত হইতে দেয় নাই—রূপরসের যে আত্যস্তিক আবেশ বাগীকে ছন্দোময় করিয়া তোলে, তাহাকে বশে রাখার জন্য বঙ্কিমচন্দ্রের কাব্য-গুলি গল্প-নাটক না হইয়া গল্প-ট্রাজেডি হইয়াছে। শেক্সপীয়ার ও বঙ্কিম উভয়ের কাব্যের বিষয়বস্তু এক, এবং কবিপ্রেরণাও মূলে সগোত্র বলিয়া মনে হয়, তথাপি একজনের কবিদৃষ্টি অবিমিশ্র বলিয়া—জগৎ ও জীবনের বস্তুগত সত্তাকে রসরূপে আত্মসাৎ করিবার শক্তি বিধাহীন বলিয়া—তাহা কাব্যমন্ত্র-সাধনায় পূর্ণ সিদ্ধি লাভ করিয়াছে; অপরের দৃষ্টি সেইরূপ বিধাহীন নয়—বস্তু ও ভাবের মধ্যে দ্বন্দ্ব আছে, একে অণ্ডের উপর প্রাধান্য স্থাপনের চেষ্টা করিয়াছে, এবং শেষ পর্য্যন্ত একেরই জয় হইয়াছে। অথচ এই কাব্যগুলির উপাদান ও প্রেরণা এমনই যে, গল্প-উপভাস হইলেও তাহারা বার বার শেক্সপীয়ারকেই স্মরণ করাইয়া দেয়।

আর একটি বিষয়ে কিছু বলিয়া আজিকার আলাপ শেষ করিব। কবি ও কাব্য সম্বন্ধে ঐতর্য্য যাহা বলিয়াছি, তাহা হয়তো তেমন কাজে লাগিবে না; কিন্তু ইহারই প্রসঙ্গে আর একটি কথা বলিব, তাহা সাধারণ কাব্যপাঠকেরও কিঞ্চিৎ কাজে লাগিতে পারে, অর্থাৎ তাহার দ্বারা সাক্ষাৎ কাব্য-পরিচয়ের সুবিধা হইতে পারে। আপনারা সকলেই নাটক, নভেল, এমন কি কবিতা পড়িতেও ভালবাসেন—কেন ভালবাসেন, তাহার কিঞ্চিৎ আলোচনা ইতিপূর্বে করিয়াছি। এই সকল রচনায় আমরা আর একটা এমন জীবনের স্বাদ পাই, যাহা আমাদের চিত্তকে ক্রমকালের জগৎ ও সুস্থ করে। কবিকল্পনা বা কবিদৃষ্টির প্রসঙ্গে এ সম্বন্ধে যাহা বলিয়াছি, তাহার পুনরুল্লেখ করিব না, বোধ হয় আপনাদের তাহা স্মরণ আছে—এই আর এক জীবন ও জগতের উদ্ভাবনাকে একটা মিথ্যা স্বপ্নরচনা মনে করা যে ভুল, তাহাই বলিয়াছিলাম। এখন আমি সেই কথাটাই একটু ভাঙিয়া কাব্যের প্রকৃতি-ভেদের কথা বলিব। ধরিয়া লওয়া যাক, অধিকাংশ কাব্যের মতলবই এই যে, আমরা যেন তাহাতে বাস্তব জীবনের এই দাহ হইতে একটা শীতল আশ্রয় পাই। জগতে যাহা নাই, কিন্তু আমাদের গভীরতর চেতনায় যাহা কল্পনা করিয়া আমরা আশ্বাস পাই,—এই সকল কাব্যে, কবিগণ তাহারই অমুখ্যায়ী একটা অভিনব জগৎ সৃষ্টি করিয়া থাকেন। এই জগৎকে আমরা যদি বাস্তব হইতে পলাইয়া বাঁচিবার জগৎ বলি, তবে তাহা মিথ্যা হইবে না—এ বিষয়ে আপনারা সকলেই একমত, তাহা জানি। অতএব একজন আধুনিক ইংরেজ সমালোচকের অমুসরণ করিয়া আমরা এই ধরনের কাব্যকে “Poetry of Refuge” বা আশ্রয়-সঙ্কানের কাব্য বলিতে পারি। ইহাতে প্রথর সূর্যালোক জ্যোত্স্নালোকে পরিণত হয়; অথবা, সূর্য যেন মধ্যগগনে না উঠিয়া পূর্বাকাশেই ভ্রমণ শেষ করিয়া অস্ত যায়; যত কিছু শোক-তাপ একটি স্নিগ্ধ সান্দ্রনার রসে সিক্তিত হয়, কখনও বা অশ্রু হাসির ছল্লবেশে পরম রমণীয় হইয়া উঠে। কিন্তু তাই বলিয়া ইহা স্বপ্ন-রচনা নয়; ইহাও এক প্রকার সৃষ্টি—একটা সুস্বচ্ছ সুসংস্থাপিত জগৎ। অস্তরের অস্তরে আমরা ইহাকে সত্য বলিয়াই অমুভব করি, কারণ ইহার মধ্যে একটা সঙ্গতি ও সুসমা আছে। স্বপ্নে তাহা থাকে না, তাহাতে কোন সুসম্পূর্ণ জগৎ নাই,

কোন শৃঙ্খলা নাই—তাহা উজ্জ্বল চেতনার অনাক্ষয়ি মাত্র। অতএব এখানেও যে কল্পনার ক্রিয়া রহিয়াছে, তাহা কবি-কল্পনা; সেই কল্পনা যেন ধ্যানে বসিয়া, কোন এক নিগূঢ় প্রেরণার বশে, জীবনের বাস্তব অভিজ্ঞতাকেই কষ্টকহীন করিয়া, তাহার সকল কঠিনতা দূর করিয়া, এমন একটি ছাঁদে মাল্যরচনা করে যে, মানুষ তাহাকে হৃদয়ে ধারণ করিয়া কণিকের জগ্ন জীবন-মুক্তির আনন্দ পায়।

এইবার আর এক জাতীয় কাব্যের কথা বলিব। এ কাব্যে কবির কল্পনা জীবনকে মুখামুখি দেখিবার, এমন কি তাহার অন্তস্তল ভেদ করিবার দুঃসাহস করিয়াছে। 'Poetry of Refuge' না বলিয়া ইহাকে 'Poetry of Interpretation' বলা যাইতে পারে। কিন্তু এই Interpretation বা ব্যাখ্যা দুই রকমে বা দুই উপায়ে হইতে পারে। জীবনের যত স্বন্দ—সুখ-দুঃখ প্রভৃতির অস্তিত্ব পুরামাত্রায় স্বীকার করিয়াই, তাহাকে এমন একটি দৃষ্টির দ্বারা মানুষের অধ্যাত্ম-চেতনার অন্তর্গত করা যায় যে, মানুষকে তাহার জগ্ন আর হতাশ হইতে হয় না। ইংরেজ কবি শেলী ও আমাদের রবীন্দ্রনাথের কাব্য এই শ্রেণীর কাব্য। এই সকল কাব্যে কবির কল্পনা জীবনের সকল বিরূপতাকে একটা স্বপ্ন-রূপ দিবার প্রয়াস পাইয়াছে—ভ্রম-সংশয়, দৈন্ত-দুর্দশা, কুরুপ-কুৎসিতের সমাধানমূলক এক একটি বাণী তাহাতে রূপময় হইয়া উঠিয়াছে। কিন্তু এই জাতীয় কাব্যের আর এক স্তর আছে, সেখানেও কবির সৃষ্টি সমাধানমূলক বটে, কিন্তু তাহাতে সেই সমাধান এইরূপ কোন আদর্শ বা আইডিয়ার দ্বারা হয় নাই। সেখানে কবি-চিত্ত জীবনের ভীষণতম মূর্তিকে, শুধু স্বীকার নয়—বরণ করিয়াছে; যে দুর্লভ্য নিয়তি বা দেহ-দশাকে জয় করিতে না পারিয়া মানুষ নৈরাশ্রে অবসন্ন হয়—অতিশয় শক্তিমান ও হৃদয়বান ব্যক্তিও চরম বিড়ম্বনা ভোগ করে, এ সকল কাব্যে কবির দৃষ্টি তাহার প্রতিই দৃঢ়বদ্ধ, এবং সেই স্বন্দকেই পূর্ণ উপলব্ধি করিয়া তাহার যে রসরহস্য উদ্ঘাটিত করে, তাহাতেই আমাদের অন্তরে এক আশ্চর্য উপায়ে প্রহেলিকার সমাধান হইয়া যায়,—দুঃখ দুঃখরূপেই আমাদের প্রাণে একটি প্রশান্তির উদ্রেক করে। ভাল-মন্দ, পাপ-পুণ্য, জায়-অজায়, আসক্তি ও বিবেকের মূলে, জীবনের সকল কোলাহল—উদ্ভাস ও আর্জনার মধ্যে—যে মহাশক্তির লীলা রহিয়াছে, তাহা

শ্রেণীভুক্ত করিয়াই আমাদের আঙ্গুসখিৎ যেন বাড়িয়া যায়, আমরাও সকল ক্ষেত্র উপরে উঠিয়া যাই। উপরি-উক্ত ইংরেজ সমালোচক এই দুই ক্ষেত্রের কাব্যকেই এক শ্রেণীভুক্ত করিয়াছেন—কেবল কবিত্বের পরিধি ও প্রখরতার ভারতম্য নির্দেশ করিয়াছেন। আমার মনে হয়, ইহা শুধু এইরূপ স্তরভেদ নয়, কবির দৃষ্টিগত পার্থক্যও ইহাতে আছে। প্রথমোক্ত কাব্যে, Interpretation—বা, অনর্থের একটা অর্থ করিবার অভিপ্রায় আছে, কিন্তু শেষোক্ত কাব্যে অর্থ-অনর্থের ভেদ-জ্ঞানই যেন নাই। এই দ্বিতীয় স্তরে আছে—মহাভারতের কাব্যংশ, শেক্সপীয়ারের ‘লীয়র’, ‘হ্যামলেট’, আমাদের মধুসূদনের ‘মেঘনাদ’, ও বঙ্কিমচন্দ্রের ‘বিষবৃক্ষ’, ‘কপালকুণ্ডলা’; প্রথম স্তরে আছে—শেলীর ‘প্রোমিথিউস’, রবীন্দ্রনাথের বৃহত্তর কাব্য ও নাটক, বঙ্কিমচন্দ্রের ‘চন্দ্রশেখর’, ‘আনন্দমঠ’ প্রভৃতি। কাব্যগুলিকে শ্রেণীভুক্ত করিয়াছি মাত্র—কঙ্কতুক্ত করি নাই; কেহ যেন মনে না করেন যে, কাব্য হিসাবে তাহারা যে সকলে সমান, ইহাও আমার অভিপ্রায়; সে বিচার এখানে নিম্নয়োজন।

এই দুই জাতি ভিন্ন কাব্যের আর কোন জাতির অস্তিত্ব সন্দান করিবার প্রয়োজন নাই। আধুনিক কালে সাহিত্যের যে নানা ভঙ্গি দাঁড়াইতেছে, তাহার উদ্দেশ্য রসসৃষ্টি বা রসপিপাসা চরিতার্থ করা নয়, বরং যাহাতে কাহারও রসপিপাসা আর না হয়, তাহারই যেন প্রাণপণ চেষ্টা চলিতেছে। অতএব আমাদের আসরে সেগুলিকে দূর হইতে নমস্কার করাই ভাল। তথাপি ধর্মত বলিতে হইলে, এই আধুনিক সাহিত্যের মধ্যে, দুই একজন বিদেশী লেখকের রচনায় (একজনের কথাই বিশেষ করিয়া মনে পড়িতেছে) এক নূতনতর কবিত্বের পরিচয় পাইয়াছি; তাহাতে, ‘Refuge’ বা ‘Interpretation’—কোনটাই নাই; সাধনাও নাই, সমাধানও নাই। সে কাব্যে জীবনের বাস্তবকেই এমন এক রূপে উদঘাটিত করা হইয়াছে যে, তাহাকে যেমন স্বীকার করিতে হয়, তেমনই, তাহা হইতে পরিত্রাণের কোন উপায় আছে বলিয়া মনে হয় না। আমি আধুনিক সাহিত্যের বৈজ্ঞানিক বাস্তববাদের কথা বলিতেছি না। এ বাস্তব দেহসম্পর্কহীন মন, অথবা মন-সম্পর্কহীন দেহের বাস্তব নয়; ইহার দৃষ্টি আরও গভীর—এ সকল রচনায় মানুষের প্রবৃত্তির নিষ্ঠুর শাসনে তাহার বিবেক ও বুদ্ধির লাহনা ও জীবনের নিফলতা এমন করিয়া চিত্রিত

হইয়াছে, এবং তাহাতে মানুষের শক্তি ও অশক্তি, তাহার ক্ষমতা ও মন্ব, পরস্পরকে এমন পরিহাস করিতে থাকে যে, তাহাই তাহার একমাত্র নিয়তি বলিয়া মনে হয় ; এবং শেষ পর্য্যন্ত একটা বিমূঢ়তাই জাগে। ইহাতে ট্র্যাজেডিও নাই, কমেডিও নাই ; ব্যাখ্যা নাই, বিশ্লেষণ নাই, কোন জিজ্ঞাসাও নাই—কারণ, সকলই নিফল। তথাপি, মানুষের সামাজিক বা নৈতিক সংস্কার, এমন কি, আত্মরক্ষামূলক স্বার্থসংস্কারেরও অন্তরালে সেই প্রকৃতি-রূপ নিয়তিকে এমন করিয়া দেখিবার যে দৃষ্টি, তাহাকেও এক প্রকার কবি-প্রতিভাই বলিতে হইবে। কিন্তু এই জাতীয় কাব্য ওই দুই শ্রেণীর মধ্যে কোন্টিতে পড়ে ? চেষ্টা করিলে বোধ হয়, দ্বিতীয়টির কোন এক স্তরে ফেলিতে পারা যায়, নতুবা গত্যন্তর নাই।

আজ এই পর্য্যন্ত—এ আলাপের শেষ নাই। তবু যে এতদূর চলিয়াছে, তাহার কারণ, ইহার আগাগোড়াই একতরফা। প্রশ্ন করিবার অবকাশ দিই নাই, ভুল করিলেও তাহা ধরাইয়া দিবার—লোক নাই বলিব না—উপায় ছিল না। আবার, এত বেশি সময় লইয়াছি যে, ইহার পর জিজ্ঞাসাবাদ করিবার ইচ্ছা থাকিলেও ধৈর্য্য থাকা অসম্ভব। তথাপি আশা করি, আমি যাহা বলিয়াছি, তাহার সব না হউক, কতকটা আপনাদের মনে ধরিবে। কবি ও কাব্য সম্বন্ধে আজ যাহা বলিলাম, তাহাতে কোন তত্ত্ববিচারের অভিপ্রায় ছিল না, তথাপি কোন কোন স্থানে আমার ভাষা তত্ত্বগন্ধী হইয়া উঠিয়াছে তাহা জানি, আপনারা সে ক্রটি মার্জন্য করিবেন।*

* সঙ্গীত-সাহিত্য-বিতানের (ঢালা, কলিকাতা) সাহিত্য-সভার প্রদত্ত বক্তৃতা

বর্তমান বাংলা সাহিত্য

১

বিষয় 'বর্তমান বাংলা সাহিত্য' ; কিন্তু প্রথমেই, 'বাংলা সাহিত্য' বলিতে কি বুঝিতে হইবে ?—নিশ্চয়ই, যাহা বাংলা ভাষায় লিখিত, এবং বাঙালী-জীবন ও বাঙালী প্রাণমনের কাহিনী ; অর্থাৎ, যাহা 'বাংলা' এবং 'সাহিত্য' । আজিকার আলোচনায় আমি বর্তমান সাহিত্যের 'সাহিত্য' কথাটি আরও একটু সংকীর্ণ অর্থে ব্যবহার করিতেছি ; কারণ, আমি কেবল সেই ধরনের রচনার আলোচনা করিব, যাহাকে খাঁটি সৃষ্টিধর্মী বলা যায় । বর্তমান বাংলাসাহিত্যে, সেই জাতীয় সাহিত্যসৃষ্টির একমাত্র নিদর্শন পাই গল্পে ও উপন্যাসে । নাটকের কথা আমি বলিব না, বলিলে অনেকেরই ভাল লাগিবে না ; যাহারা এই ইঙ্গিতে ক্ষুব্ধ হইবেন, তাঁহাদিগকে একটা সাহসনার উপায় বলিয়া দিতেছি—তাঁহারা যেন আমার উপরে রুষ্ট না হইয়া, ইহাই মনে করেন যে, আমি নাট্যরসবঞ্চিত, প্রেক্ষাগৃহত্যাগী, হতভাগ্য ব্যক্তি ; আমার নাটকসম্বন্ধে কোন 'বাসনা' বা 'সংস্কার'ই নাই ; অতএব সে সম্বন্ধে আমার বলিবার অধিকারও নাই । কিন্তু কবিতার সম্বন্ধেও আমি ওইরূপ কথা নিজমুখে বলিব না ; অথবা সে সম্বন্ধে কেবল ইঙ্গিত করিয়াই ক্ষান্ত হইব না । কারণ, আমি বলিব—বর্তমানে বাংলা কবিতা মরিয়াছে, শুধুই মরা নয়—মরিয়া ভূত হইয়া বড়ই দৌরাভ্য করিতেছে । অতএব গল্প-উপন্যাস ছাড়া আর কিছুই সংবাদ উপস্থিত পাওয়া যাইতেছে না । সে সংবাদ যে অতিশয় শুভ ও আশ্বাসজনক, আমি তাহাই বলিতে বসিয়াছি । এই গল্প-উপন্যাস যাহারা লিখিতেছেন, তাঁহাদের মধ্যেই সম্প্রতি কয়েকজন এ সাহিত্যে স্থায়ী আসন-লাভের অধিকারী হইয়াছেন । এখানেও একটা কথা পুনরায় বলিয়া রাখি ; আমি আমারই সাহিত্যিক বিচার-বুদ্ধি ও আদর্শ অনুযায়ী আলোচনা করিব—সে বিচার আমারই ; তাহার সহিত কাহারও মতবৈধ হইলে কিছুমাত্র ক্ষতি নাই, এবং হইলে—কেহ, বা কোন পক্ষ যেন ক্ষুব্ধ না হন । আমার মতের মূল্যবিচার করিবেন তাঁহারাই, যাহারা নিঃস্বার্থ সাহিত্যপ্রেমিক ও সাহিত্যজ্ঞানী ; যাহারা নিজেরাই এই সাহিত্য-রচয়িতা বলিয়া

অভিমান পোষণ করেন তাঁহারা, অথবা তাঁহাদের দল বা ভক্ত-সম্প্রদায় খুশি হইবেন কি না, সে ভাবনা আমার আদৌ নাই। আমি যাহা বলিব, তাহা সমসাময়িক সমাজের মুখ চাহিয়াই নয়—আমার এ স্পর্শাও আছে যে, আমার বক্তব্যের অন্তত কিছুও এ সাহিত্যের ভবিষ্যৎ বিচার-সভায় প্রতিধ্বনিত হইবে। আমি এমন কথাই বলিব যাহা, আমার জ্ঞানে ও বিশ্বাসে, পক্ষপাতপ্রসূত নয়; সাহিত্যিক নয়—সাহিত্যের প্রতি প্রকটই তাহার কারণ। এক্ষণে আরও দুই-চারি কথা বলিয়া আমার আলোচনার বিষয়টি আরও স্পষ্ট করিয়া নির্দেশ করিব।

২

আমি পূর্বেই বলিয়াছি, বাংলাসাহিত্য বলিতে আমি বাংলাভাষায় রচিত বাঙালীর নিজের জীবন, তথা নিজেরই প্রাণমনের গূঢ় গভীর ও শ্রেষ্ঠ পরিচয়-কাহিনীই বুঝিব। 'সাহিত্য' শব্দটি যতই ব্যাপক অর্থে ব্যবহার হউক, শেষ পর্যন্ত তাহা জাতির ভাষায় জাতির আত্মসাক্ষাৎকার ভিন্ন আর কিছুই নয়; সেই আত্মসাক্ষাৎকারই শ্রেষ্ঠ কবিগণের প্রতিভায় এমন স্তরে গিয়া পৌঁছায় যে, তাহা বিশ্বসাহিত্যের অঙ্গীভূত হইয়া থাকে। অতএব, আমি এই গল্প-উপন্যাস-সাহিত্যের বিচারেও সেই এক মাপকাঠিই ব্যবহার করিব; ভাল-মন্দ বিচারের পূর্বেই, আমি সেই সকল উপন্যাসকে সমস্তে দূরে পরিহার করিয়াছি—যেগুলি বাংলাও নয়, বাঙালীরও নয়। বর্তমানকালে শহর নামক পীঠস্থানেই সকল শ্রেষ্ঠ ভাবচিন্তার ধারা আসিয়া মিলিত হয় বটে, এবং যাহারা সর্ববিষয়ে দেশের ও জাতির নেতৃস্থানীয়, তাঁহাদের কর্মক্ষেত্র হয় শহর; কিন্তু এ কথা ভুলিলে চলিবে না যে,—প্রথমত, বাঙালী জাতি এখনও শহরবাসী হয় নাই; এবং তাহার জাতীয় সংস্কার ও সংস্কৃতি—আজও পর্যন্ত যেটুকু খাটি অবশিষ্ট আছে—তাহা পল্লীরই স্তম্ভরসে পুষ্ট। দ্বিতীয়ত, পরাধীন জাতির পক্ষে নাগরিক সভ্যতা যে কত বিষময় ও ভয়াবহ, তাহার প্রমাণ আমরা সর্বত্র চাক্ষুষ করিতেছি। যাহাদের আত্মা আর স্বস্থ নাই, যাহারা একান্তই পরাভূতিকীর্ষু ও আত্মভীক, যাহারা নিজের জাতি কুল ও ধর্ম সম্বন্ধে—অর্থাৎ পিতা-মাতার সম্বন্ধেও—লজ্জা অনুভব করে, তাহাদের পক্ষে বিদেশ হইতে সচ্চ জাহাজে-আমদানি-করা পণ্য-সভ্যতা যে কি ভয়ানক অহিতকর, তাহা বাংলাসাহিত্যের

শেষে সর্বাপেক্ষা প্রকট হইয়া উঠিয়াছে। শহরই এই পণ্য-সভ্যতার মহাবিশি ; আশ্রয়ই পরাধীন জাতির পক্ষে এই বিশিণি সেই সম্রাজ্যের মাথা বেশি করিয়া ঘুরাইয়া দিয়াছে, যাহাদের মন একেবারে সকল সংস্কৃতিদোষবর্জিত ছিল, যাহারা ইতিপূর্বে ইহার নিকটেও বাস করে নাই; তাহারাই এই ‘হঠাৎ-আলোর বলকানি’তে নিঃশেষে আত্মবিক্রয় করিয়াছে। ইহার সাহিত্যের নামে যাহা রচনা করে—সেই গল্প-উপন্যাস প্রভৃতিতে ইহাদের আত্মকথা নাই, ইহাদের নিজেদের দেশ ও সমাজের কোন ধারণা বা স্বজাতীয় সভ্যতার কোন ঐতিহ্য-সংস্কার নাই; ইহার যি ভাষায় লেখে, তাহাও যেমন ইংরেজীর আক্ষরিক প্রতিধ্বনি, তেমনই, যে জীবন ইহার ‘ভণিয়া’ থাকে তাহাও বিদেশীর নিকটে ধার-করা একটা মুখোশ মাত্র; সেইজন্য ইহার জীবনকে ‘প্রকাশ’ করিতে পারে না—‘ঘোষণা’ করিয়া থাকে। ইহাদের রচনায় বাঙালী কখনও তাহার প্রাণের গভীরতম আকৃতির সাদা পাইবে না—বাংলাদেশের জল-মাটি আকাশ-বাতাসের একটা তাজা রংও তাহাতে খুঁজিয়া পাইবে না। ইহাদের জন্মলাভ হইয়াছে দেহে নয়—মনে, অর্থাৎ কতকগুলি কেতাবী বুলির জগতে। জীবন যে কি, তাহা ইহার জানে না; জীবনকে জানিতে হইলে যে একটিমাত্র উপায় আছে, সেই উপায় ইহাদের নাই,—ভূতপিশাচদের যেমন থাকে না। দেহ ধারণ করিয়া, তপ্ত হৃদপিণ্ডের স্পন্দন-পুলকে দেহীগণের সমাজে মিশিয়া, দেহেরই তীব্র উৎকর্ষায় মনকে ভাব-কল্পনার দিব্যদৃষ্টিতে উষ্ম করার যে পরম কবি-সৌভাগ্য, তাহা ইহাদের পক্ষে সম্ভব হইবে কেমন করিয়া? ইহার জীবনের সেই অনুভব-বাণীর পরিবর্তে ‘স্লোগান’ গাহিয়া কৃতার্থ হয়। দেহের শিরা-স্নায়ুতন্ত্রীর যে আঘাত-বেদনা প্রাণের দিব্যবেদনায় রূপান্তরিত হইলে, তবেই সাহিত্য-সৃষ্টি সম্ভব হয়—সে বেদনা ইহার বোধ করা দূরে থাকুক—কল্পনা করিতেও পারে না; অর্থাৎ, কাব্য-সৃষ্টি করা দূরের কথা, কাব্যরস আন্বাদনের শক্তিও ইহাদের নাই। অতএব, সাহিত্যিক-নামলুক, আত্মকৃতিত্ব-মুগ্ধ, জন্মমাত্রেরই মৃত্যুব্যাধি-গ্রস্ত—এবং সেইজন্যই, আত্মরক্ষা-ব্যাকুল, দলগঠনপূর্বক-প্রোগাগাণ্ডা-নিপুণ—এই হতভাগ্যগণের সাহিত্যিক কীৰ্ত্তি সম্বন্ধে কিছু বলিবার আবশ্যিকতা নাই।

তবু এত কথাই বা বলিলাম কেন? বলিবার কারণ আছে। এ যুগে আমাদের সমাজে সাহিত্যের ধর্মসম্বন্ধে শিক্ষিত বিদ্বান ব্যক্তিরও যে বুদ্ধিব্রম

লক্ষ্য করিতেছি, তাহাতে যাহা চিরন্তন তাহাকেও সাময়িকরূপে পুনঃপ্রতিষ্ঠার প্রয়োজন হইয়াছে। বাংলাসাহিত্য এক্ষণে পণ্ডিতের গবেষণার বস্তু হইয়াছে— উচ্চশিক্ষার্থী ছাত্রগণকেও সেই গবেষণার ফলাফল ভোগ করিতে হয়। এতদিন যাহা মাসিক-সাহিত্য বা বৈঠকখানা-বিলাসের সামগ্রী ছিল, এক্ষণে তাহা বিশ্ব-সভার বিচারাধীন হইয়াছে; সেই বিচার গুরুতর গ্রন্থে নিবদ্ধ হইয়া স্থায়ী মূল্য দাবি করিতেছে। অথচ তাহাতেও সেই বৈঠকখানাস্থলভ বস্তুতা—অর্থাৎ, ব্যক্তিবিশেষের ব্যক্তিগত কৃতি ও মনোভাবের অবাধ গতি সমান অব্যাহত থাকে। কিছুদিন পূর্বে একজন বিশিষ্ট বিদ্বান ব্যক্তি বাংলা উপন্যাস সম্বন্ধে যে ঐতিহাসিক সমালোচনা-গ্রন্থ প্রকাশ করিয়াছেন, তাহাতে এতবড় পণ্ডিতকেও মূল সাহিত্য-বস্তু সম্বন্ধে ‘ধর্মসম্মুচ্যেতা’ দেখিয়া সন্তপ্ত হইয়াছি—কিন্তু বিস্মিত হই নাই; কারণ, এরূপ আলোচনায় যে বস্তুটির প্রয়োজন সর্বাপেক্ষা অধিক, তাহা আদৌ সহজলভ্য নহে, এমন কি, ‘ন মেধয়া ন বহনা শ্রুতেন’। তাই গ্রন্থখানির নানাস্থানে পাণ্ডিত্য ও বিচারবুদ্ধির যথেষ্ট পরিচয় থাকিলেও, অপর অনেক স্থলে যাহা আছে তাহাতে স্বতই বলিতে ইচ্ছা হয়—‘অশোচ্যানশোচয়ঃ প্রজ্ঞাবান্ধাঃ ভাষসে’। বুদ্ধি ও অবুদ্ধি, বিজ্ঞা ও অবিজ্ঞা, মোহ ও চৈতন্তের এমন অভূত সমাবেশ আর কোথাও দেখি নাই। এই গ্রন্থে বাংলা উপন্যাসের যে ধারাবাহিক পরিচয় গ্রন্থকার দিয়াছেন, তাহাতে তিনি ধারাবাহিকতার বেগ যেমন সম্বরণ করিতে পারেন নাই, তেমনই বস্তু ও অবস্তুর ভেদ একেবারে বিস্মৃত হইয়াছেন। বাংলাসাহিত্যের সর্বশ্রেষ্ঠ লেখকগণের সহিত, তিনি অতি-আধুনিক অপসাহিত্যিকদিগকেও যুক্ত করিয়াছেন—অতিশয় নির্মম বৈজ্ঞানিক-নিরপেক্ষতার সহিত, তিনি চন্দন ও বিষ্ঠাকে এক পাত্রে সঞ্চয় করিয়াছেন। যে সকল লেখকের সাহিত্যিক প্রতিভা তো দূরের কথা,—যাহারা বাংলা ভাষাও লিখিতে জানে না, তাহারা সাহিত্যের ইতিহাসে স্থান লাভ করিয়াছে! ভ্রম-লোকের ‘ইতিহাস’ সম্বন্ধে একটা এমনই সত্য সংস্কার আছে—যে, যাহা-কিছু কালের ধারায় প্রকাশ হয়, যাহা-কিছু ঘটিতে পারে বা ঘটিয়া থাকে, তাহাকেও তিনি সাহিত্যের ইতিহাসের অন্তর্ভুক্ত না করিয়া পারেন না; ইহাকেই বলে গবেষণা-কর্মের ‘thoroughness’। রসবোধ না থাকুক, পাণ্ডিত্যের বলেই তিনি যাহা বুঝিতে পারিতেন, তাহাও পারেন নাই; এইরূপ ইতিহাসে, অতিশয়

বর্তমান কালের সাহিত্য সম্বন্ধে কোন পণ্ডিতই বিস্তারিত আলোচনা করেন না—মত প্রকাশ করা তো দূরের কথা; কেন না, এ কথা কে না জানেন যে, কালের বিকিৎ দূরত্ব বা ব্যবধান না ঘটিলে—এ সকল বস্তুর ষথার্থ রূপ-নির্ণয় করা দুর্লভ। পণ্ডিত হইয়াও তিনি এটুকু সাবধানতা অবলম্বন করেন নাই। প্রথম হইতেই উপন্যাসের ধারাটিকে তিনি এমন বেগবান করিয়া তুলিয়াছেন যে, শেষে সে বেগ সামলাইতে না পারিয়া একেবারে পঙ্কগহ্বরে পতিত হইয়াছেন। এইরূপ ভ্রম হইবার কারণ আরও গভীর। গ্রন্থকারের সাহিত্যিক বিজ্ঞা আছে—বোধশক্তি নাই,—নিশ্চয়াত্মিকা বুদ্ধির একান্ত অভাব আছে। তিনি ‘উপন্যাস’ নামক রসরচনাকে মূলে যে সংজ্ঞার দ্বারা নির্দ্ধারিত করিয়া লইয়াছেন, সেই সংজ্ঞাই ভুল। সাহিত্য যে একটা রূপকর্ম—একটা আর্ট, এবং আর্ট-কল্পিত সৃষ্টির কতকগুলি বাহ্য লক্ষণ লইয়া ইতিহাস-রচনা সম্ভব হইলেও, যেহেতু তাহার ভিতরকার রস-প্রেরণা স্বতঃস্ফূর্ত, স্বয়ংপূর্ণ ও স্বয়ম্প্রকাশ—এজন্য এক যুগের আর্টের সঙ্গে আর এক যুগের আর্টের কোন এভোলিউশন-ঘটিত পৌর্কপাৰ্থ্য নাই;—এই তত্ত্ব স্বীকার না করিলে, সাহিত্যের ইতিহাস লিখিতে বসিয়া নানাবিধ ভ্রমে পতিত হওয়াই স্বাভাবিক। যুগ, দেশ ও সমাজের বহিরঙ্গনে যাহার বিকাশ, তাহাতে যুগপ্রভাব বা যুগলক্ষণ যতই থাকুক না কেন, এবং তাহারই সাহায্যে একটা ঐতিহাসিক ধারা নির্ণয় করা সম্ভব হইলেও, এইরূপ সাহিত্যের ইতিহাস যিনি লিখিবেন তিনি যেন কোন মতবাদকে প্রত্যাখ্যান না দেন। ‘উপন্যাস’ বলিতে যদি বস্তুনিষ্ঠ কল্পনার একরূপ সাহিত্য-সৃষ্টি বুঝিতে হয়, এবং সেই মাপকাঠিতে মাপিতে মাপিতে যতই বর্তমানের দিকে আসি, ততই উৎকৃষ্টতর উপন্যাসের সন্ধান পাই বলিয়া বিচার-কর্ম আরও সহজ হইয়া উঠে, এবং শেষ পর্য্যন্ত অতি-আধুনিক উপন্যাসের তুলনায় বহুমুখের উপন্যাসও কোন হিসাবে নিকৃষ্ট হইয়া পড়ে—তবে বুঝিতে হইবে, সমালোচকের দিক্ভ্রম হইয়াছে, তাঁহাকে আবার গোড়া হইতে পথ বাহিতে হইবে। যদি সমালোচকের মুখে এমন কথা শুনি যে, বাংলাসাহিত্যের রূপকর্মের বিকাশধারায় ভারতচন্দ্র আগস্টক, তাঁহার কাব্য সেই বিকাশের ধারাকে ব্যাহত করিয়াছে—কারণ, তাহা ‘ময়নামতীর গান’ বা ‘মৈমনসিংহ-গীতিকা’র পথ রোধ করিয়া সত্যকার উপন্যাস-সৃষ্টির বাধা হইয়া দাঁড়াইয়াছে—তবে ইহাই বলিব, সাহিত্য-বিচার একরূপ ব্যক্তির কাজ নয়। ইংরেজী সাহিত্যের ইতিহাস ও সমালোচনার

বাধা রাজপথে স্বচ্ছন্দে ভ্রমণ করিবার যে শক্তি তিনি অর্জন করিয়াছেন, তাহার দ্বারা ওই সাহিত্যের পরীক্ষার্থী ছাত্রগণকে ভালরূপে শিক্ষিত করন—ইংরেজী সাহিত্যসম্বন্ধে কোন চিন্তার কারণ নাই, সেখানে কোন বিষয়ে কাহারও ভুল করিবার শক্তিই নাই। বাংলাসাহিত্যের সমালোচনায় যে বস্তুর প্রয়োজন, তাহা কেবল অজ্ঞিত বিজ্ঞাই নয়, তাহার জ্ঞান কিছু মূলধনও চাই। লজ্জার কথা এই যে, যিনি বাংলাসাহিত্যের বিচার করিতে বসিয়াছেন, তাঁহার বাংলাভাষা সম্বন্ধেও সেই জ্ঞান নাই, যাহা দ্বারা অতি সহজেই নির্ধারণ করা যায়—কোন ব্যক্তি লেখকপদবাচ্য, কে নয়; আমি আর সকল লক্ষণ ছাড়িয়া দিলাম। কিন্তু এই সকল গ্রন্থের (এমন গ্রন্থ আরও আছে, ঠিক এই শ্রেণীর পণ্ডিতের রচিত) প্রচার সহজ ও অনিবার্য হওয়ায়, বাংলা সাহিত্যের (বিশেষত বহুজন-পঠিত ও জনপ্রিয় উপন্যাস প্রভৃতির) সম্বন্ধে অনেক ভুল ধারণার উৎপত্তি হইতেছে। অতএব আমি যে এই নিতান্ত সাময়িক ঘটনাকেও এ আলোচনায় এতখানি স্থান দিতেছি কেন, তাহা সকলে বুঝিতে পারিবেন; আমি বলিব, এ সমাজে সাহিত্যের আলোচনা করিতে গেলে এ দুর্গতিভোগ অনিবার্য।

বর্তমানে বাংলাসাহিত্যের উপন্যাস-সম্পদের কথা বলিতে বসিয়াছি—সে প্রসঙ্গে কয়েকজন কৃতী লেখকের কৃতিত্বের কিঞ্চিৎ পরিচয় দিব। কোন্‌গুলিকে কেন বাদ দিয়াছি, সে কৈফিয়ৎ এতক্ষণ সবিস্তারে দিয়াছি, তথাপি, একটা বিষয় উল্লেখ করিতে ভুল হইয়াছে। আমি, সেই সকল লেখককেও আমার এ আলোচনার যোগ্য মনে করি না, যাহারা কেবল ভাবার একটু পরিচ্ছন্নতা অথবা গল্প বলিবার একটা ভঙ্গিমাত্র আয়ত্ত করিয়াছেন, কিন্তু যাহাদের রচনা সর্বের অক্ষুণ্ণতামূলক, সত্যকার সৃষ্টি নহে। সৃষ্টি করিতে হইলে যে দৃষ্টির আবশ্যক, সে দৃষ্টি যে ইহাদের নাই, তাহার প্রমাণ—ইহারা সিনেমা-ছবির মত কতকগুলি কৌশল শিখিয়া লইয়াছেন; আধুনিক পাঠকের হৃদয়গ্রাহী কতকগুলি নিকটই সেন্সিটিভ—এবং অতি গভীর সহনশক্তি ও দার্শনিকতার ভঙ্গিসহকারে তাহাদের শ্রেষ্ঠতা প্রতিপাদনের কৌশল তাঁহারা আয়ত্ত করিয়াছেন। বলা বাহুল্য, এগুলি হয় ‘কমরেডী’ ভাববিলাস, নয় ‘তরুণ-তরুণী’-বিদ্রোহের অতি তেজস্বর টনিক। আমি এগুলিকেও বাদ দিয়াছি।



পত কয়েক বৎসরের বাংলা উপজ্ঞান-সাহিত্যের সহিত ঐহাদের পরিচয় আছে, তাঁহারা আমার সহিত একমত হইবেন যে, আধুনিক বাংলা উপজ্ঞানিক-গণের মধ্যে যশের নিঃসংশয় অধিকারী হইয়াছেন এই কয়জন—শ্রীযুক্ত বিভূতিভূষণ বন্দ্যোপাধ্যায়, শ্রীযুক্ত তারাশঙ্কর বন্দ্যোপাধ্যায় ও 'বনফুল' (শ্রীযুক্ত বলাইচাঁদ মুখোপাধ্যায়) । আমি এই কয়জনকে প্রথম গণনীয় করিয়াছি এইজন্য যে, একগে ঐহাদের শক্তির পূর্ণ পরিচয় পাওয়া গিয়াছে—এবং সে শক্তি যে-কোন সাহিত্যের শ্রীবৃদ্ধিকর । ঐহাদের সমসময়ে, কিছু পূর্বে বা পরে, আরও কয়েকজন লেখক শক্তিমান হিসাবে বিশেষ দৃষ্টি আকর্ষণ করিয়াছেন—আগে তাঁহাদের সম্বন্ধেই বলিব । ঐহাদের মধ্যে সর্বজ্যেষ্ঠ এবং নূতনের পথিকৃৎ হিসাবে, শ্রীযুক্ত শৈলজানন্দ মুখোপাধ্যায়ের নাম সর্বপ্রথমে উল্লেখ করিতে হয় । শৈলজানন্দই সর্বপ্রথমে বাংলা সাহিত্যে 'regional' বা অঞ্চলবিশেষ ও সমাজবিশেষের জীবন উপজ্ঞানের বিষয়ীভূত লিখিয়াছিলেন । তাঁহার 'কয়লাকুঠি'র গল্পগুলিতে একটা নূতন রসের সৌরভ পাওয়া গিয়াছিল । পরে 'অতসী' ও 'নারীমেধ' নামক দুইখানি গল্পগ্রন্থে তাঁহার যে শক্তির পরিচয় পাইয়াছিলাম, তাহাতে একটি মৌলিক দৃষ্টি-ভঙ্গি আছে । 'নারীমেধ'-এর গল্পগুলিতে যে-ধরনের 'রিয়ালিজ্‌ম' আছে, তাহা বাংলায় প্রথম, এবং বোধ হয়, আজিও অপ্রতিদ্বন্দ্বী । আমার মনে হয়, শৈলজানন্দের সাহিত্যিক প্রতিভা ও কীর্তির পরিচয় ইহার অধিক আবশ্যক হইবে না । পরবর্তীগণের মধ্যে এইরূপ বৈশিষ্ট্য দাবি করিতে পারেন—শ্রীযুক্ত জগদীশচন্দ্র গুপ্ত, শ্রীযুক্ত শরদিন্দু বন্দ্যোপাধ্যায়, শ্রীযুক্ত সরোজ রায়চৌধুরী ও শ্রীযুক্ত বিভূতিভূষণ মুখোপাধ্যায় । ঐহাদের প্রত্যেকেরই কবি-দৃষ্টি স্বতন্ত্র ।

এইখানে আর একটি কথা বলা আবশ্যক । আমি লেখকদিগের পর পর যে নামোন্মেষ করিতেছি, তাহা বয়স বা গুণাঙ্কসারে নয়—তাঁহাদের সাহিত্যিক খ্যাতিলাভের কালক্রম অঙ্কসারে, এবং তাহাও আমার নিজের বেরূপ স্মরণ হয় সেইরূপ । শ্রীযুক্ত জগদীশচন্দ্র গুপ্ত হয়ত শৈলজানন্দ অপেক্ষা বয়োজ্যেষ্ঠ, কিন্তু শৈলজানন্দ তাঁহার পূর্বেই খ্যাতিলাভ করিয়াছিলেন ; জগদীশচন্দ্র এখনও যথোচিত প্রতিষ্ঠা লাভ করেন নাই বলিয়া মনে হয় । কিন্তু ইহার রচনাতেও একটি অতিশয় মৌলিক কল্পনা-ভঙ্গি আছে, এবং তাহাতে টাইলের লক্ষণও আছে ।

আদিম তাঁহার সেই গল্পগুলির কথা বলিতেছি, যাহাতে মানুষের জীবনে একটা অতিশয় দ্বন্দ্বহীন ও ফুর্কের মৈব-নির্ব্যাক্তনের রহস্য ঘনাইয়া উঠিয়াছে ; মনে হয়, জীবনের আলোকোজ্বল ~~স্বপ্ন-স্বপ্ন~~ এক প্রান্তে একটা অন্ধকারময় কোণ আছে, সেখানে একটা নামহীন আকারহীন হিংস্রতা সর্কষণ ও পাতিয়া বসিয়া আছে—মানুষ তাহারই যেন এক অসহায় শিকার ; তাহার নিষ্ঠুরতাও তত ভয়ঙ্কর নয়—যত ভয়ঙ্কর তাহার সেই অতি-প্রাকৃত রূপ। যাহাকে আদিম মানবের কুসংস্কার, অথবা বিকারগ্রস্ত রোগীর হুঃস্বপ্ন বলা যায়—সত্য ও শিক্ষিত মানুষের স্বপ্ন বুদ্ধি যে সকল ঘটনাকে কল্পনারও বিরোধী বলিয়া মনে করে, জগদীশচন্দ্র তেমন ঘটনাকেও তাঁহার গল্পে—শুধু সম্ভাব্যতা নয়—এমন বাস্তবতায় মণ্ডিত করিয়াছেন যে, ইংরাজীতে যাহাকে *bizarre* বলে, সেই ভাব আমাদের কাছে অভিজ্ঞত করে। মনে হয়, আমরা এমন একটা বস্তুর সম্মুখীন হইয়াছি যাহা মানুষের বুদ্ধি বা জাগ্রত-চৈতন্তের অগোচর ; সৃষ্টির নেপথ্যে যে পাঞ্চভৌতিক শক্তি প্রচ্ছন্ন রহিয়াছে—এ সকল যেন তাহারই কচিং-দৃষ্ট মূর্তি ; আদিম মানুষের অপ্রবুদ্ধ চেতনায় ইহারই ছায়া পড়িত। কিন্তু এখনও সেই সকল অনুভূতি হয় তো আমাদের চেতনার নিজস্ব-স্তরে সঞ্চিত আছে, অতি-প্রাকৃতের সেই বিরাট বেষ্টনী যে এখনও আমাদের কাছে ঘেরিয়া রহিয়াছে—নানা ইজিতে ইসারায় আমরা সে কথা স্মরণ করিতে বাধ্য হই। জগদীশচন্দ্রের একটি গল্পে, মৃত্যুর পরেই পুনর্জন্মের ঘটনা, এবং সেই সম্পর্কে একটি স্বপ্ন, এমনভাবে বিবৃত হইয়াছে যে—যাহা একটা লৌকিক কুসংস্কার মাত্র তাহাও গুরুতর রহস্যভারের মত মনের উপরে চাপিয়া বসে। এই ঘটনাটি সত্যঘটনা বলিয়াই মনে হয়, অর্থাৎ, কোন একটা অর্থে কোথাও ঘটিয়া থাকিবে ; কিন্তু লেখকের নিজস্ব কল্পনা ও রচনা-ভঙ্গি ইহাকে এমন একটি রূপ দিয়াছে যে, তাহা অপেক্ষা *bizarre* বা *uncanny* বাংলা গল্পে আর কোথাও ফুটিয়াছে বলিয়া স্মরণ হয় না। এই দৃষ্টি ঠিক রসদৃষ্টি নয়, কারণ, ইহা *normal* বা স্বপ্ন নয় ; তথাপি ইহাও আটের পর্যায়ভুক্ত ; জগদীশচন্দ্র ইহাতেও যে মৌলিকতার পরিচয় দিয়াছেন, তাহাতে তিনি যে একজন শক্তিশালী লেখক, সে বিষয়ে সন্দেহ নাই।

শ্রীযুক্ত শরদিকু বন্দ্যোপাধ্যায় একালেও যে ধর্মের রোমান্সকে বাংলা উপন্যাসে বাচাইয়া রাখিয়াছেন, উক্ত তিনি বাঙালী পাঠকমাজেরই ধর্মবান্দাই।

পাঠকমাত্রেয় বলিলাম, তাহার অর্থ এই নয় যে, তিনি অতি সাধারণ স্তরের রসিক-সমাজকেই আনন্দ দিয়া থাকেন। বাহারা তাঁহার রচনা পাঠ করিয়াছেন তাঁহারা জানেন যে, শরদিন্দুবাবুর রচনাগুলির মূলে একটি সুকর্ষিত ও সুমার্জিত কবি-মন আছে; তাঁহার কল্পনা প্রাকৃতজনসুলভ নয়, অতি উৎকৃষ্ট রুচি ও কাব্যকলাবৈভব তাহাকে পুষ্ট করিয়াছে। আমরা এ যুগের কাব্যে যে সুরটি হারাইতে বসিয়াছি—শরদিন্দুবাবু তাহাকেই তাঁহার সহজাত কাব্যসংস্কারের বলে কতকটা বাঁচাইয়া রাখিয়াছেন। যাহুবের মনে যে চিরন্তন রহস্যরসপিপাসা—দূর ও দুর্জয়ের প্রতি তাহার যে একটি অবশ আকর্ষণ আছে; কালের যে যাহুশক্তি প্রকৃতি ও সমাজের নিত্য-রূপটিকেও অনিত্য-মনোহর করিয়া তোলে বলিয়া, এককালের অতি-পরিচিত বাস্তবও একালের স্বপ্নলোকে উত্তীর্ণ হয়; এবং অতীতকালের অস্পষ্ট কুশাশার মধ্য দিয়া এই জীবন ও জগৎকে অসীম রহস্যের আংশিক প্রকাশ মনে করিয়া আমরা পরমোৎকর্ষা অহুভব করি—সেই রসের সেই কল্পনা শরদিন্দুবাবুর রচনায় যেখানে ষতটুকু সাফল্যমণ্ডিত হইয়াছে, তাহাই বর্তমান বাংলাসাহিত্যে তাঁহার বিশিষ্ট দান।

শ্রীযুক্ত সরোজকুমার রায়চৌধুরী তাঁহার তিনখানি উপন্যাস বা উপন্যাস-ত্রয়ীতে ('ময়ূরাক্ষী', 'গৃহকপোতী' ও 'সোমলতা') যে সৃষ্টিশক্তির পরিচয় দিয়াছেন, তাহাও অনন্তসুলভ। ইহাতে যেমন একটি বিশেষ অঞ্চলের বিশেষ সমাজের জীবনালেখ্য অপূর্ণ কলানেপুণ্যসহকারে অঙ্কিত হইয়াছে, তেমনই, সেই সমাজের অন্তরে পূর্ণ প্রবেশ করিবার যে সহাহুভব-শক্তির পরিচয় তিনি দিয়াছেন, তাহাও একটি উৎকৃষ্ট কবিশক্তি। যে ভূমি, যে প্রতিবেশ ও যে সংস্কৃতির পট-ভূমিকায় তিনি জীবনের এই এক নূতন রূপ আবিষ্কার করিয়াছেন, সে যে কত বাস্তব তাহা অহুভব করি তাঁহার স্টাইলে—ভাষার অতিশয় সংক্ষিপ্ত সরলতায়, ভাবালুতার সতর্ক সংঘমে। সরোজকুমারও 'রিয়ালিস্ট'; বাস্তবের অন্তরালে যে রহস্য আপন অর্থ-গভীরতায় প্রচ্ছন্ন রহিয়াছে—কাহারও মনঃকল্পিত অর্থ বাহার নাগাল পায় না, সেই রহস্যাবরণের এক প্রান্ত তুলিয়া ধরিবার জন্যই, তিনি Real-এর পূজা করেন; তাহাকে লাঠির আঘাতে ভাঙিয়া যুর্ধের মত সকল রহস্য নষ্ট করিবার প্রয়াসী তিনি নহেন। এ-জাতীয় উপন্যাস ইহাই প্রমাণ করে যে, জীবনের বহিঃকশোভা ষতই সাধারণ বা তুচ্ছ হউক, সত্যকার দৃষ্টি বাহার আছে,—

যে পুঁথির পরিবর্তে প্রাণকে প্রাণাণ্য করিয়াছে, যে 'বুলির' বদলে মাহুবকে চাহিয়াছে, এক কথায়, যে এই সৃষ্টির প্রতি শ্রদ্ধাবান—সে পথের উপরকার সর্ববিধ পদচিহ্ন হইতেই অনন্তের তীর্থযাত্রার সঙ্কেত ধরিয়া দিতে পারে; তাই এই উপজাস-জয়ীর মধ্যে যে বৈরাগীর আধড়া এবং যে বৈষ্ণব-বৈষ্ণবীর যুগল-চিত্র লেখকের তুলিকায় ফুটিয়া উঠিয়াছে, তাহাতে কাল, দেশ ও সমাজের আবরণ ভেদ করিয়া—এমন কি, প্রবৃত্তি বা দেহসংস্কারকেও অতিক্রম করিয়া—মাহুবের ক্ষুধার গূঢ়তম রূপ ও তাহার পরম তৃপ্তির আশ্বাস উকি দিয়াছে।

বিভূতিভূষণ মুখোপাধ্যায়ের ছোটগল্পগুলিতে রসের আর এক ভিমান—আর এক সৌরভ আমাদের সচকিত করে, যেন শ্রীশ্রীরাধাগোবিন্দজীর মন্দির-সংলগ্ন পাকশালায় চিরন্তন কিশোর-কিশোরীর রসনাতৃপ্তির জন্ত, অতি নির্লোভ ভক্তিম্যান পূজারী শুচিবাসে ও শুদ্ধচিত্তে পায়স-ব্যাঞ্জন পাক করিতেছেন। সে পাকের তিনটি রস প্রধান—সখ্য, বাংসল্য ও মধুর। শিশুর রূপ ধরিয়া ঠাকুর যে রসের লীলায় আমাদের ঘর-সংসার আলো করিয়া রাখেন, সে রসের পাকও যেমন,—ঘরের বাহিরে, ব্রজ-বনে, তাঁহার দুর্লভিত বাল-চাপল্যের কোতুক-লীলা আমাদের বয়োভার-পীড়িত মনকেও ক্ষণেকের জন্ত যে রসাবেশে লঘু করিয়া দেয়, তাহার পাককর্মেও বিভূতিবাবুর সমান নৈপুণ্য। তাঁহার গল্পগুলিতে এই লীলা-রস উৎকৃষ্ট 'হিউমার' হইয়া উঠিয়াছে; সে হিউমার যে সূক্ষ্ম পর্দাগুলির উপরে গভীরত করিয়া থাকে, তাহার আশ্বাদনও অতি সূক্ষ্ম রসবোধসাপেক্ষ। তাঁহার রচনার সর্বপ্রধান গুণ—সৌকুমার্য; এই সৌকুমার্য কেবল ভাব, বিষয় বা উপকরণগতই নয়,—সকল রচনার অন্তরালে আমরা একটি অতিশয় সংযমী, পর-সহিষ্ণু, নির্বিরোধ, কোমল-হৃদয়, অথচ তীক্ষ্ণ রসদৃষ্টি-সম্পন্ন শিল্পী-চরিত্রের আভাস পাই। এই ব্যক্তিত্বই তাঁহার স্টাইল—ইহাই তাঁহার রচনার 'হিউমার'-গুণের কারণ। তাঁহার হাসিও যেমন স্বচ্ছ ও নির্মল, অশ্রুও তেমনই,—যেমন করুণ তেমনই মধুর। জীবনের হাসি ও অশ্রুকে পাশাপাশি গাঁথিয়া একই মণিমালার তাহাদের অভিন্নতা সম্পাদন করার যে উৎকৃষ্ট রস-দৃষ্টি—তাহারই একটি সুকুমার ললিতভঙ্গি বিভূতিভূষণের রচনাকে লক্ষণীয় করিয়াছে। সম্প্রতি তিনি 'নীলানুরায়' নামে যে স্ববৃহৎ উপজাস প্রকাশিত করিয়াছেন, তাহাতে তিনি তাঁহার শক্তিকে আর একটু ছরছ কর্ত্তে প্রেরিত করিয়াছেন; এবার তিনি রসের বাহা সার—সেই

উজ্জ্বলতম মধুর রসের ভিমান করিয়াছেন। এ রসের পাক-নৈপুণ্যে শুধুই শিরী-
 মন নয়—জীবনের অতলকে মহন ও তাহার গরল হইতে অমৃত—মৃত্যুর হাত
 হইতেই মৃতসঞ্জীবনী—উদ্ধার করার যে কবি-শক্তি, তাহাই বিশেষ করিয়া
 প্রয়োজন। এই উপস্থানে বিভূতিবাবু সে কাজ করেন নাই, তাঁহার অভিপ্রায় এত
 উচ্চ বা দুঃসাহসিক নয়। তথাপি, তাঁহার নিজস্ব পাক-প্রণালীতে বা নিজের
 ব্যক্তি-চরিত্রের সেই স্টাইলে, তিনি এই রসের যে রূপটি নিজেরই অভিজ্ঞতার পট-
 বস্ত্রে রঙিন করিয়া তুলিয়াছেন, তাহাতে সেই বৃন্দাবনী বাণির সুরেও একটু নূতন
 সূক্ষ্মতা যুক্ত হইয়াছে। বিভূতিবাবুকে আমি এক ধরনের বৈরাগী কবি-শিল্পী
 বলিয়াছি—এ উপস্থানে তাঁহার সেই বৈরাগ্যের পূর্ব-আশ্রমের ছায়া খুব গভীর
 হইয়া পড়িয়াছে; frustration ও tragic waste-এর মর্মান্তিক নিখাস—
 সূচিরবিরহের নৈরাশ ও বিধুরতা—এই প্রেমের কাহিনীতে নিখসিত হইয়াছে।
 জীবনের মাঠে বাটে চারিদিকে কত সুরে কত হৃদয় সেই এক বাণির সুরে ব্যাকুল
 হইয়া উঠে; অনেক স্থলেই স্পষ্ট অভিসার-সঙ্কেতও পাওয়া যায়, কিন্তু শেষ পর্যন্ত
 পৌঁছানো আর হয় না। কালিন্দীর ক্রুর-কৃষ্ণ জলধারা চিরবিচ্ছেদের অশ্রু-
 তরঙ্গিণীর মত প্রেমকে দুই পারে ভাগ করিয়া রাখিয়াছে। এই ‘একা-নদী’ই
 ‘বিশ-ক্রোশ’ হইয়া উঠে, বার বার লগ্নভ্রষ্ট হয়, পারের নৌকা ছাড়িয়া দেয়—তখন
 খেয়াঘাটে গড়াগড়ি দিয়া জীবনের বাকি সঙ্ক্যাটুকু শেষ করিতে হয়। এই
 উপস্থাসগত উপকরণের বেশির ভাগ—লেখকের নিজ জীবনের অভিজ্ঞতা হইতেই
 সংগৃহীত বলিয়া মনে হয়, তাই ইহার প্রত্যেক চিত্রে যেমন বাস্তবনিষ্ঠা আছে,
 তেমনই প্রতি কথার মধ্যে ভাবানুভূতির অতি সূক্ষ্ম ও সুকুমার, অথচ দৃঢ় ও
 অসংশয় অভিব্যক্তি ঘটিয়াছে। এখানেও জীবনকে দেখিবার একটি ভঙ্গি ফুটিয়া
 উঠিয়াছে—বিভূতিবাবুও জীবনেরই রূপকার। কিন্তু এই উপস্থানে তিনি নিজের
 প্রাণকেই জীবন-পূজায় পুরোহিত করিয়াছেন—নিজের মনের যে গঠন, এবং
 ধ্যানের যে ধরন, তাহার উর্ধ্বে উঠিতে পারেন নাই; যে বাস্তব হয়তো তাঁহারই
 নিজের জীবনে অচ্ছেদ্য বলরীর মত জড়াইয়া আছে, তাহাকে বৃহত্তর করণার
 বলে কুসুমিত করিতে পারেন নাই। তিনি তাঁহার নিজের স্মৃতিরাশি
 সত্যকে অস্বীকার করিতে পারেন নাই বলিয়া, যে-প্রেম জীবনের সহিত যখন
 পরাজিত হইয়াও মানুষকে আর এক মহিমালোকে বরমাল্য পরাইয়া দেয়—

tragic waste-এর মধ্যেও যে সাহসী আমাদের অন্তরের অন্তরালে নিগূঢ় উৎসমুখে উৎসারিত হয়—চিরবিচ্ছেদের মধ্যেও ভাব-সম্মিলনের যে অমৃত সেই এক বাণীর সুরেই করিত হইতে থাকে—তাহার সন্ধান ইহাতে নাই। এমন একখানি উপন্যাসের সমালোচনা সহজ নয়; জীবনকে তিনি যেমন দেখিয়াছেন—সে দেখা যেমনই হউক, তাহাতে seriousness ও sincerity থাকিলে—এবং তাহার বাণী-রূপ সার্থক হইলেই হইল; ইহার অধিক দাবি করা অশ্রদ্ধ। কিন্তু আমাদের উপন্যাসগুলিতে কেমন যেন শেবরক্ষা হয় না, জীবনের খণ্ডচিত্র-গুলি পর পর একটি সূত্রে সুন্দর গাঁথা হইয়া থাকে, কিন্তু সেই সূত্রের দুই মুখ বুক হইয়া একটি সুসম্পূর্ণ সুমণ্ডলায়িত কাহিনী হইয়া উঠে না। তাহার কারণ—‘রিয়্যালিজম’ নয়; আমি কাব্যে সেইরূপ রিয়্যালিজম মানি না; একমাত্র কারণ, আত্ম-নিরপেক্ষভাবে জীবনকে দেখিবার যে দৃষ্টি, তাহা আমাদের লেখকগণের নাই; আমাদের সকল কাব্যই lyrical—আত্মকেন্দ্রিক। আরও কারণ এই যে, আমরা ভাব-রসিক, জীবনের রণস্থল হইতে আমরা সরিয়া যাই; তাই প্রেম আমাদের কর্মশক্তির প্রেরণা নয়—ধ্যান-কল্পনার বস্তু। লেখক এই উপন্যাসেও তাহা স্বীকার করিয়াছেন; এ উপন্যাসের নায়ক-চরিত্রে কর্তব্যের নির্মমতা বা প্রেমের আত্মবিশ্বাস—কোনটাই নাই, তাই যে ট্র্যাজেডির পূর্ণতর বিকাশ ইহাতে সম্ভব ছিল, পুরুষের শক্তিহীনতার জন্ত তাহা ঘটতে পারে নাই, উপন্যাসটিও কাহিনী-হিসাবে পূর্ণাঙ্গ হইয়া উঠে নাই।

তথাপি বিভূতি মুখোপাধ্যায়ের যে পরিচয় দিলাম, আশা করি, তাহাতে কাহারও সন্দেহ থাকিবে না যে, বর্তমান বাংলা উপন্যাসে আমরা একজন শক্তিশালী লেখকের অভ্যুদয় দেখিতেছি—শক্তি বলিতে যাহা বুঝায়, সেই বিশিষ্ট দৃষ্টিভঙ্গি বা স্টাইল তাঁহার রচনায় সুস্পষ্ট হইয়া উঠিয়াছে।

এ পর্য্যন্ত আমি তিন জন অপেক্ষাকৃত বড় শিল্পীর পরিচয় স্থপিত রাখিয়াছি, তাহার কারণ, তাঁহাদের সহজে একটু পৃথক আলোচনার প্রয়োজন হইবে। বর্তমানে খ্যাতিলাভ করিয়াছেন বা ইতিমধ্যেই বিশেষ দৃষ্টি আকর্ষণ করিয়াছেন এমন আরও কয়েকজনের কথা এইখানেই বলিব। ইহাদের মধ্যে মনোজ বসু,

মাণিক বন্দ্যোপাধ্যায়, রামপদ মুখোপাধ্যায়, 'সম্বন্ধ', অমলা দেবী ও প্রমথনাথ বিশ্বীর নাম উল্লেখযোগ্য।

শ্রীযুক্ত মনোজি বহু বয়সে ইহাদের অনেকেরই অগ্রজ, এবং গল্প-লেখক হিসাবেও যথাসময়েই সকলের দৃষ্টি আকর্ষণ করিয়াছিলেন। কিন্তু তাঁহার রচনা খাটি সাহিত্যিক-গুণযুক্ত হইলেও শেষ পর্যন্ত সৃষ্টির প্রাচুর্য বা দৃষ্টির মৌলিকতা রক্ষা করিতে পারে নাই; রবীন্দ্র-শিষ্য কবিগণের মতই, তাঁহার মধ্যেও যেটুকু শক্তির লক্ষণ আছে, তাহা রবীন্দ্রপ্রভাবের ফল—সেই সাহিত্যেরই একটা জের বলা যাইতে পারে। তিনি সেই সাহিত্যেরই প্রাস্তটিতে প্রায় একই প্যাটার্নের কিছু কারুকর্ম করিয়াছেন—নূতন কিছু যোগ করিতে পারেন নাই।

মাণিক বন্দ্যোপাধ্যায়ের 'দিবারাত্রির কাব্য' ও 'পুতুলনাচের ইতিকথা'য়—বিশেষত প্রথম উপন্যাসখানিতে—এই তরুণ লেখকের যে প্রতিভার লক্ষণ আমাকে আশাষিত করিয়াছিল, দুঃখের বিষয়, পরে তাঁহার লেখাগুলিতে রচনার যে ভঙ্গি ও কল্পনার যে দৈন্ত উত্তরোত্তর প্রকট হইতে লাগিল, তাহাতে তাঁহার সেই শক্তির অপচয় লক্ষ্য করিয়াছি। প্রথম দিকের গল্পগুলিতে কাব্য-কল্পনা ও মনস্তত্ত্বের যে সমন্বয়, এবং নারীচরিত্র-বিশ্লেষণে যে অপূর্ব ভঙ্গির পরিচয় পাইয়াছিলাম, লেখকের বয়সের তুলনায় তাহা বিস্ময়কর বটে। কিন্তু পরে, সৃষ্টিকল্পনাকে সম্পূর্ণ বিদায় দিয়া তিনি সেই দৃষ্টি হারাইয়াছেন—চিন্ময়-বাস্তবের পরিবর্তে জড়-বাস্তবের উপাসনা তাঁহাকে পাইয়া বসিয়াছে; তাঁহার রচিত কাহিনীগুলিতে সে রস আর কোথাও নাই। অতিশয় কুলী কুরূপ ও অকিঞ্চিৎকর যাহা তাহারই পুঙ্খানুপুঙ্খ বর্ণনা এবং ভাষারও অহুরূপ অপরিচ্ছন্নতার ফলে, তিনি শেষে রূপকার কবির আসন হইতে রূপ-বিদ্রোহী কর্মকারের পদবীতে নামিয়াছেন। তাঁহার 'পদ্মা-নদীর মাঝি' বিষয়বস্তু ও নামের জোরেই পদ্মাপারের পাঠকগণের বড় প্রিয় হইয়াছে; এই পুস্তকে তাঁহার শক্তির পরিচয় আছে, কিন্তু সে শক্তি রসসৃষ্টির শক্তি নয়।

শ্রীযুক্ত রামপদ মুখোপাধ্যায় পশ্চিমবঙ্গ বা রাঢ়ের ধ্বংসোন্মুখ গ্রাম—সেই সমাজ ও তাহার বিগতশ্রীর চিত্ররচনার যে দক্ষতা দেখাইয়াছিলেন—তাহার প্রতি যে কবিস্বপ্নের মমতা তাঁহার কল্পনাকে উজ্জীবিত করিয়াছিল, তাহাতেই তিনি বর্তমান গল্পলেখকগণের মধ্যে একটি আসন পাইবার অধিকারী। ইহার পূর্বে শ্রীযুক্ত

মনোজ বর প্রায় এই ধরনের গল্প লিখিয়া সকলের দৃষ্টি আকর্ষণ করিয়াছিলেন, কিন্তু তাঁহার গল্পগুলিতে কল্পনার কবিত্ব আরও অধিক।

‘সম্বন্ধ’ (শ্রীযুক্ত অমল্যকুমার দাসগুপ্ত) কয়েকটি হাস্যরসাত্মক গল্প লিখিয়া আমাদের চমকিত করিয়াছেন; আমরা পূর্বে ইহার কোন নোটিস পাই নাই, অথচ গল্পগুলির লিপিকৌশল পাকা ওস্তাদের মত। নিছক কৌতুক বা Fun, এবং কোথাও বা তাহার সহিত অতিশয় সূক্ষ্ম Satire এই লেখকের হাতে এমন একটি নূতন ভঙ্গি লাভ করিয়াছে যে, তাঁহার সেই ছুট-সরস্বতী বাণীমূর্তিতেই আবির্ভূত হইয়াছেন। ‘সম্বন্ধ’ গল্পীর ভাবের গল্পও লিখিয়াছেন, তাহাদের অধিকাংশ বুদ্ধিবৃত্তি ও বিশ্লেষণ-শক্তির চমৎকার নিদর্শন হইলেও—ছুই-চারিটি অপর গল্পে লেখকের মর্মবিদারী দৃষ্টিরও পরিচয় পাওয়া যায়। তথাপি ‘সম্বন্ধ’কে বাংলা সাহিত্যের খাল-বিলে শোধিন মৎস্তশিকারী বলিয়াই মনে হয়—শক্তিমান হইলেও তিনি ‘অ্যামেচার’; তাঁহার সাহিত্য-সেবায় নির্ভার অভাব আছে। তাঁহার দৃষ্টি তীক্ষ্ণ হইলেও স্থির নয়; এ পর্য্যন্ত যাহা কিছু রচনা করিয়াছেন, তাহাতে একটি খেয়ালী মনোভাবের পরিচয় পাই—ইহা আশঙ্কাজনক বটে।

অমলা দেবী তাঁহার ‘মনোরমা’ নামক প্রথম গল্পের বইখানিতে যে ধরনের আধুনিক সমাজ-চিত্র, যে দৃষ্টি-কোণ হইতে দেখাইতে পারিয়াছেন, তাহাতে তিনি তখন হইতেই আমাদের পরিচিত মণ্ডলীর মধ্যে আসন গ্রহণ করিয়াছেন। তাঁহার রচনায় কাব্যকল্পনা প্রায় নাই বলিলেই হয়; তিনি অতিশয় নির্ভুল ও গভীর রেখায় এমন কতকগুলি চিত্র আঁকিয়াছেন, যাহার অঙ্ক, যেমন প্রত্যক্ষ পরিচয়ের প্রয়োজন, তেমনই ঠিকমত বর্ণ-সন্নিবেশের ও রেখাবিন্যাসের কৌশল পাকা শিল্পীর মত আয়ত্ত করিতে হইয়াছে। এই রচনাশক্তির মূলে আছে স্বগভীর সহানুভূতি বা বেদনাবোধ, তাহাই তাঁহার দৃষ্টিকে এমন অন্তর্ভেদী করিয়াছে—সমাজের বহিরাবরণ জীর্ণ-কঙ্কার দীর্ঘ সেলাইগুলি খুলিয়া দিয়া তিনি নির্মমভাবে তাহাকে বে-আক্র করিয়া দিয়াছেন। এ ধরনের সাহিত্য বড় সাহিত্য নয়; স্মার, সত্য ও নীতিজ্ঞানই ইহার প্রধান প্রেরণা—জীবনের রহস্য-রূপের সন্ধান ইহার মূখ্য অভিপ্রায় নয়; তথাপি অমলা দেবীর স্টাইল খাটি সাহিত্যিক বটে, সেই গুণেই রচনা উপভোগ্য হইয়াছে।

শ্রীযুক্ত প্রমথনাথ বিনীও কয়েকখানি উপন্যাস রচনা করিয়াছেন—পণ্ডিত-ভাবুক,

সমালোচক ও কবি বলিয়া তাঁহার যে খ্যাতি আছে, সেই খ্যাতির বিস্তার কামনা করিয়া তিনি নাটক ও উপন্যাস-রচনাতেও সংসাহসের পরিচয় দিয়াছেন। নাটকের সম্বন্ধে আমার কোন মতামত নাই বলিয়া আমি এই 'জি-বি-এস'-শিষ্ট আধুনিক একলয়ের শরসঙ্কানচাতুরীর কথা কিছুই বলিতে পারিব না, তবে আধুনিক সাহিত্যের একমাত্র রস—Satire, এবং Satire-সৃষ্টিই এ যুগের শ্রেষ্ঠ কবিকর্ম—ইহাই তাঁহার সাহিত্যিক ধর্মমত, তাঁহার উপন্যাসগুলি যদি তাহারই আনুষ্ঠানিক নিদর্শন হয়, তবে বলিতে বাধ্য হইব যে, তিনি তাহাতে সিক্ককাম হইতে পারেন নাই; কারণ সেগুলির মধ্যে গ্লটের যে নিরঙ্কুশ গতি আছে, এবং চরিত্রগুলিতে যে স্বপ্নস্বলভ কাল্পনিকতা আছে—তাঁহার কোনটাতেই Satire-এর প্রেরণা নাই—কল্পধেহুর হৃৎদোহন-প্রবৃত্তিই আছে। এই রচনাগুলি গল্প হয় নাই—এ গুলিতে সেন্টিমেন্টযুক্ত ভাবুকতা, সূক্ষ্ম-চিন্তা, ও বাহিরের উপরে মনের রং কলাইয়া সার্থক জায়েরি-রচনার কৃতিত্ব আছে। তথাপি আমি তাঁহার নাম উল্লেখ করিতেছি এইজন্য যে, বর্তমান বাংলাসাহিত্যের তিনি একজন শক্তিমান লেখক।

অতঃপর আমি এই কালের তিনজন প্রধান লেখকের সাহিত্যিক প্রতিভা সম্বন্ধে কিছু বলিব।

৫

ত্রীযুক্ত বিভূতিভূষণ বন্দ্যোপাধ্যায় মহাশয়ের রচনার প্রতি আমিই সর্বপ্রথম 'শনিবারের চিঠি'তে সকলের দৃষ্টি আকর্ষণ করিয়াছিলাম—তখন তাঁহার 'পুথের পাঁচালী' 'বিচিত্রা'য় ধারাবাহিক প্রকাশিত হইতেছিল। এই প্রথম উপন্যাসখানির দ্বারাই তিনি যেন—leapt into fame—এক লক্ষ্যে যশের শিখরে আরোহণ করিয়াছিলেন; আজও তাঁহার সেই যশ অক্ষুণ্ণ আছে। তাঁহার কারণ, তাঁহার দৃষ্টি যেমন, তাঁহার স্টাইলও তেমনই মৌলিক। এই মৌলিকতার কারণ দুইটি; প্রথমত, আমাদের রসপিপাসাকে তিনি একটা ভিন্নমুখে ফিরাইয়াছেন—পূর্ববর্তীগণের (রবীন্দ্রনাথ ও শরৎচন্দ্র) মত জীবনের অন্তঃশ্রোত বা বহিঃশ্রোতে অবগাহন করিয়া তাঁহার বেগ নির্গম করিতে চাহেন নাই; তিনি ভীয়ে বসিয়া ভটশোভা নিরীক্ষণ করিয়াছেন, জীবনের দুর্গম গহনে প্রবেশ না করিয়া, আপনার মানস-ধরে, তাঁহার প্রসারিত পট-দৃশ্যের ছবি তুলিয়াছেন। জীবন তাঁহার

নিকটে একটি স্থির শান্ত প্রতিহীন ও প্রায় হস্কিত মনোহর চিত্রশালা। তাঁহার চোখদুইটির নিছনে একটি যে ভাবরসগ্রাহী মন আছে, তাহার রসায়নাম্বারে বাহিরের বস্তু কিছু—মাছ, পল্ল, পক্ষী, মাঠ, বন, নদী ও আকাশ—কেবল একটি রসরূপে পরিণত হয়; প্রাণ যেন বলে,—এই তো! ইহার অধিক কি চাই? তুচ্ছতম বস্তুতায় ও তৃণ-পুষ্পে, কুটীরবাসী মানুষের অতি-কৃত্র জঠরের, কৃত্র ক্ষুধার খুদ-কুঁড়াতেও কি অমৃত রহিয়াছে! চাই কেবল সেই স্বল্প-তুট তুচ্ছ-সুখ, যাহা-পাই-তাহাতেই ধন্য রসভিখারী মন, তাহা হইলেই জীবনের ধূলা-মাটিও পরম পদার্থ হইয়া উঠিবে। বিভূতিভূষণের ব্যক্তি-মনোভাব এমনই বটে, কিন্তু কবিশিল্পীহিমায়ে তাঁহার মৌলিকতার দ্বিতীয় লক্ষণ—তিনি এই কাঙাল-স্বলভ পিপাসাকে সাহিত্যে একটি অভিনব স্টাইলরূপে প্রতিষ্ঠিত করিতে পারিয়াছেন। এই স্টাইল জীবনের স্বন্দ-গভীর, রহস্য-ঘোর, বিরাট-বিপুল অথবা সূক্ষ্ম-জটিল শক্তি-মহিমার স্টাইল নয়, তথাপি তাহা good art বা নিছক রসসৃষ্টির স্টাইল বটে। এই রসেরই সিদ্ধ সাধক ছিলেন রবীন্দ্রনাথ—তাঁহারও কাব্যসাধনার মূলমন্ত্র ছিল—সহজ ও সর্বব্যাপ্ত যাহা ('joy in widest commonalty spread') তাহারই রসরূপ সৃষ্টি করা; এই রস-সন্তোগের কথাই তিনি তাঁহার 'চিত্রা' কাব্যের "সুখ" নামক কবিতাটিতে বড় চমৎকার করিয়া বলিয়াছেন, যথা—

মনে হইতেছে,

সুখ অতি সহজ সরল, কাননের
প্রফুল্ল ফুলের মতো, লিঙ্গ-আননের
হাসির মতন, পরিব্যাপ্ত বিকশিত,
উন্মুখ অধরে ধরি' চুখন-অমৃত
চেয়ে আছে সকলের গানে, বাক্যহীন
শৈশব-বিশ্বাসে, চিররাত্রি চিরদিন।

* * *

কিন্তু রবীন্দ্রনাথ তাঁহার কাব্যে যাহাকে অতিশয় সরল ও সহজরূপে উপভোগ করিয়াছেন—জীবনের আলেখ্যরচনায়—গল্পে উপন্যাসে—তাহাকে এমন বাউল শিশুর বেশ ধারণ করান নাই। বিভূতিভূষণ কিন্তু সেই বাউলের একতারাটি মাত্র সম্বল করিয়া উপন্যাসেও সেই স্বর বাজাইয়াছেন। তাঁহার কল্পনা নিরিক-কবির মতই আত্মকেন্দ্রিক; তাই তাহা অতিশয় সরল—তিনি কেবল তাঁহার নিজেরই

ভাবস্বভূতির মিতিকার। ঔপন্যাসিককে জীবনের রূপকার হইতে হইবে, এরূপ একান্ত গিরিক-কল্পনা উপন্যাসের উপযোগী নয়। তিনি জীবনের আর্টিস্ট মাত্র— জীবনের কবি নহেন। তাঁহার যাহা কিছু সৃষ্টিনৈপুণ্য তাহা ওই স্টাইলেই সীমাবদ্ধ।) ওই স্টাইলের বলে তিনি তাঁহার সেই প্রথম উপন্যাসের পরে বহু গল্প-উপন্যাস রচনা করিয়াছেন, তাহাতে জীবনের রহস্যপুরীর কোন নূতন ধার-উন্মোচন নাই; সেই একই সুরের আলাপ আছে। এইরূপ রচনা বিভূতিবাবুর পক্ষে এতই সহজ, এবং তাঁহার ওই স্টাইল এমনই হৃদয়গ্রাহী যে, তিনি অনায়াসে সাহিত্য-বিপণির পণ্যভার বৃদ্ধি করিতেছেন, সামান্য ডায়েরী-জাতীয় রচনাও উপন্যাসরূপে বাঙালী পাঠকের উপাদেয় হইয়া উঠে।

(তথাপি, বিভূতিভূষণ একজন বিশিষ্ট সাহিত্যশিল্পী, তাঁহার মৌলিকতার দাবিও স্বীকার করিতে হইবে;) কিন্তু তিনি জীবন-কাব্যের কবি নহেন, ইহাও মনে রাখিতে হইবে। ভগতের সকল শ্রেষ্ঠ মহাকাব্য, নাটক ও উপন্যাস মানুষের যে কাহিনী গাহিয়াছে, তাহাতে গিরিক-সুরের অবকাশ যথেষ্ট থাকিলেও, তাহার রস—মানুষের জীবনাবেগের প্রাবল্য, তাহার সুখ-দুঃখের গভীরতম অনুভূতি, এবং স্বন্দ-সংশয়ের আবর্তফেনিল তরঙ্গকে—এক কথায় জীবনের সমগ্র রূপকে আশ্রয় করিয়াছে। প্রত্যেক যুগের সাহিত্যে জীবনের যুগোচিত অনুভূতি ও তন্মুখিত ধ্যান-ধারণা যেমনই হউক, যাহা কেবলই আর্ট নয়—কাব্যও বটে, অর্থাৎ, যাহা মানুষেরই গভীরতম পরিচয়-কাহিনী, তাহাতে আমরা কেবল সুর পাই না, কথাও পাই; সে কেবল সুন্দরের কথাই নয়, সুন্দর-অসুন্দরের স্বন্দঘটিত এক অপূর্ব রহস্য-রসের কথা। অতএব বিভূতিভূষণের রচনাগুলি আকারে ভঙ্গিতে উপন্যাস হইলেও, আমি—মাত্রাভেদসত্ত্বেও যাহাকে খাঁটি সৃষ্টিশক্তি বা কবিশক্তি বলিয়াছি—তাহার দিক দিয়া, তিনি বড় ঔপন্যাসিক নহেন, একজন শিমান সাহিত্যশিল্পী মাত্র। (একরূপ মনোবৈজ্ঞানিক কৌতূহলের সহিত রসপিপাসা যুক্ত হইলে, মানুষকে ও প্রকৃতিকে একটি স্থির-চিত্রে সন্নিবিষ্ট করিয়া যে ধরণের সৌন্দর্য্যসৃষ্টি সম্ভব, তিনি সাহিত্যে সেই সৌন্দর্য্যের স্রষ্টা। এই হিসাবে, তাঁহার মৌলিকতাও যেমন সত্য, তেমনই তাঁহার প্রতিভা যে রবীন্দ্র-যুগের রস-সাধনারই একটি স্বাভাবিক পরিণাম—তাহাও সত্য।)

কিন্তু শ্রীযুক্ত তারাপ্রসন্ন বা 'বনকুলে'র প্রতিভা খাঁটি ঔপন্যাসিকের প্রতিভা—

আমি উপন্যাস বলিতে 'ছোট' কিংবা 'বড় গল্প'ও বুঝিতেছি। এই দুই লেখকের রচনাই বর্তমানে বাংলা উপন্যাসের ধারাকে বেগবান করিয়াছে। দুইজনেই জীবনের রূপকার, দুইজনেই জীবনের কলশকমুখর তরঙ্গভঙ্গকল স্রোতকে কলাবিন্দু, কবিশিল্পীর মত কাহিনীর আকারে ধরিবার নিরন্তর সাধনায় আপন আপন অভিপ্রায় অল্পযায়ী সিদ্ধিলাভ করিয়াছেন। কিন্তু দুইজনের দৃষ্টিভঙ্গি বা রসপ্রেরণা সম্পূর্ণ বিপরীত বলিলেই হয়—উভয়ের কবি-প্রকৃতির মধ্যে এমন একটা বৈষম্য আছে যে, আমার সন্দেহ হয়, একজন আর একজনের রচনা বোধ হয় পূর্ণ উপভোগ করিতেও অক্ষম। একই কালে এই দুই বিরুদ্ধধর্মী লেখকের অদ্ভুতদয়ে সাহিত্যের রসপ্রমাতার বড় সুবিধা হইয়াছে। 'বনফুল' জীবনের যে-রূপটি তাঁহার অজস্র রচনার অজস্র রূপ-ভঙ্গিমায় ধরিয়া দিতে পারিয়া উত্তরোত্তর নিজের দৃষ্টি সম্বন্ধে আরও নিঃসন্দেহ হইতেছেন, সে রূপ এক হিসাবে আদিম ও অবিকৃত—চির-পুরাতন ও নিত্য-নূতন; তথাপি তাঁহার দৃষ্টিভঙ্গিতে আধুনিক বৈজ্ঞানিক যুক্তিবাদের সুস্পষ্ট প্রেরণা আছে; তাঁহার সেই paganism নিছক সৌন্দর্য-লালসার অতিশয় সুস্থ দেহ-প্রবৃত্তিই নয়, তাহাতে আধুনিক যুগের বিশিষ্ট মনোভাব যুক্ত হইয়াছে। এই কারণে এক অর্থে তাঁহাকেই আমাদের সাহিত্যের একজন খাঁটি আধুনিক শিল্পী বলা যাইতে পারে। 'বনফুলে'র মনে কোন সংশয় বা অতীন্দ্রিয় অল্পভূতির মোহ নাই—তিনি অতিশয় সাহসী ও সংস্কারমুক্ত, জীবন-পাঠশালায় যথাপ্রাপ্ত রসের সমজদার অতিথি। পাঠশালার অধিকারীকে তিনি কোন বহুমূল্য বাদশাহী পানীয়ের ফরমায়েস যেমন করেন না, তেমনই অতিশয় অল্পমূল্যের ধূম্রজাত নেশাও তিনি বরদাস্ত করিতে পারেন না; যাহা স্বাস্থ্যকর ও জীবনীয় তাহাই তাঁহার পুরামাত্রায় চাই—এতটুকু ভেজাল থাকিলে তিনি একটি পয়সাও দিবেন না। এই মনোভাব তাঁহার রসকল্পনার মূলে বিদ্যমান, তিনি মানুষকে তাহার সুস্থ প্রাণশক্তির লীলায় সহজেই চিনিয়া লইতে পারেন, এবং সে বিষয়ে বিজ্ঞান ও ইতিহাসের সাক্ষ্য মান্ত করিয়া থাকেন। মানুষ পশুও নয়, দেবতাও নয়, এমন কি মাঝামাঝি কিছুও নয়; সে কেবলমাত্র মানুষ; তাহাতে গৌরব বা অগৌরবের কথা নাই, আছে শক্তি ও স্বাস্থ্য-অল্পভূতির আনন্দ মাত্র। সকল সাহিত্যিক প্রতিভাই সহজাত,—অল্পকূল বা প্রতিকূল শিক্ষা ও অভিজ্ঞতার ফলে সেই প্রতিভার বিকাশ হয়। 'বনফুলে'র শিক্ষা ও কর্মজীবন

তাঁহার সেই মহাজাত শিল্পী-মনোভাবকে বিশেষরূপে পুষ্ট করিয়াছে বলিয়া মনে হয়। তিনি যে-বিজ্ঞানের তাত্ত্বিক ও ব্যবহারিক চর্চা করিয়া থাকেন, তাঁহার এই মনোবৃত্তিকে পুষ্ট করিবার পক্ষে তেমন আর কিছুই নাই। তিনি জীবনের বৈজ্ঞানিক দেহতত্ত্বকে—বায়োলজি ও ফিজিওলজিকে—তাঁহার সাহিত্যিক জীবনবাদের অন্তর্গত করিয়া লইতে পারিয়াছেন; যাহা সর্ব-সেটিমেন্ট-বর্জিত তাহাই তাঁহার রসপিপাসু মনকে একটি বিশিষ্ট ভাবমার্গে দৃঢ়প্রতিষ্ঠিত করিয়াছে। ‘বনফুলে’র রসসজ্জানী মনের সঙ্গে দুইটি সর্বদর্শী চক্ষু এবং একখানি সুরধার ল্যান্সেট সর্বদা কাজ করিতেছে। অঙ্ককার তো নহেই—মন্দাক্ষকারেও তিনি কাহারও পরিচয় করিবেন না, সেখানেও অতি তীব্র বর্জিকালোক তাঁহার প্রয়োজন। মানুষের জীবন তাঁহার নিকটে অতিশয় সুস্পষ্ট ও সুগোচর বস্তু,—সে যে কত সুগোচর, অসংখ্য জীবন্ত চিত্রে তিনি তাহা প্রমাণ করিয়াছেন। সে সকল চিত্রে তিনি মানুষের প্রত্যক্ষ দেহমনের যে পরিচয়—ভাষা ও ভঙ্গির আশ্চর্য্য অবলীলা এবং চকিত-প্রথর আলোকপাতসহকারে—উদ্ধৃত করিয়াছেন, তাহাতে যেমন বিস্মিত হইতে হয়, তেমনই মানুষের সম্বন্ধে আমাদের মনে একটা নূতন সংস্কার জাগে, বিশ্বাস হয় যে, মানুষের চরিত্র দোষ-গুণে যেমনই হোক—মনুষ্য-জীবন মোটের উপরে, হয় বা লজ্জা পাইবার মত কিছু নয়। যদি কোন কারণে ইহার স্বাস্থ্যহানি না হয়, তাহা হইলে প্রকৃতির রাজ্যে সুমহৎ শক্তিকেন্দ্ররূপে সে জীবনের একটি বিশেষ মর্যাদা আছে। সেই শক্তি ও স্বাস্থ্যই ইহার সব-কিছু সৌন্দর্য্য।

‘বনফুল’ এই আশ্বাস ও বিশ্বাসের কবি, তিনিও এক ধরনের প্রকৃতিবাদী—Naturalist। তাঁহার আঁট মানুষেরই স্নায়ু-শিরা-শোণিত-বিজ্ঞানের আঁট। তিনি কেবল রূপের পূজারী নহেন, সেই রূপের চিরচঞ্চল প্রবাহে তিনি প্রাণশক্তির লীলা দেখিয়াছেন। এই শক্তি প্রাকৃতিক শক্তি, তাহার মূলে কোন আধ্যাত্মিকতা নাই। পূর্বে বলিয়াছি, ‘বনফুলে’র কাব্য-প্রকৃতিতে একপ্রকার paganism আছে, সে এই শক্তিপূজারই paganism; শক্তির যে সৌন্দর্য্য, তিনি সেই সৌন্দর্য্যের উপাসক। প্রকৃতির এই মূর্ত্তি তিনি একবার পূর্ণরূপে অপরোক্ষ করিয়াছেন তাঁহার ‘রাজি’-নামক উপন্যাস-কাব্যে—আমাদের দেশের শক্তিসাধকদিগের সেই উপাস্ত দেবতাই যেন সেখানে শোণিত-মাংসে শরীরী হইয়া দেখা দিয়াছে।

লেখক তাহার যে রূপ-কল্পনা করিয়াছেন, তাহা শ্রেষ্ঠ কবিশক্তির পরিচায়ক ; সে রূপ রাজির মত, তথাপি তাহা কালিদাসের ‘ফুটচন্দ্রতারকা বিভাবরী’ নয় । রাজি হইলেও তাহার রূপ মধ্যাহ্নদিবার মত ভাস্বর, কালো মথমলের খাপের মধ্য হইতে তীক্ষ্ণাঙ্গুল ছুরিকার মত তাহা বলসিয়া উঠে । এই মৃত্যুরূপিণী নারী মহাশক্তি-রূপিণীও বটে ; ‘অপবিত্র পবিত্রো বা’—কোন সংস্কার তাহার নাই ; প্রেম, ধর্ম বা নীতির কোন বন্ধন তাহার চিত্তকে অধিকার করিয়া কলুষিত করিতে পারে না । তাহার চতুর্পার্শ্বে তাহাকে কেন্দ্র করিয়া যাহারা ঘুরিতেছে, তাহারাই মোহগ্রস্ত, তাহারাই কুপার পাত্র । ‘বনফুল’ এই একখানি উপন্যাসে তাঁহার অন্তর-গহনের কাব্য-প্রেরণাকে মূর্ত্তিমতী করিয়া তুলিয়াছেন ।

জীবনের রূপ-কল্পনার এই এক দিক—আর এক দিক আছে ; কোন্ দিক বড় তাহা আমি বলিব না, আর্ট-হিসাবে উভয়েই উভয়ের দিক দিয়া উপদেশ । শ্রীযুক্ত তারশঙ্কর বন্দ্যোপাধ্যায় জীবনের সেই আর এক রূপের রূপকার । ‘বনফুলে’র জগৎ যেমন প্রত্যক্ষ-বাস্তবের জগৎ, তারশঙ্করেরও তাহাই ; তথাপি ‘বনফুলে’র জগৎ দিবালোকের জগৎ, কিন্তু তারশঙ্করের জগতে আলোকের পশ্চাতে নিশীথের রহস্যাকার ব্যাপ্ত হইয়া আছে । ‘বনফুল’ জীবনের যেটুকু স্পষ্ট প্রকাশ তাহার অধিক দেখিতে রাজি নহেন ; তারশঙ্কর সেই প্রকাশের মধ্যেই যে অপ্রকাশের ইঙ্গিত আছে, তাহারই ধ্যানে জীবনকে আর এক মহিমায় মণ্ডিত করিয়াছেন । ‘বনফুল’ বিশ্বাসংশয়হীন দৃষ্ট ও বলিষ্ঠ বৈজ্ঞানিক ; তারশঙ্কর অজ্ঞেয়-রসিক, মিষ্টিক, তান্ত্রিক । ‘বনফুল’ অন্ধকারকে আলোর দ্বারা অপসারিত করিবার—মৃত্যুকে জীবনের হস্তে নির্জিত দেখিবার পক্ষপাতী ; তারশঙ্কর জীবনকে আর এক রূপে উপভোগ করেন—তিনি,

“Night, the shadow of light,

And life the shadow of death.”

—এই দুইয়ের রহস্য মিলাইয়া দেখিতে চান ; তাই তাঁহার কল্পনায় প্রকৃতির নিয়মই মানুষের নিয়তি নয় । সেই নিয়তিই প্রকৃতির নিয়ম-শাসনকে অসীম অর্থ-গৌরব ও পরম রমণীয়তা দান করিয়াছে । তাই প্রকৃতির তাড়নার মানুষের জীবনে যত বহিষ্কুলিঙ্গ উদগত হয়, তাহার সেই বহুবর্ণের আত্ম-

শোভা তিনি যেমন অপলক নেত্রে তীক্ষ্ণদৃষ্টিতে নিরীক্ষণ করেন, তেমনই, তাহার পশ্চাতে যে অন্ধকারের পটভূমি রহিয়াছে, তাহাকে সেই শোভার একটা বড় কারণ বলিয়া বিশ্বাস করেন; সেই অন্ধকারে জীবনের যে অংশ প্রচ্ছন্ন রহিয়াছে, তাহাকেই তিনি বৃহত্তর বলিয়া জানেন এবং তাহারই সঙ্কেতে তিনি যে রূপ-সৃষ্টি করেন, তাহাতে সকল জ্ঞান-বিচার স্তম্ভিত হইয়া যায় বলিয়াই একটা মধুর উৎকণ্ঠায় আমাদের রসচেতনা অনুরণিত হইতে থাকে। তথাপি ইহা নিছক কাব্যরস নয়, আমাদের প্রাচীন আলঙ্কারিকের সেই 'ব্রহ্মান্বাদসহোদর' ইহা নয়। ইহাও জীবনের বাস্তবরূপোদ্ধৃত রস, এ রসের উপভোগকালে জীবন-চেতনা লুপ্ত হয় না, বরং জীবনেরই একটা বিশিষ্ট রূপের বিশিষ্ট ভঙ্গি সর্বক্ষণ সেই রস-চেতনায় বিদ্যমান থাকে—তাহার সেই রূপই অপরূপ হইয়া উঠে। তারশঙ্কর বাংলাসাহিত্যে জীবনের এই যে রস-রূপ তুলিয়া ধরিয়াছেন, বাস্তব জীবনেরই সর্ববিধ বৈচিত্র্য ও বিরূপতা—সর্বস্তরের জীবন, এমন কি, মনুষ্য প্রকৃতির কুংসিত ও বীভৎস প্রকাশকেও তিনি যে রসরূপে পরিণত করেন, তাহার মূলে আছে সেই রসচেতনা। জীবনের এই যে রূপশ্রোত ইহাও একটা মহারূপকের নাট্যাভিনয়। রঙ্গভূমিতে মাতৃষের চরিত্র ও নিয়তির এই রহস্যরসবোধ যাহার কল্পনার উদ্দীপন-কারণ—তিনি বিশ্লেষণ করেন না, আবিষ্কার করেন; ব্যাখ্যা করেন না, সৃষ্টি করেন; প্রমাণ করেন না, প্রদর্শন করেন। তারশঙ্করের সকল উৎকৃষ্ট রচনায় এই ইঙ্গিতমূলক প্রদর্শন আছে, রূপের সেই রূপক-রস-সঙ্কেত আছে; কোন যুক্তিতত্ত্ব, কোন থিয়রি বা মতবাদ—কোন কিছুই ঘোষণা তাহাতে নাই। কল্পনার এই objectivity—বিশেষ করিয়া তাঁহার ছোটগল্পগুলিতে জীবনের যে রূপ-চিত্রাবলী উদ্ঘাটিত করিয়াছে, তাহার বৈচিত্র্য সৃষ্টি-বৈচিত্র্যের মত। তাঁহার দৃষ্টি সেই এক রসকেই বহুর মধ্যে বিচিত্ররূপে আবিষ্কার করিয়া, কুংসিত-সুন্দর, ভীষণ-মধুর, নিষ্ঠুর-কোমল প্রভৃতি সকল বস্তুকেই সমান উপভোগ করে; প্রত্যেককে তাহারই ভাবে সম্পূর্ণ গ্রহণ করিতে পারে বলিয়া সেই অপকৃপাত রস-সম্ভোগ তাঁহার গল্পগুলিতে সম্ভব হইয়াছে। আমি তাঁহার আর্টের যে objectivity-র কথা বলিয়াছি, তাহার একটা প্রধান লক্ষণ এই যে, তাঁহার গল্পের প্রতিবেশ ও ঘটনা-সংস্থানের সঙ্গে চরিত্রগুলি এমন অচ্ছেদ্য ও অলাভীভাবে যুক্ত হইয়া থাকে যে, সবগুলি একত্রে একমুখে গল্পটিকে রসের পরিণাম-মূর্ত্তে পৌছাইয়া দেয়; ইহার

আর একটা লক্ষণের কথা পূর্বে বলিয়াছি—তাঁহার রস-সৃষ্টিতে ব্যাখ্যা বা বিশ্লেষণ-ভঙ্গি নাই; গল্পের সকল উপাদানই নাটকীয় পাত্র-পাত্রীর যত কাজ করে; চরিত্রগুলিও কোথাও আপনাদিগের অন্তরঙ্গ আপনারাই এতটুকু উন্মোচন করে না—সে বিষয়ে তাহাদের যেন কোন সজ্ঞানতাই নাই; তাহারা খাঁটি জীবনধর্মী মানুষের যত ব্যবহার করে—কথায় ও কাজে তাহাদের গূঢ়তম প্রবৃত্তির ইঙ্গিতমাত্র প্রকাশ পায়; অর্থাৎ, লেখক নিজকে সম্পূর্ণ আড়ালে রাখিয়াছেন—তাই ঘটনা বা চরিত্রের কোনরূপ ব্যাখ্যা-বিশ্লেষণ নাই। জীবন বলিতে যে একটি পরমার্শব্য ব্যাপারকে আমরা কেবল ধ্যানেই উপলব্ধি করি, তাহাই এ সকলের মধ্যে যেন চকিতে চমকিয়া উঠে—বিন্দুর মধ্যেই সিদ্ধদর্শন হয়, ক্ষুদ্র নখের দর্পণে দেশ-কালের বিস্তৃতি উদ্ভাসিত হইয়া উঠে। ইহাকেই আমি রূপের রূপক-মহিমা বলিয়াছি—অতি ক্ষুদ্র মানব-মানবীর ক্ষুদ্র কাহিনীতে সর্বমানবের নিয়তি প্রতিবিম্বিত হয়; অতি ক্ষুদ্র জীবনের তুচ্ছ প্রেম-সঙ্কটে বিরাট ট্র্যাজেডির ছায়া পড়ে; যেন জীবনের সম্মুখভাগে, তাহাকে আড়াল করিয়া যে বিশাল যবনিকা হুলিতেছে—যাহাকে আমরা পরিদৃশ্যমান বাস্তব-দৃশ্যপট বলি—তাহার যে-কোন স্থানের ক্ষুদ্রতম ছিদ্রপথেও চক্ষু সংলগ্ন করিলে, সেই এক অসীম রহস্য-সাগরকেই উদ্বেলিত হইতে দেখিব। তারশঙ্করের যে কোন উৎকৃষ্ট গল্প ইহার নিদর্শন—এখানে বিশেষ করিয়া তাঁহার ‘বাসের ফুল’ নামক গল্পটি আমার মনে পড়িতেছে।

তারশঙ্করের কবিশক্তির পরিচয়-প্রসঙ্গে আমি জীবন-রস-রসিকতার যে আর এক ভঙ্গি, ও তাহার আঁট সঙ্কে যাহা বলিয়াছি—তাঁহার রচনাগুলির অনেকাংশে তাহা প্রযোজ্য হইলেও, আমি এমন কথা বলি না যে, তাঁহার ছোট গল্পগুলিতেই সেই আঁটের চরম পরিণতি ঘটিয়াছে। এই দৃষ্টি তাঁহার আছে—তাঁহার ছোট গল্পগুলিতে তাহা প্রায়ই সার্থক হইয়াছে।

কিন্তু ছোটগল্পের স্বল্প পরিসরে তিনি যে রসদৃষ্টিমূলক অসাধারণ ভাব-সংঘমের পরিচয় দিয়াছেন, তাঁহার উপল্লাসেও সাধারণত সেই শক্তির নিদর্শন থাকিলেও সমগ্রভাবে সেই সংঘম এখনও তাহাতে দেখা দেয় নাই। তাহার কারণ, উপল্লাস রচনাকালে তিনি জীবনের যে সুপ্রশস্ত পটভূমিকার শরণাপন্ন হন, তাহাতে তাঁহার কল্পনা ভিন্নমুখী হইয়া পড়ে—বঙ্গার জলবিস্তারে নদীর তটরেখা স্থানে স্থানে লুপ্ত

হইয়া যায় ; তিনি চিরন্তনকে গৌণ করিয়া যুগ-মহিমাকেই মুখ্য করিবার লোভ সম্বরণ করিতে পারেন না। যুগ-সমস্তা বা যুগ-প্রবৃত্তি জীবনের নিত্য-রূপের—অর্থাৎ রস-রূপের—অন্তরায় নয় ; বরং তাহারই নিরন্তর তট-বন্ধনে যাহা কালাতীত, তাহাই নব নব রসরূপ পরিগ্রহ করে। কবিশিল্পীর পক্ষে, বিশেষত জীবনের দক্ষতম রূপকার—উপন্যাসিকের পক্ষে, সেই উপাদানগুলির প্রয়োজন অল্প নহে ; কিন্তু সেই সঙ্গে তাঁহার রসদৃষ্টি আরও মুক্ত ও স্বচ্ছ থাকা আবশ্যিক—বস্তুর ভাব-প্রাণে শিল্পীও যেন স্বস্থানচ্যুত না হন, তাঁহার নির্লিপ্ত রসচেতনায় আত্ম-ভাবের (personal sentiment) ছায়ামাত্র না পড়ে। উপন্যাসের স্ববৃহৎ আকারে জীবনের জটিল ও বহুবিচিত্র রূপকে সেই এক রূপক-রসে অভিব্যক্ত করার যে আর্ট, তাহাই কবিশক্তির পরাকাষ্ঠা—তারশঙ্কর সে পরীক্ষায় উত্তীর্ণ হইলে বাংলাসাহিত্যের গৌরব বৃদ্ধি হইবে, তাহাতে সন্দেহ নাই।

* * * *

এই আলোচনায় আমি কোন্ শ্রেণীর লেখককে কি কারণে বাদ দিয়াছি, প্রবন্ধের আরম্ভেই তাহা বলিয়াছি। দুই-একজন লেখককে অন্য কারণেও বাদ দিয়াছি—কেহ হয়তো এ যুগের পূর্ববর্তী ; কেহ বা এখনও অতিশয় নবীন, তাঁহাদের সম্বন্ধে কিছু বলিবার সময় এখনও আসে নাই। কিন্তু আমি জ্ঞাতসারে এমন একজন লেখককে বাদ দিয়াছি, যাহার সম্বন্ধে এ প্রবন্ধে কিঞ্চিৎ উল্লেখ থাকা উচিত ছিল। শ্রীযুক্ত প্রেমেন্দ্র মিত্র সাহিত্যে বামপন্থী হইলেও, একমাত্র তিনিই সে পন্থায় মৌলিকতার দাবি করিতে পারেন। তাঁহার সাধন-পন্থা সম্পূর্ণ বিপরীত হইলেও, আমি তাঁহার সাহিত্যিক বিবেক ও রচনা-শক্তিকে শ্রদ্ধা করি। কিন্তু দুঃখ ও লজ্জার বিষয় এই যে, আমি তাঁহার গল্প-উপন্যাস খুব অল্পই পড়িয়াছি—এবং যাহাও পড়িয়াছি, তাহা এতকাল পূর্বে যে, তাহার সম্বন্ধে এমন সুস্পষ্ট ধারণা মনে নাই, যাহার উপর নির্ভর করিয়া আমি তাঁহার সঠিক পরিচয় দিতে পারি। অতএব এ ক্রটি আমারই, ইহার জন্য তিনি দায়ী নহেন।

বর্তমান বাংলাসাহিত্য সম্বন্ধে আমার যাহা বলিবার ছিল তাহা উপস্থিত একরূপ শেষ হইল। এ প্রসঙ্গে আমি যাহাদের পরিচয় দিয়াছি তাঁহাদের তুলনায় আরও দুই চারিজন উল্লেখযোগ্যতা দাবি করিতে পারেন ; এ বিষয়ে আমার

বক্তব্য এই যে, আমি কেবল সেই সকল লেখকের উল্লেখ করিয়াছি যাহারা অপেক্ষাকৃত সুপরিচিত—যে কারণে হোক, যাহারা ইতিমধ্যে কিঞ্চিৎ খ্যাতিলাভ করিয়াছেন ; আমি ইহ্নর অধিক দায়িত্ব লই নাই । দুই এক জন লেখকের প্রতি আমি হয় ত' সুবিচার করিতে পারি নাই,—তার কারণ, তাঁহাদের রচনার বৈচিত্র্য অতি অল্পদিন মাত্র দেখা দিয়াছে, এজন্য তাঁহাদের সম্বন্ধে আমার ধারণা এখনও স্থনিশ্চিত হইতে পারে নাই । আমি যাহাদিগকে একটু বিশেষ শক্তিমান বলিয়া নির্দেশ করিয়াছি—শিল্পীহিসাবে তাঁহাদের সমকক্ষ আরও দুই একজন হয় ত' আছেন ; কিন্তু যাহারা আমার এই আলোচনা ভাল করিয়া পড়িবেন তাঁহারা বুঝিতে পারিবেন—আমি শুধুই গল্পের আর্ট বা রসসৃষ্টির নৈপুণ্যকেই এ বিচারে মুখ্য করি নাই, দৃষ্টিভঙ্গি বা স্টাইলের মৌলিকতাকেই সকলের উপরে স্থান দিয়াছি । ঔপন্যাসিককে আমি জীবনের রূপকার বলিয়াছি, তাহার অর্থ তাঁহাকে কেবল রূপবিশেষের রেখাশিল্পী হইলেই চলিবে না—সেরূপ শিল্পকর্মে অনেকেই দক্ষতা দেখাইয়াছেন—জীবনকে সমগ্রভাবে দেখিবার দৃষ্টিও তাঁহাদের রচনায় বিদ্যমান থাকা চাই । এই দৃষ্টি সকলেরই সমান ব্যাপক বা গভীর না হইতে পারে ; তথাপি, তেমন লেখকের রচনায় জীবনের সব-কিছুই একই অর্থে অর্থবান হইয়া উঠে ; সে অর্থ একটা রসবোধমূলক অর্থ—কেবল একটা significanceএর অনুভূতি মাত্র । এই মাপকাঠিতে বিচার করিলেই সকল যুগের সকল সাহিত্যের শ্রেষ্ঠ লেখকগণকে—শক্তির মাত্রাভেদ সত্ত্বেও—এক পর্যায়ভুক্ত করা যায় । যাহাদের রচনায় আমি এই শক্তির নিদর্শন পাইয়াছি তাঁহাদিগকেই—শুধু কথাশিল্পী নয়,—জীবনের রূপকার হিসাবে—একটু পৃথক আসন দিয়াছি ।

নির্দেশিকা

অতি-আধুনিক সাহিত্য, ইহার ভাষা
২৭-২৮, ৩৮-৩৯, —এই সাহিত্যের 'প্রগতি'-
বাদ, ৭৫, ১৮৯-৯৭, —প্রধান প্রবৃত্তি ১৯২-
৯৪, ১৯৮-৯৯, ২৭৪ —এ সম্বন্ধে রবীন্দ্রনাথের
উক্তি ১৯৭, —বিদেশী সমালোচক ১৯৯,
২০০, —এ সাহিত্যের সাধারণ লক্ষণ ৩৫-৩৬,
৭২-৭৩, ১৮৭-৮৯, ২৪৪-৪৫, ২৭০, বর্তমান
সাহিত্যের আদর্শ ১৮১-৮৪, —দুঃখবাদ ২০৩,
২০৭-৮, সাময়িক সাহিত্য বা মাসিক পত্রিকা
৩৫-৩৬, ২৩১-৩৩, এই সাহিত্য ও বিশ্ববিদ্যালয়
৩৩-৩৪, —ও শিক্ষিত সমাজ ৩৪-৩৫,
'সাহিত্যিক' সম্প্রদায় ৩৬-৩৭, বর্তমান
সাহিত্যিক ভাষার রীতি-সমস্যা ৩৮-৩৯,
—অবনতি নিবারণের উপায় ৪০-৪১

অমলা দেবী ২৮৪, ২৮৫, —মনোরমা' ২৮৫

অমিত্রাক্ষর ছন্দ, ৫৭, ১০৬, ১০৮, ১১৬

অলঙ্কার শাস্ত্র, আলঙ্কারিক ২, ১৪, ২২,
২৩, ২৪, ৮৪, ২৪৩, ২৪৪, ২৪৬, ২৬৪, ২৬৫,
২৯২

আনন্দ মঠ ৮৪, ২৭০

আর্ট ও সাহিত্য ৪-৫, ৭-৯, ৮১-৮২, ৮৩,
৮৫, ২৭৬, ২৭৯, ২৮৮, ২৯৫

উপনিষৎ ১০১

উপন্যাস, ঔপন্যাসিক ২৭৬, ২৮৮, —এ
আদর্শ ২৮৭, ২৮৮, ২৯৪, ২৯৫, —রূপক-রস
২৯২, ২৯৩ —ছোট গল্প ২৯৩, —বন্ধিনী

আদর্শ ৭৮, ৮০-৮৩, ৮৫, —ও নাটক ২৬৬-
৬৭

'কপালকুণ্ডলা', ২৭০

কবির 'কল্পনা' ২৬২-৬৪, ২৬৯.

কবি ও কাব্য, —কবিচরিত্র ২৫৪-৫৭, ২৬৭

কবি ও কবিত্ব ১৪৫-৪৬

কবিতার ছন্দ ১৫৫-৫৭, ১৮৫, ২৬৭

কবি করুণানিধান ১৪৪-৬৪, তাঁহার কাব্য-

প্রকৃতি ও তাহার পরিচয় ১৪৭-৫৫, ১৫৯

—কাব্যের ছন্দোমাধুর্য ১৫৭-৫৯ —বৈকল্য-

মনোভাব ১৫৯, কাব্যসৃষ্টির অসম্পূর্ণতা ১৫৯-

৬৩, —ইহার কারণ, ১৫৪-৫৫, ১৬৩-৬৪

কাব্য জীবন, ২৪৭-৫১, জীবনের বাস্তব ও

সাহিত্যের রসতত্ত্ব ২৪৭-৪৮, ২৪৯, ২৫০-৫১,

২৬৭, ২৬৯, ২৮২, ২৯২, মানুষের দুঃখ ও

তাহার স্বরূপ ২০২-৯, —ও কাব্যরস ২০৫,

২০৬, সুখ-দুঃখ ও আনন্দ, আত্মিক শক্তি,

জ্ঞান ও প্রেম ২০৪-৫, ২০৬-৭, ২০৮-৯,

২৬৩, ২৬৯-৭০, [সৌন্দর্য ও নব্বয়তা

১৬৩]

কাব্যের আকৃতি-ভেদ—গল্প ও পঞ্চ ২৬৫-

৬৭, —প্রকৃতি-ভেদ ২৬৮-৭১

কাব্য-সমালোচনা, —সমালোচক, ১, ২৩,

১৫৯

কালিদাস, ২০, ৭৬

'কালিকলম' পত্রিকা, ১৮৩

- কালীপ্রসন্ন সিংহ, ৬০
 কালীরাম দাস, ৫৩
 কুন্তিলাস, ৫৩
 'ক্লাসিক' 'ক্লাসিক্যাল' ৩৫, ৪১, ৫৩, ৫৬
 কিপ্লিং (Kipling), ২৯
 গত শতাব্দীর বাংলাসাহিত্য, ৩০, ৬২,
 ৩৬, ৫৫-৫৬, ৬৪, ৬৭, ৭১, ৭৩, ২৩৮,
 ২৪০-৪১
 গল্প কাব্য, ১১০, ১৮৫, ২৬৬-৬৭
 'গল্পগুচ্ছ', ২৫২
 গেটে (Goethe), ৭৬
 গোবিন্দ দাস, ৫২
 'চন্দ্রশেখর,' ২৭০
 চণ্ডীদাস, ৫২
 জাতির ভাষা ও সাহিত্য ৪৪-৫৪, —ও
 বিশ্বসাহিত্য ৪৫, ৫১, —ভাষা ও জাতীয়তা
 ৪৫-৪৬, ৪৯-৫১, ১৪১, —ও জাতীয়-জীবনী
 শক্তি ১৩৭-৩৮, ২৭৩, জাতীয়-শিক্ষা ৪০
 জগদীশচন্দ্র গুপ্ত, ২৭৮-৭৯
 জয়দেব, ৫২
 জ্ঞানদাস, ৫২
 তত্ত্বরস (mysticism), মিষ্টিক, ৯৯,
 ১২৭, ১৩০
 'তরুণ', 'সবুজ', ২৪১-৪২, ২৪৪-৪৫
 তারানাথ বন্দ্যোপাধ্যায়, ২৭৮, ২৮৮-৮৯,
 ২৯১-৯৪, —ও 'বনফুল' ২৮৯, ২৯১, —তাঁহার
 উপন্যাস ২৯৩-৯৪
 দীনবন্ধু মিত্র, ২১৩, —'লীলাবতী' 'বিদ্যে-
 পাগলা বুড়ো' ২১৩,
 'দেবী চৌধুরাণী,' ৮৪
 'নব্যভারত'-পত্রিকা, ২৪০
 টেনিসন (Tennyson), ২৯
 ট্র্যাজিডি, ১৯-২০, ২৪৭, ২৬৬-২৬৭, ২৮৩
 ডিকেন্স (Dickens), ২১৩
 'পরশুরাম',—'গজলিকা' ২১৫
 প্রগতি বাদ,—বাদী, ৭৫, ৭৮, ১৬৭,
 ১৮৭-২০১
 প্রভাতকুমার মুখোপাধ্যায়, ২১৫
 প্রমথনাথ বিনী, ২৮৪, ২৮৫-৮৬
 প্রেমেন্দ্র মিত্র, ১৮৩, ১৮৬, ২৯৪
 বঙ্কিম চন্দ্র, ৩০, ৫৩, ৫৭, ৬৪-৮৬, ১১৯,
 ১৩৭, ১৪০, ১৪২, —প্রতিভার বৈশিষ্ট্য ৬৪-
 ৭৪, —ঐ পৌরুষ, ও তাঁহার লক্ষণ ৬৬-৬৭,
 ৬৮-৭০, তাঁহার যুগের বাঙালী জাতি ৬৭-৬৮,
 বঙ্কিমচন্দ্রের ষ্টাইল ৭৯-৮০, ৮৫, বঙ্কিম-
 সাহিত্যের রস-বিচার ৭৫-৮৬, —তাঁহার
 উপন্যাস ৭৮, ৮০-৮৫, তাঁহার জীবন দর্শন
 ৮২-৮৩, —ও সৃষ্টি-প্রতিভা ৮৪-৮৫ —জীবন
 ও আর্টের সমন্বয়—প্রতিভার মহত্ব ৮৫
 'বনফুল' ২৭৮, ২৮৮-৯১, —ও তারানাথের
 ২৮৯, ২৯১, রাত্রি ২৯০-৯১ ; .
 'বলাকা', ১১০
 বর্তমান বাংলাসাহিত্য, ২৭২-২৫, —গল্প ও
 উপন্যাস ২৭২, এ সাহিত্যের আলোচনা ২৭৫-

নির্দেশিকা

৭৭, ইহাতে 'রিমানিজম' ২৭৮, ২৮০, ২৮৪, ২৮৫,—হাস্তরস, satire, 'হিউমার' ২৮১, ২৮৫,—মধুররস ও ট্রাজেডি, ২৮২, ২৯৩,— 'bizarre' ২৭৯, —রোমান্স ২৭৯-৮০,— রবীন্দ্র প্রভাব ২৮৪, ২৮৭, —জীবনের ধূলামাটি ২৮৭,—বৈজ্ঞানিক জীবন বাদ, শক্তি পূজা ২৮৯-৯১,—কল্পনার আর এক ভঙ্গি ২৯১-৯৩

বর্তমান বাঙালী জীবন ও সাহিত্য,

১৬৮-৭১, ১৭৪-৭৫, ২২৯, ২৩৪-৩৫, ২৪১-৪২, ২৪৫

বাঙালীর প্রতিভা, ১৩৭, ১৩৯-৪০

বাল্মীকি, ২০, ১৯৪,

বাংলা বানান-সমস্যা ৩৯-৪০

বাংলা গল্প—ক্লাসিক্যাল রীতি ৫৬

বাংলা ভাষা—বর্তমান প্রবৃত্তি ২৭-২৮, ৩৮-৩৯, ৪৬-৪৯, ইহার কারণ ও পরিণাম ৪৯-৫১, —শিক্ষার দোষ ৫১-৫২, বাংলা ভাষার সাহিত্যিক গৌরব ৫২-৫৩, বিশুদ্ধ উচ্চারণ ও আবৃত্তির প্রয়োজনীয়তা ৫৩-৫৪

'বিচিত্রা'-পত্রিকা, ২৮৬

বিদ্যাসাগর, ৫৫-৬৩, ৬৭, ১৩৭, —ঐ চরিত্র ৫৭, ৬০-৬১, ৬২ —ও সাহিত্যিক ষ্টাইল ৫৭, —ও বাংলা গল্প সাহিত্য, ৫৬-৫৭, 'বেতাল পঞ্চবিংশতি' ৫৬, ৫৭, —ঐ ভাষা ৫৮, ৫৯, 'শকুন্তলা' ৫৯, 'কথামালা' ৫৬-৫৯, 'সীতার বনবাস' ৫৯, ৬০, 'ব্রাহ্মবিলাস' ৬০, 'রামের রাজ্যাভিষেক' ৬০, আত্মজীবন-চরিত ৬০-৬১, 'প্রভাবতীসম্ভাষণ' ৬১, ৬২-৬৩

বিবেকানন্দ ৪২, ৬৩, ৬৮, ১৩৭, ১৪০

'বিষয়ক', ২৭০

বিভূতিভূষণ বন্দ্যোপাধ্যায় ২৭৮, ২৮৬-

৮৮ —'পথের পাঁচালী' ২৮৬

বিভূতিভূষণ মুখোপাধ্যায় ২৭৮, ২৮১-৮৩

—'নীলাক্ষরী' ২৮১

বেনেদেত্তো ক্রোচে (Benedetto Croce) ২৪

বৃহৎসপ্তপুরাণ, ২৬৪

৫২

ব্যাস, ২০, ১৯৪

ভারত চন্দ্র, ৫৩, ২৭৬

ভাষা ও রীতি, কথ্যরীতি, ৩৮-৩৯, ৪৮

মধুসূদন, ৫৩, ৫৭, ১৩৭, —'মেঘনাদ' ২৭০

মনোজ বসু, ২৮৩-৮৪, ২৮৫

মহাভারত, ৫৯, ৯০, ২৭০

মানসী, ১০৬

মানিক বন্দ্যোপাধ্যায়, ২৮৪, —'দিবারাত্রির কাব্য', 'পুতুল নাচের ইতিকথা', 'পদ্মানদীর মাঝি', ২৮৪

মুকুন্দরাম, ৫৩

'মৈমনসিংহ-গীতিকা', ২৭৮

রবীন্দ্রনাথ, ৩১, ৪২, ৭৬, ৮৭-১৪৩, ১৬৯,

১৯১, ১৯৬, ১৯৭, ১৯৮, ২৪৫, ২৪৮-৪৯,

২৫০-৫১, ২৫৬, ২৬৯, ২৮৭ —মর্ত্য-মমতা,

মানব-প্রেম, জীবনরস-রসিকতা ৮৭, ৯০-৯১,

৯৩-৯৪, ১০৪ —মৃত্যুসম্বন্ধে কবি-মনোভাব

৯১-৯২, ৯৫-৯৬ —'মিষ্টিক'-রস ৯২-১০১,

মৃত্যুর সাক্ষাতে রবীন্দ্রনাথ ১০১-১০৫, —

গানের মধ্যেই আত্মপ্রকাশ, ও রবীন্দ্র কাব্যের

সাহিত্য-বিভান

- মুদ্রণ ১৭-২২, ১২৪-২৫, ১২৭,—বৈরাগ্যের
 সুর ১০৪, ১২৭-২৯, ১৩৪-৩৫, —‘ইই
 আর্মি’র তত্ত্ব ১২৮-২৯, —কাব্যের আদর্শ
 ১১৯, ১২০-২২, রবীন্দ্রনাথ ও স্বদেশী
 আন্দোলন ১১৮-২০, ১৩৩, প্রতিভার বহু-
 মুখিতা ও বৈশিষ্ট্য ১২৩, ১২৫-২৭, রবীন্দ্র
 কাব্যের কবি-পুরুষ,—ব্যক্তিবর্গ ও কবিবর্গ,
 ১২৪, ১২৯-৩২, ১৩৩-৩৫, —‘মিষ্টিক’ নহেন
 ১২৭, ১৩০-৩১, রবীন্দ্র সাহিত্যের মূল্য ১৩২,
 রবীন্দ্রনাথ ও বাংলা সাহিত্য ১৩৬, ১৩৭-৩৮,
 ২৫০, রবীন্দ্রনাথের বাঙালীত্ব ১৩২-৩৩,
 ১৩৭-৩৯, ১৪০-৪১, রবীন্দ্র সাহিত্যের
 আনন্দ-বাদ ২৪৭, রবীন্দ্র কাব্যের সর্বশ্রেষ্ঠ
 বাণী ৯৯-১০১, রবীন্দ্রনাথের কাব্য, ভাষা ও
 কবিতার ছন্দ—২২৫-২৬,—তাঁহার কবিতার
 ছন্দোবন্ধন ১০১-১১০, গজের কাব্য-ভঙ্গি
 ১০৯, —তাঁহার গজ-কবিতা ১১২-১৬,
- রবীন্দ্র মৈত্র, ১৬৫-৭৭, —ব্যক্তি চরিত্র ও
 শিল্পী-মন, ১৬৫-৬৭, —কর্ণজীবন ও সাহিত্য-
 সাধনা ১৬৬, ১৭১-৭২, ১৭৩-৭৪, ১৭৫,
 ‘মানময়ী গাল্’স্ স্কুল’ ও ‘হৃতকুস্ত’ ১৭২-৭৩,
 ১৭৫-৭৬
- ‘রাজকাহিনী’, ১১০-১২
- রামপদ মুখোপাধ্যায়, ২৮৪-৮৫
- রামমোহন, ৬৭, ১৩৭, ১৪০
- রামেন্দ্রসুন্দর, ৩০, ৪২
- ‘রিদমিক প্রোজ’ (‘rhythmic prose’)
 গজচ্ছন্দ, ১০৬, ১১২, ১১৩, ১১৫, ১১৬, ১৭৮
- রোমান্টিক, ৫৬, ৮০, ৮১
- রোমান্স, ১৭, ৭৮, ৮৫, ২৭৯
- ‘লিপিকা’, ১১০
- ‘লীলাবতী’, ২১৩
- ‘শতনরী’ ১৪৪
- ‘শনিবারের চিঠি’, ১৭২
- শরৎচন্দ্র,—‘শ্রীকান্ত’ ২১৪, ২৫১-৫২
- শরদিন্দু বন্দ্যোপাধ্যায়, ২৭৮, ২৭৯-৮০
- শেক্সপীয়ার, ২০, ৭৬, ৮৪, ১৮৩, ১৯৪,
 ২০০, ২৪৮, ২৬৬-৬৭, ‘লীয়ার’, ‘হ্যামলেট’
 ২৭০
- শেলী (Shelley), ১৫৬, ২৫৫, ২৬৯,—
 ‘প্রোমিথিয়ুস্’ ২৭০,
 ‘শেষের কবিতা’, ২১৭-২৬,—অতি-আধুনিক
 অপসাহিত্য ও রবীন্দ্রনাথের রসকল্পনা ২১৫-
 ১৯,—তাঁহার মূল প্রেরণা ২২০-২২,—
 ‘অমিত রায়’ ও রবীন্দ্র-কবিমানসের
 Complex ২২২-২৪, ‘রডোডেনড্রন-ফ্লোর’
 ২২৪-২৬
- শৈলজানন্দ মুখোপাধ্যায়, ২৭৮, —‘নারীমেধ’
 ‘অতসী’ ২৭৮
- সত্যেন্দ্রনাথ দত্ত, ১৯৩
- ‘সম্বন্ধ’ ২৮৪, ২৮৫
- সরোজকুমার রায়চৌধুরী, ২৭৮,
 ২৮০-৮১, —‘ময়ূরাক্ষী’, ‘গৃহ-কপোতী’,
 ‘সোমনতা’ ২৮০-৮১
- সার ওয়ান্টার স্কট, ৭৭, ৭৮
- সাহিত্যের আসর, ২৫৩, ২৬০-৬২
- সাহিত্যের ইতিহাস, ২৭৫-৭৬
- সাহিত্যের বাস্তব-বাদ (Realism),—
 ও Idealism, ১২-১৩, ১৭, ৮০-৮১, ৮৩,

১৭৯-৮১, ২০৮, ২৪৮-৪৯, ২৫১, ২৬৮, ২৬৯,
২৭০, ২৭৮, ২৮০
সাহিত্যের ব্যবসায়, ২২৭-২২৮, ২৩৩-৩৫, —
ও সাহিত্যিক ২২৮-২৯, ২৩৫-৩৭, ২৪৫,
—ও গণ-মনোরঞ্জন ২২৯-৩১
সাহিত্য-বিচার, ১-২৯, সাহিত্যের সৃষ্টিকর্ম
১, ৪-৫, —ঐ 'রচনা', ও তাহার সংজ্ঞা ১-২,
৪৪-৪৫, —ঐ ভাষা ২-৩, 'রূপ' ও 'ভাব'
৩-৪, (ভাব ও বস্তু ২৬৬), সাহিত্য ও
শিল্পকলা ৪-৫, ৭, ৯, —ঐ 'রূপ' নাট-
লীলাঙ্গক ৬, ৮, —তাহার দায়ক 'মানুষ' ১০,
সাহিত্যের বিষয়, 'জগৎ ও জীবন' ৬, ৭,
৯-১০, ৮১, ৮৩, কবি-চিত্ত ১০-১২, সাহিত্য-
বিচারে 'কায়-কান্তিবাদ' ৯, ২৫, কবিদের
মূল প্রেরণা ১৩-১৭, —'প্রেম' ও রূপ-
পিপাসা ১৬-১৭, —রোমান্স, ১৭- ১৮, ৮৫,
সাহিত্যের নীতি ১৮-১৯, ৮১, সাহিত্যের
'ট্রাজেডি' ১৯-২০, —ঐ হিউমার ১৯, ২১২-
১৫, উৎকৃষ্ট কবি-প্রতিভার লক্ষণ,
'normal' বা 'স্বস্থ' ১১, ২৭৯, শ্রেষ্ঠ
সাহিত্যের রস-প্রমাণ ২০-২১, ২৬-২৮
সাহিত্য বিচারের নানা পদ্ধতি ২২-২৫
সাহিত্য বিচারে ভাষা ও ষ্টাইল ২৭-২৮
সাহিত্যের ভাষা, ২-৩, ২৭-২৮, ৪৪, ৪৫,
৪৯, ১৪১
সাহিত্য ও যুগধর্ম, ২৩৮-৫২, সাহিত্যের
যুগান্তর ২৩৯, ৪১, বর্তমানে ভবিষ্যতের
সৃচনা ২৪২-৪৩, —নূতন প্রেরণা ২৪৩-৪৪,
সাহিত্যের যুগধর্ম ও রবীন্দ্রনাথ ২৪৫-৫১
সাহিত্য সৃষ্টি ও যুগ-প্রভাব, ৬৬-৬৭,
১৬৭, ১৭৪-৭৫, ২৪৩-৪৪

সুইনবার্ণ (Swinburne), ২১৩
সুধী কবি, ২৫৮-৫৯
সুরেন্দ্রনাথ মজুমদার, ১৬৭
'সোণার তরী', ২৪৯
ষ্টাইল-তত্ত্ব, ষ্টাইল, ২৪, ২৫, ২৭, ৪৯,
৭৯-৮০, ২৮৭
হাফেজ, ২৫৪-৫৫
'হাস্ত কৌতুক', ২১০
হাস্তরস ও হিউমার, ২১০-১৬; —ঐ
প্রকার ভেদ ২১০-১১, খাঁটি হিউমার ২১২-
১৫, ২৮১, —রবীন্দ্রনাথ ২১১, —দীনবন্ধু
২১৩, —শরৎচন্দ্র ২১৪, —প্রভাতকুমার
২১৫, —পরশুরাম ২১৫
হোমার (Homer), ২০, ১৯৪
Collins,—, 'Ode to Evening', ১৫২
'Expression', ৪৪
'Form' ও 'Content', ১১১
Good Art ও Great Art, ২৫, ৮২,
৮৫, ২৮৭
James,—Æsop's Fables, ৫৯
Keats,—'St-Agnes' Eve', Isabella',
১৬০-৬১
Lamb,—'Essays of Elia', ২১৩
Mannerism, ২৮
Mark Twain, ২১৩
Middleton Murry,—'Countries
of the Mind', ১৬৪ (ফুট নোট)
Objectivity, ১৫, ২৯২

Personality, ১০-১২, ১২৯, ১৪৫, —	Poetry of Refuge, ২৩৯, ২৭০
Individuality ১০-১২	'Regional', ২৭৮
Paganism, ২৮৯, ২৯০	Subjectivity, ১৫,—'lyrical', আত্ম-
Poetic Reason ২১২, ২১৫	কেন্দ্রিক, ২৮৭
Poetry 'of Interpretation, ২৭৯,	Vers Libre, ১১০
২৭০,	

এই ভুলগুলি সংশোধন করিয়া লইবেন :—

পৃষ্ঠা	পংক্তি	ভুল	শুদ্ধ
৯	২৩	জীবন জীবনের রূপ	জীবন ও জীবনের রূপ
১৬	৪	এই রূপ-পিপাসা	এই রূপ-পিপাসার
২২	২৬	রচনভঙ্গিমা	বচনভঙ্গিমা
২৭	১৬	সৃষ্টি যে	সৃষ্টি যে হয় (পংক্তির শেষে)
৪৯	৫	নিজ স্বরূপ	নিজস্ব রূপ
৫৯	১৩	আরও সাক্ষ্য	আরও একটি সাক্ষ্য
৬১	শেষ পংক্তি	যে ব্যক্তি স্নেহ দয়া	যে ব্যক্তি রাইমণির স্নেহ দয়া
৬৯	২৭	বন্ধিমচন্দ্রের	বন্ধিম-চরিত্রের
৯৫	৭	বিদার-বিধুর	বিদায়-বিধুর
১০৯	১৩	অতল উৎসের	শীতল উৎসের
২২০	১৭	বিক্রপের	বিরূপের
২২০	২৬	'slying vapours'	'flying vapours'

